

الفاخومي

السيرة الذاتية

أحمد فؤاد نجم

مكتبة جزيرة الورد

اسم الكتاب : الفاجومى

السيرة الذاتية

أكتوبر ٢٠٠٩

أحمد فؤاد نجم

إعداد وإخراج : سيد مهدى عنيه

رقم الإيداع : ٢٠٠٩/٢٠٩٥٣

الرسوم إهداء الفنان : جمعة فرحات

حقوق

النشر محفوظة

الطبعة الأولى

٢٠٠٩

مكتبة جزيرة الورد

ميدان حلیم خلف بنك فيصل الرئيسى شارع ٢٦ يوليو من ميدان

الأوبرا

ت : ٢٧٨٧٧٥٧٤ م: ٠١٠٠١٠٤١١٥ / ٠١٠٠٠٤٠٤٦

لعمركم فذلونم

الفاجوحي

السيرة الذاتية الكاملة

الناشر

مكتبة جزيرة الورد

ميدان حليم خلف بنك فيصل الرئيسي

شارع ٢٦ يوليو من ميدان الأوبرا

ت: ٢٧٨٧٧٥٧٤ م: ٠١٠٠١٠٤١١٥ - ٠١٠٠٠٤٠٤٦

٢٠٠٩

أهلاً...

إلى بناتي..

عفاف ونورة وزينب

يكن ما تلاقوش في حياة أبوكو شيء تتعجبوا بيه

لكن أكيد مش حتلاقوا في حياة أبوكو شيء.. تخجلوا منه

هو ده اعتقادي إلى دافعت عنه ودفعت ثمنه بمتتهى الرضا

أبوكم

أحمد فؤاد نجم

المقدمة

الحب الإيجابي

طوال مسيرتنا -الشيخ إمام وانا- قابلنا ناس كثير حبونا وحبناهم.. ومنهم من كانوا بالنسبه لنا زي الدراويش.. وأيضاً منهم من رشّد حبه ليتحول إلى «حب إيجابي» بمعنى النجاس شيء مفيد يخلصنا.. من هؤلاء أخي وصديقي / سيد عنبه اللي حياته عبارته عن تجسيد لمقولة الحب الإيجابي فقد جمع قصائدي اللي لم تنشر في طبقات سابقه وضمها للطبعه الجديده لأعماله الشعريه الكامله الصادره عن مكتبة جزيرة الورد بعد أن أخرجه في شكل جديد -وأيضاً هذا الكتاب- بروح وقلب محب. وقبل كده جمع أغاني الشيخ إمام وتعامل معها بالتكنولوجيا الحديثه حفاظاً عليها للجانين بعدنا، وأهم من كل ده انه بيقوم بدور جهاز إعلام واعى لـ«حدوته إمام- نجم» زي ما بيسمياها هو.

وتحت عنوان الحب الإيجابي يبجي دور رسام الكاريكاتير المبدع / جمعه فرحات الذي أهداني الرسومات العبقرية بهذا الكتاب.

ولما الفنان / حسانين يقوم بإبداع الرسومات لكتاب «حلاوه زمان» حباً في أبو النجوم - على حد تعبيره - مش بالذمه ده يبقى حب إيجابي برضه؟.

عزيزي القارئ بعد أن تقرأ الفاجومي أدعوك أن تحول حبك لأمننا الحبيبه مصر إلى حب إيجابي.. وأنت عارف الباقي وسمعنا سلام عظيمه يا مصر وبلادي بلادي لك حبي وفؤادي.

أحمد فؤاد نجم

أكتوبر ٢٠٠٩

الفاجومي

أمي .. عليها السلام

■ تزوج أبي من أمي وعندها ١٣ سنة وكان مهرها ١٥

جنيه ذهب مجيدي

■ كان لي ١٧ شقيق مات منهم ١١

■ اتهممتني أمي بقتل أختي التوأم في بطنها قبل ما

تتولد

■ مات أبي وما فيش في جيبه غير ٣ جنيه

أهل زمان يقولوا: الحق حبيب الله.
موسى نبي.. عيسى نبي.. محمد نبي.. وكل حى وله نبي..
وكل من له نبي يصلى عليه..
أنا الفاجومي.. فى سوق الرجال؟.. محض مواطن.. لا اسم ولا كسم.. ولا
سعر..
إنما بقى حسب الأوراق الرسميه وختم النسر.. أنا مواطن كامل الأهليه.
الاسم.. أحمد فؤاد نجم.
الوظيفه.. شاعر.
الديانه.. مسلم وموحد بالله.
النوع.. ذكر.
فوق دا ودا باتمتع بجنسية مصر العربيه.
ولا تتعجب يا صديقى.. إنها إرادته الله.
الى شفته ح أقوله.. من طقطق لسلامو عليكو.
عجبك كلامى؟ اشترى.. وأهل زمان يقولوا.. الشارى كسبان والبايع خسران
- ما عجبكش الكلام؟ بين الشارى والبايع يفتح الله.. وربك رازق البعض من
البعض وغانى البعض عن البعض.
الله يرحمك يا امه.. هى الى علمتنى اللماضه دى!
كانت واحده فلاحه.. لا بتكتب ولا بتفك الخط - إنما أجارك الله كانت فى
الكلام مكلمه.. بس مش أى كلام - وكانت لما تبدأ ما تنتهيش زى أبريق
العسل الى ميّل على بزبوزه وهاتك يانز!
ما تعرفش كانت بتجيب ده كله منين؟ إشى حواديت على إشى نوادر على

إشى حكيم وأمثال على إشى مواويل فى شكوى الزمان!

لما كان الهوى يبجى سوا كانت تحطنى فى حجرها وتفضل تزقنى لحد ما
أشبع وأرتوى والإش بقى لما كان الوجد يستحكم ويحرك الشجن والمواجه
وتغنى لى.. آه يا وعدى صوت زى هديل اليمام فى عز حر بؤونه الحجر..
سخن ومفرهد وعرقان ومشروخ لكن جواه خيط حرير ناعم ما تعرفلوش
أول من آخر.. يشدك من شراشيب قلبك ويفضل يطوحك فى الهوا «دوخينى
يا لمونه» وبعد الدوخه ينزلك على كفوف الراحه مستحمى ومغسول
بدموعك.

يا حلوانى

بيع الخلاوه اللى عندك

يا حلوانى

عضيته عضه وبننت

مطرح أستاذنى

خر العسل يا جميل

وشربته بحفاننى

والناس تنقط بفضه

والدهب غالى

وأنا بانقط حببى

بس بوصالى

يا حلوانى.. بيع الخلاوه اللى عندك

أنا بقى يا سيدى كنت أسمع من هنا وهاتك يا نهنه وهاتك يا شنهفه وعياط
لحد ما زورى يوجعنى وعنياً تدغش وخدودى تولع من لسع مية العين اللى
عامله لها على كل خد مجرى:



وحتى لما كنا بنتخانق ودا كان بيحصل يومياً وبدون أسباب جوهرية.. كانت تبدأ
الموشح بلعن سنسفيل جددود اليوم المنيل بستين نيله اللي هو يوم ٢٢ مايو سنه
١٩٢٩.

كان يوم أسود يوم ما جبتك.. كان صباحه أسود من مساء.. الصبح وعلى ريق
النوم يا فتاح بلا مفتاح جاني الخبر اللي هو أسود من قرون الخروب قال إيه؟ أبوك
الله يجحمه مطرح ما راح كان عايز يتجوز على..

والنبي ماني مسامحاه ليوم حاشر عزت ابن مريم القادره الفاجره اللي رمت
عيالها لحمه حمرا وراحت الأنيتة التجوزت حسن أبو مطر البغيلط أبو قلايط اللي
كرشه يبيلع مال النبي ويقول مابي.

الضهر وف قوله الله أكبر زعق غراب البين جاب خبر الحاج متولى الطحش المزين
جوز أختي الحزينه اللي جت يا قلب أمها تفرح ما التقتلهاش مطرح واتهجلت يا
كبدى والحنه لسه فى إديها.

صفار شمس فرقع وابور الجاز فى بطن البت فردوس بنت جارتنا وراحت يا
قلبي شابه تقول للقمر قوم لما أقعد مطرحك.. لكن برضه ماتعظمش على اللي
خالقها وقبل ما يرجعوا من دفتتها جاني الطلق فيك يا مخفى الاسم وبعد حزق
ومزق وهدة حيل نزلت يا مقصوف الرقبه ويا ريتك ما نزلت.. كل عيال المسلمين
بتنزل بدماعها إلا انت اللي تنضرب فى كمينك.. نازل برجليك لما كنت حتموتنى..
وبقت ستك سعده الدايه تخبط كف على كف وتقول آدى صحيح الزمن اللي وصى
عليه حسان اليماني وشالونى ع الاستباليه هيللا بيلا وأنا بين الموت والحيا.. لكن ريك
خلق الطب والدوا وخلص روح من روح.. وهناك نزلوا المرحومة.. فلفة القمر آدى
الشعر وآدى الوش وآدى شرطه العين.. سمينها فاطنه وهى فاطنه.. أثارها نازله يا
قلب أمها ميتة وتلايك أنت اللي قتلتها يا مجرم يا ابن المجرم».

يبقى حسب رواية الست الوالده وبغض النظر عن مجموعة الكوارث اللي

اتجمعت لاستقبالى نزل محسوبكم متهم بارتكاب جناية قتل وكمان مش مكفينى..
لأ.. نازل برجلياً.. يعنى نازل ماشى!

وأهو من يومها.. وأنا ماشى.. بلاد الله.. خلق الله.. اتفرج ع الناس والناس تتفرج
على.. حاطط همى فى قلبى وكاتم الدم ع القبيح لحد ما جرى ما جرى.. وصلوا
على خير الورى.



أمى جابت تلتاشر بطن.. منهم أربعة مجوز.. يبقى المجموع فى عين العدو
سبعتاشر مواطن بالتمام والكمال.

أنا كنت عضو فى الفجوز الرابع والأخير من مسلسل حشو وتفريغ أحشاء المواطنه
المصريه هانم مرسى نجم أمى عليها السلام.



السبعتاشر مواطن اللى أنجبتهم السيده الوالده بالاشتراك مع السيد الوالد
صفصفوا على خمسه زائد واحد فى عداد المفقودين اللى هو.. على.. والباقى اتكل
على الله وعشان كده كانت المرحومه بتسمينا «فضلة الموت» وكانت فخوره بينا
جداً.. لأسباب لم تتضح بعد.. كانت تتجعص فى مجالس النسوان وتقول بالفم
المليان.. أنا أم الرجاله يا بت.. تقولها بالأطه ولا الأميره فوزيه مرات ملك إيران اللى
كنا بنغنى لهم زمان واحنا عيال:

حسن يا عمر

قوم ارفع العلم

الملكه فوزيه

والملك إيران

داخلين الجمعيه

يحفظوا القرآن

أُمى تبقى بنت عم أبويا محمد أفندى عزت ضابط البوليس الحليوه المعجبانى
البرمجى اللى مقطع السمكه وديلها وملهلب قلوب النسوان ومسهر العذارى فى
المضاجع.. خدها وهى بنت تلتاشر سنه.. حسب روايتها.. شافها وهى بتلعب مع
البنات فى الحاره.. سأل:

- مين البنت البيضه أم شعر أصفر وعيون فيروزي دى؟

قالوا له:

- دى هانم بنت عمك.

قال لهم:

- عمى مين؟

قالوا له:

- عمك الحاج مرسى.

صاحبنا ما كدبش خبر.. على بيت عمه وطلبها منه لا إحم ولا دستور ستى آمنه
اللى كانت زى الأرنبة الرومى الرقيقه الجميله ما قدرتش تمسك نفسها ورفعت
صوتها لأول مره فى وش جدى الرهيب:

- البت لسه جاهله يابو عباس.

قال لها:

- الجاهل بكره يكبر يام عباس.

قالت له:

- بس عزت فلاتى وديله نجس يابو عباس.

قال لها:

- إدعى له ربنا يتوب عليه ويهديه يام عباس.

قالت له:

- لأبقى.. ياكلها التمساح ولا ياخذها السفاح.

جدى اعتبر فقره الأخيره من كلام ستى آمنه خروج على النص وأدب الحوار
راح شایل إيده اللى زى المرزبه ورازعها قلم مكومها ع الأرض وراح حاطط رجله
على رقبته زى الزير سالم ما عمل مع الأسد اللى كل حماره.. وزعق بعلو صوته:

- ابن عمها ياخذها من ع الجمل يا بنت المزين.



أجعص عروسه أيامها كان بيندفع فيها خمسه جنيه.. لكن أمى اندفع فيها
خمسناشر جنيه ذهب مجيدى عدداً ونقداً.. وفى ظرف أسبوع كانوا جهزوها
وشوروها وعلى بيت العدل دوروها.

وهى بتركب التختروان حضنتها ستى آمنه وقالت لها من بين دموعها اللى نازله
تسح:

- كان بدرى عليك يا قلب أمك يا بنتى.. منه لله أبوكى اللى باعك بيعه جزارى.

شخطت أمى زنوبه اللى هى خالتى الكبيره فى ستى آمنه:

- يامه حرام عليكى ما تفسريش فى وشها.

وطبطبت على أمى وقالت لها:

- يغلبك بالمال وتغلبيه بالعيال ياختى.

وودت وشها الناحيه الثانيه وانفجرت بالعياط.



الوداع يا عزية أبو نجم.. اختلطت الزغاريت بالدموع وتحرك الركب الميمون

بالعروسة الطفله هانم أم مرسى وعلى مصر أم الدنيا عشان تعمرو وتتمرو وتعيش مع جوزها فى التبات والنبات وتخلف له صبيان وبنات.

بعض الناس الطيبين وأولهم ستى آمنه طبعاً كانوا حاطين إديهم على قلوبهم وخافين ع البت المفعوصه من وحش الغلا الكاسر محمد أفندى عزت الشهير فى عالم النساء بالزناتى خليفه.. وتلاقيه هو كمان كان بيتهيلآه إنها حتبقي حمل على كتافه.. بت بقى فلاحه عبيطه لا راحت ولا جت ومحتاجه الرعايه والتغذيه زى أى جاموسه فى زريبه جده الشيخ نجم الكبير المؤسس الأول لعيله أبو نجم الشهيره.

ما لحقش الزمان يروح ولا ييجى وف ظرف سنه كانت البت الفلاحه المفعوصه بقت الست أم على عمده نسوان شارع سيدى المعاليفى بشبرا البلد.. على سن ورمح.. واتحول كازانوف الجبار اللى هو السيد الوالد إلى زوج مطيع.. جداً يفكر ك بالخروف الصومالى المستورد.. عديم القرن والليه.

أولاً: بطل السنكحه ع القهاوى لأنها اتعلمت له سرّاً كل ألعاب التسليه من كوتشينه بجميع أنواعها لضومنه عربى وأمريكانى لطاوله وفاجتته بمستوى محترفين وكانت بتتعد كل ليله تغلبه على كل لون يا بطيسطا بعد ما يسرق ويحيص ويزوزغ واحنا بتتفرج على غلبه وحركاته ولعبه اللى مش نضيف ونضحك فى سرنا.

ثانياً: بطل الصرمحه وهجر مجالس الأنس وإخوان الحجر لأنها عملت له عده بيتى وكانت بتجالسه وتجانسه ولأن - الكيف مناقله - كانت بتشاركه صَدَ رَدَ لغايه ما توصله لمرحله الانسجام التام وهذا هو المراد من رب العباد.

قُصِر الكلام.. مسكت فى رقبته زى الأوبه الإنجليزى وفضلت تحبل له وتولد له.. وتولد له وتحبل له.. لحد ما شنكلته بالعيال.

بس الأكاده حطت كتفها فى كتفه وزاملته بشرف وجدعنه واتغربت معاه فى كل بلد راحها ورا أكل عيشه.. من مصر لاسكندريه ومن إسكندريه لطنطا للسويس بلد الغريب وم السويس لبنها العسل ومن بنها ينهى قطر الغربه رحلته بينا فى محطة الوصول الأخيره.. الزقازيق عاصمة الشرقيه «بلدى».

كان المرحوم أبويا سايب سلك البوليس - واتعين في وزاره الماليه ولما وصلنا الزقازيق - استلم عمله «رئيس خزينة المحكمه الكليه بالزقازيق».

بلدنا عزبه أبو نجم تبعد عن الزقازيق ٢٤ كيلو متراً ويمكن ده هو اللي شجع أبويا بيني لنا في العزبه ويمكن تكون كتافه تعبت م الشيله فقال في عقل باله:
- ما تريخ يا واد حبتين من همّ المرا والعيال ووجع القلب.

القصد قعدنا في بيت العزبه وقعد هو لوحده في بيت الزقازيق، وكان بيشرقنا بزياراته المفرحه كل يوم خميس بعد الظهر ويقضى معانا الجمعه ويصبح السبت يسافر على شغله.

أنا في الأيام دي كان عمرى حوالى خمس سنوات... يعنى شفت أبويا كويس.. كان راجل جميل... زى عود الزان.. .. وكان نضيف وشلبى حتى وهو لابس الجلايه السواكيس البيضا.. كان بيقى زى القمر.. وكان أب شديد الحنان وأحياناً شديد القسوه مره كلنى قلم على سهوه دوشني لأنني كنت ماسك عصفوره من رقبته ومعلقها!

كنا بنستنى زيارته زى العيد... كان بيجى محمل بالهدايا الجميله وكان يحطنا كلنا في حضنه ويدي كل واحد هديته والفرح والحنان بينطوا من عنيه.

وكان ليله ما بيجى البيت يتملى ضيوف يتعشوا ويسهرواع البرانده حوالين النار والدخان المغمس والحواديت والقفشات والضحك والانبساط.. وكنت أنا الوحيد بين إخواني اللي مسموح لى أ حضر القعهه وكان أبويا يسلطنى على أى واحد من الضيوف أستم وأشخط وأنف في خلقتة وأبويا يضحك من قلبه وياخذني في حضنه
"مش عارف ليه"

يعنى.. رجعت هانم أم مرسى إلى قواعدها فى عزبه أبو نجم.. البت المقعوصه
الى خرجت امبارح من الحجله على بيت العدل رجعت النهارده حاجه ثانيه.. ما
بقاش اسمها ها نم.. بقت الست أم عبد العزيز بعد ما ضاع منها على البكرى وأول
الفرحه.. ضاع فى السفر والغربه ما عرفتلوش طريق جره.. لكن كان دايماً حاضراً
معانا فى حواديتها عن جماله ونباهته وأحياناً فى غناها الحزين اللى كان بيسحرنى
وبيكىنى.

أنا شفتها فى القتره دى دارت واستدارت وخرط البنات خرطها على ذوقه..
الشعر الأصفر كاسى صدرها وظهرها زى الشال القطيفه ومبروز وشها اللى كان
لونه بمبى من غير دهان والعيون الفروزي اللى تغرق فيها العين ما تيجيش قرارها
والعود الفارح زى ناز الطرفه.. وفوق دا كله كانت زى أبويا نضيفه ومشلبنه - ما
أعرفش أنا طالع نتن لمين؟

والسؤال اللى لسه محيرنى حتى وقتنا هذا:

- مين ابن الشيطان اللى كان شار عليها تركب سنانها فوق وتحت.. دهب؟

أنا بطبعتى ما بحبش الذهب.. ويبدو إنه هو كان بيبادلنى الشعور.. لكن الذهب
اللى كان فى بق المرحومه لما باعته سنه سنه وضرس ضرس أنقذ بعضنا من المرض
وأنا أولهم وأنقذنا جميعاً من عضه الجوع بعد موت أبويا المفاجئ يوم الجمعة ٨
يوليو سنه ١٩٣٥.

التاريخ ده أنا قرите على حيطه قاعة القرن الجوانى بخط عبد العزيز أخويا الجميل
اللى كان مالى حيطان البيت فى شكل حكم ومواعظ وأحياناً أشعار فى الحب
وشكوى الزمان.. مثلاً:

أفديه إن حفظ الهوى أو ضيِّعاً..

ملك الفؤاد فما عسى أن أصنعاً..

من لم يذق ظلم الحبيب.. كظنه..

حُلُوًّا فقد جهل المحبه وادعى..

أو

إن قل مالى فلا خِلْ يصاحبنى

وإن زال مالى فكل الناس خلانى

فكم عدو لأجل المال صاحبنى

وكم صديق بفقد المال عادانى

أو

لو كان الفقر رجلاً لقتلته

أو

القناعه كنز لا يفنى... إلخ

الجمعه ٨ يوليو ١٩٣٥.

يومها كنا قاعدين على مصطبه خالى حسن أبو مهدي.. الرجاله لابسين الهدوم

المزهره والنسوان لسه شعورهم مبلوله من حمام الصبح.

كان موضوع الدردشه هو المقارنه والمفاضله بين مهاره أبويا ومهاره السيد أبو

دقاق شيخ الغفر فى التيشان والرمايه وأخيراً قال خالى حسن أبو مهدي حسماً

للمناقشه:

- سيد أبو دقاق ابن ليل ما يركب شيخ غفر وشطارته إنه بيصيد فى الضلمه لكن

عزت ابن عمى اتعلم التيشان فى المدرسه وشطارته إنه بيصيد فى النور وهو دا الفرق

بين سلاح الحكومه وسلاح الحراميه والمنسر.

وفجأه سمعنا صوات جاى من ناحيه دارنا وضحك خالى حسن وقال:

- دا على أبو سماحه بيضرب بهيه ما هو النهارده الجمعه.

وقال أبو عبد الله ابن عمي «تاجر التموين»:

- برضه خروف يا علي يا بو سماحه.. تضرب ما تضرب برضه خروف. لكن عبد اللطيف أبو مصطفى ما خلصوش كلام أبو عبد الله فسأله:

- طب إنت يا أبو عبد الله تقدر تعمل زيه وتضرب الست نفيسه؟

قال له:

- يا حمار يا بن الحمار ماهو لو نط الليلا دي زبي ماكانش بقى فيه حيل للضرب.

وضحك خالي حسن وقال:

- العوض على الله فى الرجاله يا ولاد.. يظهر إننا دخلنا عصر الرخا.

وفوجئنا بأمرى زنوبه هاجمه علينا بحله مليانه وراحت دالقه نصها فوقى «نيله زرقا» وهى بتولول وتقول:

- أبوك مات يا يتييم.. يا خراب بيتك يا هانم.. يا شماتة العدوين فيكى ياختى.

جرينا كلنا على بيتنا.. فتشت بعينى على أبويا لقيتيه نايم ومتمدد على السرير النحاس وعينه مفتحه مطفيه وشففت أمدى مرميه ع الأرض مغمى عليها وأمدى زنوبه مغرقاها نيله زرقا.. يا سنه سودا يا ولاد.. أبويا مات.

مات محمد أفندى عزت الخليوه المعجبانى البرمجى اللى كان مقطع السمكه وديلها وملهلب قلوب النسوان ومسهر العذارى فى المضاجع.. مات فى عز شبابه يا ولده.. مات وهو متوضى لصلاة الجمعة ودا معناه فى رأى زنوبه إنه ع الجنة حذف لكن أمدى هانم كان لها رأى تانى.. إنه مات ومفيش فى جيبه غير ثلاثة جنيه كانوا هما كل التركه اللى فاتها رئيس خزينه محكمه الزقازيق الكليه لولاده الخمسه القصر وأرملته الشابه الجميله الست أم عبد العزيز.

الست هانم مرسى نجم
والدة الفاجومي



محمد أفندي عزت نجم
والد الفاجومي



الفا جومى

أنا أحقق من الحماقات

■ أمي كانت تقول لي الراجل ما يبلعش لسانه
 ■ كنا في الكتاب طبقات.. فرقة القمح وفرقة الدرر
 ■ وبتوع الشعير اللي كنت بتشرف عمل لواءها
 ■ استطعت أن أفرض احترامي على كلاب العزبه عدا
 كلب واحد.. اسمه كلب كانو
 ■ سيدنا قال إن كلب أهل الكهف اسمه قطمير وهو سيد
 كلاب الأرض

من بين المواهب العديدة اللى حبانى بيها سبحانه وتعالى مشكوراً موهبة الحماقه
ولا فخر.. ويمكن المرحومه أمى ساهمت فى تطوير وتنمية الموهبه دى عندى من باب
الإعجاب.

مثلاً!

أنا فاكرو إحنا عيال لما كان عيل من إخوانى تصدر منه هفوه.. كان يتحاسب
حساب الملكين.. والإش بقى لو فاتته فرض ربنا.. ياداهيه دقى.

- قوم ياكافر يابن الكافر يا تارك الصلا يا قليل الدين ماتكلش معانا. وتحط له
ياكل لوحده زي الكلب.. والكل يبقي شمتان فيه.. وأولهم انا طبعاً.

وأنا يا مبارك لا صلا ولا صوم ولا حيا.. ودابر زى العقربه ألوش فى خلق الله
شمال ويمين.. وأشخط وأسب الدين.. وهى فى الطناش المسوجر.. وأحياناً ما
تقدرش تدارى إعجابها فتضحك بفخر! ولو عيل من إخوانى سأل.. حتى من باب
العلم بالشىء:

- إسمعنى ده؟

تقول له:

- دا عيان ومجنون وعنده داء الدفعه.

ودا صحيح مع الأسف.

أنا رگك بس الهوا يصفر فى ودانى.. آخذ فى وشى زى الجمل لاطرش..
ومطرح ما ترسى أدق لها.. عمرى ما شلت فى قلبى لحد.

- تكفى العايب عيبته.

هى اللى كانت تقول كده.. وكانت تقول لى: الراجل ما ييلعش لسانه.. واللى
إيدك مش فى مقطفه عفريت يلهفه.. واللى إيدك مش فى قفصه ضربه تقطع نفسه..

واللى عينه مش مكسوره يقدر يقول عينك حمرا يا غوله.. إلى آخر تراث الحمقى
اللى أعتقد أن السيد المسيح عليه السلام سماهم ملح الأرض.. عمرى ما حسبت
حساب بكره.. الله جاب الله خد الله عليه العوض.. الله يرحمك يا حاج عبده يا
دمرداش.

شيبتنى يا زمن
وأنا ما استحق الشيب
وخذت منى الحبايب
ولا اختشيت العيب
حوشوا الغنم
عن عليق الجمل
أحسن دا بيقى عيب
لو كان جمل فى جمل
ماكانش بقى عيب
وأجود ما فى الفتى
جيبه
وإن لطش الزهر
الفقر ماهوش عيب

والحاج عبده ده كان فنان شعبى مالوش حل.. كان جاهل بالقرايه والكتابه زى
المرحومه أمى.. لكن مواويله اللى كان بيرتلها أو بيألفها على مهله أو حتى اللى كان
بيختارها ويغنيها تشهد له بأصالة الموهبه وسلامه الذوق.. مثلاً:

يا جنه الملتقى

مين فات سأل عنا

ومين عطف بعدنا

ع الورد يا جنه

داللى نساكى اتنسى

واللى جنى اتهنى

وأنا اللى طبعى الوفا

ما أقدرش أنساكى

ياريت تعود الليالى

وننسى ما جرى منا

كان قهوجى كل علاقته بالمزيكه إنه سمع شاعر الربابه وبعدين مكنة الفناار وبعدين الراديو ومع ذلك كانوا الملحنين الأفذاذ على زمانه أمثال الشيخ درويش الحريرى والشيخ زكريا أحمد والشيخ إسماعيل سكر والصييته العظام أمثال الشيخ على محمود والشيخ محمد رفعت والست فتحية أحمد والشيخ أحمد ندا وغيرهم دول كانوا زباين قهوته ليلاتى ولما كان يبقى سهران فى فرح يروحوا له بربطة المعلم ويسهروا صباحى مع الهنك والرنك والعُرب والعفقات الحراقه وكل فنون الطرب والأداء المعجز الساحر من فنان أصيل متمكن ما جاتش سيرته «لحسن الحظ» على سن قلم هلفوت من هلافيت الصحافه والأدب والإذاعه والتليفزيون.. الشيخ إمام مره قال لى عنه:

- الحاج عبده ده يابو النجوم مشكل.

فقلت له:

- ليه يا إمام؟

قال لى:

- فطاحل شعراء البلد يبعده واحد منهم وعتاوله الطرب والمزيكه فى البلد يبعده واحد منهم وهو سبحان الله ماكانش عارف قيمة نفسه.

قلت له:

- وإنت إيه رأيك فيه؟

قال لى:

- ما أنا باقول أهه.. هو أنا باتكلم رومى؟!

ونوادر الحاج عبده الدمرداش ماتقلش حلاوه عن فنه.. مثلاً..

هو كان زى حالانى ضعيف جداً أمام سحر بنات أمانا حوا رضى الله عنها وأرضاها ويبدو أنه كان مستقلب المزاج يعنى متعدد العلاقات.. برضه زى حالانى.. وفي ليله من ذات الليالي كان سهران في فرح.. وكان الشادر اللي حىغنى فيه منصوب تحت شباك الدنيا ره اللي كان هو لسه دالقهها من أسبوعين.. صاحبتنا خدت خبر التحففت واتزوقت على سنجة عشره ولبست قميص مقور ماركه «عش النمل» اللي هو عدم المؤاخذه لا يبين ولا يخبى وقعدت ع الشباك، ونزكت ابنها الصغير يلعب قدام الشادر عشان تشغله سلك تليفون توصل من خلاله الرساله للحاج عبده.. وهو دا بقى فن التلقيح اللي أبدعته وأبدعت فيه بنت البلد المصريه اللي حيرت عمنا بيرم العظيم ونزلته من بروج الأدب وفرجت عليه اللي يسوى واللى ما يسواش.

لسه الحاج عبده حيقول يا هادى.. زعقت صاحبتنا على ابنها والكلام ليكى يا جاره:

- ما تطلع بقى ياواد وكفايه سنكحه.. هو إنت لسه فيك نفس يامدهول؟.. اطلع دا إنت سلمت النمر.. وانهد حيلك.. ونفسك انقطع خلاص.

الحاج عبده طنش واستمر في المغنى والسميعة تقول آه.. إن صاحبتنا تسكت؟
أبدًا.. وفوجئ الناس بالحاج عبده يبيص ع الشباك ويرتجل الموال التالي:

يا نمل نام لى

وسلم لى على نملى

واكثر سلامى

ع اللى لابس

قميص حرير نملى

طلبت منه الوصال

قام بالعجل

نام لى

يا قلبى فُضِّكْ

من اللى بالعجل بينام

هلبت ما نام لغيرى

قبل ما نام لى

ويقال والله أعلم إن المرا خشت والشباك اتقفل إلى يومنا هذا.



يرجع مرجوعنا وموضوعنا للحماقة اللى ملازمانى ومسببه لى المشاكل ووجع
القلب أنا كنت فى حدود أربعناشر سنه يعنى زى ما يقولوا الشعرا.. فى مطلع الصبا
- وفجأه وقعت قتيل المحبه متيم فى هوى السنيوره المدهشه إكرام بنت عمى سليم
شيخ البلد وابن عم أبويا.. وربنا يجازى اللى كان السبب. ولاد الكلب اسثلمونى
ونزلوا زن على ودانى.. وَدِ وَدِ وَدِ وَدِ وَدِ.. أمها تقول وأمى ترد عليها:

- إكرام وفؤاد موهوبين لبعض.

- يا مرحبا ياختى هى حنلاقي عريس أحسن منه؟

- ولا إحنا ياختى حنلاقي عروسه أحسن منها.. ربنا ياختى يكملها بعقلها.

- وشوفى تضاريف ربنا.. لتنين يتولدوا سوا فى يوم واحد.

- النصيب غلاب ياختى.. النصيب.

إدينى عقلك بقى.. قالوا يا جحا حتعيا بالسخونه.. قال لهم: فاضى ورايق لها..
وكان بينافسنى فى هوى إكرام سعيد ابن عمى عثمان.. اللى هو برضه شيخ بلد وابن
عم أبويا يعنى كلنا على بعض كده كان زيتنا فى دقيقنا.

وطبعاً كان كل واحد فينا عنده أسبابه فى هوى المحبويه وله أسلحته فى المنافسه..
أسبابى أنا كانت كثيره من أهمها مثلاً الجلايب اللى كانت بتلبسها مش السواد
الأصلى الجربان اللى لابساه بقيه بنات العزبه.. وكان شعرها سايح وأسود ومغطى
نصها الفوقانى وأكيد كان خالى الحشرات المستوطنه بكشافه فى شعور بنات
الفلاحين.. وكانت تلميذه فى مدرسة أبو حماد الابتدائيه وكانت بشرطن
بالإنجليزى.. وتلعب طاولة وتغلب أجعصها راجل.. وكانت بتتكلم وتضحك
بصوت غناج.. حاجه كده زى المنجايه اللى من غير بذر يعنى بالصلاع النبى كده
كانت نتايه تهيج الحجر.. وأنا مش حجر.. دى بعض الأسباب.. أما أسباب أخونا
سعيد فمكانش يعلمها غير اتنين.. هو وعلام الغيوب.. نيجى بقى لأسلحته نلاقيها
كثير.. أبوه عايش وشيخ بلد وعليه طين.. كانت أملاك أبوه تتعب فيها العين ما
تحببش آخرها.. علاوه على كده كان تلميذ فى أبو حماد الابتدائيه ومستقبله مضمون
زى الجنيه الذهب، أما العبد الفقير فكان سلاحى الوحيد إن إكرام بتحببنى.. كانت
دائماً تقول لى:

- إنت عفريت.. وانا بحب العفاريت.

غير كده.. الفاتحه للنبي أنا كان باطى والنجم لا أب ولا طين ولا مدرسه ولا

مستقبل ولا يحزنون.. مع إننا ولاد عم.. ماتعرفش قسموها إزاي.. ومين اللي قسمها كده؟ ولما رحت أسأل الشيخ أبو عطيه باعتباره إمام المسجد وشيخ الكتاب ومندوب ربنا في أرضه قعد يبص لي بدهشه من فوق لتحت ومن تحت لفوق والآخر تف ع الأرض في اتجاهي وقال لي:

- إنت فيك بذره شيطانيه والعياذ بالله.

وزي عوايده حب يدعم فتواه بالشعر فراح واخذ وضع الاستعداد وتف ونخم واتنحج ثم أنشد يقول - صلوا على طه الرسول:

ملك الملوك إذا وهب

لا تسألن عن السبب

الله يعطى من يشأ

فقف على حد الأدب

يا كافر يابن الكافر

قلت له بمتهى البراءة:

- استغفر الله العظيم ياسيدنا أنا مسلم وموحد بالله.. إنت بس اللي مش واخذ بالك أمي يتقول إن عمامي ولاد الكلب أكالين السحت هما اللي كلونا ونهبونا على حياه عين أبويا وبعد أبويا ما مات طالعين على أمي زى الديابه عايزين ياكلوا لحمها حي.

قال لي:

- أمك دي مره مهر وشه والحشيش لحس مخها.

قلت له برضه بمتهى البراءة:

- يظهر إن كلامك صحيح يا سيدنا.

ابتسم لأول مره وقال لي:

- ليه يا ولّيه؟

قلت له:

- دنا باقول لها ماتزعلش يامه وانا ح أخلى سيدنا يفضحهم ع المنبر فى صلاه الجمعة قعدت الأول تضحك وبعدين فقعت بالصوت فى وشى وقالت لى:

- جاك شهر حزن وشهرين نيله عليك وعلى سيدنا بتاعك وقالت عليك يا سيدنا إنك راجل بكرش وبتاكل على طبلية وإنك بتفتى ع النمله و تبلع الجمل... وإنك مش حتعرض على جنة ولا حتندفن فى طرب مسلمين لأنك راجل ابن كلب ضلالى وشبيه عرعر وذمتك يرمح فيها الخيال.

ولسه ح اكمل راح صارخ فى وشى:

- بس كفايه يابن الزوانى.. إنت مين مسلطك على النهارده؟

ودخل الميضة جاب شومه وفضل يجرى ورايا فى الغيطان لما انقطع نفسه ولما يأس من إنه يلحقنى قعد على قرافيصه فى حوض الباميه وقال وهو بينهج:

- حسى الله ونعم الوكيل فيكو يا عيله نجم م الباب للمحراب.. اسفخص عليكو عليه نجسه.



نرجع للحب الأول وحماقاته.

كانت عصره جميله من عصارى الربيع اللى كان بيلبس أحلى وأغلى الملابس لما ينزل كل سنه فى ميعاده على عزبة أبو نجم الغرقانه فى الخضره والميه طول السنه... كنا قاعدين فى ملفف نسيم العصارى على كوبرى ترعة الملاك ثلاثه وربنا رابعنا حبيب القلب إكرام والعدول سعيد ابن عمى وأعوذ بالله من قوله أنا... مش فاكركنا بتكلم ولا ساكتين وفجأه قالت المحبوه بمتهى الدلال:

- غنى يافؤاد... أنا با حب صوتك.

يا نهاري زى بعضه... طب حظ نفسك مطرحى... تعمل إيه؟

أنا فى هذه الأثناء كنت يومياً أسمع أغاني فيلم يحيا الحب من راديو عمى سليم أبو بطارية سايله.. كان فيه ثلاثه فى البلد.. واحد فى سرايه العمده وواحد فى دكان أبو عبد الله بقال التموين.. والثالث اللي هو فى دار أبويا سليم.. الراديو ده كان فيه شبه كبير من دولاب الشعريه اللي بينزل البلد كل رمضان.. وكانت البطاريه بتاعته أكبر من بطاريه العربيه ومليانه ميه نار وكانت لما بتفضى نروح غملاها من مكنة الطحين؟ بالعباسه ويعلم الله إنى لغايه وقتنا هذا مش قادر أفهم إيه علاقة مكنة الطحين ببطارية الراديو ومية النار؟

وكان فيلم يحيا الحب بطولة مطرب الملوك والأمراء الأستاذ محمد عبد الوهاب اللي كانت الجماهير بترشحه لرتبه البكويه أسوه بجورج بك أبيض وسليمان بك نجيب.. لكن الملك ماكانش راضى ينعم عليه بالرتبه.. لأنه «حسب كلام عبد العزيز أخويا» كان بينافسه فى النسوان.

وكانت البطولة للآنسه ليلى مراد اللي اعتبرها عبد العزيز أخويا أكبر اكتشاف فنى وأجمل صوت نسائي بعد الآنسه أم كلثوم واللى بعد كده قدرت تدخل للقلوب بصوتها الدافى الساحر وأغانيها اللي أصبحت لسان حال العشاق من الجنسين حتى فى العزب والنجوع لأنى بعد كده كنت باسمع أغانيها بصوت أمى الجميل!

ولما كان عبد العزيز أخويا يبعتنى بجوابات الغرام لفوزيه بنت عمى كنت بافتحها فى السكه واقراها.. فكنت دائماً ألاقى كلام من أغاني الآنسه ليلى مراد بين السطور.

القصد.. نرجع لكوبرى الملاك.

هى قالت لى:

- غنى يا فؤاد أنا باحب صوتك..

وأنا طلعت زى البندقيها خرطوش:

يادى النعيم اللي إنت فيه يا قلبى

من بعد العذاب

كان لك حبيب تشتاق إليه

وارتد لك بعد الغياب

أنا أغنى وهى تقول:

- الله.. تانى والنبي يا حماده عشان خاطرى.

أعيد تانى.. لخد ما وصلنا للجو راق وارتاح البال.. العزول ماطاقش روحه..
راح قايم رامى نفسه فى الترعه بهدومه.. وبدأ يغطس ويقب ويقلل.. وأنا فرحان
وحاسس بالزهو.. وفوجئت بإكرام بتصرخ:

- إلحق يا فؤاد.. سعيد بيغرق.

أنا بقى يا سيدى اللى ما انت فى هذه الفتره كان حصل لى شرف دخول سيما
أبولون فى الزقازيق حوالى سبع تمن مرات.. ويشاء السميع العليم إننى كل ما أدخل
السيما ألاقى طرزان.. كان جدع طول بعرض ولابس مايوه جلد ثمر وساحب وراه
قرد اسمه شيتا وطايح فى الغابه.. يزق الزعقه «عا عا عا» يزلزل حيطان السيما
ويسيب مفاصل الجمهور.

وأجدع حاجه كانت بتعجبني فى عمنا طرزان.. كان يقف ع الشجره ويزعق «عا
عا عا» ويروح ناطط.. سمكه.. فى الميه ويغيب تحت الميه وبعدين يقب تمساح
ويفضل يعوم والقرد وراه.. والتماسيح تشوفه تخلع.. وكل تمساح يستخبي فى زؤر
والعيال تسقف وتصفر فى الترسو تضامناً مع الشجيع ضد التماسيح.

بس يا سيد.. هى قالت لى:

- إلحق يا فؤاد.. سعيد بيغرق.

وأنا فى لمح البصر كنت مالخ الجلايه السحو وعامل إديا على بقى قرطاس وعا
عا عا ورحت قازح من فوق درابزين الكوبرى.. أولاً آخذ بنط على غريمى أمام

المحبويه.. وثانيًا أنقذ غريمي من الغرق في مبادره رومانسيه تسجل اسمي بحروف من النور في كتاب العشاق الفرسان.

وإذ بي يا مبارك وانا بين درابزين الكوبرى وصفحه النهر أذكر إنى ما باعرفش أعوم.. وصرخت من معاميعي:
آه.. يا لهوى يامه.

وانقطعت أخبارى تحت الماء على رأى عبد الحليم.. لحد ما فقت على المنقذ الشهم اللي هو الغفير النظامى إبراهيم الطيب معلقنى من رجليا زى الديقحه وبينطقنى بغباوه.. الاسم بيصفينى من الميه.. لكن الحقيقه هو كان بيصفى حسابه معايا لأنى من يومين بس.. كنت ماسك محمد ابنه ومطفحه الدم واحنا بنلعب الحكشه والدليل على سوء نيه المنقذ إنه طلع سعيد ابن عمى الأول وصفاه بحنيه واندار على علقنى وهاتك ياتنطبق وكل تنطبق بخزرانه على ضهرى.. وابن الحرام لما حس إن أمى جايه من بعيد تصوت وتولول زاد فى الضرب وهو يقول:

- هيه أمك الغلبانه ناقصه حزن - طاخ - تحرم ياد تنزل الميه - طيخ - أشوفك فى الترعه تانى ح اهرى بدنك - طوخ.

وبنت الكلب حبيبه القلب ميته من الضحك.. وهو دا اللي وجعنى أشد من لسع الخرزان على رأى عتر بن شداد رحمه الله عليه.

حماقه تانيه كان ممكن بسببها أروح فى الكازوزه وابقى مفيش.. لكن بقى على رأى أمى.. عمر الشقى بقى.. ولا يقعد ع المداود إلا شر البقر.. تقصدنى طبعًا.

الشيخ أبو عيطه شيخ الكتاب الآنف ذكره.. كان راجل جهول وغليظ وربنا ماحطش فى قلبه أى نوع من أنواع الرحمه.. طول ما احنا قاعدين فى الكتاب نازل فينا ضرب عمال على بطل وكأنا قتلنا لأمه قتيل.. وولاد الكلب أهالينا هما اللي شجعوه ع الخصله السودا دى.. يعنى مثلاً تلاقى راجل قد الفلق جاى وساحب عيل عنيه معصين وبربوره مدلدل ووشه أصفر ومكرش م البلهارسيا وضلوعه تنفذ من تحت الجلايه الوسخه اللي لابسها وحافى وحالق إنجليزى ويقول له الواد ابنى ايه

ياسيدنا عايز يختم المصحف فى سنتين.. وعنى أنا أبوه بأقول لك.. إكسر وأنا أداوى
«شوف الحياه».

ولو عيل مننا استجرا واشتكى لأهله يقولوا له:

- يا بختك ياهناك.. دى عصايه الفقى من الجنه.

ومن علمنى حرفاً صرت له عبداً وإلى آخر الكلام اللي مش جايب همه ده.

وكانت أجره سيدنا بتتدفع له ع المحصول.. الغنى يديله ع الراس كيله قمح
والمستور كيله دره والفقير الكحيتى كيله شعير.

وكان ابن الزنا مقسم قعدتنا فى الكتاب.. تقسيم فتوى.. بتوع القمح دول أهل
اليمين يقعدوا ع اليمين وبتوع الدره دول بتوع وجعلناكم أمهً وسطا.. دول يقعدوا
فى النص وبتوع الشعير دول أهل الشمال والعياذ بالله يقعدوا ع الشمال وكانت
فرقه القمح هى - جلاب الطيب - بالنسبه لسيدنا.. كل يوم الصبح يجيبوا له مالذ
وطاب من البيض والزبد والجبنه والفطير المشلتت والقشطه وعسل النحل..
وخلافه.. هو كمان كان عامل بالمثل الساير.. إطعم الفم تستحى العين.. كان
بيحترمهم بشكل دنيء.. كان يقول للعيل فيهم واحنا مروحين:

- مع ألف سلامه ياسى فلان.. بلغ احترامى للسيد الوالد والست الوالده..
وماتنساش تقول للحاجه.. تحضر لنا فضله خيرها بكره.. أنا جاي اقرا الراتب إن
شاء تعالى.. مع ألف مليون سلامه.

وفرقه الدره كانوا ينضربوا أحياناً بس إيه؟.. ضرب الغزبه فى حمارها.. ودا كان
بيحصل فى حاله الغلط الشديد أو الإصرار على عدم الحفظ.

أما فرقه الشعير اللي كنت باتشرف بحمل لواءها الخفاق فدى كانت الهدف
الدائم والسهل والمباشر لشومه سيدنا ولسانه الى زى المبرد.

كان عنده كنز لايفنى من أسماء التدليل اللي كان بيخصنا بيها:

- يا ولاد الكلب يا جاموس أبيض.. يابقر ويا ولاد البقر.. يا خنازير يا ولاد الخنازير.. يا بهائم ربنا يا ولاد البهائم.. يا حثالة الحثالة يارمم.. يا زواني يا ولاد الزواني.. وكان دا كله يهون جنب شطحات الجنون اللي كانت بتلبس جتته فجأه فيقلب لنا الكتاب دندره وسبحان المنجي.

يعنى مثلاً كنا نبقي قاعدين في أمان الله وينحفظ في كلام ربنا العزيز ونفاجأ بالشومه نازله على دماغ أو وش أو دراع أقرب عيل من فرقه الشعير مكوماه مطرحة!

وبعدين نكتشف إن ده مجرد هزار وسيدنا بيضحك ويقول للضحيه:

- أمك قالت لأبوك إيه ليله الجمعة يا واد.. آه يابن المرا اللي مابتقولش لأ.

ويروح راقعه شومه تانيه وهو متكوم - على سبيل المداعبه - ويروح ضاحك وباصص لنا - وتضحك فرقه القمح وفرقه الدرر وبعض فرقه الشعير فينشكح سيدنا ويتهيأله إنه كده يبقى دم أمه خفيف!

ويا ويل العيل اللي يظبطه سيدنا متلبس بعدم الضحك.

وكان معنا في الشعير عيل اسمه محمود عرفه.. الواد كان ماسكه مرض أبو النوم.. كان بيتنام وهو قاعد ويناام وهو واقف ويناام وهو ماشى.. ودا كان بيشيل تلتين هزار سيدنا لوحده.. وبرضه يرجع ينام.. وفي ذات مره جت لسيدنا الطوفه أثناء ما عرفه كان نايم.. فوجئنا بسيدنا فازز متور على حيله وقال بدون مناسبه وبصوت منغم:

كلا الأخوين مظراط ولكن شهاب الدين أظرط من أخيه

وأثناء ما كان سيدنا بيتمايل وهو بينشد لمح عرفه نايم فاتجه ناحيته وزغده بالشومه في رأس قلبه:

- فاهم ياعرفه؟

وقام عرفه مفزوع وقال له:

- نعم يا سيدنا؟

قال له:

- شهاب الدين؟

قال له:

- ماله ياسيدنا؟

وكرز سيدنا على أسنانه وقال له:

- أظرت من مين ياعرفه؟

قال له:

- مش واخذ بالي يا سيدنا.

ونزلت الشومه على ظهر المسكين زى المرزبه وسيدنا بيقول له:

- من أخيه يابن الكلب يا بقره.

وقفز عرفه فى الهوا من ألم الضربه وهو يصرخ:

- من أخيه يابن الكلب يا بقره.

وضج الكتاب بالضحك القمح والدره والشعير ماعدا سيدنا اللى اعتبر إن عرفه

بيقصده بجمله يابن الكلب يا بقره وفضل يضرب فيه لحد مانام.

شوفوا خفة الظل!

نيجى بقى لموضوعى.

كان يوم مايتنشيش.. يوم أغبر ما طلعتلوش شمس.

قاعدين فى الكتاب منهمكين فى الحفظ وإذ بالطوفه تيجى لسيدنا فيروح منتور

على قزحه ويسألنا بدون أى مناسبة:

- فيه خمس أشياء حينخسوا الجنة عارفينهم يا ولاد الكلب يا بقر؟

- لا يا سيدنا.

فابتسم ابتسامه النصر.. وبدأ يتكلم بلهجه العالمين ببواطن الأمور وقال:

- غراب سيدنا قابيل.. وناقه سيدنا صالح.. وحيوت سيدنا يونس وعصايه سيدنا موسى.. وكلب أهل الكهف.

أنا اللي علق فى دماغى كلب أهل الكهف من وسط الهلمه دى.. ليه بقى؟

أنا فى هذه الأثناء كان بينى وبين كلاب البلد حرب ضروس ومشاكل مالهاش أى حل.. حرب أنا مابدأتهاش.. ويعلم الله أنى كنت متلهف على وضع حد ونهايه لها.. لكن الأمور كانت كل يوم تسير من سئ إلى أسوأ بحيث انضربت كل فرص السلام بينى وبين كلاب البلد.

يعنى مثلاً لو سيادتك ماشى فى أى وقت من أوقات الليل والنهار فى عزبة أبو نجم وسمعت كلب يبعوى أو يصرخ مستجير.. حتلاقينى هناك.. غفل له شويه أو سهى عليه وهو ماشى أو ركن جنب حيطه وحط دماغه بين رجليله وخدله تعسيله أروح منقض عليه أسرع من لمح البصر لايشه حجر أو عصايه أو شلوت يصرخ ويحط ديله بين وراكه ورجليه ماتعلمش ع الأرض - بس وهو بيجرى يتلفت يلمحنى - وكرد فعل طبيعى وعادل كنت دائماً وأنا ماشى بالليل فى الضلمه أفاجأ بجسم غريب بينظ فى كرشى ع الساكت بيعترنى طبعاً.. وقبل ما ألم نفسى يكون اختفى من غير ما أتأكد من شخصيته.

ولو سعادتك مثلاً فى الليالى اللي مافيهاش قمر سمعت مجموعة كلاب بتنبح بضراوه وبلهجة انتقام يبقى دا معناه إن أخوك محاصر فى حته مافيهاش طوب وموقفه حساس.. إلى أن يأتى الله بالفرج فى هيئه شخص معاه عصايه يهشهم عنى بس بعد ما تكون صواميل ركبى سابت من بعضها ومنظرى بقى لا يسر عدو ولا

حبيب وعشان كده كنت بالنهار باخد العاقل بالباطل .. وبكده قدرت أفرض
احترامى على كلاب العزبه كلب كلب اللهم إلا كلب واحد.. اسمه كلب كارنو.

وكانو دا كان واحد من مئات الأوروبيين اللي كانوا مستوطنين الريف المصرى
قبل وأثناء وبعد الحرب العالميه الثانيه بعضهم كان فاتح خمارات وبعضهم كان فاتح
محلات بقاله وبعضهم كان عامل مكن طحين أو مكن رى وكان أقربهم لقلوب
الفلاحين المصريين اليونانيين بالذات.. وكان كل الخواجات دول ساكنين فى سرايات
على النظام الأوروبى.. صحيح مبنيه بإدين الفلاحين المصريين.. لكن الهندسه كانت
أوروبيه.

كانت كل السرايات نظام واحد.. اللون الأبيض.. والجنيهه اللي محاطه السرايه
وفيه من خيرات الله ما لذ وطاب.

أنا شفت سرايه الخواجه كارنو صاحب الكلب المذكور وشفت سرايه الخواجه
مرشاق اليهودى الشامى اللي كان ابنه فريد بيه صديق شخصى للملك فاروق وكان
يلعب معاه قمار ونسوان وخلافه.

وسرايه الخواجه باسطنبوليا اليهودى الفايطجى اللي سلف أبويا إبراهيم «عمى
شقيقى» تمتناشر جنيه بالفايط وفضل المسكين يسدد فيه تسع سنين ومات ولسه عليه
من أصل المبلغ اتنين وتلاتين جنيه!

وشفت سرايه الخواجه أنطون أو ألتون زى ما كنا بننطقها.

الخواجه مرشاق كان عامل جنينه حيوانات صغيره خارج جنيته السرايه.. وكانوا
أهالينا كل شم نسيم يلبسوناهدوم العيد اللي فات ويبعتونا نعيد ع الخواجه والمدامه
بتاعته.

كنا نقوم الصبح بدرى نلاقى البصل الأخضر تحت روسنا نشمه الصبح ونلبس
ونتجمع قدام سرايه العمده ونتكل على الله على عزبة مرشاق على بعد حوالى أربعة

كيلو.. نخبط على باب الجنيته الخشبي يطلع لنا الخدام سيد أبو معيز يفضل
يشخط فينا شويه بحجة إنه بينظمنا وبعدين يقول:

- إنتوت جاين بدرى كده ليه؟.. الخواجه لسه نايم.. ومش عايز أسمع صوت..
وبعد مانسكت قيمه ربع ساعه يفتح لنا باب الجنيته ويقول:
- ماحدش يتحرك من مطرحة.

ويدخل يغيب شويه وبعدين تطلع الخواجايه وهو وراها فتقول لنا:
- كل سنهوانتو طيبين يا بنات.. كل سنه وانتو طيبين يا ولاد.
ونرد في نفس واحد:

- وانتي بالصحه والسلامه ياستى الحاجه.

ويبدأ سيد أبو معيز يوزع علينا الخس والملايه والبيض الملون بعد ما يكون نشف
ريقنا وسم بدننا وبعدين يطلع الخواجه مرشاق فى البرانده تروح مسقفين وقايلين:
- هيبه.. فالتعيش الخواجه.

يرجع سيد أبو معيز تانى يوقفنا طابور عشان الخواجه يسبقنا واحنا نمشى وراه
على جنيته الحيوانات نتفرج ع التعالب والقروء والنسانيس والحمار أبو فأنله مخططه
كل دا والخواجه بيشرح لنا بكلام ماحناش فاهمين منه حاجه واحنا نسقف وسيد أبو
معيز يشتمنا والآخر نروح على بيت الغزلان.. وكان التيس بتاعهم قرونيه زى
الشجره وكان الخواجه مرشاق مسميه شيخ العرب.. يروح الخواجه ماسكه من قرونيه
ويسحب منها لغايه مايجيبه قدامنا ويقول لنا:

- هو دا شيخ العرب يا ولاد.. لازم ينسحب من قرونيه.. لأنه تمبل.. ياكل
ويشرب وينط ويزبل وينام.. ما بيعملش حاجه غير كده فى الحياه.. هو دا شيخ
العرب يا ولاد.. نروح مسقفين وقايلين.. هيبه.

وبعد الجوله يسألنا الخواجه:

- مبسوطين يا بنات؟ مبسوطين يا ولاد؟

ونردد كلنا ورا سيد أبو معيز:

- مبسوطين يا خواجه.. كل عام وإنت طيب والمدامه طيبه وفريد بيه طيب.

فيضحك الخواجه ويقول:

- وشيخ العرب قرونه أطول.

نروح مسقفين يروح سيد أبو معيز كانستا وهو بيقول:

- ياللا على أمك إنت وهو.. والوداع من عاش.

ونرجع زى مارحنا زى ماجينا.. وكل سنه والخواجه طيب.

نرجع بقى للخواجه كارنو صاحب الكلب الآنف ذكره.

هو كان عنده مكنة طحين ومكنة ميه وقطعة أرض زراعيه.. وبصراحه كانت جنيئة السرايه بتاعته.. هي البريمو على جناين الخواجات.. من المأكولات خد عندك.. برتقان ويوسفندى ولارنج ولمون بنزهير وقشطه خضرا وعنب وخوخ وتين وكمشرى ومشمش وماتجه وجوافه وبلح عامرى ومن المشمومات تمر حنه على قرنفل على ياسمين على دقن الباشا على ورد بلدى حاجه يعنى سبحان العاطى من غير مناسبه.

وفى يوم من ذات الأيام اكتشف الخواجه إن الجنيئه بطلت تطرح.. أو زى ماتقول.. هو اتهيأله كده.. لكن والله الوكيل احنا اللى كنا بناكلها نيّه.

عملنا فى سور الجنيئه منط سرى على شجرة المشمش الكبير «خد الجميل».

أنا فاكرا إننا خدنا القرار ده بعد مناقشات طويله حول حرمانية ودناءة العمل اللى حنرتكبه.. ناس قالوا دا خواجه والسرقه فيه حلال استناداً على دعاء خطبة الجمعة اللى الشيخ أبو عيطه بيقوله ع المنبر وبالتحديد الفقره الخاصه بالكفار اللى بتقول:

- اللهم اجعلهم وأموالهم وأولادهم ونساءهم غنيمة المسلمين.

وناس قالوا السرقه فى حد ذاتها حرام سواء من مسلم أو كافر.. لكن الواد غريب ابن أم تهاى حسم المناقشه بجمله زعم أنها حديث نبوى بتقول:

- ربنا ما يفرح حد واحنا حزاني.

وف ليله سودا ماطلع لهاش قمر وكان أوان المشمش.. نزلنا ثلاث عيال من المنط.
واستيننا احنا فوق.. نراقب لهم الطريق ونشقط منهم.. هما يادوب رجليهم لمست
أرض الجنينه وسمعنا صريخهم وفي لمح البصر بقوا فوق تاني وأول رجليهم ما
طالت الأرض ماوقفوش.. واحنا وافقين مذهولين.

الواد الأخراني من الرعب عمل الثقيله على روحه وبقي عمال يشر وهو بيحري
ومن باب شر البليه.. ضحكنا كلنا عليه خصوصاً بعد ما غريب قال:

- الواد سيد ابن أملك سعادته مطعون سيخ في مفساه.

المهم لحقناهم نستفهم منهم.. إيه بقى الحكايه.. أثارى الخواجه ابن الحرام جاب
كلب متوحش فى الكتم وربطه فى شجره المشمش خد الجميل تحت المنط وكلفه
بحسن استقبال الضيوف.

بس ياسيدى.. رجالتنا نزلوا وجرى اللى جرى.. الواد أبو هنداوى أقسم بأغلظ
الأيمان إلى إن مربوط فى شجره المشمش ده مش كلب.. ده بسم الله الرحمن الرحيم
وبينى وبينك الواد معاه حق.. فيه كلب قد الكنبه؟ فيه كلب عنيه بتطلع شرار؟
وبعدين دا ماكانش بيهو هو زى بقيه خلق الله.. دا كان بيور.. أى والله كان بيور..
كان بيور الوره والجعيص فينا هو اللى يسبق فى الهرب مع إننا كنا بنبقى متأكدين إنه
مربوط.. ولما كانوا بيطلقوه بالليل كان يقطع السكه حتى ع الدوريه.. خلاصه
الكلام.. الكلب دا كان عامل لى قلق من نوع غريب.

أنا بعون الله ماكانش فيه كلب فى البلد يستجرى يقف فى سكتى.. كلب خالى
الشوادفى الرهيب أنا جعلت منه عبره فى البلد وفرجت عليه أمه لا إله إلا الله..
الأول ماكانش بينى وبينه إلا كل خير.. لأننى كنت يومياً داخل خارج فى بيت خالى
وهو كان بيعاملنى على إنى واحد من البيت وانا خارج وانا داخل يهز ديله ويتمسح
فى.. يعنى أهل.. وذات ليله أنا رايح بيت خالى أثاره لأم جماعه صحابه وزانقين
كلبه فى الضلمه.. ودا موضوع طبعاً مايخصنيش.. وأفاجأ باللى ناطط فى كرشى

على خوانه خلاً الجلاييه الجديده عباره عن هلاهيل ! ومش كده وبس داه استمر فى الهجوم علىَّ وكأنى بينى وبينه تار بايت.

- يابن الكلب يا زباله.. وحياه أملك لأدمرك.

وقد كان.. قعدت أفكر له وأدبر له وأخيراً وجدت الحل فى سن إبره حطيتهاوله فى حته لحمه شفته ورميتها له.. قعد ثلاث سنين يكح وانسقم وبقى هفيه لكل من هب ودب.. أولاً للعالم اللى ياما نظ فى كروشهم وقطع هدومهم وثانيًا للكلاب اللى ياما ضربهم وكل نسوانهم وأخيراً طلعت روحه النجسه ومات فى ستين داهيه وكل البلد فرحت فيه وكل البلد كانت عارفه مين اللى قتله ماعدا خالى الشوادفى.. فى هذه الأثناء كانت زعامه العيال مقسومه بينى وبين غريب ابن أم تهامى.. فكانت عصابه غريب دائماً يضربولى ع الوتر الحساس:

- تقدر على كلب كارنو؟

طبعاً اعمل مش سامع:

- لو إنت أبو عزت صحيح هات لنا مشمش من جنيته كارنو.

أغير موضوع الحديث فوراً.

- طب تقدر تعدى بالليل من ورا سرايه كارنو وتيجى على دار أبو هنداوى وتاخذ بريزه.

أطنش أو أقول أنا مش محتاج فلوس من حد.

عرفت سعادتك سبب اهتمامى بكلب أهل الكهف بالذات دوناً عن الخمس أشياء اللى حيخشوا الجنة؟

وقبل ما أفكر أطلب من سيدنا يقول لنا ولوسطرين فى موضوع كلب أهل الكهف تطلع هو مشكوراً وسألنا:

- عارفين كلب أهل الكهف اسمه إيه يا خنازير يا ولاد الخنازير؟

وردينا فى نفس واحد:

- لا يا سيدنا.

قال:

- اسمه قطمير يازوانى يا اولاد الزوانى .. وهو سيد كلاب الأرض .. وإذا ذكر
يا هلف يابن الهلف إنت وهو .. لازم تقولوا عليه السلام.

وفوجئنا بسيدنا عمال يتطوح شمال ويمين ويطلع رغاوى من بقه ويزعق بعزم ما
فيه:

- يا حيبى يا قطمير .. الصبحه ياسيد الكلاب .. قطمير .. قطمير .. قطمير.

وزعقنا فى نفس واحد:

- عليه السلام.

وابتسم سيدنا فى زهو ووطى على جلابية محمود عرفه اللى كان نايم مسح فيها
بقه من الرغاوى وسألنا بلهجه وديه:

- إنت عارف يا كلب يا ابن الكلب إنت وهو .. لو كلب هجم عليك فى السكه
وقلت له قطمير يعمل إيه؟

قلنا له:

- لا يا سيدنا.

ضحك وقال:

- يا عينى عليكو يا جهله .. يقف مطرحه عدل وينحنى لك باحترام لا تستحقه لا
إنت ولا أهلك وممكن يدبك ضهره تركبه.

أنا بعد كده ماسمعتش حاجه من أصله .. وأول ما خرجنا من الكتاب أصدرت
تعليماتى:

- ما حدش يروح .. لا من عصابتى ولا من عصابة غريب.

وقفوا العيال ساكتين يبصوا لى.. فقلت بكبرياء وثقه:

- أنا النهارده عازمكوع الغدا.

العيال قعدوا يبصوا لبعض مش فاهمين حاجه فكملت:

- الغدا النهارده مانجه ومن جنيئة كارنو.

وصرخ واد من عصابة غريب:

- ومين اللى حييجب المانجه من تحت؟

ورديت بمنتهى الهدوء والعنجهيه:

- أنا.

وسأل واد من عصابتى:

- يالهوى.. والكلب؟

ابتسمت ابتسامه الواصل وبعدين ضحكت بألاطه وقلت ببساطه:

- ح اركبه.

وانفجرت عصابتى بالتهليل والتكبير:

- الله أكبر.. يدوم الحماس ياابو عزت.. يدوم الحماس يادكر.. يدوم الحماس يا

بطل.

وفضلوا يصحنوا لعصابة غريب على كفوفهم ويطلعوا لهم لسانهم إلى أن تحرك

الركب الميمون فى اتجاه الهدف الجليل.. اللى هو جنيئة كارنو.

واحنا ماشيين ساكناش حد فينا قادر يفتح بقه بكلمه ولا حتى يبص للى جنبه..

سكون مهيب إلى أن وصلنا بسلامة الله إلى الهدف المنشود.

دلدنا روسنا من السور لقينا الزميل مربوط فى الشجره ونائم فى غفله ربه وما

عندوش فكره باللى حييجراله.. وابتسمت فى سرى وقررت بمنتهى الحزم وضع حد

لأسطوره الكلب الذى لا يهزم.. كنت واثق من سلاحى لدرجة إنى قلت بصوت مسموع:

- جالك الموت يا تارك الصلا.

وبحركه استعراضيه رشيقه قفزت على حافه السور وحطيت ديلى فى سنانى.. مع ملاحظه إن الجلايه ع اللحم.. وقلت للعيال:

- سقفه للنبي.

سقفوا.

قلت لهم:

- قولوا هيه.

قالوا:

- هيه.

قلت لهم:

- وكم ان هيه.

قالوا:

- وكم ان هيبه.

قلت لهم:

- سقفه شديده للنبي بقى.

سقفوا سقفه شديده.

وبحركه مظلبيه مفاجئه رحت ناطط بقيت فى حضن الكلب وزعقت فى وشه بثقه:

- قظمير عليه السلام.

ودى كانت آخر جملة سمعتها.

ما اعرفش بقى فات قد إيه؟ بعدها فقت لقيت الخواجاية راميانى فى الزريبه
وبتدلق على ميه سخنه بتغلى وبتدهن لى مرهم وشكلها قرفان من هدومي اللى بقت
هلاهيل والدم اللى ييشلب من كل حته فى جسمى وبتترطن بالجريجى بشكل
مايطمنش وباضرب بعينى لقيت لك ثلاث عيال من عصابتى متكتفين فى جبل واحد
ومرميين فى ركن من أركان الزريبه وماحدش فيهم نفسه طالع من الرعب.. ريك
والحق أنا بدأت أخاف م المجهول.. وإذ بالمنتقذ العجيب والدائم اللى هو صوت أمى
جأى من بره السرايه وهى بتقول جملتين لسه مش فاهمهم إلى وقتنا هذا.. كانت
بتقول: - سلامتك يا شلبى!! سلامتك يا معجبانى!!



الفاجومي

أبو كوعلى الشمروخ..

بابــــــــــــــــوص

■ أبو علي الشمروخ مكانش له مثوى.. محل الإقامة
تحت شجرة المنجھ

■ كبس الإنجليز على العزله بحثا عن مسروقات من
الكتب

■ أشعلت النار في العرييه الحمله بالمسروقات
المضبوطة

■ تم القبض على أبويا على بتهمة حرق العرييه ومات
في السجن

قالوا اللي يعيش ياما يشوف.. قلنا اللي يمشى يشوف أكثر.

وأنا كانت بايضة لي في القفص.. من صغري وأنا ماشي.. يعني على قد ما
عشت مشيت وعلى قد ما مشيت شفت.

ناس يا ما مالهاش عدد قابلتني ع الطريق.. وشوش متركة على صناديق مقفوله
على حواديت.. اللي شبه بعضها كبيتته من دماغي.. مافاضلشي غير الحواديت
الوحدانيه اللي مالهاش شبه.. معششه في نافوخي ومكلبشه ف قلبي لساها بتعن
على زي الجرح القديم.. وافتح وشوف..

ماحدث في البلد كان يعرف له أصل من فصل.

طلعنا لقينا الكبار بيقولوا له (يا با على).. قلنا زيهم.

فقير.. فقير.. فقير.. على رأيه هو:

- أجب لك منين يا شيخ الغفر.. دانت كرشك يبلع جاموسه بخراها.. والراعي
اللي وراها.. وأنا أفقرم الدبور لاحمر.

سألناه:

- واشمعني الدبور لاحمر يابا على؟

قال لنا:

- حاكم الدبابير الصفرا زي النحل بتفرش عشوشها قبل ما تسكنها.. إلا الحزين
لاحمر يفحر له خرم في الحيط وينام على لحم الخرم.

وأبوكو على الشمروخ لا كان مالك ولا مستأجر.. ولا حتى مرابع.. كان حته
تملى. يعني عامل باليوميه ماحيلتوش إلا عينه وحيله ومواله الوحداني:

إن مال عليك الزمان.

يابن الكرام



باعك

شمر دراعك

وقوم ميل على دراعك

ومكانش له متوى.. المقر الدائم ومحل الإقامة.. صيف وشتا.. تحت شجره المانجه
الهنديه فى جنينة جدى البيهه الشوادفى العمده العظيم الفخيم السلى مره عزم خديوى
مصر شخصياً على الغدا وطلع له صينية الغدا دهب وعليها الأوزى محشى ومشوى
وواقف على رجله!

وذات مره سألته:

- إنت يابا على مابتبردش إزاي وانت نايم فى الطل؟ داحنا بتتكتك م البرد واحنا
تحت الغطيان.

ضحك وقال لى:

- يا عبيط.. ربك رب العطا.. يدى البرد على قد الغطا.

عمرى ما شفته صالب طوله.. كان دائماً متنى لتحت.. يا إما ماسك الفاس
وبينكش بطن الأرض. يا إما شايلى الكريك.. ويحمل تراب أو سباخ.. وحتى لما
كان يقف أو يقعد يلقط نفسه.. برضه كان بيبقى متنى لتحت.

الواد غريب ابن أم تهانى فى مره قال لنا:

- أصل أبوكو على.. بيكسل يقف.

وكان عندى ابن عم دماغه لادع اسمه الأستاذ نجم لكن كان دمه خفيف.. كان
يلم البط والوز والمعيز والفراخ حواليه ويطلع لهم أكل من جيوبه ويفضل طول ما
بياكلوا يكلمهم كلام مش مفهوم ويضحك.. وكان بيصطاد التعابين ويخلع سنانهم
بطاقيه صوف وبعدين يفتح بطونهم ويدور على خاتم الملك اللى خباه سيدنا سليمان
من شمهورش ملك الجان أثناء ما كانوا يفتحوا البحر!

الأستاذ نجم ده مره وإحنا قاعدین علی کوبری المملک قال لنا:

- بصوا کده یا ولاد علی أبوکو علی الشمروخ.. وقولولی شایفین إیه؟

وبعدین ضحک مع معزه السید أبو یوسف وقال لنا:

- أبوکو علی دا مش واحد.

الواد أحمد أبو هنداو ی ضحک وقال له:

أمال کام؟

قال:

- اتنین.. واحد رأسی وواحد أفقی.

ورجع تانی یضحک مع المعیز إحنا مافهمناش حاجه.

وماکانش أبویا علی الشمروخ یملک من دنیاہ غیر الجلائیہ الزرقا القدیمہ اللی کان أصلها خیمه وكوز السلامون المصری اللی كان یعمل فیہ الشای الزردہ ویشربه فیہ برضه!

كان وشه أصفر ومكرمش ورقبته صفرا ومكرمشه وإدیہ مقشفه وبتخر میه صفرا خصوصاً فی البرد وكانت شقایفه مشققه ولولا الأنیمیا كانت جابت دم.. وكان طول النهار یلحسها بلسانه عشان یطریها.. وكانت رجلیه صیف شتا ما بتبانش من القشف والحراشیف اللی کاسیها زی ضر الزحلفه.

المدھش إنه ماکانش شایف أی إخراج فی المسأله دی.. وكان أوقات الصفا إحنا ملمومین حوالیه یمد لنا رجلیه ویقول:

- شایف یاواد إنت وهو البلغه الربانی دی؟ صیفی شتوی.. لا تدوب ولا تروح للصرماتی.

ویکمل:

- إن شاء الله وبإذن واحد أحد یوم الموقف العظیم ح استأذن سبحانه وتعالی

وانسَلَّ فرده على لبدہ شیخ الغفر وفردہ على عمہ الشیخ عیطہ.

كان كل شيء في أبويا على شبه ميت إلا حاجتين.. لسانه الحراق وعينيه الصاحيين.. لما كان يغضب كنت تشوف فيهم ماسورتين بندقيه ميزر.. ولما كنا بنتلم حواليه ونتوه في حواديته الجميله ويحس هو بسعادتنا باشوف فيهم بحرین حنان صافيين.

مره قلت له:

- نفسى يابا على أقلع بلبوص وانزل استحمى فى عينيك.

ضحك من قلبه وقال لى:

- تغرق يا بو عزت.. وأروح من أمك فين؟

وفى يوم من ذات الأيام حصلت علينا كبسه إنجليزى.. ودى كانت دايماً بتحصل بشكل مستمر على جميع البلاد والعزب والكفور والنجوع المحيطة بمعسكرات الاحتلال الإنجليزي فى منطقہ قتال السويس اللى بتبدأ بمعسكر محجر أبو حماد وتنتهى فى السويس وبورسعيد.. كانوا بيداهمونا بحثاً عن مسروقات عبارة عن معالق وشوك وسكاكين وبطاطين وملايات وناموسيات وصحون وفناجين.. كلها بتباع علنى كل يوم اتنين فى سوق أبو حماد العمومى وعشان كده كانت لازم أى كبسه تسفر عن مضبوطات يلزم لها متهمين يدبرهم شيخ الغفر ويتحاكموا أمام القضاء المصرى اللى كانت أحكامه عليهم بتتراوح بين شهر وست شهور سجن مع الشغل والنفاذ.

وشهادہ لله إن الإدارة المصریہ ماكتتش بتقصر فى واجبها تجاه القوات الحلیفہ وكانت كل جهه عارفه اختصاصها وبتأديه على أكمل وجه.

العمده يستقبلهم لحظة الوصول ويقدم لهم التحية والترحيب مصحوبين بشأى الصباح يبلّغوه بالمتين والغريبه وما شابه ذلك ويحضر لهم الغدوه المعتبره يلهفوها بعد نهايه الكبسه وهما راجعين مستصرين ع الفلاحين وماسكينهم تلبس وشيخ البلد

مستول قسم الهدايا اللى هى عبارة عن كميات من القشطه والزبدہ والفطير المشلتت وعسل النحل والبيض والطيور والفواكه والخضروات ولا سيما البطيخ والعنب والمانجه والموز والخيار والطماطم وكل دا بيتلم من غيطان وبيوت الفلاحين بالسحت وعدم الرضا.

أما شيخ الغفر فكان يستقبلهم بحرس الشرف ويعين له غفيرين لحراستهم وخدمتهم وبعدين يقبضوا لهم على المتهمين اللى يحددهم شيخ الغفر.. يشيلوهم المضبوطات ويسوقوهم على أوضه التليفون اللى هى تخشيه الأرياف حين ترحيلهم للسجن.

خرجت الحمله من سرايا العمده بعد شأى الصباح فى اتجاه بيت خالى حسن أبو مهدي ودا معناه إنهم يمروا على موقع أبويا على الشمروخ فى جنية البيه الشوادفى.. كان أبويا على لحظتها بيحمل سباخ ع الحمير وإذ بالحمله تتوقف قصاده ويسأله الترجمان المصرى اللى بيصاحب الحمله المكونه من الكابتن واثنين جنود والسواق:

- إنت يا راجل جايب الجلايه اللى إنت لابسها دى منين؟

ورد أبويا على بمنتهى الجديه:

- من بنك سمعان يا خواجه.

ويظهر إن الترجمان مافهمش النكته فقال له:

- إنت راجل كداب.. الجلايه دى قماش إنجليزى.. بالأماره كان أصلها خيمه.

قال:

- وافرض؟

قال له:

- تبقى حرامى.

ضحك أبويا على وقال له:

- والعمل يا شريف؟

قال له:

- تروح السجن.

اتنهد أبويا على وقال له:

- ريحت قلبي الله يريح قلبك.. مش هناك ح اكل واشرب واشخ وانام؟ ورطن
الترجمان مع الكابتن والحاشيه وبعدين غير لهجته وقال بمتهى الود:
- اسمع يا عم الحاج.. الكابتن مستخسر ك فى السجن وييقول إنك مش وش
ذلك.

وضحك أبويا على وقال له:

- وبناءً عليه؟؟

وابتسم الترجمان يمكن لأول مره فى حياته وقال له:

- تعجبني كده يا حاج.. بناء عليه بقى تشوف معاك حاجه للكابتن وتفضل
جلايتك ساتراك ويا دار ما دخلك شر.

قال له بجديه:

- وتدوني بيها مبايعه؟

قال له:

- نديك اللى إنت عايزه.

قال له:

- طب يا أخى مش تيجى عدل م الأول؟.. هو احنا لينا بركه إلا الكابتن ورجالة
الكابتن.. خد يا سيدى.

وفى ظرف ثانيه كان مالخ الجلايه ومكورها وحادفها فى وش الكابتن:

- آدى اللى معايا.

الكابتن فؤجىء بالحركه ورجليه ماعلمتش ع الأرض ماتعرفش خوف من أبويا على ولا من محتويات الجلاييه من قمل وبراغيت وخلافه. والحاشيه طلعت تجرى وراه وفاتوا أبويا على واقف بلبوص وبيحمل السباخ وبيضحك وبيقول:

- بطلوا ده واسمعوا ده.. الحرامى بيقول لصاحب البيت بخ.. آه يا زمن عايب!

وشاع الخبر فى العزبه:

- أبوكو على الشمروخ واقف بلبوص فى جنينه البيه الشوادفى وحاله باين والنسوان بيروحوا يبصوا عليه ويرجعوا مخبين وشوشهم بالطرح وبيضحكوا!

وجريت على جنينه جدى البيه الشوادفى أشوف النسوان بيضحكوا على إيه؟.. لكن مع الأسف رحت لقيت أبويا على لابس جلاييته وواقف يحمل سباخ كالعاده وسألته:

- خبر إيه أَمال يابا على؟

قال لى:

- خيرك أسود.

قلت له:

- اللى شايع فى البلد خبرك إنت مش خبرى أنا.

قال لى:

- لادد عليك اللى بيعجرا فى بلدكو دا يابو عزت؟

قلت له:

- إنت ما سمعش شيخ الغفر وهو بيقول للغفر الإيد اللى ماتقدرش على قطعها

بوسها؟

قال لى:

- حد علمى إنك اتدلّيت غفير.

قلت له:

- فشر.

قال لى:

- تبقى شيخ غفر.

قلت له:

- فشرين.

قال لى:

- أمال مالك؟

قلت له:

- مالى على الله.

قال لى:

- شايف إيه واقف قدام سراية عمدتكو التنبل؟

قلت له:

- كومبيل إنجليزى ومحمل من خيرات الله.

قال لى:

- وعارف ده كله حيروح على فين؟

قلت له:

- ع الكامب طبعاً.

ضحك وقال لى:

- هو الكامب ييلم زباله وقمل يا أهبل؟. الحاجات دى حياخدوها ويبيعوها تانى فى سوق لتنين ويرجعوا يظبطوها تانى وياخدوا فى نواتيها جدعين تلاته غلابه يحبسوهم.. عشان ييقى موت وخراب ديار.. زى الغلبان أبو العيال أنور ابن عمك اللى حبسوه الكفرة ولاد الكلب.

قلت له:

- وأبويا العمده عارف ده كله؟

قال لى:

- أبوك العمده حرامى وبيقسم معاهم وإن ماكانش ييقسم معاهم ييقى خدام إنجليز كلب ابن كلب.

قلت له:

- طب وإننت ساكت ليه يابا على؟

قال لى:

- اسمع ياد يابو عزت.. لو إننت واد ذكر صحيح اتسحب على طراطيف صوابك وروح فسى العجل واطلع من بره بره على داركو.. ماتخافش هما دلوقتى ملهين فى بطونهم ويطفحوا الدردى فى السرايه.

أنا طبعاً وكعادتى أحب لما اعمل العيبه ما اطلعهاش ناقصه!

- إيه يعنى أفسى العجل؟!.. طب ماهم حيفخوه تانى.

طيران على دارنا سهيت أمى وسحبت لتر الجاز وعلبه الكبريت الهلب وعلى طراطيف صوابى ومن جنب الحيط واتسحبت لغاية ماوصلت للعرييه اللى عليها جبال من البطاطين والناموسييات والملايات.. كانوا لتجليز بياكلوا فوق والغفر بياكلوا فى أوضه التليفون وفى ثوان كنت دالق الجازع البطاطين وشاكك عود

الكبريت الهلب راميهِ ع الجاز وخذت القسط وعلى بيتنا حمامه.. لقيت أمي بتسخن العيش للغدا قعدت معها وبدأنا نتغدى لقمه و الثانيه والثالثه والفرقه إشتغلت.. أصوات زى أصوات الكنايل إالى بترميها الطيارات الألمانية ع الانجليز بالليل وويك ويك الصوات اشتغل وشويه وسمعنا صوت شيخ الغفر لأول مره بيستغيث:

- روحوا ياولاد.. تعالوا ياولا.

وطلعت الناس اللى فى البيوت وجريت الناس م الغيطان على مصدر الصوت.. صوت الاستغاثه اللى طالع من سرايه العمده لأول مره برضه.
أمي قالت:

- يالهوى الغاره الألماني بالنهار؟.. دى علامات الساعه اللى وصى عليها حسان اليماني.. أشهد إلا إله إلا الله وأشهد أن محمداً رسول الله.

أنا حصل لى شويه لخبطه.. أروح.. ما اروحش؟.. وشويه شويه سكنت الفرقه والصوات وبدأت الأصوات تهدأ وإذا بأمي تفقع بالصوت وتخرج حافيه جرى فى اتجاه الأحداث فقلت مابدهاش جريت وراها فى اتجاه سرايه العمده.. لقيت مشهد فى غاية الغرابه.. العربيه عباره عن فحمه غرقانه ميه والغفر حواليتها ماسكين جرادل وغرقانين ميه وأخونا الكابتين مابقاش كابتين.. دا شخص ياولداه وشه أصفر وواقف مفرشح وناسى فوطه السفره على صدره وبيكلم نفسه ويضحك والتفرين لتجلىز واقفين مسهمين وبيصوا لبعض وشوشهم ضارب بهلمونى على زرقان.. والترجمان اختفى والعمده ماسك خرزانه وبيشوح بيها فى الهوا والأهالى واقفين على بُعد بيتفرجوا وهما ساكتين لكن وشوشهم فيها لؤم وشماته.. وفجأه صرخ العمده فى وش شيخ الغفر:

- الفاعل كوم وعمرك كوم ياسيد.

وإذا بصوت أبويا على جاى من ورا سور الجنيه:

- «.....» حمرا يا عمده.

بعض الأهالي قدر يكتم ضحكته وبعضهم ما قدرش.. لكن اللي ضحك ضاح
فى اللي ماضحكش - فى اللحظة دى - أنا شفت بعينى ما حدش قال لى.. شفت
العمده وهو بيهز دماغه مرتين لشيخ الغفر وشفت شيخ الغفر وهو بيشاور بدماعه
للغفرع الجنيهه وزعقت بعلو صوتى:

- طير يا بابا على.. اهرب يا بابا على.

وأفاجأ بمطرقه حديدته نازله على صدغى.. دوشتنى.. أخويا العزيز عبد العزيز..
قرر فجأه إنه يتحمل مسئوليه الأخ الكبير المربى فراح نازل بكلوه إيده على صرصور
ودنى اليمين نترتنى ييجى ثلاثه متر قلبنى على جنبى الشمال.. وعبد العزيز ده كان
ممسوس علاوه على إنه فاشل فى الدراسه والحب والحياه.

المهم.. كل ما احاول أقوم راسى تغلبنى أروح نازل زرع بصل.. ما اعرفش
الوقت اللى فات قد إيه قبل ما اسمع صوت ضرب الدباشك وكعوب الجزم المبرى..
أنا قلت الدور على رحى فازز مرعوب لقيت أبويا على مرمى على ظهره وكل
الضرب دا فيه وهو مايقولش آه.. لحد ما كعب جزمه جه فى بطنه فصدرت عنه آهه
مكتومه زلزلت قلبى رحى جارى ورامى نفسى عليه وأنا باصرخ:

- سيبوه يا ولاد الكلب.. أنا اللى حرقتها.. سيبوه يا ولاد الكلب.. أنا اللى
حرقتها.

وظا طالت الدنيا وسمعت صوات أمى وشتيمة شيخ البلد فى الناس وزعق العمده
بصوت مرعوش:

- خدى ابنتك يا هاتم لحسن ودينى وأيمانى أرميهولك فى السجن مؤبد.

اتكاثروا على وشالونى من فوق أبويا على الشمروخ.. كان وشه غرقان دم.. لكن
عنيه كان فيها ابتسامه حسيت المره دى إنى استحमित فيها وجرجرونى على بيتنا
وكتفونى بحبل فى السُم النقالى.. ولما فكونى جريت على المنجايه الهنديه مالمقيتش
أبويا على الشمروخ.. خدوه ع السجن بتهمه حرق العرييه.. رجعت ع البيت
مكسور ومقهور.. وروحي يا أيام تعالى يا أيام وسمعنا إن أبوكو على الشمروخ..
مات فى السجن ألف رحمه ونور عليه.



الفاجومي

الغريب.. ابن فاطمة

- بعد موت أبويا علي ترك فراغ وكان فرصه لظهور الصراع بيني وبين «غريب ابن فاطمه».
- قالت لي أمي: أقطع لسان اللي يناديك باسم فؤاد ابن هانم.
- جدي بلغ أملاك القصر وعوضهم في أملاك الدولة.

بعد موت أبويا على الشمروخ.. ساب مطرحه فاضى تحت المنجايه الهنديه فى جنيئة البيه الشوادفى وساب حسره فى قلوب وعيون محيينه.. خصوصاً إحنا الشباب اللى كنا دائماً حواليه.. نعاكسه عشان يشتمنا ونضحك.. ونسأله عشان يجاوبنا ونفهم.. وكنا بنلاقى فى حضنه الونس والدفا اللى ماكانش بتلاقيهم فى البيوت.. من أول سراية العمده لحد أوضه ستك سعده الدايه.

الأحلى من دا كله والأمتع كانت نوادره وتشنيعاته الحراقه اللى كان بيصبها أساساً على دماغ العمده والمشايخ وشيخ البلد وشيخ الغفر وشيخ الجامع وشيخ المنسر اللى هو زى ما بيقدمه أبويا على:

- أبوعبد الله ولا غيره.. حرامى التموين.. قليل الدين الضلالى مقطوع اليد اللى باله العالم فى كرشه مساحه وقباله ويبيع قوت الغلابه للحراميه عيني عينك.

كان أبوعبد الله صاحب محل البقاله الوحيد فى العزبه وكان مسمر غطا صندوق جزم كرتون على باب المحل وكاتب عليه بقلم كويبا بالخط النسخ «ممنوع الشكك قطعياً بمناسبه الحرب».

والمدهش إن الساده الحراميه اللى كانوا الهدف المباشر لتشنيعات ونوادر أبوكو على الشمروخ كانوا نشطين جداً فى ترويح هذه التشنيعات

وهذه النوادر عن طريق الروايه والنقل.. يمكن عشان كل واحد فيهم يثبت للناس إنه مش هو المقصود بالكلام دا.

أما متوسطى الحال فكانوا بينقلوا أخبار ونوادر أبويا على من باب التعالم والوجاهه شوف التفاهه.

بذمه النبى حصل إلى يومنا هذا جهاز إعلام مجانى يشتغل بالكفاهه دى؟
أبويا على كان بالنسبه لى شخصياً حضن دافى أمين.. على الأقل باستخبي فيه

من بطش عبد العزيز أخويا الرهيب اللي كان نازل فيَّ ضرب عمال على بطل.
مره قال له قدام سراية العمده:

- إنت ياد يا عويل يا هايف كل ما صرمك يحرقك تعمل راجل وتنزل ضرب
وتلطيش في اخواتك اليتامي؟.. طب ماهم الحراميه اللي كلوك إنت وأمك
وإخواتك قدامك أهم.. وريني شطارتك.. وإن كان فيك الله يعافيك.

راخر من يومها بطل يضربني برا البيت خوفاً من أبويا على الشمروخ.

وكان أسعد لحظات أبويا على الشمروخ هي اللي بنقضها حواليه واحنا بنسمع
حواديتة الجميله الغريبه وخصوصاً حدوده الجنيه الأميره بنت ملك الجن لاحمر..
اللي عشقت أبوك على وهربت معاه ليلة دخلتها على ابن عمها الأمير عيروض ابن
ملك الجن لاصفر وشالت أبويا على - على ضهرها وحلت ضفايرها وقالت له:
- اتشعلق يا حبيبي.

وطارت بيه سبع تيام بسع ليالى ونزلوا سوا في القصر المسحور وقعدوا ياكلوا
لقمة المحاياه ويشربوا لبن العصفور اللي كانت الجنيه مخبياه في صدرها بقت تشرب
م البز اليمين وهو يشرب م البز الشمال لحد ما كان فاضل له مصتين ويتلحس ويبقى
من أهل تحت الأرض وتجوز له الجنيه بشرع الله وسنه نبي الله سليمان.. وإذ بالحيطه
تنشق ويدخل منها الصعصعان وزير أبوها وحواليه الحاشيه وعسكر الجن لاحمر
ويقبضوا عليهم وتصرخ الأميره:

- إقتلونى أنا وسيبوا حبيبي.

وإذا بالوزير الصعصعان ينزل بالكف على وشها ويقول لها:

- إخرسى يا فجره.. (ويسجى يضرب أبوك على كف يروح أبوك على مهيفه
فيضرب الهوا).. ويقوم العسكر بتكتيف أبوك على ويغموه عشان مايشوفش حكيم
الجان وهو بيكشف عليها وبعد فتره قلق يصرخ حكيم الجان:

- يا سليمان يا نبي الله.. العفو والسماح.. صاغ سليم يا مولانا الوزير.. لسه

بختم ربها.. صاغ سليم شرف الجن لحرر.. صاغ سليم.

ويهيض عسكر الجن لاحمر ويرقصوا رقصه الشرف.. كل دا وأبويا على لسه
متغمى ويشكل الوزير محكمه الجن فى لمح البصر ويصدروا الحكم الرهيب على
لسان رئيس المحكمه:

- دم شرف بنات الجن لاحمر غالى.. وإنت صنت الغالى يا على يابن الإنسان..
عليك مليون أمان وأمان.. لا تلدغك حيه.. ولا تخطفك جنيه.. ولا يطرق سكتك
سلطان ولا يلبس جتتك شيطان.. لكن جزاء فعلك الخسيس وعشقك لبنات إبليس
حزميك فى بقمه حفرا جفرا.. كثيرة الحركه قليلة البركه.. نسوانها بيحكموا على
رجالتها وشبابها أميع من بناتها.. الفقر فيها صايح والحق فيها ضايح!

وراح مديله شلوت طار فى الهوا سبعين ساعه وساعه ونزل تحت المنجايه الهنديه
فى جنينه جدى البيه الشوادفى.

دلوقتى خلاص راح أبويا على.. وتحرمى علينا يا جنينه البيه وإنتى يامنجايه هنديه
خلاص.. مابقاش تحتك إلا الرماد فى راكبه النار اللى ماتت.. وكوز السلمون
المصرى انكفى على وشه.. لاحس.. ولا خبر.. ولا روح.

ونقلنا ملاعب النهار وسهرات الليل للعلوايه.. قدام بيت الحاجه سنيه بنت عمى
وأخت عبد الله تاجر التموين.

والعلوايه كانت ساحه واسعه رمليه بتفصل بين عزبه أبو نجم وعزبه القوادره
المنتسبين لعبد القادر ابن بدره جارية سيدى البيه الشوادفى اللى اتجوزها وهى معاها
عبد القادر لسه طفل وبعد كده خلف منها عبد الحميد وعبد المجيد وعطيه غير البنات
اللى طلوعوا كلهم بيض.. بينما أخوهم من الأم كان أسود فطلعت ذريته كلها سوداء
من غير سوء.. وكان أبويا عثمان أبو سعيد غريمى فى الهوى مسميهم الملونين
وكانت العلوايه مساحه أوسع وفرصه أكبر لتجمع عددًا أكبر من العيال أكثر من اللى
كانوا بيتجمعوا تحت المنجايه الهنديه حوالين أبويا على.

وحصلت خلطه عجيبه على رمل العلوايه واتولدت التريبطات والتقسيمات اللى اتأصلت بعد كده فى القلوب والبيوت والغيطان.

الفقرا من شباب أبو نجم التحموا بشباب القوادره والسواله رغم تباعد الدم والسكن.. وكونوا جبهه موازيه لجبهه شباب أبو نجم الملاك، وبقت التقسيمه بوضوح ملاك ضد معدمين.

وطبعاً اندماجى فى جبهه المعدمين ماعجبش أعمامى وأخوالى من آل نجم وكنت دائماً أسمع اللوم والتوبيخ أينما توجهت:

- يا عويل يا هايف.. سايب بيوتك فى العزبه وقايم نايم عند العبيد.

لكن أمى الله يرحمها كانت بتشجعنى على الاندماج أكثر فى جبهه المعدمين.. ولما كانوا عمامى يسلطوا على دلدولهم عبد العزيز أخويا كانت بتتصدى له.. مره قالت له:

- إن كنت يا خايب يا ابو ريالاه فاهم إنهم واقعين فى هواك تبقى بتحلم.. وإن كنت منشئ على جوازهم منهم حيطلع نقبك على شونه.. وادى مقصوصى اللى ما حدش علم عليه.



كان الفراغ اللى سابه أبويا على بموته فرصه لظهور الصراع بينى وبين غريب على زعامه العيال..

وغريب كان مندوه باسم أمه فاطمه أم تهاى.. ودا مقصود بيه الإهانه والتحقير لأن اللى بيتنده باسم أمه واحد من اتنين يا إما تربية أرمله يا إما تربية مره متسلطه وأب مسلوب الشخصيه وفى الحالتين:

- عمر المره ماتربى عجل ويحرت.

وأول مره أنا اتندهت باسم فؤاد ابن هانم من ولد كنت باضره، ولما سألت أمى عن الموضوع ده قالت لى:

- إمشى قطع لسان اللى يقول عليك كده.. دانت أحمد فؤاد ابن عزت أفندى على سن ورمح.. أنا صحيح مره لكن مقصوصى ده يسوى ميت شارب.

بعد كده كان أى عيل يقول لى العبارة دى كان بيدفع التمن من صحته فوراً وأحياناً من منظره.

عمنّا غريب بقى ماكانتش بياخذها على إنها إهانه.. بالعكس دا كان مصدر فخره دائماً إنه ابن أم تهاى!.. ليه بقى؟.. اسمع وصلى ع النبى:

- جدته أم أمه كانت خدامه فى سراية جدى الحاج عطيه الأخ الأكبر للبيه الشوادفى.. كان هو العمده وكان التليفون والعز فى سرايته ولما مات اتنقلت العموديه بتليفونها وعزها لسراية أخوه الأصغر محمد بك الشوادفى حامل عالمية الأزهر والحاصل على رتبة البكويه مرتين.. مره من الخديوى عباس.. ومره من الملك فؤاد فاعتبر نفسه باشا إلا ربع وأتارى ياخويا الرتب بتاعه زمان دى كانت بتحتاج لفلوس كتير لزوم الأبّه والمنظره.. وميراث جدى البيه الشوادفى عن أبوه مايكفّيش خصوصاً وإنه كان هارى نفسه جواز وخلفه فبقى مسئول عن مؤونه جيش عرموم من الأبناء والبنات والأحفاد والحفيدات.. يقوم يشاء السميع العليم إن جدى أبو أبويا المدعو محمد أبو محمد أبو نجم يطلع هو الأخ الشقيق الوحيد لمحمد بك الشوادفى الأبّه.. فلما مات أبوهم.. استلم البيه الشوادفى حصته وحصّة أخوه الأصغر محمد وعين نفسه وصى على محمد الصغير.

قوم إنت يا عم محمد يا صغير فوت عيّلتك لحمه حمرا.. إبراهيم ١٥ سنه.. وعزت ١٣ سنه.. واطلع لى الحجاز عشان ترجع من هناك الحاج محمد.

لأ وكمان ما استكفّاش بكده.. بسلامته بعد ماخذ رتبه حاج وراجع بقى.. مات فى المركب ورموه مع الزباله فى البحر.. حاجه خرا يعنى.. هى برضه أصلها لما بتغفلق ما بدّهاش.

وطبعاً جدى البيه الشوادفى بلع العيلين اليتامى خصوصاً بعد أمهم ما رمتهم وراحت التجوزت وعلشان يخزى العين خدهم ع الجبل وقاس لهم أربعين فدان من

أرض الدولة وقال لهم:

- دول نصيكم فى الميراث.. صلحوهم وخدوهم.

وحسب روايه أمى:

- فضلوا بيعوا جزء ويصلحوا بحقه جزء تانى لغايه العبارة ما صفصفت على سبع فدادين مستصلحين.

أبويا باع الثلاثه ونص تبعه واشترى أوتومبيلين واحد له هو والمدام اللى هى أمى والتانى للعيال اللى هما احنا واللى فضل من حق الأرض شبرق بيه ومنجه نفسه.. نيجى بقى للأوتومبيلين فيكتشف السيد الوالد الأهل إنه يحتاج لاتنين سواقين يمشوا العجل وطبعاً دا مش فى مقدوره فباع الأوتومبيلين ورجع شبرق بيهم ومنجه نفسه تانى.. وفضلوا الثلاثه ونص بتوع أبويا إبراهيم ينزرعوا إلى يومنا هذا.

نرجع لغريب وجدته اللى كانت خدامه فى سراية العمده الحاج عطيه وكان جوزها بيشتغل معاها فى نفس الموقع كلاف.. يعنى مسئول البهايم لامؤاخذه وكان جدى الحاج عطيه أبو نجم نموذج للفحولة.. اتجوز تلتاشر وخلف حوالى خمسـه وأربعين غير السقط واللى مات صغير!

وكان أفخم وأحلى مرا فى سجل الفحل المذكور هى الحاجه زينب آخر النسوان التلتاشر وأقواهم.. سيطرت على الفحل وهو بيلعب فى الوقت الضايـع وكوشت على كل شىء لكن على رأى الرئيس السادات:

- بالقانون.

لأنها بالصلاـح النبى استطاعت فى التـمن سنين الأخرى من حياة الفحل إنها تجيب تسع عيال!

ومن النوادر اللى بتحكى ليومنا هذا إن الزميل الفحل مات والحاجه زينب حامل.. ولما جم يقسموا الميراث اختلفوا.. يحسبوا اللى فى بطنها ولد ولا بنت.. هى قالت:

- ولد.

وهما اللى هما ولاد ضرايرها قالوا:

- بنت.

واحتدم الخلاف وأخيراً لقيوا واحد عاقل نصحهم بالانتظار لحين الولادة.. ويوم
الولادة حصلت المفاجأة الزينية.

الحاجة زينب جابت عطيه وعطيات.. شوف المرا؟



الحاجة زينب ليله فرحها جوزت خدماتها جده غريب لكلاف البهايم جد غريب
برضه.. وفضلت الحاجة تخلف وخدماتها تخلف لحد ما زحموا البلد.

من اللى خلفهم تهامى الكلاف بنت اسمها فاطمه طمعت فيها الحاجة زينب
وفضلت تربيتها لغايه ما بقى عمرها ست سنين.. استلمت الشغل وصيفة الحاجة
زينب شخصياً ودا فى حد ذاته امتياز على سائر خدم السرايه تاكل فضلات الحاجة
وتلبس قديم الحاجة وتعيش بجوار الحاجة.. كبرت البنت بسرعه وخرط البنات
خرطها ودارت واستدارت واتقسمت ورا وقدام وطرح الرمان على صدرها وطاب
واستوى وطلب الأكال.

فى هذه الأثناء كان أبويا عثمان أبو سعيد مرمى فى السرايه عليل.. كان عنده
شلل من نوع غريب.. المفروض الشلل النصفى يبقى يا إما فوق.. يا إما تحت.. لأ..
دا بقى كان عنده شلل نصفى بالطول وياريت مثلاً الشلل ضارب نص يمين أو
شمال.. دا كان إيده اليمين ورجله الشمال هما اللى مشلولين يعنى متكثف تكتيفه
مخبرين وسبحان الله - له فى ذلك حكم!.. لأن اتضح بعد كده إن المذكور يستاهل
كل خير وإن التكتيفه دى شويه على معرفه كان دا هو الأكال اللى طلبه رمان صدر
الوصيفه فانتهاز أول فرصه اختلى فيها بفاطمه أم تهامى وقزح عليها زى طور
الطلوقه وتحبل البنت الخدامه ويستندل الفاعل وتستندل الحاجة زينب زى أفلام

المرحوم حسن الإمام وعشان يداروا الفضيحة جابوا جثته راجل مريض مرميه جنب الجامع واسمها سيد أبو يوسف وكتبوا على فاطمه وهي حامل باسم سيد أبو يوسف مريض الجامع وتصمم فاطمه إنها تسمى المولود «الغريب» وقبل ما تسبع الولده يطردوها برا السرايه.. وتعمل فاطمه من حضنها سكن لجوزها المريض وطفلها الغريب اللي أصبح ابنها وجوزها وأخوها وأبوها.

اشتغلت في البيوت والغيطان بإديها وسنانها عشان تربي الطفل وتعالج المريض ويكبر الطفل ويطلع متعلق بأمه ودود وحنين مع أبوه المعلن سيد أبو يوسف ويعامله بمنتهى الاحترام زى ما اتعلم من فاطمه العظيمة.

وتروح الأيام وتيجي ويستمر القدر في هزاره الثقيل البايع ويشاء السميع العليم إن مريض الجامع يعيش ويشوف بعنيه الإنسانه اللي حافظت عليه وعاشرته بكل الحنان والحب وهي جثه بلا روح.. يعيش سيد أبو يوسف ويشوف فاطمه الحبيبه وهي بتموت!.. كانت أول مره نسمع فيها صوت أبو يوسف.. فضل يبص لها ويثن ودموعه نازله تسح وبعدين عوى زى الديب وشق الجلابيه اللي ساتراه نصين وصرخ من بين دموعه:

- الله يجازيك يا موت.. يا عريس الخلوين «ورجع سكت لحد ما مات».. أنا كنت حاضر لحظات احتضار فاطمه أم تهامى وسمعت آخر كلامها للغريب.. قالت له وهو واخدها في حضنه ويسقيها الدوا:

- أنا عارفه ياخويا مجروح وموجوع.. حقك على أنا يا غريب حقك على راسي يا خويا.. ولو إنت بتحب أمك صحيح.. دير بالك على أبوك السيد عشان خاطري.. دا غلبان لا بإيده ولا بالمنجل.. داهو حتى اللي سماك الغريب.. حتوحشنى يا غريب.. قلبى وربي راضيين عنك يابنى.. دير بالك على روحك يا حبة عين أمك.



وشلنا خالتى فاطمه أم تهامى على كتافنا تلاته كيلو عشان ندفنها في جبانة الشيخ


عثمان فى العباسه كانت خفيفه زى الريشه.

وصلنا بأمان الله وفتحنا القبر وقبل ما ننزلها خدنا غريب بالكفن فى حصنه وباس الكفن وملس عليه بحنان وناوله للتربى وهو بيقول له:

- سمى عليها يا عم محمود.. اسم الله عليكى يام الغريب.. حتوحشيني يامه مع السلامه.. مع ألف سلامه ياختى.

وصدرت عنه زفره مرعبه قبل ما يدير وشه عتنا ويقول بصوت مخنوق:

- الله يجازيك يا موت.. يا عريس الحلوين.



الفاجومي

عبد الجليل لاقرع

- عبد الجليل لاقرع اللي هزمراكر رجال الأمن
والعمده وشيخ الفخر.
- لبيه المأمور بذات نفسه واقف يفرك زي اللي عليه
البيضة.
- تقنيت من الله إني أشوف كلب البوليس وهو ماسك
« كلب كارنو » وبينسله لجمه.

الدنيا دى رقاصه.. لعبيه.. قليلة أصل بنت سته وستين.. كل ليلة لها عريس جديد.. ترقص له وتترقص له.. واللى فات مات.

الله يرحمك يا بابا على الشموخ.. ويشبش الطوبه اللى تحت راسك.

صحيح زمن كلب بينسى المحب حبيبه.. ودنيا طاحونه ومرجيحه قواديس حبه تحت وجهه فوق لا بتسيب الراكب راکب ولا بتخلى الماشى ماشى.

وروح يا زمان وتعالى يا زمان وبدأ الهمس وكلام العيون فى عزبة أبو نجم وزمامها من العزب والكفور والبلاد التابعه للعموديه.. حبتين والهمس بحكايات جديده شغلت الناس اللى تحت ورعبت الناس اللى فوق وابتدا الرغى:

- الجماعه اللى فوق ما بيناموش.

- يا سيدى ربنا يقل نومهم كمان وكمان.

- الحوادث على ودنه.. والفاعل مجهول؟

- قالوا يا جحا الأبعد إيه داير فى البلد.. قال لهم مادام بعيد عن المش عارف إيه يبقى خلاص.

- بيتهى لى كده والله أعلم إن العمده ممكن يطير فيها.

- لا دا بس بيتهى لك.

- طب شيخ الغفر.

- يا سيدى الله لا يرد الغلا ولا كياله.

- إنما تفتكر مين؟

- قال يا خبر النهارده بفلوس بكره يبقى ببلاش.

- دا واد ماجبتوش ولاده.

- يسلم البطن اللي شاله.

وبعد مجموعه سريعه من حوادث السطو على بيوت وزرايب مجموعه كبيره من أعيان داير الناحيه وسلسله من حرق الأجران ظهر الفاعل على الشاشه عبد الجليل ابن الحاج مصطفى لأقرع شيخ بلد قرية الستين التابعه لعموديتنا ابن الليل الفارس العجيب اللي هز مراكز رجال الأمن في مركز أبو حماد ورعب العمده ودوخ شيخ الغفر السيد أبو دقماق اللي ذالل البلد وملبس رجالتها طرح.. والسيد أبو دقماق ده كان أصله حرامى بهائم وقاطع طريق وبعد ما اشتغل مرشد للبيه المعاون وخدمه في ثلاث أربع قواضى عينوه وكيل شيخ غفر خبط لزنق وبعد ما خان زملاءه وسلمهم كافأوه بترقية شيخ غفر داير الناحيه.

وشمنت الأهالى فى البيه المعاون والعمده وشيخ الغفر وضحكنا من قلوبنا ع الأغنيا اللي كانت بهائمهم بتنسرق وجرانهم بتنحرق وماحدث فيهم مستجربى يفتح بقه بكلمه ولا يبلغ عن الفاعل وكانت كل البلاغات اللي اتقدمت للبوليس والنيابه بتنتهى نهايه واحده:

س: هل تتهم أحداً؟

ج: لأ.

س: هل لديك أقوال أخرى؟

ج: لأ.

وأقفل المحضر على هذا فى ساعة تاريخه وتليت عليه أقواله ومضى «ثم» وقيدت ضد مجهول.

الواد غريب قابل واحد منهم صباحية ماجرنه اتحرق.. وبص فى وشه وضحك وقال له:

مال تجيبه الرياح تاخذه الزوابع.





و ذات صباحيه صحينا لقينا البلد مليانه حكومه.. وقدام سراية العمده حوالى
خمس عربيات حكومه والبيه المأمور بذات نفسه واقف يفرك زى اللى عليه البيضه
والجميع زى ما قال الغفير بهنسى:

- فى انتظار الكلب وسعادة الباشا الحكمدار.

- إيه العبارة بابا بهنسى؟

- الخواجه فريد مرشاق هلك.

- ومين اللى هلكه؟

-- عبد الجليل.

- سلم يمينه.

- وطى حسك.. الموضوع باينه مش حيبجى البر.

- دا يقولوا مولانا الملك شخصياً طالب القاتل وحيقتله بإيده.

وأثناء هذه الدردشات وصلوا عربيتين واحده فيها الكلب هول وواحد فيها
سعادة الباشا الحكمدار اللى أول ما نزل عملوا له سلام سلاح تشريفه وزعق الباشا
الحكمدار:

- المتهمين جاهزين؟

ودخلوا الغفر أوضه التليفون وخرجوا ومعاهم حوالى خمستاشر راجل مربوطين
فى جلاليب بعض.

كانت دى أول مره أشوف فيها عبد الجليل لاقرع.

ماكانش مربوط معاهم.. رغم إن أبوه الحاج مصطفى ماكانش موجود ضمن
جميع مشايخ دابر ائناحيه اللى كانوا واقفين زنهار فى استقبال سعادته الباشا
الحكمدار والكلب.

كان قصير بشكل ملحوظ.. ولابس هدوم بلدى نضيفه وعليها القيمه وعلى راسه طاقيه وبر بشوكها.. ودى كانت فى الفتره دى ملبوس الأكابر.

بيمشى ووشه فى الأرض لكن عينه لفوق.. عين سوادهم داكن وبياضهم ناصع وفيهم نظره قويه حاده وابتسامه ودوده.

المهم قعدوا المتهمين صفين على قرافيصهم.. عبد الجليل كان ثالث واحد فى الصف اللى ع الشمال.

واقف مركز عنيه عليه.. لقيت إيد بتزغدننى فى جنبى بصيت لقيت غريب.. وشه منور بابتسامه جميله وعنيه فيهم نظرة شماته وإعجاب.. بادلته نظرة الشماته والفرح وقلت له:

- شفت عبد الجليل؟

ضحك بشویش وقال لى:

- الصباحيه دى مباركه من أولها.. أنا أصلى شفت المرحومه أمى الليله فى المنام.. بتسلم عليك.

وسأل المأمور بصوت عالى:

- تمام المتهمين.

وضرب البيه المعاون رجله فى الأرض وضرب تعظيم سلام وقال:

- كله تمام يا أفندم.

وفتحوا باب عربيه الكلب.. راح ناطط ع الأرض.. حاجه بسم الله ما شاء الله.. لا تقوللى كانى ولا مانى.. ما اعرفش إيه لحظتها اللى فكرنى بكلب كارنو واتمنيت من الله ولا يكثر على الله إنى أشوف الكلب دا وهو ماسك الكلب كارنوا وبينسل لحمه.. قادر يا كريم.

ونط العسكرية ورا الكلب مربوط فى آخر السلسله.. ماتعرفش مين فيهم اللى صاحب الثانى.. وراح العسكرية مادد إيده فى المخله ومطلع سكر قوالب.. بقى

يحدف القالب لفوق يروح الكلب ناطط فى الهوا ولاقطه يبجى خمس ست مرات
وراح فاكك سلسله الكلب ومسقف وقايل:

- اتبع.. اتبع يا نمر.. اتبع.

الكلب جابها من أول الطابور يحط بوزه فى عب اللى قاعد ويشم شويه ويسيبه
شويه ويروح ع اللى بعده.. خلص الصف اليمين.. كانوا المتهمين واللى بيتفرجوا
دمهم نشف.. واحد أغمى عليه.. وواحد عمل الثقيله فى هدومه.. وواحد زعق بعلو
صوته:

- الحقينى يامه.

وأنا فى الحقيقه مش عايز أقول أسماء لأن بعضهم مازال على قيد الحياه ولا
داعى للإحراج.

وبدأ الكلب يجيب من أول الصف الشمال وهب واحد اتنين وجه دور عبد
الجليل الكلب حط بوزه فى عبه وإذا بعبد الجليل حاطط إيديه لتنين فى بق الكلب
اللهم احفظنا وراح فاشخ بقه ورمى نفسه على دماغ الكلب كتم نفسه فى الأرض
وسابه الكلب الضخم ده حط ديله بين وراكه وقال يا فكيك وفضل العسكرى يجرى
وراه لغاية ما جابه من على ترعه التفتيش.. وظاظت العالم وفوجئنا بسعادة الباشا
الحكمدار بيقول بعلو صوته:

- مش كلام ده يا عمده.

المهم والمدهش إن ماحدث من الهلأله دى قدر يقول لعبد الجليل تلت التلاته كام
ونزلوا الغفر فينا ضرب بالخرزان طفشونا.

وهما ماشيين خدوا عبد الجليل معاهم مقبوض عليه بتهمه قتل الوجيه فريد بك
مرشاق مع سبق الإصرار والترصد.

واتحول مصير عبد الجليل لقضيه شغلت البلد كبير وصغير.

أنا كنت باروح على دكان أبو عبدالله واندس وسط الكبار عشان اسمع بيقولوا

إيه واعرف أخبار عبد الجليل.. كانت كل الناس بتسأل عن مصيره وقال أبو عبد الله:

- مولانا الملك تركى والتراكوه زى الصعايده ماييسبوش تارهم.

وسأل برعى الصغير:

- يعنى حيموتوه يا حاج محمد؟

فرد أبو عبد الله بثقه:

- الملك حيموته بإيده.

وصدّق الشيخ أبو عطيه على كلام أبو عبد الله فقال:

- إنتو عارفين إن الملك ده قوة ستين حصان.. وإن الحكما فى بلاد لندره اكتشفوا

قلب صغير منبت جنب قلبه الكبير.. يعنى بقلبين اللهم احفظنا.

ورجع برعى الصغير يسأل تانى وبإلحاح:

- يعنى يابا محمد مين اللى يغلب فهمنى.. الملك ولا عبد الجليل؟

ونزل أبو عبد الله بملوكفه على قفا برعى العريض وقال له:

- بقى عبد الجليل اللى بياكل المش بدوده ولا الملك اللى بيعصروه ستين جوز

حمام فى كبايه كل يوم يشربها ع الريق يا حمار؟!

ونسى برعى القفا اللى لسه واكله وقعد يحك فى قفاه وقال:

- يا سيدى سليم يا بومسلم.. ستين جوز حمام حته واحده؟!

أنا كمان حصل لى رعب شديد من قوه الملك على زور عبد الجليل.. رحت قايم

وأنا باحوش نفسى م العياط على عبد الجليل وأول ما بعدت عن الدكان انفجرت

بالعياط بصوت عالى:

وفضل عبد الجليل فى سجن أبو حماد محبوس على ذمة التحقيق اتناشر شهر

ماحدث فى عيال العزبه نسيه وبعد سنه اتناشر شهر قدموه لمحكمه جنایات الزقازيق

بتهمه القتل وأبوه شد له ثلاثه محامين كبار منهم الوزير على أيوب وحكمت المحكمه ببراءة المتهم لعدم كفايه الأدله ورجع من محكمه الزقازيق بزفه ثمانيه وعشرين عريبه.. اللى جاى م الزقازيق واللى قابلهم فى أبو حماد ومشى وباهم واللى قابلهم على كوبرى المعاهده واللى قابلهم عند جبانة الشيخ عثمان فى العباسه الكبرى ودخل لك الموكب العزبه وقعدوا يضربوا نار قدام سراية العمده ودكان أبو عبد الله واللاتين مافيهمش صريخ ابن يومين.. ماحدثش عارف راحوا فين؟ وبالليل استمر الاحتفال وجابوا فرقة بعزق ودبحوا جملين وشاب وعشر خرفان وكان فيه أكثر من ثلاثين كلوب قدام دوار الحاج مصطفى الأقرع وعلى بُعد أقل من كيلو متر كانت سراية الخواجه مرشاق غرقانه فى الضلمه ومهجوره.

بعد البراءه اتسلطن عبد الجليل فى دماغ البلد وخصوصاً العيال.. وعلى رأى بتوع السيمه سرق الكاميرا منى ومن غريب وانتهى الصراع الوهمى بينى وبين غريب على الزعامه المزعومه ورجعنا أشخاص عاديه جداً زى كل العيال وحتى لعبه عسكر وحراميه بقى اسمها عبد الجليل والملك وماكانش حد م العيال بيرضى يعمل الملك فبقينا نعمل قرعه.

خط الله معيد معيد

كله حرب وكله صيد

كله مراكب

تخطر وتفوت فى الحاره

يا واكل الكشك البايث

لا تاكله وأنا فايت

ع النبائث

ع النبائث

ع النبائث

واللى ترسى عليه القرعه يبقى هو الملك.

وفى ليله من ذات الليالى بعد نص الليل سمعنا ضرب رصاص سريع .. اتھیألنا
إنه فى قلب العزبه والناس كلها صحيت فى البيوت وقعدنا أنا وأمى وأخويا الصغير
نجم بعد الرصاص ما سكت نبص لبعض واحنا ساكتين وفجأه لقيت نجم يبص لى
ويقول وكأنه بيخمن:

- عبد الجليل.

قلت له:

- بس القتيل ماحطش منطق.

أمى قالت:

- يسلم زنده.

الصبح نشفت البركه وبانت قراميطها.

السيد أبو دقماق كان سهران عند العمده يشدوا الأنفاس المعطره وربنا يعلم
كانوا بيتفقوا على إيه وخلصت السهره وقام أبو دقماق ركب المهره واتكل على بيته
وأثناء مروره أمام جنينه محمود أبو سليم سمع خرفشه وهمس بين الشجر وف لمح
البصر كان حادف نفسه من على ضهر المهره بقى ع الأرض وإيده على زناد مسدسه
فرغ الست رصاصات فى اتجاه الصوت ع الضلمه .. وهو كان مشهور بأنه بيغمض
عينه ويضرب ع الصوت ولازم يصيب الهدف.

وبعد ما فرغ الطنبجه خدها زحف فى بطن الترعه من جنينه أبو سليم لسراية
العمده حوالى نص كيلو متر .. لقي العمده واقف بيرجف وقال له:

- خبر إيه يا سيد .. مين اللى كان بيضرب رصاص؟

قال له:

- مبروك يا عمده .. عبد الجليل تعيش إنت.

وقبل العمده ما يستوعب الصدمه كمل أبو دقماق:

- أهه متكوم فى جنية أبو سليم.. غرقان فى دمه.

ورفع العمده سماعه التليفون وآلو يا مركز:

- سعادہ المعاون؟.. أنا عمده أبو نجم.. الأمر كيت كيت.

وبعد ساعة زمن كان البيه المعاون على راس قوه كبيره شايلين المشاعل والكلوبات ويبدوروا ع القتل فى جنية أبو سليم.

وتحت شجرة جوافه عجوزه ووسط برکه من الدم الطازه لقيوا جثتين لكلبين كانوا فى حاله حب.

ماحدث فى البلد قدر يدارى الفرحة والشماته.. كل الناس كانت فرحانه باللى حصل.. لكن بعض الناس ومنهم أمى كانت قلوبهم متوغوشه.

- والنبي يابنى أنا قلبى واكلى على عبد الجليل.

- ليه يامه بتقولى كده؟

- تفتكر العمده وشيخ الغفر والمأمور حيسكتوا ع البهدله وقلة القيمه اللى حصلت لهم؟

وقال لها نجم أخويا:

- وإن ماسكتوش يعنى حيعملوا إيه؟

قالت له:

- العمل عمل الله.. لكن برضه الفانس غلب الحارس.

قلت لها:

- ماتخافيش يامه.. ربنا حينصره عليهم.. زى ما نصر النبي ع الكفار.

قالت:

- ربنا يابنى ينصره.. بس أنا برضه خايفه.

وأثبتت الأيام أن خوف أمى كان فى مطرحه.

كان لازم الحكومه ترد اعتبارها وتسترد هيبتها اللى بعترها شبح عبد الجليل فى جنينة أبو سليم.. وف سراية العمده جهزوا الطبخه وحطوها ع النار تستوى جابوا ولد حرامى مواشى ومرشد اسمه أبو جاب الله.. واتفقوا معاه ياخذ بقره ويروح بيها لعبد الجليل بعد صلاة العشا فى الليله الموعوده اللى مافيهاش قمر ويفهمه إنه سارقها وعنده شارى فى العباسه ويطلب منه الحمايه فى الطريق فى مقابل نص ثمن البقره على شرط إن عبد الجليل هو اللى يسحب البقره.. وعند أمينة الطوب المهجوره يتنحج أبو جاب الله ويسيب الباقي على الله لأن السيد أبو دقماق كان قايس جبل البقره وقايس البقره نفسه فإذا تنحج اللى ماسك ديل البقره يضرب هو بالمقاس ولازم يصيب اللى ساحب البقره.. دى لعبته.



وفى الليله الموعوده خبط أبو جاب الله على باب عبد الجليل اللى كان قاعد يتعشى والحقيقه إنه فوجئ بالزياره الغريبه دى!

وبعد الأهلنات وشرب الشاى والذى منه سألته:

- خير يابو جاب الله؟

- كل خير ياعم عبد الجليل. معايا بقره سارقها م العرب وزبونها فى العباسه.

- طيب.. وجاى لى أنا ليه؟

- ما احنا كلنا حمايه ربنا وحمايتك يا عم عبد الجليل.

- هات م الآخر يابو جاب الله.

- تمشى معايا بالبقره للعباسه.. وأول ما ندخل للعباسه أنا اللى ح اسحب البقره وأودبها للزبون.

- وحتدینی کام؟

- النص بالنص يا عم عبد الجليل.

- يفتح الله.

واصفر وش جاب الله واتلجلج حبتين وقال:

- أمال عايز كام يا عم عبد الجليل؟

قال:

- إنت التلت وأنا التلتين.

واتنهد أبو جاب الله وقال:

- اللى تشوفه يا عم عبد الجليل.

قال له:

- روح هات البقره.

وراح المرشد جاب البقره وسلم حبلها لعمه عبد الجليل ومشىوا فى الضلمه على شط ترعة الإسماعيليه قاصدين العباسه اللى تبعد عن الستين حوالى سته كيلو متر وقبل ما يوصلوا لأميته الطوب المهجوره بحوالى ثلاثين متر اندار عبد الجليل على أبو جاب الله والطبنجه فى إيده وقال له:

- إمسك ياد حبل البقره وامشى ساكت.. لو سمعت نفسك ح افرغ فيك الطبنجه.

وامتثل المرشد وسحب البقره ومشى.. وقصاد أمنيته الطوب المهجوره اتنحج عبد الجليل وطلعت الرصاصه من بندقيه أبو دقماق ومعها الصرخه الأخيره بأبو جاب الله وخسرت الشرطه واحد من أصدقائها.

واتأكد سيد أبو دقماق المره دى من موت عبد الجليل بعد ما سمع الصرخه

الأخيره وجرى فى اتجاه الجثه والغفر وراه وعلى بُعد مترين من الجثه فوجئوا بنور الكشاف ضارب فى عينهم وصوت عبد الجليل يقول:

- قتلت راجلك يا سيد.. يا خبيثك.

لا سيد أبو دقماق ولا حد م الغفر نطق بكلمه وضحك عبد الجليل وقال:

- طب سمى عليه بقى وشيله وارميه فى الحلوه.. ترعه الإسماعيليه.. وإن الله حلیم ستار.

وقال سيد أبو دقماق وهو مش مصدق:

- طول عمرى راجل يابو الحاج.. أنا عايز أقعد أنا وإنت فى الوقت والمكان اللى يريحك.. عايزين نصفى اللى بيناتنا.

وضحك عبد الجليل وقال له:

- اللى بيناتنا ما يتصفاش يابو دقماق.. تمام زى اللى بين الديب والغنم.

وقال سيد أبو دقماق للغفير إبراهيم الطيب:

- شيل الواد ده طُشه فى الحلوه.

وقال عبد الجليل بمنتهى الحزم:

- إنت اللى حتطشه فى الحلوه يا سيد.. وامثل أبو دقماق المرعب وشال الجثه وحذفها فى الحلوه وغرقت هدمومه من دم القتل وفوجئ بعبد الجليل بيقول له:

- اقلع الجلابيه وهاتها.

وامثل.. ولف عبد الجليل الجلابيه بدمها وقربها من وش أبو دقماق وقال له:

- لعبت بديلك بديلك تانى.. ح اقطعهمولك.



الفاجومى

السفر إلى الزقازيق

- قعدونى من الكتاب عشان اشتغل «تملى».
- عشر سنين وأنا واحد من غلمان ملجأ الأيتام بالزقازيق وكنت عامل راسى براس عبد الحليم حافظ.
- عدت لعزبة أبو نجم واشتغلت كلاف للبهائم.
- أول مقابلة بينى وبين القاهرة.. أخذنى ليها أخويا محمد ثم طردنى منها بعد ما تسببت له فى مشكله أدت إلى طرده من السكن.

بعد موت أبويا المفاجئ.. طعم الحياه مرر ولونها بهت.. والأحلام الوردية
اصفرت واسودت الدنيا في عين الست أم عبد العزيز وشالت الحمل بدرى..
وسبحان المعين.

كان المفروض إن محمد أخويا يمشى في التعليم العام ويتخرج من الجامعة عشان
يعوض فشل عبد العزيز في الدراسة وموت مديحه - العروسه.. بينما كان طريق
العبد لله حبيداً من كتاب الشيخ أبو عيطه وينتهى بعالمية الأزهر الشريف والعمه
ولقب العالم الجليل لشخصى الضعيف.

ومات أبويا ومحمد في سنه ثانيه إبتدائي في مدرسة أبو حماد وأنا في الكتاب
وكان المنطقي إن محمد أخويا يسبب الدراسة أم مصاريف وأستمر أنا في الكتاب أبو
كيله شعير.. لو المسأله مسأله فلوس يعني. أما بقا لو الحكايه رهان على الحصان سبق
فأنا لها ولا فخر.

أولاً: تدهور العلاقات والنزاع المسلح اللي كان ناشب بيني وبين الشيخ أبو
عيطه ماكانش سببه غبائي ولا تخلفي في الحفظ.. دنا كنت بامسح عشر ألواح في
اليوم بينما أجعص عيل كان يمسح ثلاث ألواح.. المسأله إن فيه عدم استلطاف
متبادل بيني وبين سيدنا لسبب جنونه وشطحاته إلی مالهاش أى مبرر.. وأنا متأكد
إنه بدون الشطحات دى ونوبات الاستظراف اللي كانت بتلبس جتته كان ممكن نبقى
مع بعض زى السمته ع العسل.

ثانياً: محمد أخويا كان مدبلر سنه أولى إبتدائي وعلى وشك الدبلره في سنه ثانيه
بإذن واحد أحد.. لكن اللي حصل إنهم قعدوني من الكتاب عشان أشتغل في
الغيطان تمللى وكان رأى أمى في المسأله دى إن محمد ما يقدرش على شغل الفلاحه
والبهذهله.. لأنه كان وشه أحمر وعنيه زرق وشعره أصفر!

وكانت صفيه أختي اللي هي أكبر من محمد بتساعد عبد العزيز والشوادي ابن
أبويا إبراهيم وأمى زوبه في شغل الغيط.

اندمجت فى حياتى الجديده وبسرعه بقيت جزء من الألعاب اللى يمارسها الأنصار فى أوقات العمل والراحه.. عشقت غنا البنات والولاد واحنا بنشتغل وعشقت لعب السيجه وخط الله معيد معيد وحراميه الدور والمكحوش وحميت بوشه وتلابطنى وصيد السمك من الترع والرشاشيح وحلقات الذكر بالليل والفكه والطاقيه فى اللعب اللى كنا بنلعبها فى لياالى القمر.

الحاجات البسيطة دى كانت هى اللى خلقت علاقه العشق بينى وبين المكان اللى هو عزيه أبو نجم أدفا حضن ضمنى وملاعب الصبا وموطن القلب والروح وبهجة النظر أوقات كنت باقول بينى وبين نفسى:

- الحمد لله إن أبويا مات وماكملتش فى الكتاب وسافرت مصر أدرس فى الأزهر.. ماكتتش قادر على مجرد تصور بعدى عن عزبة أبو نجم.. حتى مولد أبو مسلم اللى كانوا العيال يستعدوا له ويحوشوا له طول السنه.. عمرى مارجته.

كنت خايف أروح المولد ما ارجعش!

كنت عاشق بجنون لكل شىء فى عزبتنا.. إلى أن كان ذات يوم جمعه.. تاريخ ما اعرفشى كام سمعت أمى وهى بتقول بصوت باسم:

- اسم الله ياخويا.. يا مرحبًا يا حلة البركه.

شويه ودخل خالى حسين أبو سماحه.. ابن عم أمى وابن عم أبويا اللى كان بيزورنا فى بيت الزقايق ويسهر عندنا ويلعب أبويا طاولة وكان أبويا بيغلبه دايماً.. المره الوحيدة اللى هو غلب فيها حصلت لى كارته.

- أنا كنت قاعد جنبه وهو بيلعب ويظهر إنه اتفاهل بوشى راح مدينى قرش صاغ مخروم حطيته تحت للخدّه ونمت.. وصبحت الصبح أدورع القرش صاغ؟.. أبلداً.. وصرخت صرخه أثارت الفزع فى البيت وجت أمى جرى من أوضتها وحاولت مديحه أختى تاخذنى فى حضنها رحت عاضضها فى ذراعها صرخت ورمتنى فى الأرض وأخيراً اكتشفنا إن محمد أخويا هو اللى سرق القرش صاغ بشهادة صفيه أختى وقام بدرى.. ودى مش عوايده.. ونزل ع المدرسه وكانت المدرسه فى آخر

الشارع.

ونزلت لك زى المجنون وفضلت أجرى لغايه ما وصلت المدرسه لقيت بوابتها
الحديد الكبيره مفتوحه دخلت لقيت التلاميذ واقفين طابور ومعاهم المدرسين والناظر
ويقولوا نشيد الصباح:

حفظ الله الملك

ورعى الله علاه

ربنا والفضل لك

احمه وانصر حماه

أنا عجبني الغنا وقفت أغنى معاهم وأبصع الناظر.. كان راجل قصير ورجليه
مفرسحه وكان اسمه الأستاذ عبد العزيز القط وأول ما خلص النشيد رحت جارى ع
الناظر وداخل بين رجليه وجايبه بسنانى من لبلوب وركه وحطيت غلى من عملة
محمد أخويا ورحت غارز سنانى فى لحمه.. الراجل صرخ بعزم مافيه:

- يالهُوتى يامه.. حوشونى يا ناس.. الحقونى يا مسلمين.

وفوجئت بريعه بشعه خارجه من مؤخرته رحت ساييه راح واقع على الأرض
مسورق وقلت له:

- إف.. جتك القرف إنت مفسى؟

الأول المدرسين قعدوا يضحكوا وبعدين اتكاتروا علىّ ومسكونى ولما عرفوا
الحكايه حبسونى أنا ومحمد أخويا فى المراحيض لغاية ما جه أبويا استلمنا وما
بطلش ضحك من لحظه ما خرجنا من باب المدرسه وراح حكى لأمى واخواتى وهو
بيضحك وادانى شلن وقعدوا يضحكوا طول النهار.



المهم.. دخل خالى حسين وبعد السلامات ودعوات أمى له بطولة العمر وشرب

القهوه.. بدأ الكلام بينهم يبقى وشوشه وبدأوا يبصولي بإشفاق ويتسموا لي بشكل ما يطمئنتش وفجأه ارتفع صوت خالي حسين يقول لأمي:

- خبر إيه يام عبده ياختي.. وحدي الله أمال.. ابنك في حبة عيني من جوا هو فؤاد مش أخو عفاف؟

بصيت على أمي لقيت وشها غرقان دموع مع إنها ماكانتش بتعيط.. لكن إيه رأيك بقي عمري ما شفت وشها بالجمال ده؟

وقامت أمي وخدتني في حضنها ودخلت أوضتها وقلعتني هدمي ولبستني جلابيه العيد اللي فات والصندل اللي كان أبزيم فردته الشمال مقطوع وضايع.. وقعدت تبص لي من فوق لتحت وباستني وقالت لي:

- اسم النبي حارسك وضامنك.. زي القمر!

وخدتني في حضنتها وضمتني بشده وفضلت تبكي من غير صوت ومسحت دموعها وخرجنا من الأوضه لقينا خالي حسين واقف وأول ما شافني ضحك وقال لي:

- اسم الله على عريس بنتي اسم الله.

راحت أمي واخذتني في حضنها وقالت لخالي حسين:

- يا زين ما أخذت لبنتك يابو عفاف.

وملست على شعري بحنان وقالت:

- دا هو الراجل اللي في ولادي.

وقالت لي:

- إنت حتسافر مع خالك حسين على مدرسة الزقازيق وفي المسامحه حتيجي في حضن أمك هنا.

وسحبني خالي حسين من إيدي وخرجنا عشان أسافر لأول مره وأسيب عزبة أبو

نجم لوحدي.. ما اعرفش إيه جرافي ساعتها.. مشيت جنب خالي حسين ساكت لا
أنا فرحان ولا حزين.. لا أنا موافق ولا رافض.. زى الدبيحه اللى رايحه المجره..
لحد ما وصلنا فم ترعه الملاك وقابلتنا نسمة العصارى شايله صوت العيال بيغنوا
وهما بيشتغلوا فى غيط المدور:

أوحه بقره حاحا

أوحه النطاحه

أوحه حلبت شخبين

أوحه والباقي فين

أوحه شربه الراعى

أوحه والراعى فين

أوحه حدا ابن عمه

أوحه دا وابن عمه

أوحه ما سيّل دمه

أوحه يا دم الشوم

أوحه عدى الفيوم

أوحه فيومه خضرا

أوحه ماعدت طنطا

أوحه طنطا شراقي

أوحه فيها وز عراقى

أوحه ناكل وندبح

أوحه نرمى العضام

أوحه في سوق شاهين

أوحه شاهين ما مات

أوحه خلف بنات

أوحه وبناته تسعه

أوحه إتيهم لسعه

واحد منهم راحت تملا

رجعت حبلتي

قابلها ابن السلطان

قرصه التعبان في كحكوحه

طلع روجه

يا عم ياللي قاعد ع الحيط

إنت حللي ولا ضيف

أنا ضيف ومعايا سيف

باطير روس الظالمين

الظالمين الظالمين

ما قدرتش أمسك نفسي وأنا سامع العيال بيغنوا من غيري ورحت معيط وقايل:

- آه يا حبيبتى يامه.

لقيت خالي خدني في حضنه وفضل يطبطب عليّ وهو يقول:

- خبر إيه يا هايف.. دانت حتروح المدرسه.. وتطلع أفندي زى أبوك عزت

وخالك حسين.. وح أجوزك عفاف بنت خالك.

يوم السبت خدني خالي حسين الصبح وركبنا عربيه حنطور وصلنا للمدرسه
ودخلنا أوضه الناظر راجل قصير وتخين فكرني بالأستاذ عبد العزيز القط.. وبعد ما

خالى حسين شرب القهوه مع الناظر سابنى وخرج.. وخذونى طلعونى ع الدور الثانى قلعونى هدمى ولبسونى بنطلون شورت وقميص كاكى.. وحجزونى فى الدور الثانى لحين بلوغى السن القانونى اللى يسمح لى بنزول فصول الدراسه والورش:

- كانت المدرسه دى هى ملجأ الأيتام بالزقازيق اللى بناه المحسن الكبير عبد اللطيف بك حسنين وهبه اللى كان تمثاله النصفى محطوط على قاعده رخام فى وسط الجنينه اللى فى حوش الملجأ.

من سنه ١٩٣٦ إلى سنه ١٩٤٥ وأنا واحد من غلمان ملجأ الأيتام بالزقازيق الميّه وخمسين.. عنبر ألف ستين غلام وعنبر ب ستين غلام وعنبر ج ثلاثين غلام. أول ليله قضيتها فى الملجأ كانت على سرير نمره واحد فى عنبر ألف وآخر ليله قضيتها كانت على سرير ١٤٩ فى عنبر ج.

يعنى فى خلال عشر سنين جبته من شرقها لمغربها فى الثلاث عنابر وفى الورش بدأت بورشه الأحذيه وحققت فيها فشل باهر وخرجت منها مذموماً مدحوراً بعد ما ضربنى أحمد أفندى سعيد مدرس الورشه بقالب جزم خشب مقاس ٤٤ فى دماغى وأنا قاعد نايم جنبه.. أنا صحيت على ألم رهيب فى دماغى وسمعتة بيقول:

- قوم.. إنت حتشخ جنبى.

بعد كده رحت ورشه التريزه اللى مدرستها محمد أفندى الليثى أبو كرش ضخم وفضلت فيها لغايه ما اتخرجت من الملجأ وأنا مش فاهم طظ من سبحان الله غير جملته اللى كان دائماً يقولها لى كل ما أستأذن منه أروح المراحيض.. يقول لى:

- شخ وأغسل وشك.. «ويروح ضاحك».

حاجتين كان نفسى أعملهم فى الملجأ لكن كل الظروف اتجمعت وشكلت حاجز متعنى من إنى أعملهم.

الحاجه الأولى.. إنى أشارك فى فرقه الموسيقى النحاسيه اللى كان يقودها محمد أفندى ندا.



نجم أمام بوابة ملجأ الأيتام بالزقازيق عند زيارته للملجأ عام ١٩٩٠

الحاجه الثانيه.. إني أشترك في فرقه الموسيقى الوترية اللي كان ييقودها عازف
الكمان الموهوب محمود أفندي حنفي.
يمكن محاولات كلها كانت على استحياء.. بس هو دا أنا دائماً.

وانقضوا العشر سنوات العجاف وما قدرتش أحقق حاجه من الحاجتين دول
صحيح كان عندي إحساس بالظلم وسوء الحظ.. لكن أمتى علمتني من ضمن ما
علمتني إن الخير دائماً فيما اختاره الله.. والحقيقه إن الاعتقاد ده مريح!

عشر سنوات كانت مزدحمه بالأحداث العامه.. على المستوى المحلي استفتحنا
بموت الملك فواد وتنكيس العلم الأخضر أبو هلال وثلاث نجوم وبعدين تتويج الملك
فاروق ملك على مصر والسودان وبلاد النوبه وكردفان ورفع الأعلام ونصب
الزينات والاستبشار بعهد كله رخاء وخير وبركه ومات الملك عاش الملك.. وتعليقاً
على كده أدلى الأسطى محمد الليثى بدلوه فقال:

- اللي مات كلب واللى جاي كلب ابن كلب.. إنما بقى تقول إيه.. دى بلد اللي
يجوز أمتى أقول له ياعمى.

لكن الشيخ إبراهيم الدسوقي اللي كان متعين مدرس عربى فى الملجأ ومانف عش
فعينوه ظابط التعيين فى المطبخ اتهم الاسطى محمد الليثى رئيس الترزيه بالكفر
والإلحاد وقال له:

- دى أفكار ثورجيه وإحنا لازم نطيع الله والرسول وأولى الأمر منا.

ورد عليه محمد الليثى بتهكم:

- والنبي تخليك إنت فى العدس والبصل يا شيخ إبراهيم.. يامصن.

وضحك كل من فى ورشه الترزيه سواء الغلمان أو الصنایعيه اللي كان الملجأ
بيشغلهم بالأجر أحياناً وقال الأسطى ميخائيل أبو قتب:

- أتارينى كل ما باشوف عم الشيخ إبراهيم باعطس.

وثار الشيخ إبراهيم الدسوقي واتهم الأسطى محمد الليثى بأنه موسكوفى
ويسحوى البلشفيك فى ورشه الترزيه وفوجئنا بمحمد أفندى الليثى راح هاجم ع
الشيخ إبراهيم الدسوقي وضربه بالمقص فى رقبتة راح الشيخ إبراهيم واقع فى
الأرض وشالوه ع العياده عند التمرجى محمود المدنى اللي كبس له الجرح تراب

وربطهوله بكم قميص قديم بحجه إن ما عندوش مرهم ولا شاش لأنه ما استلمش العهده.. لكن عبد الحليم أفندى شهوان مدرس الحساب اعتبر إن دى إهانه لكل المدرسين وضرب محمود المدنى بالركبه فى محاشمه واتهمه بتبديد العهده وعملوا له تحقيق وشهد عليه عطيه أفندى المخزنجى وانتهى التحقيق بأنهم نقلوا محمود المدنى المطبخ عند الشيخ إبراهيم الدسوقى وعينوا بداله محمد ناصر مساعد الأسطى محمد الطباخ تمرجى!

من الأحداث العالميه فى عشر سنين الملجأ قيام وانتهاء الحرب العالميه الثانيه وعلى فكره أنا كنت باشجع هتلر وكنت متبنى قضيته بحماس جنونى.. مش عارف ليه لغايه دلوقتى!.. الحاجه اللى عارفها إنى كنت باتمنى إنه ينسل لحم لنجليز زى ما اتمنت إن الكلب هول ينسل لحم كلب كارنو.. لكن الخواجه هتلر خذلتى وسلم فى فبراير سنه ١٩٤٥ ولأن الملك فاروق كان مولود يوم ٢١ فبراير سنه ١٩٢٠.. نفس اليوم اللى اتولد فيه عبد العزيز أخويا.. انتهز الشاعر صالح جودت الفرصه وربط هزيمه هتلر بعيد ميلاد الملك فاروق وكتب غنوه غناها مطرب الملوك والأمراء الأستاذ محمد عبد الوهاب بتقول:

هل السلام فى مواعيدك

زاهر وجميل

بشر الدنيا بعيدك

ياحبيب النيل

وهى أعيادك بمعاد

دى كل أيامك أعياد

وهكذا شهدت العشر سنوات العجاف صعود وسقوط الرايخ الثالث فى ألمانيا الهتلريه.

ومن الأحداث اللى باعتبارها شخصيه فى العشر سنوات إياهم تشریف محمد أخويا للملجأ بعد ما عجزت أمى عن مواصلة دفع مصاريف مدرسة أبو حماد

الابتدائييه ومن الصدف العجيبه إن محمد أخويا وصل الملجأ فى نفس اليوم اللى وصل فيه الغلام عبد الحليم على إسماعيل شبانه من قرية الحلوات مركز ههيا شرقيه واللى بقى بعد كده اسمه عبد الحليم حافظ أهم وأذكى مطرب عربى ظهر فى العصر الحديث بعد عبد الوهاب واللى قدر هو ومجموعه من الفنانين الشبان سمير محجوب ومحمد الموجى وصلاح جاهين وكمال الطويل يخلقوا مدرسه جديده فى الطرب العربى ويفرضوا لأنفسهم مكان على خريطة الموسيقى والغناء فى عصر دولها المطربين وفى عز سطوة وجبروت الملكين أم كلثوم وعبد الوهاب!



ومن حماقاتي إنني كنت عامل راسي براس عبد الحليم اللي كان بيعزف على آلة كلارنيت في فرقة الموسيقى النحاسية بقياده محمد أفندي ندا.. كان يوم مايات محمود أفندي حنفي نوبتشي يجيب الكمنجه ويجيب عبد الحليم وبعد عده تقاسيم ساحره يخلي عبد الحليم يغني وبعدين يجي دوري أغني.. كان عبد الحليم صوته مزيج من صوت أمي وصوت فيروز كان ييقشعر جسمي وأنا باسمعه وكان دائماً يغني حياتي إنت بتاعة عبد الوهاب.. وأنا كنت أغني مادام تحب بتنكر ليه بتاعة أم كلثوم.

أنا طبعاً مازلت مندهش من جرائتي.. إزاي أغني مع عبد الحليم؟!

نفس الدهشه تنسحب على موقف محمود أفندي حنفي اللي كان بيعزف لي بنفس الحماس اللي بيعزف بيه لعبد الحليم.. سبحان الله يرزق الهاجع والناجع والنايم على بت ودنه.

تفضل من أحداث سنين الملجأ.. الحادته الأخيره اللي هي سقوط عصفور الكناريا الطروب عبد الحليم شبانه من فوق الملجأ وإصابته بعدة كسور في ضهره ورجليه إضافه لكسور الركبتين اللي نتجت عن سقوط باب فوقه وهو لسه طفل بيحيى بعيداً عن حضن الأم اللي ماتت وهي بتولده بالبلهارسيا - المرض الفولكلوري للشعب المصري - لكن تشاء الأقدار العجيبه أن ينجو الفتى النحيل اليتيم من كل هذه الحوادث ويخرج من المستشفى على مصر أم الدنيا عشان يعيش في كنف أخوه المطرب إسماعيل شبانه اللي كان بيشغل في معمل أدوية دوش ويلتحق بمعهد الموسيقى العربيه ويتخرج منه عازف على آلة الأبوا وبعدها وبالصدفه البخته يحترف الغناء تحت اسم عبد الحليم حافظ.

سنة ١٩٤٥ وكأناك يابو زيت ما غزيت.. رجعت لحضن عزبه أبو نجم بشوق وفرحه مافكرتش في العشر سنين اللي ضاعوا من عمري أونظه في ملجأ الزقازيق.. كنت مستعد أشتغل أي حاجه عشان ما افارقش البلد.. وكانت فرحة عمري يوم

ماجت عمتي نظله أم إكرام تطلب من أمي إني أشتغل عندهم كلاف للبهائم.. ساعته شفت الانكسار والهزيمة في عنين أمي اللي فوجئت بحماسي للفكره وموافقتي الفوريه عليها.. كان الاتفاق إني أشتغل كلاف بهائم يعنى راعى.. فى البيت والغيط فى مقابل إني أكل واشرب ويجبولى جلابيه زفير فى الصيف وجلابيه كستور فى الشتا ويدوا لأمي خمسين قرش كل شهر! يابلالش.

وكانت أمتع لحظات حياتي لما كنت أروح الصبح أطلع البهائم من الزريه وأنا باغنى بصوت عالى وتصحى إكرام على صوتي وتيجى تصبح على..

أيضاً فى ليالى الخميس من أول كل شهر لما كنا بنسهر مع حفله أم كلثوم وكانت دائماً تقدم فى الوصله الأولى أغنيه معروفه وتخلى الأغنيه الجديده للوصله التانيه وكنت فى الاستراحه بين الوصله التانيه والتالثه أعيد لهم الأغنيه الجديده بحذافيرها وكانت هى تيجى تقعد جنبى وأنا باغنى ودا كان كفايه على وأكثر من الكفايه كمان.

بدأت مواهبى تفتح وأنا على مشارف سن السبعناشر اتعلمت ألعب كره القدم من ولاد عمى الطلبه والموظفين أثناء وجودهم فى العزبه فى الأجازات.. وشويه شويه أصبحت لاعب أساسى فى فريق العزبه وهداف الفريق!

فى المباريات اللى كنا بتقابل فيها مجموعه من فرق داير الناحيه وخصوصاً فريق كفر أبو نجم اللى كانت المنافسه على صداره فرق داير الناحيه بتنحصر بيننا وبينه وكان أهم لاعب فى فريق الكفر هو عبد الحليم أبو حمد ابن عمى.. كان لاعب موهوب جداً فى كره القدم وكان بطل المدارس الثانويه على مستوى القطر فى القفز بالزانه وكان لاعب بنج بنج موهوب وأنا مندهش إنه مالمعش رياضياً رغم إنه التحق بالكلية الحريه واتخرج منها ضابط فى القوات المسلحه.

وفى لعبه - الباط - اللى هى الجودو الفلاحى ماكانش فيه عيل يجيبنى الأرض لا من جيلى ولا من الجيل اللى أكبر.. غريب ابن أم تهامى هو فقط اللى كان بيطلع معايها دائماً - فرش حصير - يعنى تعادل.. وبعد عدة محاولات قررنا أنا وهو مانلاعبش بعض تانى.

وفى صيد السمك كانوا يستبشروا بوشى.. ويستغلوا قدرتى العضليه على نزح أكبر كمية من الميه بالجردل أو الصفيحه لتسهيل عمليه صيد السمك اللى بيبقى قوى جداً فى الميه علاوه على إنى كنت باستغل قوه أعصابى وعضلاتى فى القبض على السمك الكبير والخروج بيه خارج الميه.

وفى لعبه المكحوش كانوا يختاروا لى أضعف فريق وكنا دائماً بنكسب رغم قوة أفراد الفريق المنافس.

وفى العمل كنت صوت الولاد فى أغانى العمل بعد ما حفظت كمية كبيره من الأغانى كنت بارد بيها على أغانى البنات اللى كانت زكيه أم عبد القادر أحلا صوت يغنيها.

بحر من السعاده كنت غرقان فيه لشوشتى فى عزبة أبو نجم.. حتى ضرب عبد العزيز أخويا القاسى كنت بانسأه وبأتحمله مادام مش حيبعدنى عن البلد.

لكن الفقر واستئثار عبد العزيز أخويا بكل شىء جعل استمرار الحياه فى عزبة أبو نجم مستحيل.. صفيه التجوزت فى كفر أبو نجم.. ونجم كبر وبishtغل فى غيط أبويا إبراهيم وعبد العزيز بيشغل كاتب أنفار فى تفتيش الملك وأنا ماقدرتش أستمّر فى خدمة أبويا سليم لندالته الشديده فى التعامل معايا فانتهت علاقتنا بالمشهد التالى:

عصره يوم خميس صيفى وأنا واقف أمام بقالة أبو عبد الله لابس الجلابيه ع اللحم ولابس فى رجلياً - كنجه سودا بتاعه مجدى ابن عمى - والجمهور واقف حوالياً وكلهم بيترجونى أشد حيلى النهارده ويفهمونى إن الآمال كلها معقوده على وأنا بمنتهى الألاطه باوعدهم إننا حنكسب المباره اللى كان فاضل على بدايتها حوالى نص ساعه ودى كانت أول مباراه ألعبها ضد فريق كفر أبو نجم الرهيب اللى كان عقدتنا على مدى الثلاث سنوات الأخيره وقال أبو عبد الله:

- نغلبهم مرّة يا ولاد.

- أنا متظمن مادام فؤاد حيلعب النهارده.

وأنا طائر فى السما وباحكم بالزفه اللى حنعملها بعد الماتش والعيال شايلينى على كتافهم ويبلغوا بيا العزبه وإذا بأبويا سليم جاى شاقق طريقه بين المشجعين وقايل لى:

- إنت واقف ليه؟.. إمشى اسقى البهايم.

بلعت الإهانه وقلت له:

- لسه ساقهم.

قال لى:

- روح اسقيهم تانى.

قلت له:

- لا مش رايح.

قال لى:

طب اقلع الجلاليه اللى أنا لسه جاييها لك.

رحت مالخ الجلاليه وراميهها فى وشه ووقفت عريان وبالكنجه والشراب المخطط.. راحوا العيال مسقفين وشالونى عريان على كتافهم وودونى الملعب لقيت فريقى وفريق الكفر فى انتظارى وأول ماشافونى انفجروا بالضحك وقال لهم غريب:

- هى دى الخطه الجديده اللى حنلا بكم بيها ونغلبكو!

ورد عبد الحميد ابن عمى كابتن فريق الكفر وقال:

- أنا عندى شورت خد ألبسه.

قلت له:

- لآ.. أنا حلعب عريان.

قال لى:

- لا.. أنا خايف على روحى من الفتنة «وضحكننا».

ودى كانت نهايه علاقه العمل اللى بينى وبين أبويا سليم.





فى الفتره دى كان محمد أخويا اتخرج من الملجأ بعد ما اتعلم العزف على آلة السكسفون فى فرقته الموسيقى النحاسيه واتعلم فى ورشه الطباعة وسافر على مصر اشتغل فى مطبعه مصر وفى أثناء إحدى زياراته للبلد أمى اشتكت له من سوء الحال ومن عدم وجودى فى عمل دايم فقرر إنه ياخذنى معاه مصر أم الدنيا وعلى قد ما كنت فرحان إنى ح اشوف الترمای وقصر عابدين على قد ما كنت حزين على فراق البلد.

وفى أول مقابله بينى وبين القاهره حسيت بالخوف!

دوامه رهيبه والناس جواها زى القش والتراب جواً فسية العفريت.. اشتغلت ترزى عند الأسطى أبوسريع فى التربيعة.. كان متجوز اتنين وبيافين عشان يلاحق عليهم وكان بيدبني خمسه تعريفه فى اليوم من تمانيه صباحاً لغاية اتناشر نص الليل.. سبته واشتغلت فى مصنع غزل عند واحد خواجه فى كلوت بيه وحرصت مظاهرات سنه ١٩٤٦.. وكنت أيامها بابيع ظروف وجوابات فى الترمای واتعلمت أنط من ع الشمال وأنزل وش دى كانت فرصه قدامى عشان أشارك فى المظاهرات وأنا فى منتهى السعاده وكان ميدان التحرير اسمه ميدان الإسماعيليه وكان فيه معسكر إنجليزى مكان الجامعه العربيه وفندق هيلتون.. كانت المظاهره تبدأ من الأزهر الشريف ندخل الأول نسمع الخطب الوطنيه المتهبه من القسس والمشايخ.. وبعدين نخرج نقبل ترمای ١٩ بتاع شارع الأزهر وتنطلق فى اتجاه العتبه الخضراء ثم شارع عبد العزيز ثم شارع الساحه ثم شارع باب اللوق ثم ميدان الإسماعيليه ونفضل نضرب لانجليز بالطوب لغاية ما بيدأوا هما يضربونا بالرصاص فنطلع نجرى على سراية عابدين نشتم الملك والانجليز والأحزاب ونروح بعد ما نتواعد على بكره فى نفس الميعاد والمكان.

- الصبح فى الأزهر.. جوا الجامع.. ماحدش يتأخريا رجاله.

ومن الهتافات الظريفه التى علقت فى دماغى لوقتنا هذا:

- الجلاء بالدماء.. اليوم حرام فيه العلم.. مصر والسودان لنا وإنجلترا إن أمكننا..

ساعدونا يا عساكر.. بائع الأوطان كافر.

دى كنا نقولها لما تشوف عساكر الدرجه التانيه جاينين بالحدود والخزان التخين
والدروع.. يروح واحد قايل:

- أبو الليف وصل.

نروح قايلين على طول:

- ساعدونا يا عساكر.

والغريب فى الأمر إنهم أول ما كانوا يسمعون الهتاف ده ماكانوش يهجموا.. ومره
عسكرى سقّف لنا والظابط ضربه على قفاه فقعدنا نشتم فى الظابط لحد ما مسك
العسكرى باس على راسه وحضنه راحوا كل العساكر والمظاهره مسقفين.

ومن أطرف الحاجات اللى شفتها راجل صنايعى بيصلح بوابير الجاز شايلىته
وماسك وابور لحام مولع وبيهتف واحنا وراه:

- يا الجلاء يا الحريقه.. يا الحريقه. يا الحريقه يا الجلاء.

كنا ساكنين أنا ومحمد أخويا فى عطفه ندا فى الحسينيه فى مطرح مفروش ع
السطح وفيه دوره ميه مستقله وكانوا واخدين علينا قايمه بمحتويات مطرح اللى هى
سرير بواحد مرتبه وواحد مخده وواحد لحاف وكتبه بلدى بواحد مرتبه واثنين مسند
وواحد ملايه وواحد وابور جاز وواحد طشت غسيل وواحد زير بواحد حماله
وواحد قله بواحد غطا نحاس فى واحد صينيّه نحاس وواحد براد شاي صاج بواحد
كبايه قزاز ياسين م الأصلى وكان إيجار مطرح خمستاشر قرش تدفع بإيصال كل
أول شهر وكانت صاحبه البيت اسمها أم مُلعب وكانت ساكنه مع بنتها مُلعب فى
الدور الأرضى وكانت هى مرافقه المعلم عيد بلاص صاحب القهوة وبنتها مرافقه
بيومى الطرشجى وف ذات ليله قعدوا الأربعة سوى مع بعض وقاموا دوروا الضرب
فى بعض وكنت أنا لوحدى فى مطرح لأن محمد كان بايت بره وفوجئت بـخبط
شديد ع الباب قمت أفتح لقيت مُلعب عريانه ملط أول ما فتحت الباب راحت
زقانى وداخله وقالت لى:

- إحميني لو كنت راجل.. إحميني الله يستر عرضك.. ابن الكلب عايز يقتلني.
وراحت طالعه ع السرير ومتغطيه باللحاف.. أنا الدم سخن فى دماغى وخدتنى
نخوة الشراقوه.. وفوراً استحضرت سيره عنتر بن شداد وإزاي كان يحمى الحریم
حباً فى سواد عيون حبيته عبله بنت مالك وتذكرت إكرام فزعقت بعلو صوتى:
- أنا.. أنا.. أنا.. أنا.


ولما مالقيتش كلام أقوله استلفت كلام من عنتر بن شداد فصرخت تانى:
- أنا الموت الأحمر.. أنا الأسد الغضنفر.. أنا المدعو بعنتر.
وباضرب بعينى لقيت الطرشجى واقف ع الباب ولابس فائله بس وماسك فى
إيده رقبة قزازه وقال لى بصوت سكران:
- فىن الوليه؟
قلت له:

- اتفضل يا عم بيومى.
ومن حسن حظه إنى كنت حاطط البراد ع الوابور قبل ما تطلع مُلعب عشان
اشرب شاي وأبص ألاقى الميه بتغلى رحت جايب البراد من ع الوابور وزاعق بعلو
صوتى:

- هل من مبارز؟ هل من مناجز اليوم يوم الهزاهز.
ورحت ملبس البراد بالميه السخنه فى خلخته راح صارخ:
- عيني ضاعت.

ونزل ع السلم - يعوى زى الكلب اللى كل قالب طوب فى راس قلبه - وقبل ما
استوعب اللى حصل سمعت ضحكه مُلعب أم ديل ولقيتها رفعت طرف اللحاف
وقالت لى:

- تعالى.. تعالى هنا ف حضنى.. دانت عليك كلام ولا بتوع التياترو.



قلت لها:

- استنى بقى لما نشوف المصيه دى حترسى على إيه.

ضحكت وقالت لى:

- إنت خايف يا أفلاحوكش؟.. ما تخافش طول ما إنت ف حضنى.. دنا مُلعب

والأجر على الله.. تعالى بقى وخليك راجل على طول.

ودى كانت أول تجربه فى حياتى.. بس يا خساره ما طولتش لأنه تانى يوم ومحمد أخويا راجع من الشغل اصطادوه عمال معمل الطرشى وجروه على جوا المعمل وفضلوا يضربوا فيه لحد ما خلوا بربره دم وكسروا درج النقدية وشيلوهوله وزفوه لغايه نقطه الحسينيه وهناك عرض المعلم بيومى إنه يتنازل عن المحضر على شرط تعزّل من البيت.. وماكانش قدام محمد غير إنه يقبل وخرجوا من النقطه.. الحاج بيومى على معمله.. ومحمد أخويا ع البيت لقينى.. أول ما بص فى وشى قال لى:

- إنت لسه هنا يا نجس؟

أنا شفت منظره المشلف وعنيه اللى الشر بينط منها خدت السلالم أربعات وهو ورايا وكل ما إيده تطول حاجه يحدفنى بيها وفضل يطاردنى زى الكلب الجربان لغاية ميدان باب الشعريه ولما تعب وقف وقال لى بعلو صوته:

- على أملك يابن الكلب يا نجس.. وإياك تعتب هنا تانى.

أنا قلت فى عقل بالى:

- بركه يا جامع.. وملعون أبوكى يا مصر.. وأبو اللى عايز يرجع لك تانى.

واتجهت إلى شبرا البلد وأول ما رجلى طالت شط الترعه الإسماعيليه حسيت إنى طائر من الفرح.. طائر وباتمنى آخذ الطريق فى خطوه واحده عشان أرجع للحمى تانى.. وحسيت بالانتصار على كل الظروف اللى بتحاول تبعدنى عن الحظن الدافى الحنين.. عزبة أبو نجم.. وطنى الحبيب الجميل.. ورجعت ماشى.



وقدرت أمدى تجيب لى واسطه من أبويا عطيه أبو إبراهيم ريس الأنفار فى عريشة عشرين فى تفتيش الوادى اللى مساحته أربعة وعشرين ألف فدان ممتده من العباسه الكبيره حتى التل الكبير وكل المساحه دى بما عليها ومن عليها من زرع وضرع وبنى آدمين كانت ملك جلاله الملك فاروق الأول ملك مصر والسودان وبلاد النوبه وكردفان!

وكانت عريشة عشرين تبعد عن عزبتنا سبعة كيلومتر كنت باقطعهم يومياً رايح

جای ماشی علی رجلیا!

أول يوم استلمت شغلی رحت العريشه كتبت اسمی وقالوا لی:

- روح علی غیظ الرزّ الرشاح الكبير وانزل مع الانفار نقی الرزّ.

مشیت علی الرشاح الكبير فی اتجاه الانفار ولما بقی بینی وبينهم حوالی خمس مینتر بدأت أسمع غناهم الجماعی وفجأه شفت بعینی صوت ساحر جای علی وش المیه.. صوت یمامه بتغنی وهما یردوا علیها:

هی: یاجمیل لمه ودا قمحک اللی بدرته

هما: یاجمیل لمه ودا قمحک اللی بدرته

هی: یا جمیل لمه والبنت قالت لأبوها

ما اختشیت منه توب الحیا یا بابا داب

والنهد بان منه

وإن كنت عایز تصون

العرض وتلمه

ما تجوز البنت للی

عینها منه

ودا قمحک اللی بدرته

هما: یاجمیل لمه ودا قمحک اللی بدرته

مشیت ع الصوت لغایه ما وصلت الانفار قلت للخولی:

- أنا فؤاد أبو عزت.

قال لی:

- إندلی التریعه مع الانفار یابن (...).

بلعت الإهانة لأنى كنت عايز أشوف صاحبة الصوت اللى جرجرنى من العريشه
لغاية ما جابنى هنا.. نزلت التربيعة وبدأت أمشى مع الصف وفجأه بدأ الغنا:

ع الزراعيه

وأنا رحت أقابل حبیبى

ع الزراعيه

وأنا خدت بختى ونصیبى

أهه.. جوز عيون بقرى فيهم الليل والنهار.. وفيهم ابتسامه حنان تطرد الغضب
وتجلب الرضا والفرح.. حسيت إنها بتقصدنى بعبارة وأنا خدت بختى ونصیبى
واتأكدت لما عادت الغنا م الأول وهى بتبص لى وتبتسم الابتسامه اللى تدوب وتموت
وتحى.. كان اسمها هنومه أم اسماعين.. ولقيت نفسى باقول بأحلا صوت إداهونى
ربنا:

ساعه سعيده

سعى قدمى

وراح ليكم

إنتو الحبايب

وشرب الراح

راح ليكم

راحت هنومه مزغرطه والبنات وراها راحوا الولاد قايلين هيبه.. يدوم الحماس
يابو عزت وفجأه دب النشاط فى الأنفاس لدرجه إننا خلصنا المقطوعيه قبل معادها
بساعه وربع ودا كان معناه إنى نجحت فى الاختبار بدرجه امتياز.



طاب لى الزمان واستطاب واحلوت الأيام ولا ابتسامه متيم جاد لها الحبيب
بالوصال.. الصبح أصحى مشتاق لشقا الغيط والغنا والضحير أفرح بالتقييله تحت

ضل الشجر ولعب الباط وآخر النهار أبقي متلهف ع المرواح وحضن أمى الدافى
والعشا كانت أى حاجه بتعملها بيبقى لها طعم جميل .. لو حتى حنة جنبه قریش
بالزيت والطماطم وكانت وهى بتحط لى الأكل تحسنى برجولتى وترضى غرورى
وأبقى قاعد نافش ريشى زى الديك الرومى ! وبعد العشا كنت أطير ع الرملية عشان
يكون لى شرف النداء لى كنا بنلم بيه العيال:

طق المغزل

تانى تانى

يا حلاوه

بين أستاذنى

يا محلا قوله هيبه

يروحو العيال لى لسه قاعدين ع الطبالى مجاوبين:

- هيبه.

وبعد ما نتلم فى الرملية أوالعلوايه نحدد اللعب حسب الأحوال الجويه .. لو الليله
قمر نلعب الحكشه أو الباط أو السيجه أو كورة القدم خصوصاً إذا كان موجود حد
من الطلبة وعنده كوره كفر ثمره خمسه ولو الليله ضلمه نلعب حرامية الدور أو
الطاقيه فى اللعب وآه من ليالى رمضان وسحرها فى عزبه أبو نجم.

كانوا المتيسرين يسهروا مقرئين ومنشدين طول الشهر الكريم .. وكانت عزبتنا
واحد وعشرين بيت بيسهر فيها عشره منها فى المتوسط كانوا بيخلوا العزبة زى عش
العصافير .. قبل المغرب يطلعوا ع الأسطح يقولوا التراتيل الجميله لغايه موعد الأذان
وبعدين يآدنوا وبعد الفطار يروحوا الجامع يصلوا المغرب والعشا والتراويح فى
مهرجان من النغم الساحر وبعدين كل واحد يروح ع البيت اللى هو سهران فيه يقرا
لغاية قبل موعد السحور يروحوا طالعين ع الأسطح تانى وينشدوا الأدعية والتراويل
الجميله وبعد السحور يطلعوا الجامع يصلوا الفجر ويروحوا يناموا ويرجعوا الجامع
فى صلاه العصر وبعد الصلاه يملوا الجامع نغم ساحر مضاف لحلاوه القرآن وجلاله

وكانت المنافسة بينهم بتكون دائماً في صالح المستمعين.

وكان فقى العمده هو عمدة الفقها عن جداره.. كان اسمه الشيخ إمام محمد طه.. وكان من بلبس.. كان منشد عظيم وكان بالإضافة إلى قراءه القرآن بيغنى الموشحات الجميله وكان بيأديها باقتدار وكان يمسك الإيقاع بالسبحه والعصايه وكان دائماً يختار قصائد المنشد العظيم الشيخ على محمود أو بعض أغاني أم كلثوم اللي لحنها الشيخ زكريا أحمد.

الراجل ده أنا كنت باعشقه وكنت دائماً لازق له وكان هو سعيد بكده رغم صغر سنى وتفاهه شأنى.. وكان ده أول صوت موسيقى يدخل من سمعى إلى وجدانى ويشبعنى بالمتعة الروحيه اللي حددت نوع الثقافه الفنيه اللي حصلت لها بعد كده باختيارى واجتهادى الشخصى.

وكان فيه الشيخ سلامه اللي كان أبويا سليم بيسهره كل رمضان وكان إلى جانب قراءة القرآن عازف عود جميل وذات ليلة كان الشيخ إمام مسافر رحت سهرت مع الشيخ سلامه.. وليلتها لحسن حظى عزف الشيخ سلامه على العود وغنى موال لك يا زمان العجب.. والحقيقه إنه أبدع لدرجة إنى عملت مقارنة بينه وبين الشيخ إمام ولأنى كنت متحيز للشيخ إمام قلت لنفسى:

- لازم نطلع العود والسبحه والعصايه ونقارن بين الصوتين.

فى هذه اللحظه بدأ الشيخ سلامه يغنى شبيكى لبيكى عبد وملك إديكى.. وأنا رأيى إنها من أرق وألطف ما كتب البديع عمنا العظيم بديع خيرى:

أنا اراهن بعيناً

ومؤكد كسبانه

فى الأصل إنتى حوريه

م الجنه وهربانه

سهيتى رضوان

وفتحتي الفردوس

مين قال دول أجفان

دا التبل

ودا القوس

يا حواجبك يا عنيكى

شبيكى.. لبيكى

فيه أحلى ولا أرق من كده؟.. الله يرحمك يا عم بديع.

العيال كبرت وكبر جواها الإحساس بالظلم والتفاوت الاجتماعى الى مالوش
أى تبرير مقنع.. وبدأ كلام أبويا على الشمروخ يتحول من نواذر تشير الضحك
والسخريه إلى دروس تثير التساؤل؟.. وبدأ عبد الجليل لاقرع.. يتحول من بطل
أسطورى خارق إلى نموذج ممكن تكراره.

وفى ذات ليله مظلمه فوجئ الجالسون أمام دكان أبوعبد الله على الكلوب
بسيل من الرصاص حطم الكلوب وأثار الذعر لدرجه إن أحد الخفراء النظاميين
مسك البندقية بالقلوب وكان هيضرب نفسه.. وبعد الليله دى بدأت سلسله من
السطو على بيوت وحقول الأغنياء وأولهم سراية العمده ذات نفسه.

واضطر أبو عبد الله - أبوالبناات - إنه يحتمى بأحمد أبوهنداوى ونجم أخويا..
كل ليله يسهروا معاه يتعشوا ويحششوا وأحياناً يشربوا الروم والنبيت.

وكان بيشيل فلومه فى مكتب بخمس أدراج رزم مأسكته وعلى كل رزومه ورقه
مكتوب عليها قيمه المبلغ ولما كان يسحب أى مبلغ من أى رزومه ينزله ويطرحة من
أصل المبلغ ويكتب الباقي.

وفطن حماة الحمى للعمليه فبقى واحد منهم يدعى إنه محصور ويقوم بفك
حصر فيدخل ع الأوضه اللى فيها المكتب ويسحب مبلغ ويطرحة ويكتب حاصل
الطرح ع الورقه ويظهر إنهم سحبوا بافترا لدرجه إن أبو عبد الله هرش فبدأ يراجع

عمليات الطرح اكتشف إن دا مش خطه يعمل إيه؟ .. إذا واجههم ماعندوش دليل ضدهم وعليه بعد كده إنه يتحمل نتيجة اتهامهم بالباطل .. وإذا سكت بيته حينئذ .. وهده تفكيره إلى طريقه جهنميه تلخصت في إنه سقاهاهم ذات ليلة كميات مهوله من الخمره والحشيش ولما تصور إنهم فقدوا وعيهم سألهم:

- قوللى ياسى محمد إنت وسى نجم.

قالوا له:

- خير يا أبو عبد الله؟

قال لهم:

- هو الفار بياكل الفلوس؟

وكأنه رمى جبل النجاه فردوا في نفس واحد:

- طبعاً.. الفار بياكل الفلوس.

قال لهم:

- آمنت بالله.. لكن الفار بيكتب؟ .. يعنى الفلوس اللى بياكلها بينزلها من أصل

المبلغ؟

ورد عليه أحمد أبو هندأوى بمنتهى الهدوء:

- أمال.. مش الفيران بنى آدمين زينا وفيهم فيران متعلمه.

وقلع أبو عبد الله البُلغه وقعد يضرب نفسه على دماغه لحد ما أغمى عليه.

اتغيرت الخريطة السكانيه فى البلده لعدده أسباب.

أولاً: دخول عنصر جديد على الخلطه البشريه الموجوده على أرض عزبه أبو نجم وزماماتها.. كان عنصر أوروبأوى قوامه الأسرى الألمان اللى هربوا من معسكرات الإنجليز حتى بعد نهايه الحرب واحتمال عودتهم للوطن.. والحقيقه إن العزب والكفور والبلاد المحيطه بمعسكرات الإنجليز فتحت أحضانها وقلوبها للأسرى الهريانيين واستقبلتهم بكل حب وكرم المصريين وكراهيتهم للإنجليز لدرجه إن أغلبهم

أشهر إسلامه وانجوز وعاش واندمج في حياه الريف المصرى .

كان نصيب عزيتنا من العنصر الأوروبى ثلاثة اتنين ألمان وواحد طليانى لتنين الألمان اللى هما بوبى وهانتز اشتغلوا فى أرض أبويا عثمان وأثبتوا إنهم فلاحين إيديهم خضرا وكانت الناس بتروح تتفرج على زراعتهم وتستعجب أما الثالث اللى هو باولوا الطليانى فطلع صايح لأنه مارضيش يشتغل فى أى مكان قريب من سراية العمده ونزل عزبة التمانين اللى تبعد عن عزبتنا حوالى أربعة كيلومتر واشتغل عند واحد فلاح انجوز بنته بعد ما أشهر إسلامه وسمى نفسه محمد المهدى.. وإيه رأيك إن باولو ده طلع هو الوحيد اللى بيّفهم لأن أول خلاف حصل بين العمده وأخوه الكبير عثمان كان ضحيته بوبى وهانتز والغريب إن اللى بلغ عنهم هو أبويا عثمان ذات نفسه قبل العمده ما يسبقه وجم لنجليز والبوليس المصرى خدوهم فى الحديد بعد ما ضاعت توسلاتهم للظابط المصرى فى الهوا.

ماكانوش عاوزين يرجعوا بلادهم وبقوا يعيطوا زى الأطفال واحنا واقفين نعيط على عياطهم وقال بوبى لفصيل أفندى الظابط المصرى:

- أنا موش بوبى.. أنا مهمود.. أنا موش ألمانى أنا مسلمان.

راحت بهيه أم على راقعه بالصوت راحوا كل النسوان مصوتين وراحوا الغفرا نازلين فينا ضرب بالحززان رحنا جارين وقعدنا نضرب فيهم بالطوب راحوا راجعين جرى احتموا فى عربيه لنجليز يقوم يشاء السميع العليم إن بوبى هو اللى يتعور ودمه يسيح راح عايص إيده دم وطابعها على صندوق البوسته وبعد كده كان أحمد أبونجم الغفير يحلف بالطلاق إنه كل ليله بيشفوف عفريت بوبى مطلع دماغه من صندوق البوسته ويقول:

- أنا موش بوبى.. أنا مهمود.. أنا موش ألمانى.. أنا مسلمان.



مرت الأيام هنيه بكل ما فيها من متاعب وفقر وجوع وشقا.. ليه بقى؟

لأنى كنت راضى بمجرد وجودى فى البلد.. ومادام ده اختيارى فكان لازم أتحمّل

مستوليته بمنتهى السعاده.

كان آخر مشهد مهم شفته فى البلد هو مشهد سعيد المجنون ابن خالتي منيره وهو واقف على طريق المعاهده تانى بر الحلوه ويهتف لمجموعه من سيارات اللورى التابعه للجيش المصرى محمله بالجنود والعتاد ومتجهه ناحيه الإسمااعيليه:

- إلى سحق الصهيونيه أيها الأبطال.

ماهانش على أسيبه واقف ع البر التانى يهتف لوحده رحت قالع الجلابيه ومعدى الحلوه عايم وطلعت ع البر التانى وانضميت له من غير ماياخذ باله وفوجئ بى باهتف معاه وأنا واقف ملط:

- إلى سحق الصهيونيه أيها الأبطال.

بص لى وضحك وقال لى:

- تعالى جنبى هنا يا بطل.

فقربت منه وإذا بيه يرزعنى قلمين طيروا الشرار من عنيه وقال لى:

- إمشى البس هدومك وتعالى اهتف للأبطال.

كلت القلمين ورجعت غديت الحلوه وأول ما وصلت البر التانى زعقت عليه:

- يا سعيد يا مجنون.. والله ما أنا هاتف معاك خليك زى الكلب لوحداك.

قال لى:

- كده.. طيب وحياة أمك هانم.. لو إيدى مسكتك لأركبك العفاريت.

وساب الهتاف وقعد يضربنى بالطوب من البر التانى وأنا أرد عليه بالطوب وأشخر له!



فوجئنا ذات عصره بحضور محمد أخويا فى أبهى صورهِ رأيتهُ عليها طول عمرى.. البدله الشر كسكين البيضاً والجزمه الشمواه وكانت أول مره فى حياتى

أشوف الشرابات التايلون وراشق منديل حرير أحمر في جيب الصدر.. وراح معكم
أمي مبلغ شديد الشئ حاولت أحده لكن ما أمكنش وبعد ما هزأني شويه قال لنا إن
ربنا فتح عليه نتيجة دعا أمه ويشغل دلوقتى عند الانجليز ويلعب بالفلوس لعب..
وقعد يعايرني بخيبتى ويتنبأ لى بمستقبل مظلم نتيجة غضب أمي على.. وبعدين قال
لى:

- أنا سايب فلوس مع نينه عشان تشتري لك شويه لبس وتيجنى ع العنوان اللي ح
اسيهولك ودى آخر فرصه ح اديهالك.. بس إياك تنفع بقى.



الفاجومي

أصبحت الرفيق نجم

- اشتغلت في معسكرات الانجليز بمنطقة الاسماعيلية.
- تعرفت على الشيوعيين على يوفيه في فايد ١٩٥١.
- عيال الاسماعيلية سرقوا سلاح الانجليز بالنجده والقيطان.
- ٨٠ ألف رفضوا العمل مع الانجليز فعينتهم الحكومة تحت بند زائدين عن الحاجة.

وراح قايم عبد العزيز أخويا رازعنى أربع تقلام عشان أ نفع ! أثاره يا سيدى كان منشن على جوز شراب نايلون من محمد وبالحركة دى نال المراد من رب العباد.

وفى خلال أسبوع كانت رجلى بتخطى عتبه أول معسكر إنجليزى دخلته وهو معسكر عائلات الطيارين الإنجليز بفناره المينا.. واشتغلت عند الأسطى حمامه الترزى فتره اكتسبت فيها بعض الخبرة فى الصنعه وبعد كده اشتغلت فى مجموعه من معسكرات الاحتلال فى منطقة القنال كانت أهم محطه فيها مدينه الإسماعيليه الجميله.. سكنت فى شارع الفن الشهير وشتت بعينى الأطفال وهما بيخطفوا سلاح العساكر لنجليز فى عز النهار! كان العيل يضرب النحله أم قطان فى الأرض تنزل دايره وبعدين يشقظها على كف إيده ويشقظها للعسكرى الإنجليزى على كفه وهى دايره برضه ويقول له:

- تعرف تعمل كده؟

العسكرى يركن سلاحه ويمسك النحله القطان عليها ويضربها فى الأرض ممكن ينجح وممكن يفشل وفى الحالتين يعاود المحاوله باطمئنان وفجأه وأثناء انهماكه فى لف القطان على النحله يختفى العيل ومعه سلاح العسكرى.

وعاشرت فى شارع الفن أبطال المقاومه الشعبيه المجهولين.. حنيدق وطه وعباس ودول أشقاء ومعاهم الباشا وحسين حافظ اللى كان عنده عربيه رولزرويس زى المارشال اللى هو قائد قوات الاحتلال ذات نفسه.. وشتت عزت السواق شهيد شارع الفن قبل ما يقتلوه لنجليز فى المعركه اللى دارت بينهم وبين شارع الفن فى شارع محمد على. واللى بلغت فيها خسائر الانجليز حد أجبرهم على سد هويس أبو جاموس لانتشال الجثث من الترعه الإسماعيليه.

وأثناء حصر قوات البوليس المصرى داخل مبنى المحافظه وقفوا ولاد شارع الفن

وقفه فرسان وبقوا يهربوا الأكل والشرب والأسلحه والذخيره للمحاصرين.. ودى صفحه سريه مجيده من تاريخ كفاح الشعب المصرى الخالد ضد الاحتلال.

ومع بدايات سنه ١٩٥١ كنت فى فايد اللى كانت مركز تجمع لكل القوى السياسيه العماليه وكانت أماكن اللقاء عباره عن مجموعه من المقاهى.. قهوه أحمد عبد النبى بتاعة الوفد وقهوه تانيه للمستقلين ومصر الفتاه وقهوه تالته للإخوان والمستقلين وكان فيه ورا البلد قهوه صغيره اسمها بوفيه كامل كانوا بيقتعدوا عليها الشيوعيين وكانت الحركه الوطنيه فى حاله غليان وكانت الصحافه المصريه عباره عن منشورات وطنيه ملتبهه.

وتصاعدت مقاومه الفلاحين المصريين ضد طغيان الإقطاع - الحليف الأول للإنجليز - وقدمت حركه الفلاحين المصريين مجموعه من الشهداء الأبرار كان أشهرهم الشهيد عنانى عواد شهيد قرية بهوت.

وركزت الصحافه المصريه بما فيها صحافه حكومة الوفد هجومها على الإنجليز وفساد القصر الملكى - الحليف الثانى للإنجليز - وعبث الأميرات شقيقات الملك ومجون أمه الملكه السابقه نازلى.

وكان فرسان القلم فى ذاك الزمان مجموعه من الكتّاب الأفذاذ أذكر منهم على سبيل المثال الأساتذء.. فتحى رضوان وسيد قطب وأحمد حسين وإبراهيم شكرى ومحمد عصفور وأبو الخير نجيب وعبد الرحمن الخميس وسعد مكاوى وفتحى الرملى رئيس تحرير جريده الملايين الشيوعيه اللى كانت بتصدر أسبوعيه بترخيص من الحكومه.. وأحمد أبو الفتوح وعزيز فهمى الشاب الذى مات غرقاً فى ظروف غامضه كتلك التى راحت ضحيتها المطربه أسمهان مع الفارق فى التشبيه.

وفى هذه الأثناء كانوا أهم شخصيتين فى مدينه فايد هما سامبو بتاع الجرايد واليوزباشى سيد الحولى معاون نقطه بوليس فايد واللى كان بيشاع عنه إنه وفدى الميول.

أيامها كانت مصر حبلى بشىء.. يمكن مالوش ملامح.. لكن الحمل كان أكيد

صحيح وواضح.. وكل الناس من كل الجهات وعلى جميع درجات السلم الاجتماعى كانوا يسيئون وكانهم كانوا متواعدين عند لحظة الميلاد.

وقعدت مصر كلها جنب الراديو يوم عشره أكتوبر ١٩٥١.

كانت مصر على موعد مع خطاب رئيس الحكومه وزعيم الأمة مصطفى النحاس باشا.

كان الوعد الأكبر والمهمه الرئيسيه لحكومة الوفد هي القضية الوطنيه اللى فشلت فى حلها سياسات المفاوضات والنفس الطويل.. وبدأت الحركة الشعبيه بالفعل مرحلة الكفاح المسلح ضد الوجود الإنجليزى على أرض مصر وقدم الشعب المصرى كوكبه من أجمل وأنبأ أبناءه شهداء على شرف مصر وتحررها ومستقبلها.. من شباب الجامعات الشهداء الأبرار عمر شاهين.. وأحمد المنيسى.. وعباس الأعسر.. ومن ضباط الجيش الشهيد طيار أحمد عصمت ومن عمال مصر مجموعه من الشهداء ما زالت مجهوله العدد والأسماء مع الأسف الشديد.

وبدأ خطاب النحاس باشا الساعه ثمانيه مساء وبعد الديباجه والمقدمه فوجئ المستمعون بالشيخ اللى أشرف على سن السبعين بيزأر زى الأسد:

- حضرات الشيوخ.. حضرات النواب.. من أجل مصر وقعت معاهدة سنة ١٩٣٦ ومن أجل مصر.. أطلبكم اليوم بإلغائها.

وكان فقره دى كانت سيم بين أهل مصر.. انفجرت المظاهرات العارمه فى كل أنحاء مصر المحروسه حتى فى قلب عرين الأسد البريطانى.. فى كل مدن وقرى منطقة القنال المحتله وفى مدينة فايد بالذات انتظم الجميع على اختلاف اتجاهاتهم السياسيه فى مظاهره ضخمة وهتفوا بسقوط الاستعمار وأعوانه وطالبوا بسرعة فتح معسكرات التدريب العسكرى أمام المتطوعين وتشكيل لجان مشتركه من جميع الأحزاب لتنظيم عمليه مقاطعه العمال المصريين «ثمانين ألف» لمعسكرات الاحتلال.. ثمانين ألف عامل مصرى تركوا العمل بمعسكرات الاحتلال فوراً وقبل ما يوافق البرلمان على طلب النحاس باشا بإلغاء معاهده سنه ١٩٣٦ من أجل مصر.

علمًا بأن رزق العيال والقوت الضروري كان الحصول عليه مرتبطاً عضوياً بوجود الإنجليز في منطقته القتال أو أي منطقته على أرض الوطن.

ثاني يوم الصبح كنا قاعدين على بوفيه كامل وكانت المناقشات على ودنه.. طرحوا كافة التصورات ودرسوا كافة الاحتمالات والحقيقة أن المناقشة كانت بتدار بشكل ديمقراطي وكانت بالنسبة لي ممتعة إلى حد بعيد.

وعلى فكره أنا كنت واحد من بين ثلاثة أربعه مسموح لهم بارتياح بوفيه كامل وهما ليسوا شيوعيين: ليه بقي؟

- أنا كنت من حوالي ثلاث شهور اقتحمت بوفيه كامل بدون إحرم ولا دستور وسألت القاعدين بصوت عالي:

- فين الشيوعيين اللي هنا؟

وبعد فتره صمت وارتباك سألتني واحد منهم:

- إنت مين؟

قلت له بدون تردد:

- أنا أسمى فؤاد عزت نجم وباشتغل ترزي في مطار فايد.

قال لي:

- وبتسأل عن الشيوعيين ليه؟

قلت له:

- أصل أنا عايز أحسن الشيوعيه.

وانفجر الجميع بالضحك وحتبدأ التعليقات لكن الراجل اللي كان بيكلمني بص لهم بصفه أسكتتهم وقام سلم علىّ بود وقدم لي كرسى وطلب لي شاي وسألني أسئله حميمه عن شغلي ومشاكلي وحياتي وقدم لي نفسه بتواضع شديد كان اسمه حلمي ومش فاكسر حلمي إيه وكان شغال في المطبعة وكان فياض بالحنان والعذوبه


وأثناء الدردشه سألنى عن قراءاتى فقلت بكل فخر:

- أنا يا محترم قارى حتى الآن ميه ثمانيه وسبعين روايه بوليسييه .. يعنى بعون الله
أى قضيه غامضه أجيب لك القاتل فى ظرف ربع ساعه.

طبعاً أنا كنت منتظر إنه يغمى عليه من سعه اطلاعى وعمق ثقافتى لقبيته مع
الأسف بيكلمنى فى موضوع ثانى.. قال لى:

- أنا سعيد جداً بمعرفتك يا أستاذ فؤاد وح أكون أسعد لو شرفتني بزيارتك لبيتي
المتواضع فى الموعد اللى يناسبك.

واتفقنا على بكره وفى الموعد المضروب كنت فى بيته.. اكتشفت إنه ساكن لوحده
وأذهلنى كم الكتب اللى مالى كل مكان فى الشقه حتى الحمام! وأثناء العشاء
اكتشفت إنه طباح ماهر وفى نهايه الزياره قدم لى كتاب عشان أقراه واشترط على
شرطين:



الشرط الأول: المحافظه على الكتاب أثناء القراءه ورده بعد القراءه.

والشرط الثانى: إننى أناقش أى شىء مش فاهمه معاه بدون حساسيات.

- كلنا بنعلم بعض وكلنا بتعلم من بعض.

وكان الكتاب هو روايه الأم لمكسيم جوركى وكان دا أول لقاء بيتم بينى وبين الشيوعيين المصريين.



أثناء المناقشات على بوفيه كامل دخل علينا ثلاثه أفنديه كان واحد منهم شايلى كاميرا وشنطه.

قدموا لنا أنفسهم محمود شكرى وعلى جمال الدين الطاهر وعلى الديروطى المصور وكلهم بعثه جريدة المصرى لمتابعة ردود الفعل فى وسط عمال المعسكرات المصريين.. رحبنا بيهم وشاركوا فى جانب من المناقشه وفجأه قال محمود شكرى:

- فيه منشور موجه من قياده القوات البريطانىة للعمال المصريين... وبما عرف عنى من حماقه واندفاع قاطعته قبل ما يكمل:

- فيه مناشير كثير مش منشور واحد.

قال لى:

- أنا بتكلم عن المنشور اللى بيدعو العمال المصريين لعدم ترك العمل بالمعسكرات وإحضار أسرهم إذا شاءوا لحمايتهم وبيوعدهم بإسقاط حكومه الوفد فى أقرب وقت ممكن عقاباً لها على تهورها الوطنى.

قلت له:

- بس المنشور ده موجود جوا المعسكرات.

وتدخل حلمى فى الحديث وقال:

- طيب معلش أنا رأيي تأجل الكلام فى الموضوع ده ونتغدى الأول.
ووافق محمود شكرى وبالليل كنا سهراتين فى شقه حلمى وتم الترتيب.



الصبح انفتحت بوابه الـ «تو أو فايف جروب» معسكر ومطار فايد ومقر القيادة العليا للقوات الجوية البريطانىة فى الشرق الأوسط ودخل موتوسيكل عليه ثلاثه مصريين.. محمود شكرى بيسوق وأنا وراه فى الوسط ووراي على الديروطى اللي مخبى الكاميرا تحت فوطه محلاوى كان فارشها على رجله.. كان واقف ع البوابه الشاويش الإنجليزى اليهودى - نن - وأنا كنت متفق مع محمود شكرى وعلى الديروطى إنه فى حاله سؤالهم ع البوابه يقلولوا احنا «نيو تلو» ودى معناها بالإنجليزى بتاع الأورنص - التريزه الجداد - لكن ماحصلش أى سؤال.. مجرّه ما وصلنا البوابه ولمحنى نن راح رافع دراع البوابه وهو قاعد.. قلت له:

- مورننج نن.

قال لى:

- مورننج تيلر.

وفى أقل من عشر دقائق كنا خارجين تانى بالكاميرا المليانه لأن ابن المجنونه محمود شكرى صمم على تصوير الطيارات النفائّه - سيبت فاير - فى الممرات بعد ما صورنا المنشور ثلاث مرات.

يوم ١٢ / ١٠ / ١٩٥١ لقيت سامبو داخل علينا بوفيه كامل وفى إيده جريدة المصرى وقال لى:

- شفت نفسك بالمطبعه؟

وراح فارد الجرنال ع الطرايبزه ع الصفحه الأخيره وقام كل اللى فى البوفيه يتفرج على بالمطبعه.. لابس بنطلون كاروهات ومكتوب تحت الصورة: «فؤاد عزت نجم.. من أبطال العمال».

والأنقح من كده إن اسمى ورد فى نشرة أخبار بالليل ضمن أول سته عمال تركوا العمل فى معسكرات الاحتلال قبل البرلمان ما يقرر إلغاء المعاهده.

حصل بعد كده شىء مش قادر أفهمه لغايه دلوقتى..

اليوزباشى السيد الخولى الشهير بالوفدى فاجئنى على يوفيه كامل ومعاه تلاته مخبرين من ماركه الشداد الغلاظ وكان عايز يقبض على بحجة التحرى لولا إن حلمى تصدى له.. واحتدمت المناقشه بينهم لدرجة إن الطابط هدد بأنه ياخذنى بالقوه لولا إنه لقى نفسه هو ومخبريه محاطين بعمال المطبعه الشيوعيين فانسحب بهدوء لكن وهوع الباب قال لى:



صورة نجم وهو شاب

ذنبك على جنبك.. تواجدك في منطقته عسكريه بدون تصريح إنت عارف معناه إيه؟.. ولو مش عارف.. اسأل الأساتذه اللي بيحرضوك.

وبعد ما مشيوا سألنى حلمى:

- فين الباص بتاعك؟

قلت له:

- سايه فى الكامب.

وضحك حلمى وضحكوا كل اللي قاعدين.. وكان فيه عامل قصير اسمه أحمد قال لى:

- إنت خايف عليه لينسرق؟

وعلى فكره أحمد ده كان واخد منى موقف معادى فى أول علاقتى بيهم وكان شاكك فى إنى مدسوس عليهم من البوليس السياسى وأنا كنت باشوف ده فى نظراته لى بيألمنى جداً.. لكن حلمى كان دائماً بيخفف على الألم بابتسامته الودوده اللى كان دائماً بيحتوينى بيها.. وكانت له جملة دائماً يكررها فى حديثه عن أى موضوع وكأنه كان بيوجهها لى شخصياً:

- يوم ما ينجحوا فى إنهم يشككونا فى بعض.. يبقى كل شىء انتهى.

وبعد خروج الظابط والمخبرين دارت مناقشه طويله انتهت بالاتفاق على ضرورة سفرى بأسرع ما يمكن وبمنتهى السريه.

ولأول مره فى حياتى أحس بإنى مهم وفيه ناس يفكروا فى وفى مصلحتى.

على محطة سكة حديد فايد الساعه سته صباحاً وأنا منتظر القطار اللى جاى من السويس فوجئت بأحمد القصير جاى يمد من بعيد وأول ما وصل عندى خدنى بالحضن وقال لى وعنيه مليانه دموع:

- أنا عارف إنى بارتكب خطأ تنظيمى جسيم بحضورى لتوديعك.

ومد لى إيدته بصورته وقال لى:

- الكلام المكتوب ورا الصورة ابقى اقراه وإنه فى القطر.. يمكن تسامحنى.

حطيت الصورة فى جيبى ووصل قطر السويس ولقيت أحمد بياخذنى بالحضن
وانفجرنا احنا لتنين فى البكا وطلعت القطر وأنا حريص إنى ما ابصلوش تانى!

وأول ما القطر مشى طلعت الصورة وقريت المكتوب وراها:

- «إلى الرفيق المتأجأ.. فجأه التقينا.. وفجأه لم أسترح لك وكسرتك.. وفجأه
أحببتك لدرجة العشق.. وفجأه افترقنا.. فهل نلتقى ثانية.. وفجأه؟».

«أحمد»



الفاجومي

مـصـرـتـانـي

- وزير الشؤون الاجتماعية عزمني على فنجان قهوة في مكتبه وأصبحت موظف في السكة الحديد في الرقازيق.
- نقلت إلى مصلحة البريد وتم توزيعي على أبو زعبل.
- نقلت إلى ورش النقل الميكانيكي ومنها إلى سجن أرميدان ١٩٥٩.



فى شارع القصر العينى وفى مبنى وزارة الشئون الاجتماعيه طوابير من العمال يقفون أمام الشبابيك.. ولما جه دورى سألتنى موظف الشباك:

- معاك ما يثبت إنك كنت بتشتغل فى معسكرات الجيش الإنجليزى؟

قدمت له جريده المصرى عدد ١٢ / ١٠ / ١٩٥١.

بص فيه بقرب وقال لى:

- ده تقدمه لأهل العروسه.. معاك ورق رسمى؟

قلت له:

- أنا اللي انتقال اسمى فى نشره الأخبار ضمن....

قاطعنى:

- إنت حتحكى لى قصه حياتك؟ يا أستاذ ماتعطلناش.. اللي بعده.

ولقيتنى ضايع فى شوارع مصر المحروسه.. أروح فىن؟ لأ أجى متين.. أعمل إيه؟! دنا حتى ما قدرش أرجع تانى وسيد الخولى هناك.

وفجأه على رأى أحمد القصير تذكرت بعثة جريده المصرى فمكدبتش خبر سألت عن جريده المصرى قالولى جنبك أهه فى شارع القصر العينى.. رحت على هناك سألت عن الأستاذ محمود شكرى قالولى مسافر السويس هو وعلى الديروطى.

- طب الأستاذ على جمال الدين الطاهر.

قالولى فى مكتبه دخلت عليه الراجل عرفنى وقابلنى بالأحضان حكيت له خيبتى ضحك وطلب لى القهوة وكتب لى جواب خطه فى ظرف مفتوح باسم «عبد الفتاح حسن باشا - وزير الأوقاف».. وقال لى:

- حتروح تسلم الجواب ده فى مكتب الوزير وتشوف حيعملوا معاك إيه وتيجى تقول لى.. أنا مش ح أروح أنا مستنيك.

كانت الساعه حداثر بالليل ضحكت وقلت له:

- حتستنى هنا لبكره؟

قال لى:

- لا.. روح دلوقتى الوزاره فاتحه والوزير هناك.

وكانت مقابلة الوزير لى هى المفاجأه.. أنا سلمت الجواب لمدير المكتب وفكرت
أمشى وأجى الصبح وفوجئت بعبد الفتاح حسن باشا بمجرد دخول مدير المكتب عليه
خارج لاستقبالى وهو بيقول لى:

- أهلاً بالبطل.

وخدنى من إيدى على جوا المكتب شربت معاه فنجان قهوه وأثناء شرب القهوه
سألنى:

- تحب تتوظف فىن؟

قلت له:

- أنا من الزقازيق.

وفى خلال خمس دقائق انكتب الجواب ووقع عليه الوزير وصرف لى مرتب
شهر كامل وقال لى:

- إنت من النهارده موظف فى السكه الحديد فى الزقازيق.

ودى كانت نهاية مرحله وبداية مرحله جديده فى حياة الفاجومى.



المحترم اللى قال «الغريال الجديد له شدّه» قال نص الحقيقه وساب الحدق يفهم
النص الثانى اللى هو إن الغريال لما بيقدم بيرهرط ويترخى ويبقى زى ندل ابن عروس
ميت وهو حى ماحد يحسب حسابه زى الترمس النى.. حضوره يشبه غيابه.

وهو دا بالظبط اللي حصل لعمال الكنال التمانين ألف إياهم.

الأول استقبال الأبطال بالأحضان يا بلدينا.. والكتف دا زاد والكتف دا ميه
والوداع لمن عاش يا غربه.. البلد بلدنا والحكم حكمنا.. والنيل امبو.. وحنشرب منه
كلنا.. وعمار يا مصر يام الفدائيين والعمال الوطنيين.

وفجأه ضربت الخيانه ضربتها والضربه جت فى الصميم.. حرقوا القاهره..
وخلوا النحاس باشا يعلن الأحكام العرفيه بنفسه.. وبعدين طردوه عشان يستفردوا
بالشعب المصرى ويأدبوه.. قفلوا الصحف الحره واعتقلوا فرسان القلم وقبضوا ع
الغدائيين.. واعتبروا إلغاء معاهده ١٩٣٦ وما ترتب عليه.. لاغى! يعنى إحنا التمانين
ألف عامل كلنا الأوطنه واتشعلقنا فى الحبال الدايبه.. واللى أكد الظن ده سوء
المعامله.. مش من الإدارة وبس لأ.. من زملائنا العمال الأصليين.. فهموهم إن احنا
جايين ناكل لقمتهم.. وبدأنا نسمع تعبير جديد من رؤسائنا المصريين.. اسمه العمال
الزايدين عن الحاجه.. إحنا يعنى بقينا زايدين عن الحاجه وجايين نخطف اللقمه
الحاف من بق عمال الحكومه.. وفى الزقازيق قال الحاج أحمد حنفى ملاحظ قسم
عربات السكه الحديد فى الزقازيق قال لى:

- انتوا رحتوا ولا جيتوا شويه صبيع هفأ.. ختتوا بلدكوا ورحتوا اشتغلثوا عند
لنجليز ولما عرفثوا إن لنجليز حيخرجوا جيتوا تقرفونا وتزاحمونا فى أكل عيشنا.

قلت له:

- إنت متأكد إن لنجليز حيخرجوا؟

قال لى:

- الكلام فى السياسه ممنوع هنا.. اتفضل روح شغللك.

يا ولاد الكاااالب.

طيب يا صبر طيب.

كنا بنتلم كلنا فى بيت عيد زميلنا وماكانش لنا كلام إلا فى موضوع الزايدى عن الحاجة.. بعضنا قرر العوده إلى معسكرات الانجليز والبعض الثانى ودا الأغلبه رفض الفكره من أساسها ويشده.

لكن التصعيد فى سوء المعامله والتصريحات الرسميه ضد عمال الكنال زادت بشكل ملموس وسببت لنا القلق والتوتر ودا انعكس على علاقتنا حتى ببعض.

صرخ عبد المطلب فى وشنا واحنا قاعدين عند عيد:

- كلب ابن كلب حيكلمنى عن الوطنيه والكلام الفارغ ده ح اضربه باللى ف رجلى كفايه كلام بقى.. بيوتنا خربت وعيالنا جاعت واتشردنا والآخر طلعنا زايدين ع الحاجة.



وذات صباح جميل زى ما بيقولوا فى الروايات.. صحيت مصر على صرخه المولود اللى شق جوف الضلمه زى الأدان.. الله أكبر.. الله أكبر.. الملك لك يا صاحب الملك.. ولا مُلك إلا لك.

وصلت ورشه عربيات السكه الحديد لقيت العمال متجمعين حوالين الراديو ويستمعوا بيانات حركه الجيش.. كانت الفرجه مالينه القلوب وطافحه ع الملامح.. كله كان فرحان.. عمال كنال.. وعمال أصليين.. كل المظلومين كانوا فرحانين حتى عبد العزيز أخويا كان فرحان.. تصوروا!



مؤقتاً انحلت مشكله عمال الكنال لكن فضل تعبير الزايدى عن الحاجة ينغص علينا حياتنا بالنهار ويحرمننا لذيد المنام بالليل.. وأخيراً تم التخلص من حوالى تسعين فى الميه من عمال الكنال وتم توزيعهم أو تشتيتهم فى بلاد الله.

أنا شخصياً تم تشتيتى إلى مصر المحروسه فى مصلحه البريد اللى شتتنى على أبو زعبل واشتغلت هناك طواف وكانت دى تانى مره أزامنل حمار فى الشغل.. المره

الأولى كانت في تفتيش الملك زاملت الحمار مجدى والمره دى زاملت الحماره
عزيزه اللى كانت عارفه طريق صناديق البريد فى العزب والكفور والبلاد وأنا ما
على إلا آخذ بصمه الختم من كل صندوق وتوزيع الجوابات على أصحابها واستلام
الجوابات المرسله من صناديق المنطقه وأخيراً اتشتت إلى ورش النقل الميكانيكى ودى
كانت آخر جهه حكوميه أشتغل فيها لأنى خرجت منها على سجن أرميدان سنه
١٩٥٩ متهم بالتزوير.. إزاي؟



الرزق يحب الخفيه وورش النقل الميكانيكى فيها حوالى ٨٠٠ عامل وموظف..
وكلهم بيخرجوا ساعه الضهره ساعه ونص للغدا والراحه.. حيروحوا فين؟

حوالين الورش مجموعه من الأكشاك الخشبيه اللى بيع بييع سندوتشات واللى
بيعمل شاي وقهوه واللى بيع جرايد وظروف جوابات وعرضحالات دمغه وكله
بيبيع شك وكله بيستنى أول الشهر وشده المنافسه بينهم خير وبركه على رأى المثل
«اتخنقوا الحمارة من حظ الركيه».. فى أول الأمر كنت باطلع ساعه الغدا أقعد فى
أقرب كشك.. لكن صديقى سَمَنَظَر قال لى:

- إنت ليه بتقعد عند الراجل المعفن ده؟

قلت له:

- مش فارقه.

قال لى:

- لأ.. معفن عن معفن يفرق.

قلت له:

- يفرق إيه؟

قال لى:

- أولاً أم جميل حاجتها أنصف وبعدين غلبانه بترى أيتام وبعدين وده المهم بتسلف فلوس.

قلت له:

- لاء.. كده تبقى فرقت شويه.

قال لى:

- السبعين قرش بجنيه.. يعنى الثلاثين قرش دول هما الحسنه المستخبیه.

قلت له:

- وإيه تانى؟

ضحك وقال لى:

- المسأله التانيه دى إنت وشطارتك بقى.. ومين عارف.. الرك ع النصيب.

قلت له:

- إنت بتتكلم عن إيه؟

قال لى:

- إطلع من دول يا لثيم.. بقى يعنى إنت ما سمعتش عن نوال بنت أم جميل؟



صديقى سمنظر عامل قديم فى ورش النقل الميكانيكى جمعنا سوا حب النادى الأهلى وكنا بنزوع يوم ماتشات الأهلى ونروح الملعب سوا.. ونخرج من الملعب على بيتهم فى عابدين وكان هو ساكن مع أمه فى أوضه تحت السلم وكان إنسان مخلص ومريح زى ما بيقولوا صاحب صاحبه.. أول مره رحت معاه عند أم جميل ساعه الغدا قدمنى ليها:

- أنا جايب لك أجدع راجل فيك يا نقل يا ميكانيكى.. الأستاذ نجم رئيس الوارد والصادر فى الأرشيف (مافيش حاجه اسمها كده خالص).

كانت مرا فلاحه والهم كبرها.. كانت فى حدود الأربعين لكن تشوفها تقول
الخمسه والخمسين.. بصت لى من فوق لتحت وقالت لسمنطر:

- باين عليه ابن حرام زيك.

ضحك وقال لها:

- أمال أنا مصاحبه ليه؟!

قالت له:

- حنتغدوا؟

قال لها:

- على حسابى.. ذا راجل خيره علىّ (ماحصلش).

قالت له:

- طب استنوا زمان نوال جايه بالغدا والنهارده الغدا علىّ.

ماكملتش الكلام إلا ونوال جايه وشايله شنطه قماش بإدين خشب فتحتها
وبدأت تطلع منها الحلل والعيش والطرشى.. إلخ.

هى منهمكه فى تحضير المسائل وأنا عيني مانزلتش من عليها.. حاجه سبحان
الخالق العظيم.. شكل زهره القرنفل وحراقه زيه.. لكن الفقر كاسر نفسها ومدبل
الأنثى جواها.. كانوا عاملين محشى كرنب وأنا ضعيف جداً قدام محشى الكرنب..
فاعتبرت إن دا نوع من التكريم الشخصى ونزلت ع المحشى حتّك بتّك بشكل لفت
نظر أم جميل فقالت لى:

- حيلك شويه، إقت قايم من فُم عيا؟

قالت لها القرنفلايه:

-- سيبه ياكل يامه بألف هنا وشفّا.

قلت لها:

- إنتى الليّ عامله المحشى ده يابت؟

ضحكت وقالت لى:

- لو عجبك أعمل بكره تانى.

قالت لها أمها:

- ياخى عملك أسود إنتى وهو.

قالت لها:

- بعد الشر عليه.. إن شاء الله الليّ يكرهوه ويتمنوها له.

إدبنى عقلك يا محترم؟ أنا عقلى شت من مطرحه.. رحت ماسك صباع محشى ومديهولها فى بقها.. راحت واكلاه ومناولانى صباع فى بقى.. بصيت على سمنطر لقيته مبتسم وخجلان لكن ملامحه كلها سعادته.

وقالت أم جميل وهى مذهوله:

- شوف البت بنت الكلب بتأكله فى بقه واحنا قاعدين.

قال لها سمنطر:

- ياللا بينا نسيب لهم الجو أحسن كده بقى شكلنا زى العوازل الأردال.

قالت له:

- حتى إنت كمان يا سمنطر؟ يا خيه أملى فيك!

عرفت بعد كده إن أم جميل متجوزه الأسطى محمد المصرى سرّاً وإنه ماكانش موافق على علاقتى بنوال لأنها ماجاتش عن طريقه وذات ليلة عزمتها على السينما لكن أمها رفضت إنها تخرج معايا وقالت لى:

- لازم تستأذن م الأسطى محمد.



وقالت نوال:

- ليه؟ هو كان أبويا؟

قالت لها:

- اللى مالوش كبير بيشتري له كبير ياروح أمك.

قالت لها:

- وأنا كنت اشتريته إمتى ده؟

المسأله اتطورت أكثر بسرعته.. وأنا بصراحه ماكانش عندى مانع إننى أتكلم مع الأسطى محمد المصرى باعتباره رب الأسره لكن نوال أصرت على الرفض واعتبرت إن مجرد تفكيرى فى الموضوع بالشكل ده يعتبر انتقاص من رجولتى اللى هى بتعتز بيها! مش عارف ليه؟!

كان فيه إداره عموم الورش مجموعه من السعاه والفراشين كان أبرزهم يوسف ساعى المدير.. دمه خفيف جداً وعلاقته بالموظفين والمهندسين خاصه جداً.. دا بياخد منه حشيش ودا بياخد منه عطاره لزوم الباه.. ودا بيطلب منه سباك كويس ورخيص وابن حلال.. ودا بيكلفه بالبحث عن شقه يجوز فيها بنته ولا ابنه.. وهكذا.. وغير كده وكده عنده أسرار العلاوات والتنقلات والمؤامرات.

يوم جمعه نزلت على سمنظر فى عابدين عشان نتغدى ونروح الماتش لقيت يوسف هناك أول ما شفىنى قال لى:

- أهلاً بعريس الهنا.

قال له سمنظر:

- يسمع منك ربنا.. عايزين نلمه بقى يابو حجاج.. كلام الناس كتر.

قال لى:

- إنت لك شوق فى نوال؟

قلت له:

- إنت إيه رأيك؟

قال لى:

- يازين ما اخترت.. دى بنت يتيمه وغلبانه والمثل بيقول «خدوهم فقرا تشحتوا سوا».. وضحك.

قلت له:

- العين بصيره.. والإيد قصيره يابو حجاج.

قال لى:

- فُتَحْ مخك تاكل ملبن يا أستاذ.

قلت له:

- يعنى إيه؟

قال لى:

- يعنى الدنيا اللى إنت شايفها قدامك دى.. كلها كذب فى كذب كل ما تعرف تكذب كل ما تقدر توصل وتعيش على شوقك.

ضحك سمنظر وقال لى:

- ماتمشيش ورا يوسف ليسوِّحك.

بعد يومين عزمنى يوسف ع العشا فى بيته وأثناء ما احنا ماشيين قال لى:

- تعالى نعمل مذكره فى قسم الضاهر.

قلت له:

- مذكره إيه؟

قال لى:

- إنت مش عايز تتجوز نوال؟ إعمل اللى ح قولك عليه بدون سؤال.

ودخلنا قسم الضاهر وعملنا مذكره بفقد بطاقتى الشخصيه.. وتانى يوم خدنى

يوسف ورحنا محل فى شارع الجمهوريه على ما أذكر وصرفنا استمارتين أقمشه بمبلغ ١٤٠ جنيه.. وخد يوسف البضاعه ومشى تانى.

يوم قابلنى فى الشغل وادانى ثلاثين جنيه ودا أكبر مبلغ مسكته فى حياتى وكررنا الحكايه دى ثلاث مرات من محلات مختلفه.

ويوم خميس كنت رايح ليوسف فى بيته اللى فى الشراييه حوالى الساعه ٨ مساء وفوجئت وأنا طالع السلم بمجموعه من رجال البوليس نازلين وأول ما شافونى سألونى:

- إنت عايز مين هنا؟

قلت لهم:

- عايز يوسف عبد القادر.

قبضوا علىّ وخدونى على قسم الضاهر فى مكتب معاون المباحث منير محيسن ودا حيقى له معايا حكايات تانيه وجابو يوسف متعلق من رجله ونزلوا عليه ضرب بجنون بالخززان والشوم والكرابيج.. كانوا حوالى سته مخبرين ومنير بيه بيضربوا فيه بوحشيه علشان يعترف وهو بيثن من الألم وصرخت فى وش الظابط:

- بس.. كفايه يا كفره.. أناح اقول لكو على كل حاجه.

وفوجئت بيوسف بيقول لى:

- ليه كده الله يخرب بيتك.



ثلاث سنين قضتهم فى سجن أرميدان بتهمة التزوير غيروا خط سيرى وقلبوا حياتى وخلقوا منى كائن جديد.. كائن إيجابى بقى له اهتمامات عامه تأثر بيها وأثر فيها فى حدود إمكانياته.

ثلاث سنين اكتشفت فيها الشاعر اللى أصبح بعد كده حديث الناس من المحيط للخليج أو فى أى مدينه أو قرية على كوكب الأرض فيها ناس بيتكلموا عربى.



الفاجومي

ناس في أرميدان

- ليلة القدر في عنبر «ب» بسجن أرميدان .
- مزيج الدكتور لعلاج آلام المساجين .
- اكتشفت في السجن الشاعر اللي أصبح بعد كده حديث الناس .



عنبر كله سمع
واحد يا ورد
اتنين يا فل
ثلاثه يا ياسمين
أربعه يا أجدع ناس معلمين
خمسه يا كركيه
سته يا زهرة الشباب والحركه الوطنيه
سبعه يا سجن النسا ومخالف الشريعه الإسلاميه
ثمانيه يا باشا
تسعه يا أجدع ناس حشاشه
عشره يا فرن يا حلم الجعان
حداشر يا مستشفى العفن والدود
والداخل مفقود والخارج مولود.
اتناشر يا مشنقه.. يا مرجيحه الأبطال!
سلالم السجن
سبعين سلمه وكسور
عدى على الهوى
وأنا سلمى مكسور



زَنزان وزان
وزوايع الأحزان
سَجَنَتُم حَبِيبِي
وعملوني عليه سجان



تلات سنين يا أرميدان.. م العصر للعصر يقفلوك على ويناموا.. مفرمه حديد
عجنت عضمي على لحمي على جلدی.. ورجعت شكلتني من جديد.

زمان الصبا ولّی
وشاب الشعر مادريت
والقوس منى انحنى
بعد الصبا ماوريت
وادی السنان اتخلعت
حتى الضروس مادريت

بدأت أصحى.. وأشوف الناس والأمور والأشياء بعين ثانيه.. زمان قبل السجن
لما قریت ديوان بيرم التونسي وسمعت ألحان سيد درويش وزكريا أحمد ما كنتش
معجب!

كنت مبهور بشوقي وعبد الوهاب وبأى شيء فيه ريحه أوروبا المكرمه.. كانت
فيه حاجه ربنا يكفيك شرها اسمها «جراة الجاهل» دى كانت لابسه جتنى
ومكلبشاني زى الشيخ محمد الجريحي اللى لابس جتته زينب مرات خالى عطيه
ومطلع عليها البلا.

طول النهار أتعالم واتفلسف اسفّه عشاق شعر بيرم وألحان سيد درويش وزكريا
أحمد.. باعتبارها حاجات بلدى.. وأنا راجل أفرنجي أبّا عن جد!

ثم إيه حكاية فنان الشعب اللي ورموا دماغنا بيها دي؟ وشعب إيه الخافي ده؟
شعب جبان وخانع طول عمره وراضى بالذل ويستاهل جميع ما يجرا عليه!
الكلام ذا وأكثر منه كان بيقلهولي محمد أخويا.. وأنا كنت طبعاً باصدقه.. مش
أخويا الكبير؟.. بعد السجن اتعلمت وفهمت.. يا بنت الإيه يا مصر.. أتا ريكى
حكاية طويله مالهاش أول من آخر!



...

سجن أرميدان «بالعامية المصرية».. أو قره ميدان «بالفصحى التركيه» كان عبارة عن ثلاث عتابر.. عنبر ألف.. وعنبر ب.. وعنبر ج.

كل عنبر س عبارة عن أربعة أدوار.

الدور الأول والثاني عبارة عن ١٢٨ زنزانه صغيره.. يعنى كل دور منهم ٦٤ زنزانه سعة خمسة برش الدورين الثالث والرابع عبارة عن اثنين وتلاتين أوضه كبيره سعة عشرين برش.

هى دى لوايح السجن.

لكن عنبر ب بقى كان مخالف لكل اللوايح والقوانين زى ميكروباس الدويقه.. إداره السجن كانت مخصصه لمساكين - تحت التحقيق - وهو ده اللى حطه داخل حزام مشكله الإسكان وأزمه الأماكن بسبب عدم سرعة الفصل فى القضايا لعدم وجود دوائر قضائيه كفايه.. ودى كانت زمان اسمها مشاكل التحول الاشتراكى ودلوقتى اسمها مشاكل التحول للاقتصاد الحر والخصخصة.. (وكل واحد حر يسمى مشاكله زى ما هو عايز).

أيامها يا سيدى بقى فضل البوليس - اللى كان فى خدمة الشعب - يقبض ع المتهمين من أبناء الشعب ويحول ع النيابة والنيابه تحول ع القضاء والقضاء يحول على عنبر ب وعنبر ب زى الطربه ما بيردش ميت لحد ما الزنزانه خمسه برش بقى فيها عشرين والأوضه عشرين برش بقى فيها تمانين.

وياريت المشكله كان باين لها حل، إلا كل يوم كانت بتتعدد أكثر.

كان فيه على ذمة التحقيق ناس بقى لهم تمانين شهر وأكثر.

شحته الاسكندراني بتاع تزييف العمله الفضه كان بقى له تحت التحقيق ثلاثه وتمانين شهر وكان الأستاذ عبد الرسول مدرس الرياضيات كل ما يشوفه يقول لى:

- الراجل ده يفكرنى بليلة القدر اللى هى - خيرٌ من ألف شهر-.

وكان دائماً بيداعبه ويقول له:

- يا بختك يا عم شحته حتشوف ليلة القدر في عنبر ب.

وكان الأستاذ جاد السوداني يقول لى:

- والله يا بن عمى عنبر ب ده يفكرنى بزربة الميرغنى عندنا فى أم درمان.. وحتى فى زربة الميرغنى البهايم ما ينوموا فوج بعضهم.

وانتشرت الأمراض المعدية.. نتيجة سوء التهويه والتغذية وانعدام الرعاية الطبية.. مستشفى السجن ماكانش فيه غير برميل خشب كبير زى اللى فى معمل الطرشى.. مليون مزيج أبيض.. فكان الدكتور يكتب على تذكره المريض مهما كان مرضه.. كاس مزيج.. وعشان يخلى مسئوليته كان بيصمم على إن المريض لازم يشرب الكاس قدامه!

مره على الصعيدى المحبوس تحت التحقيق بعد ما سرق منبر الجامع فى بلدهم.. نزل للدكتور بيشكى من آلام فى رجلية وكالعاده كتب له الدكتور كاس مزيج وقال له:

- إشرب.

قال له:

- ع يضيع الودع ده يا دكتور؟

قال له:

- وأنا مغسل وضامن جنه يا روح أمك.

على الصعيدى خدها من قصيره راح دالق الكاس على رجلية فدخلوه التأديب واتحكم عليه بست جلادات ع العروسه بتهمه إهانته السيد/ طبيب السجن.

بعد الحادثه دى كتبت زجل عن حال المساجين وقلته فى الندوه الأسبوعيه وبخصوص الرعاية الطبيه قلت:

والطبيب له شهره ذاعت

م المحيط

إلى الخليج

لو تقول له الجزمه ضاعت

برضه يكتب

كاس مزيج



وكانت ذورة المأساه هي موت عدد كبير من الشباب فتكت بينهم الأمراض وسوء التغذية وانعدام الرعاية الطبية.. حسنى بشله الهجام اللى كان واخذ بطولة السجون فى سباق خمس تلاف متر جرى والأستاذ نبيل مترى الباحث الاجتماعى.. وإبراهيم الطحطاوى اللى جاي فى جريمة قتل عمد دفاعاً عن الشرف.. والأستاذ محمد علوى مساعد المخرج اللى كان بيحلم بإخراج فيلم سينمائى عن عنبر ب ويدينى فيه دور البطولة والأستاذ عبد الرسول المدرس اللى فجأه كح دم وما استحملش ثلاث تيام وفى اليوم الرابع صحينا الصبح على صوت شحته الاسكندرانى وهو بيكي ويقول: - أيوه يا جدعان.. الأستاذ عبد الرسول مات.. يا حول الله يا ربى.. إنا لله وإنا إليه راجعون.

يومها سيطر على السجن الدهول.. مع إنه ماكانش أول واحد يموت.. لكن الأستاذ عبد الرسول الخدوم الرقيق المذهب أثر فى الناس كلها وكان أشد الناس حزنًا على الأستاذ عبد الرسول هو عم برهومه عبد الشهيد جاره ع البرش والمتهم فى قضيه تزيف عمله ورقه وترويجها فى السويس.

صحيت مره بالليل على صوت نهننه مكتومه واكتشفت إن مصدر الصوت هو برش عم برهومه اللى كان متغطى بالبطانية ودافس دماغه تحت الغطاء.. اتسحبت عشان ما اصحيش حد وزحفت على نمره عم برهومه أظمن عليه وإذا بيه يقول وهو بيكي:

- جدد زى قطفه الورد يا ولده راح فى شربة ميه.. يا حسره قلب أمه عليه.
رجعت بسرعه قبل أعصابى ما تخونى ودفنت دماغى تحت البطانيه وانفجرت
بالبكا.



فى خلال الثلاث سنوات اللى قضيتهم فى عنبر ب فى سجن أرميدان اتقلبوا
علينا طباط تولوا قياده العنبر كان أقربهم لقلوب المساجين على اختلاف أوضاعهم
وأسباب سجنهم الرائد سمير قلاده غطاس الأديب الفنان اللى كان له عدة
محاولات فى كتابه القصة والروايه.

الراجل ده كان دائماً فاتح مكتبه وقلبه للمساجين وأحياناً جيبه.
وكان الثانى النقيب عزت زعتر ودا كان راجل فى حاله كأنه مش موجود..
صحيح كان جسمه فى العنبر.. لكن دماغه ومشاعره كانوا فى حته تانيه.. الله أعلم
ببقى كانوا فين؟

وكان تالت الطباط الرائد «.....» وأنا مش ح أشرفه بذكر اسمه هنا.. لأنه كان
مش بنى آدم.. كابتن كوره تافه معجب ببذله ودبايره.. شخص قاسى متسلط
مريض حاقد على صنف البشر وكان إحساسه بالنقص مسيطر على تصرفاته
الغريبه.. مثلاً كان يحلله إنه ينزل المساجين المرضى من المستشفى ليلة ميا ييات
نوبتشى فى حوش السجن واللى ما يقدرش يجرى يخلى السجانه يمدوه ويضربه
على رجله بالكرباج أو الخزانة لغاية ما يغمى عليه.

وأحياناً كان ينزل كل المساجين العنبر ويقعدهم على قرايفصهم أطول وقت ممكن
واللى يخسع ورجليه ما تشيلهوش ويقع لازم ينضرب على ركبته بالشومه عشان
تانى مره تحرم ركبته ما تشيلهوش.

وكانت أمجاده اللى هارش دماغنا بيها إنه قتل مجموعة المسجونين السياسيين فى
أوردى أبو زعبل وكان دائماً يذكر اسم واحد كل مره ويقول عنه «الواد» اللى كان
عامل لى زعيم ما استحملش غلوه فى إيدي.

الشخص ده اسمه شهدى عطيه الشافعى واللى عرفت بعد كده إنه كان مفتش أول اللغة الإنجليزيه بوزاره التربيه والتعليم وإنه كان صديق شخصى للرئيس جمال عبد الناصر اللى كان موجود فى يوغسلافيا أثناء اغتيال صديقه على يد الرائد المعجباني كابتن الكوره الهايف المريض.



الفاجومي

حكاية السفاح

■ في كل صلاة كان السجناء يدعو للسفاح بالافراج..
وحكمهم مصر

■ بعد هروب السفاح.. كنا في عنبر «ب» بنتابع أخباره
باعتجاب وحماس

■ ليلة ما مات السفاح برصاص البوئيس بات السجن كل
«حزين»



محمود أمين سليمان.. فى أواخر الخمسينيات انتشر الاسم ده فى مصر مقرون بالإعجاب أكثر من أسماء أم كلثوم وعبد الناصر وتيتو ونهرو ونكروما وعبد الحليم حافظ.. وبلغ من تعاطف الناس معاه إنه بدأ يتحول إلى بطل شعبى شبيه بأدهم الشرقاوى على عكس ما صورته الصحافه المصريه اللى كانت بتقدمه فى هذه الأثناء فى صورته بعبع مخيف متعطش للدم الإنسانى.. أى دم!

عبد الناصر بجلالة قدره اتكلم عنه فى أحد خطاباتة السياسيه وحذر الناس من الافتتان بيه.. ويمكن ده هو اللى دفع أديب مصر الأعظم نجيب محفوظ إنه يكتب عنه واحده من أهم وأجمل رواياته.. اللص والكلاب.. أنا شفت محمود أمين سليمان - وعشقتة - وعرفت حكايته.

قابله الأول فى حبس خانة محكمه عابدين.

كنا نازلين نحدد أمر حبس أنا ويوسف شريكى فى القضية ومحمود صبره ابن خالته شريكنا الثالث.

كانوا الأهالى بيعجيووا الأكل والسجاير من شباك الحبس خانة اللى كانت تحت مستوى الأرض.

وكانت مرات يوسف جاييه لنا أكل وسجاير وواقفه ع الشباك مستنيه دورها وكان فيه مسجون شاغل الشباك لمده طويله واحنا خايفين تيجى عربيه الترحيلات وتاخذنا ع السجن قبل نا نلحق ناخذ الأكل.

وضاعت توسلات يوسف فى صريخ المسجون اللى ع الشباك.. أنا سمعته بيقول:

- أبويا يا نوال.. أنا سايب لك مصارى تكفيكى لو اتحكم على بتأييده.. حتى أبويا فى عينيكى يا نوال.. ويا ويلك لو فرطتى فى أبويا فهمانه يا نوال؟

قررت مساعده يوسف فاتجهت للشباك وزعدته في ضهره فالتفت لى.. غريبه..
لقيته شكلى بالظبط وكأنا توأم.. حاجه واحده اللى بتميزه عنى وحمه سودا جنب
دقته.. قلت له:

- يا عم خلصنا بقى عايزين ناخد حاجتنا زيك.

رد على بابتسامه ودوده:

- ما تخافش يا بلدينا.. أنا اللى ح اجيب لك حاجتك.

لمحت نوال اللى كان بيكلمها كانت زى البطة مليانه بصحه وقصيره جتين
وجمالها متوسط ولونها يميل للبياض.

قال لها:

- معلش روى إنتى وتعاليلي هنا بكره.

وبعدين سألتى:

- ناسك اسمهم إيه؟

قال له يوسف:

- قول فين يوسف عبد القادر؟

زعى:

- فين جماعه يوسف عبد القادر؟

ونزل من ع الشباك العالى برشاقه وشبك إديه وشال عليهم يوسف وطلعه ع
الشباك وبعدين ابتسم لى وخدنى من إيدى فى اتجاه بطانيه مفروشه فى الحبسخانه
وقعدنا.

سألتى:

- تاكل؟

قلت له:

- لا.

قال لي:

- تخشش؟

قلت له:

- يا ريت.

فوراً طلع من جيبه باكو الكبش «دخان فرط» ودفتر البفره وحتة حشيش تجي نص
وقيه وبدأ يلف بسرعه ومهاره ودخل على بأول سيجاره وقال لي:

- دى نكح بيها.. إنت جاي فى إيه؟

قلت له:

- تزوير.

قال لي:

- زورت إيه؟

قلت له:

- استمارات قماش.

ضحك وقال لي:

- يا خبيتك.

قلت له:

- أmaal إنت جاي فى إيه؟

قال لي:

- ح احكى لك فى السجن لما أدوشك.. إنت فى دور كام؟

قلت له:

- فى دور أربعه أوضه تلاته.

- لو عزت أى حاجه أنا قصادك فى أوضه ستاشر دور أربعه.. إنده قول يا محمود.. وفى العنبر عرفت حكايته من طقطق لسلامو عليكو.

هو زى أى شاب ضاقت بيه سبل المعاش فى الصعيد.. ركب رجليه وعلى إسكندريه.. وفى إسكندريه اتعرف على معلم هجام علمه أصول الصنعه قبل ما يسافر على بيروت 'اللى قعد فيها حوالى سبع سنين ورجع منها بمجموعه مفردات من العاميه اللبنانيه ومبلغ كبير مكنه من إنه يشتري شقه فى إسكندريه ويتجوز نوال عبد العظيم وبعد ما استقر فى اسكندريه.. بدأ يمارس نشاطه على تقيل.. يعنى ما يكسرش شقه ع الساجد.. يعنى على عماه.. لازم يكون فيه ناضورجى.. شغاله.. بواب.. مكوجى.. سباك.. وماكانش بيسرق إلا ماخف حمله وغلى تمه.. مجوهرات وفلوس ونجف ومن أشهر عملياته سرقة بالطو المطربه أم كلثوم من عربيتها وهى بتغنى حفلتها الشهريه فى مسرح حديقته الأزيكه.. الصحافه أيامها قدرت سعر الباطو للمسروق بد ثلاثين ألف جنيه!

نوال مراته كان لها أخ.. يعنى حرامى نتن.. خايب اسمه محمد عبد العظيم.. فشله دفعه أولاً لإدمان القمار ودا فى رأى محمود ماكانش مشكل لكن المشكل بالنسبه لمحمود بدأ يوم ما عرف إن محمد نسييه بيشتغل مرشد مع البوليس.. طار صوابه وهدد نوال بالطلاق إذا سمحت لأخوها بدخول البيت.

- خير ربنا كتير يا نوال.. إبعنى لأخوكى اللى يكفيه وزياده.. لكن دخوله البيت فيه خطر علينا.. فهمانه يا نوال؟

على الجانب الآخر كان جواز محمود من نوال عبد العظيم مصدر فخر لمحمد عبد العظيم بين زملائه الهفافين والمرشدين.. كل كام يوم يلم الصحبه ويدخل بيها

على نوال ياكلوا ويشربوا الشاي وياخذوا فلوس كمان فى غياب صاحب البيت.
وكانت نوال كل ما تحاول تلفت نظر أخوها يهددها بالإرشاد عن محمود وحبه
فتحط همها فى قلبها وتسكت.

وفى يوم من ذات الأيام رجع محمود البيت بدرى لقى محمد عبد العظيم ورفاقه
قاعدين فى الصالون بيدخنوا سجائر حشيش ويلعبوا قمار وساحبين البشل على
بعض.. وهاج محمود فى نوال ومحمد وطرد الضيوف الكرام شر طرده بعد مازقهم
على قفاهم واحد واحد.. وودع كل ضيف فيهم بشلوتين ع الباب.

قوم إنت يا عم محمد عبد العظيم ثور لكرامة قفوات وأرداف ضيوفك
المرشدين.. وروح بلغ على محمود فى عدة قضايا.. وقوام قوام كان البوليس كابس
شقة محمود ونوال وبالتحف الموجوده فى الشقة عملوله عدده قضايا رحلوه بيها على
مصر ثم عنبر ب بعد ما بلغ مجموع القضايا بما فيها قضيه بلطو أم كلثوم ثلاثين
قضيه.

راخر محمود ما اتأخرش عن رد الجميل فاعترف على خمس قضايا تافهه جاب
فيهم رجل محمد عبد العظيم.. وجابه معاه فى عنبر ب... لكن المدهش ف الأمر إنه
كان بيعامله كويس جداً وكان مش مخليه محتاج حاجه ومره سألته:

- إنت إزاي بتعامل الشخص ده كده.. مش هو اللى حبسك؟

ضحك وقال لى:

- إنت عاشر واحد يسألنى السؤال ده.. يا اخواننا أنا مش جايه السجن عقوبه
ولا انتقام.. أنا جايه هنا عشان أحمى مراتى وبيتى منه!

آفه المسجون الحقيقه هى التخزين داخل الزنزانه لا مشى ولا شمس ولا هوا!

محمود أمين سليمان قدر بفلوسه وذكائه يفلت من التخزين ويتصنع فى صالون
الحلاقه بعد ما دفع مبلغ للشاويش محمد عبد العظيم شاويش الصالون علاوه على
إنه كان بينزل جلسات نيايه بشكل شبه يومى لتسديد الثلاثين قضيه.

وفجأه بدأت الشكوك تساوره من خلال تسويق المحامي وعدم حماسه لفكرة الإفراج عنه وحضور الجلسات من الخارج.

ويوم بعد يوم التحول الشك إلى يقين في وجود علاقه بين نوال والأستاذ المحامي.. وقرر الانتقام.

و ذات ليلة سمعنا خبط ع الباب من أوضه ستاشر دور أربعة عنبر ب:

- يا افندى يا غفر الليل.. واحد بلع بشله.

واتصل غفر الليل بالطباط النوبتشي بسرعه على غير العاده وعلى غير العاده برضه حضر الطباط النوبتشي ومعه التمرجى ونقلوا محمود على عنبر المستشفى والصبح رحلوه ع القصر العينى.

هو فى الحقيقه كان بالع ورقه مفضضه بتاعه علبه سجائر ودى بتظهر فى الأشعه وكأنها بشله ويسموها بالاصطلاح الطبى.. جسم غريب.

بعد كده سمعنا بهرب محمود من القصر العينى بعد ما سطل النفر جبيص اللى هو عسكري الحراسه بتاعه لحد ما عماه.. وبدأت سلسلة الحوادث والمطارده اللى ضخمتها الصحافه.. وكنا فى عنبر ب بتتابع أخباره بإعجاب وحماس وكأننا فى ملعب كوره حتى السجانه ماكانوش بيقدروا يخفوا إعجابهم وتعاطفهم مع محمود فى غيبة الطباط.. مره سألت الشويش عبد الغفار.. أقسى سجان قابلته فى مصلحه السجون:

- إنت صحيح يا عم عبد الغفار كنت بتدعى للسفاح إمبراح فى صلاه العصر؟

قال لى:

- إنت يا واد بتهلدىنى.. أيوه كنت بادعى له وح افضل ادعى له.. ماله محمود؟
دا واد حنين وجدع.. وربنا بحق جاه النبى يخبيه من ولاد الكلب الظلمه دول.. وينصره عليهم.

وضحك أحمد فوزي حرامي الققط اللي هي الشنط الحريري وقال لعبد الغفار:

- يعني لو ربنا نصر محمود عليهم.. الحراميه حيحكموا مصر يا عم عبد الغفار؟

ولأول مره أشوف عبد الغفار بيضحك وهو يقول:

- ما هم حاكمينها يا حمار!

وليله ما مات محمود أمين سليمان برصاص البوليس بات السجن كله حزين..

مساجين وشاويشيه وعساكر غفر الليل وغرق عنبر ب في الحزن والصمت

والإحباط.. وصوت عم أحمد الشبراوي المجروح وهو بيغنى:

من فوق شواشي الجبل

أسمع نغم بالليل

غاب القمر م السما

بكيت نجوم الليل

نزلت دموعهم مطر

ع الكون

غرق في الليل

آه يانا يانا يا وعدى



الفاجومي

خرجت من السجن شاعرا

- شقيقى على الذي خرج ولم يعد كان في الزنزانة المجاورة لي.
- مقدمة ديواني الأول كتبها «دكتورة سهير القلماوي».
- مسك الإذاعي طاهر أبوزيد الميكرفون وقال:.. أحمد فؤاد نجم.. تذكروا هذا الاسم جيداً.
- سألتني يوسف السباعي: مؤهلاتك إيه؟.. أجبته كاذباً: توجيهيه.
- في ليله من صيف ١٩٦٢ كان أول لقاء مع الشيخ أمام في حوش آدم.

واحنا عيال .. أمى ماكتتش بتفوت مناسبة عامه رمضان والعيدين ونص شعبان
وسبعة وعشرين رجب وعاشورا وشم النسيم .. إلخ.
كانت تفضل تولول وتبكي على الغائب الحاضر على أخويا البكرى وأول الفرحة
اللى ضاع منها فى الغربه وطريق السفر.

ودا كان بيشوقنى لمعرفة أكبر كميه من المعلومات عنه.

- كان شكل مين يامه؟

تقول لى من بين دموعها:

- ماكانش له شكل ولا زى يابنى .. كان زى القمر وكان شاطر ونبيه ولد
ماجاتوش ولاده .. دى عين وصابته يا قلب أمه.

وترفع إديها للسماء وتقول:

- وحياء حببيك النبى تبل ريقى بشوفته قبل ما أموت عطشانه.



وذاذات ليله من ليالى أرميدان كان حسنى بشله بيحكى لنا بأسلوبه الجميل عن
بعض مغامراته العجيبه فى عالم الليل وجاب سيره شخص اسمه على عزت وسألته
فوراً:

- مين على عزت يا حسنى؟

بص لى بدهشه وقال لى باستنكار:

- فيه حد فيكى يا مصلحة السجون مايعرفش على عزت؟ على عزت دا ملك
الخنز وعمدة أى سجن يدخله .. دا عليه قلم ما ينزلش الأرض .. اللى يكتب فيه
شكوى قول يا رحمن يا رحيم عليه .. وأى شاويش فيكى يا مصلحة السجون يعمل
له ألف حساب.

أنا ماخدتش واديت فى الكلام لكن ربك والحق الموضوع شغلنى فتره طويله
انتهت بموت الفتى حسنى وخلو مطرحه جنبى.. ودا كان فى مطالع الستينات مات
فى عمر الورد - أربعه وعشرين ربيع.



- اسمع اسمك العياده.. اسمع اسمك الجلسه.. اسمع اسمك الزياره.. إلخ.
دى النداءات اللى كنا بنصحى عليها كل يوم فى سجن أرميدان.. وف يوم
سمعنا..

- اسمع اسمك المكتبه على عزت.. اسمع اسمك المكتبه.. فبن على عزت؟
قمت من على غمرتى متتور وحطيت وذننى على نضاره الباب سمعت نفس النداء..
حسيت بقلبي نزل فى رجليا.. سألت بصوت استنكار عالى:
- هو على عزت هنا؟

- سمعت أكثر من إجابته أوضحهم إجابته خليل الذئب:
- ماهو جنبك فى أوضه اتنين.

قلت له:

- هو قضيته إيه يا ذئب؟

ضحك وقال لى:

- جايينه م الجامع.. جاى فى ركعتين غلط.



فى طرقه العنبر لقيتني وجهًا لوجه مع الشخص اللى شاور لى عليه خليل
الذئب.. عمرى ما قابلت شخص أنحف منى إلا هو.. جلد على عضم.. عنيه لونهم
فروزى زى عنين أمى الخالق الناطق.. شوية الشعر اللى فاضلين فى دماغه صفر

وناعمين مافيهمش شعره بيضه.. وشه نفس اللون البمبي.. الشباب والصبا في ملامحه يحاربوا معركتهم الأخيره ضد الشيخوخه اللي بدأت تزحف على رقبته وقورته.. سألته:

- إنت اسمك إيه بالكامل؟

بدون تردد قال لى:

- على محمد عزت نجم.

قلت له وأنا شبه مذهول:

- إنت منين؟

قال لى:

- من الشرقيه.

- منين من الشرقيه؟

- من العباسه.

حسيت إن الأرض بتدور بيا قبل ما أوجه له السؤال الأخير:

- أمك اسمها إيه؟

بمنتهى البساطه وبدون تردد قال لى:

- هانم.

ارتميت فى حضنه.. احتضنى بشده.. حسيت فى حضنه بالأمان والدفا.. تذكرت
حضن أبويا على الشمروخ.. انخرطت فى البكا أكثر.. قال لى:

- إنت مين؟

قلت له:

- أنا أخوك.

قال لى بفزع:

- يا نهار أسود.. أخويا مين؟

قلت له:

- أخوك فؤاد.

قال لى:

- أودا؟ وإيه اللى جابك هنا؟

ضحكت من بين دموعى وقلت له:

- اللى جابك.

وحكى له الحكاية من طقطق لسلامو عليه.

خدننى ودخلنا أوضه اتنين.. لقينته فارش فى المراه.. يعنى بلغة السجن عمده..
وقف على باب الأوضه ورفع إيدى زى حكم الملاكه وقال:

- أخويا أهه يا مجرمين ياكفره يا ولاد الكلب.

ضحكوا كلهم وقاموا سلموا على واحد واحد وقال عم أمين محسن حرامى
البهايم:

- سبحان الله.. انشكل صحيح مش واحد.. لكن الدم واحد.

وضحك شراره زميل على وقال له:

- وأنت عرفت أزاى حكاية الدم؟ إذا كان واحد فيهم عنده دم والتانى
ماعدوش؟

وقال على:

- إوعوا تفكروا إن أخويا حرامى زيكو.

وقال له شراره:

- آمال يعنى جاى سياحه؟

وبمرور الزمن بدأت أكتشف فى على عشقه للمعرفه والقرايه وكمان قرئت له محاوله لكتابه المسرح.. كان كاتب نص عن صلاح الدين الأيوبي.. طبعاً أنا ما أقدرش أقيمها فنياً.. لكن كميه المعلومات اللى أورها فى النص تنم عن إنسان واسع الاطلاع واللى أدهشنى أكثر موقفه الوطنى الواعى بالنسبه لقضية فلسطين وإيمانه العجيب بحتميه هزيمة المشروع الصهيونى.

حكى لى بعض مغامراته فى عالم الجريمة.. حكاها بروح طفل شقى فرحان بكل اللى عمله باعتباره مجرد لعب برىء.

وأنا حكيت له عن الأسره وانهيارها اللى بدأ بموت مديحه فى البلد بعد وابور الجاز ما فرقع فيها.. والأقاويل اللى انتشرت فى البلد عن سبب موتها وهل هو قضاء وقدر ولا انتحار؟ وانفجر على بالبكا وقال:

- يا حبيبتى يا دَحْ دَحْ.. البنت عاشت مظلومه وماتت مظلومه.

ومره سألنى سؤال غريب:

- لكن قول لى يا فؤاد.. أبويا مات راضى عنى.. ولا غضبان على؟

قلت له:

- أبوك مات على خوانه.. لا لحق المسكين بغضب ولا يرضى.

فينك يامه تيجى تبلى ريقك قبل ما تموتى عطاشه؟.. أهه على يامه..

ياترى لو شفثيه فى المكان ده وفى الوضع ده.. حتفضلى بنفس اللهفه.. ونفس الحسره ونفس المشاعر؟.. ما أعرفش.. كل اللى أعرفه إنى بعد ماشفت على حبيته أكثر من مجرد أخ!

● ● ●

تلاته كانوا متخزين فى زنانه صغيره فى دور ٢ ممنوع حد يتصل بيهم وممنوع

هما يتصلوا بحد ومنوع عليهم الجرايد والورق والقلم وأى شئ له علاقه بخارج الزنزانه.. دى تعليمات قائد العنبر الرائد يونس مرعى.. اللى بينفذها بصرامه الشاويش - عبدالغفار الرهيب.

أنا فى هذه الأثناء كانت رجلى اليمين مكسوره وفى الجبس نتيجة ارتطامها بجسم صلب اللى هو راس المسجون إبراهيم الخضرى واحنا بنلعب كوره فى الأوضه انتهزت فرصه يوم راحه عبدالغفار ونزلت لهم العصر بعد الإدارة ما روحت ونزلت لهم.. سمعتهم وسمعونى وسألتهم وسألونى وعرفت إنهم شيوعيين مقبوض عليهم ضمن أعداد كبيره متواجدين فى معتقلات الواحات والفيوم وبنى سويف والقلعه وأبو زعل علاوه على مجموعه فى عنبرج فى أرميدان ومن خلال استمرار وتطور علاقتى بيهم عرفت منهم إن الشاويش عبدالغفار الرهيب متعاطف معاهم جداً!

الثلاثة كانوا عبد الحكيم قاسم الروائى الموهوب صاحب روايه أيام الإنسان السبعه وسامى خشبه الناقد الأدبى المعروف وابن المرحوم درينى خشبه الناقد المسرحى الكبير وحسين شعلان الكاتب السياسى المعروف.

حكى لى عبدالحكيم قاسم عن المشاكل اللى ترتبت على اعتقاله بالنسبه لأسرته خصوصاً وإن أبوه كان شيخ مسن.. والحقيقه إن الطريقه اللى حكى لى بيها استفزتني فسألته:

- وإنزى تسبب لأهلك اللى ربوك وعلموك كل المشاكل دى؟

. ضحك وقال لى:

- هو أنا اللى اعتقلت نفسى؟

قلت له:

- قلبك ما بياكلكش على أبوك وأمك وأختك؟

قال لى:

- أنا قلبى بياكلنى على مصر كلها... ويوم ما تتحل مشاكل مصر.. حتتحل معاها مشكله أبويا وأمى وأختى.

ليلتها أنا ما نمتش.. إيه الكلام العجيب ده! وإيه الناس دول؟

بعد كده كنت بازورهم كل يوم وأسمع كلامهم ومناقشاتهم وأهم من كده كانوا بيسمعونى قصايد شاعرهم العظيم فؤاد حداد ولو إن الكم اللى كانوا حافظينه من أشعاره كان قليل جداً إلا إنه دخل قلبى وأيامها كنت باكتب قصايد ديوانى الأول - صور من الحياه والسجن - فاعتقدت إنى: بأساهم فى نشر أشعار فؤاد حداد المنوعه فأخذت مقاطع منها على قد ما أسعفتنى الذاكره وأضفتها لأشعارى.. ماكتتش أعرف إنى أنا شخصياً ح ابقى الشاعر المنوع فى كل الأقطار والأزمان العربيه وده كان اللقاء الثانى بينى وبين الشيوعيين المصريين.



فى السنه الأخيره فى سجن أرميدان اكتشف الشاعر أحمد فؤاد نجم.

ومن حسن حظى أن يكون اللواء إبراهيم عزت فى هذه الفتره هو مدير سجن أرميدان والرائد سمير قلاده هو المأمور.. لتنين دول هما اللى احتضنوني وشجعوني وكانوا بيععملولى ندوات شعريه فى مسرح السجن وينشرولى شعرى فى مجلة السجن اللى فزت بجايزتها فى مسابقه عيد الأم بقصيده بحر الحنان وكانت الجايزه جنيه.. وحرصنى الرائد سمير قلاده على دخول مسابقه الكتاب الأول وجاب لى الورق على حسابه ونسخ لى القصايد على المكنه وبعثها بمعرفته إلى مجلس الفنون والآداب والعلوم الاجتماعيه.

وكان الرائد سمير قلاده شديد الشبه بالرئيس جمال عبد الناصر ولذلك لما كتبت له الإهداء فى مقدمه ديوان المسابقه - صور من الحياه والسجن - كتبه كده:

فنان وتعطف ع الفنان

ولك أبادى ومآثر

ولك حكاية فى كل مكان

يا صوره من عبد الناصر

وكانت نهاية فترة العقوبة.. ثلاث سنوات سجن مع الشغل والنفاذ - توافق يوم الجمعة ١١ مايو ١٩٦٢ بتلات أرباع المده لحسن سيرى وسلوكى فى السجن ليلتها ما جليش نوم.. أخرج من السجن.. أروح فين؟.. وأعمل إيه.. أنا خلاص بقيت شرك.. ويا رتنى أعرف أسرق وأرجع السجن ثانى يا ترى لو رحت لمحمد أخويا مراته حتفتح لى الباب؟.. وحتى لو فتحت حتقابلنى إزاي؟.. وحتى لو قابلتنى كويس.. غايته ح اتغدى وبالسلاسه.. أروح فين بعد كده؟.. دى كانت أطول ليله فى حياتى.

الساعه سبعة الصبح فوجئنا بالمفتاح فى باب العنبر وتصورنا تفتيش وسمعنا:

- إنتبأاااااه «كبير قوى».

وبدأ كل مسجون يخبى المنوعات اللى عنده.. وكانت المفاجأه الأكبر إن المفتاح بقى فى أوضتنا وبعدين:

- إنتباه.

وقفنا بسرعه وإذ باللواء إبراهيم عزت نفسه ووراه الرائد سمير قلاده وأنجھوا ناحيتى وقال لى اللواء إبراهيم عزت:

- مبروك.

قلت له:

- الله يبارك فيك يافندم.

قال لى:

- إنت عرفت؟

قلت له:

- أيوه.. ما أنا إفراجى النهارده.

قال لى:

- أنا مابتكلمش على الإفراج.. إنت قرئت الأهرام النهارده؟

وقدم لى ملحق أهرام الجمعة ولقيته معلم على خبر فى الصفحه الأدبيه:

«قررت لجنه الشعر بمجلس الفنون نشر ديوان (صور من الحياه والسجن) للشاعر

أحمد فؤاد نجم.. بعد فوزه فى مسابقة مشروع الكتاب الأول».

بعد كده أنا ما شفتش حاجه لكن سمعت صوت سمير قلاده بيقول لى:

- إنت دلوقتى حطيت رجلك على بر الأمان.



يوم ما استلمت عشر نسخ من ديوانى الأول «صور من الحياه والسجن» طلعت

من مجلس الفنون زى المجنون.. ركبت الترولى باص قعدت جنب واحد أفندى

لسه فاكركه.. مصرى مصرى مصرى.. قدمت له النسخه وقلت له:

- ده ديوانى الأول.. شوف.

الراجل طلع ظريف.. ممكن اشترى نسخه؟

قلت له:

- النسخه دى هديه منى.. ممكن تقبلها؟

قال لى:

- يسعدنى إنى أكون أول قارئ ليك وتأكد إنى ح افضل أدور على اسمك وكل

ما تصدر كتاب جديد ح احتفل معاك بيه.

ونزلت م الترولى وكان أول إنسان أفكر فيه هو عفاف بنت خالى حسين.. ليه

أثناء ماكنت زايد عن الحاجه فى السكه الحديد فى الزقازيق.. سكنت مع عبد العزيز أخويا فى شارع صبور اللى فيه بيت خالى حسين وعمتى عيشه وكان طبعى يحصل التزاور اللى من خلاله شفت عفاف الجميله واتشعلت بيها بناء على وعد خالى حسين يوم ما ودانى المدرسه - الملجأ - وبعد ستين حب ملهلب اتجوزت مصطفى ابن عمى الموظف بمصلحة السياحه - ماكانتش بقت وزاره.

وعلى باب مصلحة السياحه سألت عن الأستاذ مصطفى نجم وطلعونى مكتبه فقدمت له تانى نسخه من ديوانى «صور من الحياه والسجن».. طبعاً أنا ماكانتش قاصد مصطفى.. إصحنى للموضوع.. أنا راسم السيناريو فى دماغى ما يخرش الميه.

حياخد مصطفى الديوان ويروح بيه ع البيت ويرميه على أول كرسى أو تراييزه تقابله.. عفاف حتشوف الديوان وتقرأ الاسم.. حتساهى جوزها وتسحب الديوان ترميه فى أوضه النوم وتطلع تحضر الغدا لمصطفى يقول لها:

- مش ح تاكلى معايا يا حبيبتى؟

تقول له:

- لأ.. أنا ح ادخل أنا.. تعبانه شويه.

وتدخل تنام وتقفل عليها باب الأوضه من جوه وتاخذ الديوان فى حضنها.. وتبكى - بكاء صامت - وتبوس اسم المؤلف - فيتلوث من الروج فتغسله بدموعها وبعد ما تقرأ الديوان أربع مرات تجيب ورقه فاضيه وتكتب إلى «أ.. ف.. ن» اللى هى الحروف الأولى من اسمى.. أنا اللى استاهل كل اللى جرائى.. الغالى بعته رخيص ولا احسبوش غالى.. فقدتك يا حبيبى بسطحيتى وغبائى.. إلى اللقاء يا شاعرى الجميل.. إلى اللقاء فى جنة الخلد.. وبعد كده يكسروا عليها باب أوضة النوم يلاقوها قاطعه شريانها ومبتسمه وهى ميتة.. والورقه والكتاب جنبها.

عرفت من الأستاذ حسن السباعى الموظف بمجلس الفنون إن الدكتور سهير

القلمالوى هى اللى كتبت لى مقدمة الديوان وإنها عايزه تشوفنى .. طبعًا ماكتتش تعرف إنى فى عنبر ب بسجن أرميدان .. خدت عنوانها من المجلس ورحت لها البيت فاستقبلتنى بترحاب وشرحت لها الموقف فكتبت لى جواب للأستاذ يوسف السباعى - سكرتير عام مجلس الفنون والآداب.

دخلت مكتب مدير مكتب يوسف السباعى فى مجلس الفنون فحصل لى ذهول من كم وحلاوه النسوان اللى هناك .. سلمت الجواب للبيه مدير المكتب وانسحبت بهدوء وأنا مفهوش وفاتح بقى وعمال أعطس فى كل اللى يقابلنى .. وأعتذر! أنا لغاية دلوقتى مش فاكر إزاي قدرت أخرج من المجلس وأوصل لمبنى الإذاعة فى شارع الشرفين؟

وفى الإذاعة وعلى مكتب الإذاعى اللامع طاهر أبو زيد تركت كراسه فيها أشعار وورقه فيها اسمى وموضوعى وروحت.

مافيش يومين عديت على مجلس الفنون ففوجئت باليه مدير المكتب قايم متتور من على مكتبه ومحدوف ناحيتى .. فبدأت أستعد للجري .. مش يمكن وأنا خارج مذهبول المره اللى فاتت عملت مصيبه؟ وإذا باليه ياخذنى بالحضن وهو بيقول:

- أهلاً .. أهلاً بالشاعر العظيم .. اتفضل سيادتك.

وقعدنى على كرسى جلد من اللى بيلف وسألنى:

- قهوة سعادتك أيه؟

قلت له بمتتهى البساطه:

- ساده.

قال لى:

- كل العباقره بيشربوها ساده.

وبعد ما طلب لى الساده قال لى بعتاب رقيق:

- طب يا أستاذنا العزيز مش اللي يجيب ورقه ليوسف بيه يستنى النتيجة؟

قلت له بتأفف:

- هُف.. مشاغل يا عزيزى.

قال لى:

- ربنا يكون فى العون.. حنقرا حاجه جديده أن شاء الله.

قلت له:

- ربنا يسهل.

وبالليل قابلت يوسف السباعي قى نادى القصره بشارع القصر العينى وبعد محاضره منه عن إن الخير لازم ينتصر فى النهايه وإن الجريمه لا تفيد وأن لا تيأسوا من رحمه الله وإن المجتمع ممكن يصفح عن أبنائه المخطئين سألنى:

- إنت مؤهلاتك إيه؟

حاولت أضرب فى العالى فمفكوتش غير بكالوريوس طب أو هندسه.. لكن لقيتها حتبقى واسعه فقلت له:

- توجييه.

قال لى:

- طيب أنا ح اعينك فى منظمه التضامن بمرتب شهرى اتناشر جنيه.. ودول يجيبوا العيش الحاف.. وإنت بقى بشطارتك تجيب الغموس.

يومين كده ورحت الإذاعه ففوجئت بالأستاذ طاهر أبو زيد بكرر معايا نفس اللي عملته البيه مدير المكتب:

- إزاي يا راجل مستنئش لما أرجع من التسجيل؟ عمومًا أنا آسف لأننى ماكتش فى شرف استقبالك.

ولقيتني باقول بدون أى داعى:

- أو.. يا عزيزى طاهر.. أرجوك ما تخرجنيش.

الراجل سهم شويه كده وبعدين قال لى:


- إن شاء الله موعدنا يوم الخميس الساعة اتنين فى مسرح الهوساير عشان أسجل معاك حلقة من برنامج جرب حظك.

وفى الموعد المضروب رحت لقيت قاعة مسرح الهوساير مكتظه بالجمهور اللى فوجئ بأن فارس الحلقة مواطن ضايع ولسه خارج بشوكة من سجن أرميدان ومسك المذيع الناجح المتمرس على النجاح الميكروفون وقال:

- أحمد فؤاد نجم.. تذكروا هذا الاسم جيداً.. هذا الاسم سيلمع ويحلق فى سماء الشعر عن قريب.. وصاحب هذا الاسم دفعته الظروف إلى طريق الجريمة ثم إلى غياهب السجن وكان المفروض أنه يتحول إلى خارج على القانون ومعادى للمجتمع لكن الشاعر جواه انتصر على الجريمة وقسوة الظروف فترجم ألمه ومحنته إلى قصائد عذبه تقطر بالحزن والأمل فى نفس الوقت.. وفوجئت بالتصفيق الحاد ينفجر فى كل أرجاء القاعة.. والحقيقة أن الأستاذ طاهر أبو زيد استطاع بذلك أنه يلهب أكف الجمهور بالتصفيق الحاد المتواصل على مدى ساعه ونص مدة التسجيل اللى قدم من خلاله عرض مسرحى شيق سجله ليذاع ضمن حلقات برنامج الإذاعى الناجح «جرب حظك». وفى نهاية العرض قال طاهر أبو زيد:

- يا وزاره الثقافه.. هذه موهبه حقيقه مدفونه فى التراب فإما أن تحظى بالرعايه التى تستحقها وإما أن تتحول إلى طاقه شر وسلاح هدام ضد المجتمع.





بعد ما انفتحت كل الأبواب فى وشى وأصبحت موظف فى هيئة دوليه وشاعر
إذاعى ودا الأهم.. اتجهت بكل ثقة إلى مصلحة السياحه عشان أضرب ضربتى
واستقبلنى مصطفى ابن عمى بكرمه الغريزى وطلب لى القهوة.. فضلت أفتش بعينى
عن الديوان مالقيتلوش أى أثر وفى الوقت نفسه ماسمعتش منه أى خبر عن انتحار
أى شخص أو سؤال أى إنسان عن شخصى الضعيف.. قلت:

- يمكن بيتلائم.

وفوجئت بيه بيقول للساعى:

- اطلع يا عم عبيد شوف سعد الموجى فوق.

وبعدين قال لى:

- فيه جدع مجنون زيك عندنا وقرا الكتاب بتاعك وعجبه وقلب دماغى وعازي يشوفك ضرورى.

وقبل ما استوعب فرصه الحصول على القارئ رقم اثنين.. دخل سعد الموجى شاب مصرى الملامح والروح.. حيانى وسلم على بحراره وقال لى:

- أنا سعيد جداً برؤياك.. سعيد مرتين.. مره لأننى باقابل شاعر أصيل ومره تانيه لأننى أتأكدت إن بيرم التونسى ما ماتش.



نور ملاً نفسى بالأمان والفرح والحب وادانى إحساس بالثقه فى نفسى وفى العالم وخضر قلبى اللى كان قرب يشف ويموت.. هو دا كان إحساسى بسعد الموجى بدون زياده ولا نقصان.

وبعد جلسته ممتعه فى مكتبه قال لى:

- فيه عندنا راجل فنان أنا رأيى إنه فنان أصيل لكن الناس كلهم بيقولوا عليه دقه قديمه وزمانه ولى وأنا بصراحه عايزك تسمعه وتقول لى رأيك فيه عشان تنورنى وتحسم لى المسأله دى.

على فكره.. التواضع الأصيل فى سعد الموجى المثقف المصرى الرائع ممكن يخدع بعض الناس ويتهيا لهم إنه واحد من اثنين.. يا إما جاهل يا إما بيدعى التواضع ودا والعياذ بالله أسوأ أنواع الغرور.. لكن الحقيقة غير كده خالص.

سعد الموجى أولاً ينحدر من سلسال طاهر.. أبوه الشيخ عبد السلام الموجى..

إمام جامع الفكهاني ومعلم الفقراء في حوش قدم وموئلهم وبيته هو التكية المفتوحة لكل من هب ودب يلاقى فيها المأكول والمشرب والمأوى وحسن الضيافة.. ورغم قيد الوظيفة كان له موقف سياسي مشرف ضد الإنجليز والقصر وحكومات الأقليات وكان مرشح الوفد يعتمد بشكل أساسي على تأييد الشيخ عبد السلام الموجي لأن ده هو الضمان الرئيسي لوصوله للبرلمان أما جد سعد الموجي فهو العالم العلامة الشيخ سعيد الموجي أحد علماء الأزهر الشريف المشار إليهم بالبنان ويكفيه شرف وفخر إنه احتضن شاعر الثورة العراقيه ومنشدها وخطيبها العظيم عبد الله النديم أثناء فتره هربه من ميت الغرقا مسقط رأس عائله الموجي من هنا خرج سعد الموجي وانطلق في الدراسه حتى حصل على ليسانس آداب قسم إنجليزى من جامعه القاهره وحصل على منحه دراسيه فى أيرلندا وعاد منها مديراً لإداره المطبوعات بوزارة السياحه.. أما عن قراءات سعد الموجي الخاصه فحدث ولا حرج ابتداءً من طبقات الشعرائى ومروراً بالحلاج ومحيى الدين بن عربى والنفرى فى التصوف إلى آخر نظريات بريخت وبيتر بروك فى المسرح وآدم سميث وكارل ماركس فى الاقتصاد إلى جانب حفظه للقرآن الكريم وديوان الشعر العربى ابتداءً من امرؤ القيس وانتهاءً بمحمود درويش.. إلخ.

القصد واعدنى سعد الموجي على اللقاء فى قهوة البرلمان فى ميدان العتبه الساعه ثمانيه مساء الجمعة لننطلق منه إلى حوش قدم لمقابله الفنان المذكور والحقيقه أنا مش فاهم لغايه دلوقتى أنا ليه رحت فى ميعادى.. دى مش عوايدى النصيب بقى.

وصلنا حوش آدم زى الناس ما بينطقوها.. كان المغرب على وشك الحلول والحاره مكنوسه ومرشوشه وروايح البخور والعطاره منتشره وعامله جو من السحر وفى البيت رقم ٢ عطفه حوش قدم طلعا الدور الثانى لقينا أنفسنا فى أوضه قاعد فيها شخص مهيب قدامه طرايزه عليها خواتم وأساور وحلقان وهو ماسك ماسوره فى بقه وبينفخ فيها تطلع نار يلحم بيها الذهب والفضه.. ورمى سعد الموجي التحيه بأدبه المعهود فرد الراجل عليه بالأطه فاحترمه وقدمهولى سعد الموجي قال:

- الأسطى محمد على الشهير بمحمد الصايغ.

قلت له:

- أهلاً وسهلاً تشرفنا.

ماردش على فاحترمه أكثر.

وقدمنى سعد الموجى:

- الأستاذ الشاعر أحمد فؤاد نجم.

ماكلفش خاطره يبص ناحيتى فبدأت أخاف منه.. وسأله سعد الموجى:

- آمال مولانا فين؟

ماردش.. لكن قام بص من الشباك ونده:

- يا إمام إنزل.

أنا قلت أكيد رئيس حوش قدم بما فيها سعد الموجى.

وسمعنا خبط ع الباب وقام المحترم يفتح الباب ودخل الشيخ إمام والنوم لسه على وشه ولابس فأنله مقرحه ولباس بشباك من ورا ودخل الحمام وفجأه قال المحترم:

- أنا نازل يا إمام.. عايز حاجه م الأرزخانه؟

قلت له:

- منين؟

قال لى:

- م الأرزخانه.

قلت له:

- إلهى لا توصل هناك ولا ترجع هنا تانى يا ابن الكلب يا جزمه قديمه بقى
حابس دمي وملبش جتتى م الصبح وجاى دلوقتى تقولى الأرز خانه.
وانفجر سعد الموجى بالضحك وضحك المهيب وسمعنا ضحك الشيخ إمام م
الحمام.



بريشة الفنان **بشيرة**

بعد التعارف والشأى والذى منه طلب سعد الموجى من الشيخ إمام بأدب شديد إنه إذا تكرم يسمعنا حاحه.. وطبعاً أنا كنت اديت الشيخ إمام إيحاء يانى من شعراء الإذاعة.

وكان العود فى نفس الأوضه اللى احنا فيها جابه وناوله للشيخ إمام بعد ما نزل من عليه كمية تراب تؤكد أنه لم يستعمل من سنين واللى أكد ده أكثر إن الشيخ إمام قعد يدوزن الأوتار أكثر من ساعه ونص وبعدين سألتى:

- أستاذنا يحب يسمع إيه؟

قلت له:

- ياريت تسمعنا حاحه لسيد درويش أو زكريا أحمد.

وصرخ الشيخ إمام بفرح:

- يا حبيبى.. طب تعالى جنبى هنا بقى.

رحت جنبه هنا بقى وخذ عندك تقاسيم على العود أكدت لى إنه أستاذ متمكن بينه وبين العود علاقه عشق متبادل وبدأت أقول آه والله وأعد.. واتسعت ابتسامه سعد الموجى نورت المكان وتحول وجه الشيخ إلى وجه طفل جميل فرحان نسانى إنه كفيف وبعد ما أشبعنا نغم على العود بدأ يغنى.. إمتى الهوى ييجى سوى أغنيه أم كلثوم الشهيره وأنا كنت باقوم بدور الكورس ودى مفاجأه ساره للشيخ إمام ويمكن دا اللى خلاه أبداع وطار فى السما.. ثلاثين سنه مروا على الليله دى لكن لسه نغمها وسحرها مالى قلبى وسمعى وروحى إلى الآن.. وبعد إمتى الهوى غنى آه يا سلام زاد وجدى آه.. وياللى تشكى م الهوى هوّن عليك وفضل زى العصفور يتنقل برشاقه من غصن لغصن ومن جنيته لبستان وأنا مسحور وغايب تماماً عن الوجود المحسوس لغاية ما بدأ يغنى تحفه سيد درويش الجميله أنا هويته وانتهيت.. كنت فعلاً هويته وانتهيت وبدون مقدمات سألت محمد على بعد ما نزل سعد الموجى:

- هو أنا ممكن أبات هنا؟

قال لى:

- بات ياخويا هو أنا ح اشيلك على دماغى.. بس حتنام فين؟

قلت له:

- ح انام ع الشوال ده.

ضحك وقال لى:

- إنت يا ابنى مش بتقول إنك شاعر فى الإذاعة؟

قلت له:

- أنا قتيل هنا وعشان ماترغيش كتير ده مفتاح بيتى اللى فى بولاق الدكرور أهه.

ورحت مطوح المفتاح م الشباك قال لى:

- الله يخرب بيتك.. وحاجتك اللى فى المطرح هناك؟

قلت له:

- ياخدوها سداده حق.

قال لى:

- دانت ثورجى ودماغك أوسخ من دماغ محمود اللبان.

الليلة دى أنا مش فاكِر تاريخها كل اللى فاكِرُه إنها كانت ليلة صيفيه من سنة ١٩٦٢ وكانت ليلة ولا كل الليالى.. ليلة ما تنحسبش م العمر رغم إنها كانت أهم وأخطر ليالى العمر على الأقل بالنسبة لى وبالنسبة للشيخ إمام وبالنسبة للمارشال المتعجرف الأليط الأسطى محمد الصايغ الشهير بمحمد على.



الفاجومي

الفاجومي في القاهرة

- في بولاق خطبتني «عبله» وعرضت مهراً بيتين
ودفترت توفير.
- يوسف السباعي.. عين في منظمة التضامن كل
أصدقاء الشباب والرياضة.
- كيف ابتسم الحظ للسفرجي في عيد ميلاد بنت
الباشا حرم البية؟

قال تعاشر يابن آدم تعاشر.. مسيرك يابن آدم تفارق.. الله يرحمك يا امه!
كانت فى لحظة الوداع الأليمه تهرب من وجع الفراق إلى بلسم الكلام:
- الغربه يا ابنى زى الموت.. علينا حق.. لكن برضه مسير الغريب يروح بلده..
وعلى رأى المثل: قالوا بلدك فين يا جحا.. قال اللى فيها معاشى.
أنا قبل ليلة حوش آدم الأولى كنت مجرد مواطن عادى من رعايا جمهورية
الصين الشعبيه المعروفه إدارياً باسم: بولاق الدكرور.
كنت مأجر أوضه بعفشه ميه مشتركه فى بيت أم عبلة التمرجيه باتنين جنيه فى
الشهر. طبعاً حتسألنى:
- وعرفت منين إن صاحبة البيت اسمها أم عبلة؟
ح أقول لك:
- من عبلة ذات نفسها.
هى كانت - الله يمسيها بالخير - مقيمه مع الست والدتها فى البيت القديم المواجه
للبيت الجديد اللى احنا ساكنينه. وكان شباكها مواجه لشباك أوضتى، وكانت بعد ما
ترجع من المدرسه تلزق فى الشباك مش أقل من خمس ست ساعات كل يوم.
ما اعرفش بقى كانت بتذاكر إمتى! وكانت طول ما هى قاعده فى الشباك تسبل
فى عنيتها للى رايح واللى جاى.

ويوم بعد يوم حصل النصيب واتكلمنا سوا وإذ بها تقدم لى نفسها بكل وضوح:
- ماما ماعندهاش غيرى.. والبيتين دول مكتوبين على اسمى بيع وشرا.. دا غير
دفتر التوفير اللى فاتحاهولى ماما فى البوسته.. وعلى فكره أنا لى اسمين.. زكيه على

اسم أم بابا الله يرحمه.. وعبله اللى فى شهاده الميلاد.. إنت تحب تنادينى زكيه ولا عبله؟ أنا عندى دهب كتير.. بس مباحبش ألبسه فى البيت.

ولما طلبت منها معاد نروح سيمما ولا جنينه نتفصح واهى تبقى مناسبه تلبس دهبها وتفرجنى عليه بالمره، قالت لى:

- أكتب على عشان يبقى فى الحلال!!
أما إذا سألتنى:

- طب وعرفت إزاي إن أم عبله تمرجه؟
الموضوع ببساطه شديد مجرد خلاف عيادى بين الست أم عبله باعتبارها صاحبه البيت والست أم لبييه باعتبارها ساكنه فى البيت. كان الخلاف على فلوس الكسح. ما تفهمش إيه أظنى فؤاد الست عبله وخلاها تتدخل فى الحوار.. والشهاده لله أنا ما سمعتش هى قالت إيه بالظبط أنا فؤجت بالست أم لبييه بتصحن على كفوفها وتدرع وتترقص وتنطط زى اللى لاشتها عقره وتقول لعبله بالفم المليان:

- بيت إيه دا يابت يام بيت.. دانتوا بانيسينه من سرقة القطن والشاش والمرهم واليزول وأكل العيائن فى القصر العينى.. وإن شاء الله حيدر يك على دماغ اللى فيه طوبه طوبه لأنه من أساسه حرام فى حرام.

المهم إنى وأنا باصفى النفوس كما هى عادتى سألت الست أم لبييه:
- هى الست أم عبله موظفه فى قصر العينى؟

قالت لى وهى بتدرع فى وشى:

- موظفه؟.. دى حيا الله حتة فراشه لا راحت ولاجت.. ولايكن خدك الشهاده الكبيره واحنا ماندراش.. سلامات يا موظفين.

عموماً مش دا موضوعنا لكن الكلام بيعيب بعضه.



أنا لما اتعينت فى منظمه التضامن بدأت تراودنى بشده أفكار غريبه عن الاستقرار والانتظام فى السلك الاجتماعى، وبدأت دماغى تشتغل فى هذا الاتجاه لدرجة إننى وضعت برنامج ما يخرش الميه.. برنامج متعدد المراحل.. المرحلة الأولى منه كانت تجهيز عش الزوجيه عشان تيجى بنت الحلال تلاقى عشها كامل الأوصاف مما جميعه.. لذلك مامرش أربع شهور إلا وكان البيت بيشغى عش.

أولاً: استلقت سرير حديد سفرى من بتاع الروباييكيا. ومن برأ برأ خدته ع الأسطى عربى البوابرجى مشى لى عليه باجور اللحام قضى على بيض الأكلان المعشش فيه. وزياده فى الاحتياط رميته ع السطح أسبوعين يتحمص فى الشمس.. وقيمت جايب لك عليه لاكميه لبنى وفرشه وخذته وش بقى عروسه.. واشترت له لوح سفنج فصلت منه مرتبه ومخدتين.. ويشاء السميع العليم إنه تفضل حته سفنج رحت عاملها خداده.. وعشره متر دبلان ٢٢ عملت منهم كسوه.. ونزلت لك على سوق الحد فى إمبابه اشترت بطانيه جيش مصرى قديمه ورحت ناعها فى عليه رابسو ثمانيه وأربعين ساعه طلعت جديده.. وع الحاج مرسى بتاع القديم اللى فى شارع همفرس ولقيت عنده تراييزه نصها الفوقانى حديد ونصها التحتانى خشب.. خدتها.. وعليه لاكميه من نفس لون عليه السرير وخمس وشوش بقت لك مكتب.. دا غير بقى مستلزمات المطبخ وأهمها سبرتايه ياسين شديده كنت باطبخ عليها وأعمل الشاى والقهوه وأدمس الفول وأسخن الميه إذا احتكم الأمر وقررت أستحمى.. ولسه طبعاً كنت ح اكمل المسيره، لكن لما جوالى ما جوالى فى ليله حوش آدم وسعد الموجى والشيخ إمام بدا مخى يركب وحساباتى تتلخفن واتبخرت من دماغى أفكار الاستقرار واتدمرت مزاعم العش الهادى ومشروع التكيف الاجتماعى ودوبان الجزء فى الكل إلى آخر الكلام الحلوه..

الأول كيفته قانونى.. القانون بيقول إن حق المالك يكسر باب العين لو الساكن غاب ثلاث شهور بدون دفع الإيجار.. وفى الحاله دى تصبح محتويات العين ملك صاحب الملك ياخذها سداد حق..

طب نحسبها.. اثنين جنيه قيمه الإيجار الشهري في ثلاثه يبقوا سته جنيه.. يعنى لو أم عبله كسرت باب العين بعد ثلاث شهور حتلاقى عفش ومتقولات في حدود أربعين جنيه بالميت.. يبقى أنا ماسرقتهاش.. إذن وداعاً بولاق الدكرور.. وعلى رأى المرحومه أمى:

- تعاشر يابن آدم تعاشر.. مسيرك يابن آدم تفارق.



عملت الاستطلاع اللازم لأوضه محمد على لقيت خمس كراسى قش مكتوب على ضهورهم أسماء القهاوى اللى كانوا شغالين فيها قبل ما تقول ملكيتهم - الله أعلم إزاي - لمحمد على.. طب لزوم القعاد أهه.. أدور على حاجه لزوم النوم.. أبداً.. ولا الوتكه.. وقبل ما يتسرب اليأس إلى نفسى لمحت شوالين محشين شراميط مفروشين على الأرض بدل سجاد وطنافس.. قلت ف عقل بالى: هما دول.

سألت محمد على:

- هو أنا أقدر أناام هنا؟

قال لى:

- إنت تقدر تنام فى أى حته.. بس حتنام هنا فين؟

قلت له:

- هنا فى الأوضه دى.

قال لى:

- أما أمرك عجيب.. حتنام هنا على إيه؟

قلت له:

- ع الشوالين دول.

قال لى:

... دول مليونين تراب..

قلت له:

- أنفضهم..

قال لي:

- ولما يبجي الشتا تحتغطي بياه.. إعمل حسابك أنا ما عنديش غطا غير اللحاف
الوحداني اللي جوا..

قلت له:

- يا سيدى لما يبجي الشتا يكون خلق فى قضاة رحمه واشترينا شوالين للغطا..

قال لي:

- إنت يا ابنى مش بتقول إنك شاعر فى الإذاعة؟

قلت له:

- خلص فى الكلام.. أناام هنا وأدفع لك الإيجار؟

قال لي:

- ما تنام.. هو أنا ماسكك؟!

رحت مطلع مفتاح أوضه أم عبله ومطوحه على آخر إيدي نزل فى الأنتيكه اللي
هى بيت السيد جمال الدين الذهبى أو شيخا جمال الدين شاهبندر تجار مصر
المحروسه على أيام الفاتح محمد على باشا الكبير رأس الأسره العلويه المالكه
ومؤسس مصر الحديثه.. والله أعلم..

الصبح نزلت على شغلى اللي هو السكرتاريه الدائمه لمنظمه تضامن شعوب آسيا
وأفريقيا وأمريكا اللاتينيه الكائنه بشارع عبد العزيز آل سعود بالمنيل.. قصر جميل
ومحندق كان بتاع واحده من نساوين العيله المالكه واستولت عليه الثورة وسبحان
من يرث الأرض ومن عليها.

كنا بنمضي حضور الساعه تسعه الصبح ونمضي انصراف انساعه اتنين بعد الظهر.

أنا كنت صحيح لا شغله ولا مشغله.. لكن كنت قاعد في مكتب عقبال أملتك بالتكليف والتليفون وصدق اللي قال يرزق الهاجع والناجع والنايم على بت ودنه.. لكن زى ما يقولوا الحلو ما يكملش.. مقعدين معايا واحد زى برضه لا شغله ولا مشغله كان متطوع سنه ١٩٤٨ فى حرب فلسطين فخدله رصاصه فى فكه رحلت فتحه بقه جنب ودنه الشمال ومع هذا لا يكف عن الرغى طول ما هو قاعد لدرجه إنه جاب لى صدادع دايم وأحياناً كان وشى بينمل كأنى متبجح وهو ما فيش فى قلب أمه أى نوع من أنواع الرحمه، والمصيه العظمى إنه كان متصور نفسه شاعر وكان بيكتب عشر قصايد ولازم يقرهم لى ويناقشنى فيهم وده مثلاً نموذج من شعره:

شرايين اليأس تتفجر فى أحقاد الضغينه وعروق اللفت تتلوى فى أوحال المدينه والشمس ترقص..

على ورق المشمش.

مبنى المنظمه كان مكون من ثلاث طوابق الطابق الأول فيه شئون المستخدمين والخزينه والمطبعه والأرشيف والشئون الإداريه والشئون الماليه.

مدير شئون المستخدمين كان اسمه الأستاذ حسن الإمام ودا كان ظابط فى سلاح الفرسان ولما طلع ع الاستيداع لجأ للأستاذ يوسف السباعى فعينه فى المنظمه والحقيقه إن المرحوم يوسف السباعى كان رجل طيب وشهم والدليل على كده كميه البشر اللى عينهم فى وظائف هامه وهما مالهمش أى لازمه.. مجرد أصدقاء الشباب والرياضه!

وكان أخونا حسن الإمام متصابى وصايب شعره وحواجه وكان عنده فى المكتب قبقاب وأبريق صاج زى بتاع المستشفيات وسجاده للصلا وكان بيلعب حواجه للنسوان ومره على المطيعجى ضبطه بيضرب عشره فى الحمام.. وساومه على عدم الفضيحة فى مقابل إنه مايخصمלוش الربع يوم بتاع التأخير لمدة سنه، ومع ذلك فضحه برضه.. آمال إحنا عرفنا إزاي؟

وكان مدير الشئون الإداريه الأستاذ زكى شنوده المحامى، ودا كان بيتعامل مع

نفسه باعتباره وزير.. ليه بقى؟ هو يا سيدى كان عضو فى حزب الكتله الوفديه اللى كان رئيسه مكرم عبيد باشا المحامى والسياسى الشهير أيام الأحزاب والملك فاروق ورغم إن حزب الكتله كان ينفوز فى أى انتخابات تشريعيه بعدد مقعد واحد فى البرلمان إلا أن الأستاذ زكى كان عنده أمل إنه حييجى اليوم اللى حزب الكتله ينفوز فيه بأغلبه ساحقه ويشكل الحكومه ويبقى هو وزير فيها ووزير العدل على وجه التحديد.

أما مدير الشؤون الماليه فكان اسمه عم مهدي ودا كان باشكاتب فى الخاصه الملكيه وخدوه مع الأسلاب، وكان ممكن يتعامل معاملة أسرى الحرب لولا عبقريته فى تسويه الحسابات وسد الخانات وتسديد الفواتير حاجه كده تفكر بشرفنطح لما بيطلع ناظر عزبه فى أفلام الريحاني وكان دمه خفيف جدا وعينه صاحيه رغم إنه شارف على السبعين من عمره المديد.. كان لنا زميل ييقى طول اليوم نايم ع المكتب وكان عم مهدي يقول:

- سيوه.. نوم الظالم عباده.

ومره زميلنا ده غاب بسبب المرض ولما طال غيابه رحنا نزوره فى البيت ومعانا عم مهدي ولما خبطنا ع الباب طلعت مراته وقالت لنا إنه نايم فقال عم مهدي:

- هو بينام هنا كمان؟

وانفجرت الست بالضحك واحنا معاها.

نطلع بقى الدور التانى وطبعاً حنبداً بمكتب السكرتير العام اللى هو يوسف بيه شخصياً وما ملكت يمينه اللى هما الفتى المعجبانى الأبيضانى الحليوه الأستاذ حسين سكرتيره الخصوصى ودا بالنسبه للموظفين لا يبهش ولا يبتش.. أما العقربه الصفرا أم زبان فهو مدير مكتبه اللى شكله بيفكر بكفار مكه اللى بيطلعوا فى التلفزيون.. وش مكفهر وعين مليانه خبث ودناءه ييشعوا من ورا قزاز النضاره السميكة ودا أصله كان سفرجى عند الملك وآلت ملكيته للدولة بعد الثوره فعينه ساعى فى مجلس الفنون. مجرد ساعى فى ركن مهمل.. ما تعرفش إزاي فضل يزحف زى

الحشرة لغاية ما قرب من مكتب يوسف بيه في المجلس (ما هو يوسف بيه برضه كان سكرتير مجلس الفنون) وانتبهز فرصه غياب الساعي الخصوصي وعمل القهوة وقدمها ليوسف بيه على الطريقه الملوكي فيوسف بيه استكيف فقال لهم: الولد ده يبقى الساعي الخصوصي بتاعى فبقى الولد ده الساعي الخصوصي بتاعه.

وروح يا زمان وتعال يا زمان وأشرق على الدنيا بنوره يوم عيد ميلاد دولت هانم كريمه طه باشا السباعي وحليله يوسف بيه وطبيعى يقدم الزوج الرقيق هديه جميله تليق بالمناسبه السعيدة وكانت عبارته عن سجاده فاخره من محلات إسماعيل على.. وكانت المناسبه فى فرصه العمر للسفر جى الملكى للقفز إلى أعلى.. وقد كان..

هما كانوا خدوه بناء على طلبه لتنظيم البوفيه على الطريقه الملوكي.. أتاى ابن الحرام كان جسمه فى المطبخ ودماعه كان فى حته تانيه..

وصلت النص نقل بالسجاده وباحليوه الأيضاى واشتغلت زغاريت الخدم وفردوا السجاده التحفه على الأرض للفرجه وفوجئوا بالسفر جى يقول لسواق النص نقل بمتهى الحزم:

- استنى ما تمشيش.

وقبل ما يستوعبوا المفاجأه كان هو موطى ع السجاده ويحفصها كخبير ملكى وبعد ما عمل كام حركه ملكيه اتجه مباشره للأستاذ حسين الحليوه الخصوص وسأله:

- بكام جيتوا السجاده دى؟

وارتبك الأستاذ حسين لكن هزه من راس يوسف بيه شجعتة على الإجابة.. فقال باستعلاء واستنكار:

- بكذا.. لكن بتسأل ليه؟

عمل ما ستمش الجملة الأخيره وسأله:

- فين الفاتوره؟

قدم له حسين الفاتوره فحفظها منه وقال لسواق النص نقل:

- لف السجاده وتعالى معايا..

الله أعلم بقى يوسف بيه وأهل منزله تصوروا إيه؟.. هل السجاده مضروبه؟ هل السفرجى حيغيرها بسجاده ملكيه؟ المهم إنهم كانوا فى حالة إعجاب وثقه فى ذوق السفرجى الملكى العجيب!!

هى حسبه نص ساعه وكان راجع لهم بنفس النص نقل ونفس السواق ونفس السجاده لكن الفاتوره اتغيرت.. نقصت خمسين جنيه قدمهم ليوسف بيه فرق شطاره.. أثاره ابن الحرام راح لمحات إسماعيل على وطلب منهم فاتوره بمبلغ أقل ودفع الفرق من جيبه ومن لحظتها استولى على قلب وعقل ومفاتيح وأختام وأرقام حسابات يوسف بيه فى البنوك وفضل يترقى اجتماعياً حتى دخل نادى أصحاب الملايين ووظيفياً لحد ما وصل لدرجه وكيل وزاره! وكل شىء فى مصر جايز.



الفاجومي

ضبطت نفسي أسرق قصيدة

- شقيق بليغ حمدي طار فرحاً بأغنيته لي في غاية التفاهة.
- جبالية قرود في معهد الموسيقى.
- في قصيدتي «الليلع الطريق» ضبطت نفسي متلبس بالسرقة.

كان فيه شخص وصخص فى مكتب السكرتير العام المساعد فى منظمه التضامن، أما الشخص فهو الدكتور مرسى سعد الدين الشقيق الأكبر للملحن المشهور بليغ حمدى اللى اتهرى يا ولداه من كل من هبّ ودبّ.. كل ما يقول لواحد صباح الخير يروح ظارفه نص كيلو ورق مليون أغانى ويقولوه: للأستاذ بليغ..

الراجل بأدب شديد ياخذ الورق ويوعده بتوصيله لبليغ عشان يخلص روحه لكن برضه ما يخلصش ليه بقى؟.. ما هو كل واحد مستنى يسمع أغانيه بعد بليغ ما يلحنها وتتذاع فى الإذاعه بصوت أم كلثوم إن أمكن، وإلا فمش أقل من فايزه أحمد.. يعنى ورده لآ، ونجاه جاز بس فى أضيق الحدود، وبناء عليه وهو داخل وهو خارج يفاجأ بشخص ينط فى كرشه:

- هيه.. إيه أخبار النص؟.. بصراحه عبد الوهاب عايزه لكن أنا بأفضل الأستاذ بليغ طبعاً.. ياريت نسمع أخبار قريبه.

وذات صباح دخل على الدكتور مرسى لقانى باكتب أغنيه.. بص فى الورق وقال:

- الله.. دا حلو قوى ده..

أنا قلبى وقع فى رجليا.. ودماغى لفت ولا الأوضه اللى لفت؟.. أنا مش فاكرك.. كل اللى فاكركه إنى تماسكت وقلت له بمتتهى الألاطه:

- دى حاجه خفيفه كده.

قال لى:

- بالعكس.. دى دسمه جدآ.. اكتب منها صوره أديها لبليغ.

بصراحه أنا كنت عايز أسوق فى الألاطه وأقول عبد الوهاب عايزها لكن لقيت إن الموضوع حيبقى فيه استهبال وممكن الفرصه تطير من إيدى فرحت مادد له الورقه وقايل له:

- خدها.. أنا حافظها.

ورحت مديها بقين فلسفه فقلت له:

- أنا في رأيي إن الشعر اللي ما يتحفظش مايقاش شعر!

الراجل قال لي:

- فعلاً فعلاً يا أستاذ نجم.. بس إذا سمحت تكتب عليها لبليغ.

رحت ماسك الورقة وكاتب:

عزى بلبل.. باكوره إنتاجنا المشترك - كلام الناس - وإلى مزيد من الإبداع المشترك أيها الزميل الجميل، ورحت ماضى نجم «شين عين» يعنى شاعر عاميه.

وعلى فكره النص ده كان غايه فى التفاهه وأنا باقول الواقعه التفاهه دى لأنها بعدين حتأثر فى حياتى بشكل إيجابى.. دى حاجه.. الحاجه الثانيه إن دى كانت آخر تفاهاتى بالنسبه للشعر على الأقل.

نيجى بقى للمصخص اللي هو على نفس درجه الدكتور مرسى سعد الدين.. يعنى السكرتير المساعد.. هو كان اسمه كمال لكن لوقت له يا بهاء يرد عليك!

المذكور برضه زميل يوسف بيه فى سلاح الفرسان وسرحوه فعيته يوسف بيه فى المجلس والمنظمه.. كان الأستاذ عوف مساعد المخرج المزعوم مسميه (أبو لمعه الأصبلى) لأن كل شىء فيه كان بيلمع.. شعره ووشه المتحفف وياقه القميص والبده والجزمه وزراير القميص الذهب وكان باين عليه مبرشم.. وهو ماشى لا يرد السلام ولا يرمى السلام، ماشى ذاهل عن الوجود ومبتسم على طول وكان يوسف بيه دائماً يهزأه لأنه مش اجتماعى وماياخدش ويدى مع الناس فى الكلام:

- يا أخى إنت زى البربند مع النسوان.. اعتبر كل الموظفين نسوان واتكلم معاهم.. قول صباح الخير قول سلامو عليكم.. قول أى حاجه!


وفى يوم كان واخذ الدش ونازل من مكتب يوسف بيه فى المجلس وكانوا الموظفين متجمعين عند الساعه عشان يمضوا انصراف فوجئ السكرتير العام المساعد بحافظ رجب القصاص السكندرى بيقوله:

- يابهاء بيه يا بهاء بيه!

حافظ رجب كان قصير جداً والصخص كان طويل جداً فوقف

وانحنى على حافظ رجب فى مشهد ديمقراطى تاريخى وقال له:

- نعم يا حافظ.



فحافظ مد رقبته وبوزه فى وشه وقال له:

- ويو.

- قال له:

- بتقول إيه؟

قال له:

باقول لك ويبيو.

وانفجر الموظفون بالضحك ورجع الصخص على مكتب يوسف بيه عشان يقدم له تقرير غاضب عن نتائج الديمقراطية مع أمثال حافظ رجب!

قبل ما نخش على باقى الدور الثانى لازم نعدى ع الأستاذ محمد المصرى.. هو كان عبارته عن ساعى أفرنجى! يعنى إيه ساعى أفرنجى؟ يعنى كان بيودى البوسته المبعوته من المنظمه ويجيب البوسته الوارده من مكتب بريد الملك الصالح. وكانوا مسميته مندوب المنظمه لدى هيئه البريد، كان رجل مدور زى الكوره وكان دمه زى الشربات، وشه مبتسم دائماً رغم حملة الثقيل كان عنده اربعتاشر عيل وجوز نسوان، وكان مثال الاستقامه والانضباط ويمكن ده هو اللى خنق الشاعر جواه، أنا قرئت له قصيده واحده كان ناشرها فى فرخ ورق ومطبقه على أربعة يعنى ٨ صفحات وبعد ما قررتها سألتها:

- إنت ليه ما تكتبش؟

قال لى:

- أمال أمك اللى كاتبه ده؟

قلت:

- لا صحيح.

اتنهد بحرقة وقال لى:

- الشعر دا عايز البال الرايق.

قلت له:

- وإنت إيه اللي معكر بالك؟

قال لي:

- ولاد الحرام اللي زيك.. لكن زيك إيه.. إنت مالکش زى.. ابن الحرام بيبقى مشكوك فى أبوته لكن إنت مشكوك فى أمومتك.

وكان له بيت شعر بيحاول إنكاره خوفًا على لقمه العيش.. يقول:

كل الزملا بتدعى تمللى

يخرب بيت عبد المتجلى

اللى هو طبعًا السفرجى العجيب بعد ما استفحل وبقى وكيل وزاره.

أما قصيدته العبقرية الوحيدة التى كتبها عن طفولته فى قريه بهنباى شرقيه فمع الأسف الشديد أنا مش فاكّر منها كثير:

فى بهنباى شرقيه

فى دار أهلنا

مدفن أبونا وجدنا

فى أغلى حته عندنا

قضينا أيام الصبا

وسط الأراضى الطيبه

اللى حصاها.. مرتبه

للى قعد

واللى حبا

واللى ترابها

واللى ترابها

عرف كفوفنا والقدم

واللى ترابها

قبل الجزم

واللى ترابها

فى بهنباى

واللى ترابها

الترعه تجرى فى صهرها

واللى ترابها

وفى صدرها

واللى ترابها

وأنا وعزب

واللى ترابها

وابن اسماعين

واللى ترابها

شيخ العرب

واللى ترابها

على إيديهم كنت أعوم

واللى ترابها

فى كل يوم

واللى ترابها

أغطس وأبلىط

واللى ترابها

وانتشى

واللى ترابها

ولا أختشى

واللى ترابها

م العمده حتى لو مشى

واللى ترابها

فى بهنباى

واللى ترابها

مع الأسف أنا مش فاكِر غير دول، وعلى فكره أنا ظبطت نفسى متلبس بالسرقة

واللى ترابها

من الأستاذ محمد المنصرى فى قصيدتى «الليل ع الطريق»:

ينفخ فى بطن الأرض

واللى ترابها

تجبل

تنشئ

ما تختشئ

من أى كائن لو مشى

فوق ظهرها

الأول قعدت أكابر وأقول دا مجرد توارد خواطر والآخر اقتنعت إنه توارد

قصايد!



الشئون الفنية بقى اللى محتله الدور الثانى جنب مكتب السكرتير العام وملحقاته.. دى اللى حيرت أفكارى.. فنيه فى إيه؟ يعنى إيه الفن اللى بتفنه؟ مستنقع نسوان على ثلاث أربع شبان مرخرخين ماتعرفش بيعملوا إيه!.. ودول بقى اللى بيسافروا المؤتمرات ويأبجوا الدولارات ويحببوا بضايع بورسعيد من قبل بورسعيد ما تفتح!

والمدهش إن كل المؤتمرات سواء اللى هنا أو اللى بيسافروا لها بره كانت بتتمخض عن ورقتين مكتوبين ع الرونيو يلبس يوسف بيه نضاره القرابه ويكرهم والتليفزيون يصور وتطلع فى نشره الأخبار وكان الله بالسر عليهم!

المنظمه دى كان فيها الهند والصين والاتحاد اللى كان سوفيستى يا ولداه واليابان والعراق ولبنان وزنبار ومالاوى وحاجات من هذا النوع، ودول كلهم كان لهم مندوبين قاعدين فى الدور الثالث معايا أنا والإرزه اللى حاطينهاولى فى المكتب يرغى ويكتب شعر من ماركة شرايين اليأس ويناقشنى فيه.

وذات يوم طب علينا فى المكتب على الهندى..؟ دا يا سيدى سجان قابله فى سجن أرميدان وكان عنده داء منيل اللى هو كتابه الأشعار والأغانى بقصد تلحينها وغناها فى المدياع.. ودا كان بيحب على دماغى.. أنا أول مره قابله كان بقى له

أربعناشر سنه بيقدم نتاجه للإذاعه ويطرفض! وكان كل ما يترفض له نص يقدم بداله اتنين فيترفضوا فيقدم أربعة وهكذا إلى أن وصلت الدفعه الأخيره إلى ١٢٨ نص.. مرفوض ومع هذا كان مليء بالتفاؤل مش عارف ليه! وكان على الهندي لما يكلمك يحط بقه فى وشك ولو إنت اتراجعت هو يتقدم عشان يحتفظ بنفس المسافه ولو افتتح فى الكلام ما ينسدش وكان بيتفتف وهو بيتكلم.. شوف الكائنات بنت العرص اللى ممكن رينا بيتليك بيها وإنت ماشى فى حالك لا بيك ولا عليك!

أنا لسه بافكر أخلع إزاي من شاعر الشرايين. وإذ بالأستاذ الهندي هالل علينا من باب المكتب.. قلت فى سرى ياما إنت كريم يا رب، قمت خدته بالحضن ودوغرى رحت لاضمهم فى بعض:

- الشاعر الكبير الأستاذ شرايين اليأس.. ودا شاعر الوجه البحري الأستاذ على الهندي..

اسلموا على بعض بخراره، قلت لهم: اطلب لكو اتنين شاي؟

وقلت عليهم الباب من برا بالفتاح ونزلت عملت الاصطباحه الجميله عند محمود الباشا ورميتهم من دماغى. الساعة اتنين إلا ربع قمت عشان أمضى انصراف وأروح افتكرتهم طلعت تجرى خطيت ودنى ع الباب سمعت ودوده فتحت لقيت شاعر الشرايين جابده على الهندي بالكرسى وماسك رجليله بركبه وحاطط بقه فى ودنه ويبرغى والثانى نايم ووشه مزنهر وربالته نازله قلت له! ليه رحت ده

قتلته يا كافر؟ وإذ بعلى الهندي يصحى مقزوع وهو يقول:

- يا ساتر دماغى.. إيه ده.. ياهو.. دماغى بتنمل.. يا ستار يا رب.. فيه إيه؟ أعوذ بالله!

قلت له:

- حد يعمل كده فى ضيفه برضه؟! لا لا! لو كان كده لما كان فى الدنيا حاجة

قال لى: ..

- ضيف مين يابو خاله؟.. دا واد ما فيش فى وشه نقطه دم.. دانت ساينا تسعه ونص.. لغايه اتناشر يا مؤمن مش عارف أسمعاه مطلع.. ساعتين ونص ماخداش نفسه.. وجاى إنت تقول لى ضيف.. وبعدين دا لا شاعر ولا دياولو.. دى بلد حظوظ وشهادات..

وهرب على الهندى من جحيم شرايين اليأس وبعدها ماورائيش خلقته الشريفه. أنا متطير.. بانفائل واتشائم من أيها حاجه.. يعنى فى التفاهه الشديده، ولما سألت سعد الموجى عن معنى التسميه الرسميه لحوش آدم اللى هى خوش قدم قال لى:

- يعنى قدم الخير.

قلت:

- اللهم اجعله خير.

وبدأت البشائر تهل.. القعه عند محمد على بتتوسع كل ليله وتزيد.. أصدقاء سعد الخالص بدأوا يدمنوا السهر وسماع الشيخ إمام والسياحه الروحيه فى صفحات الطبقات الشعرانيه وغيرها من كتب الصوفيه الأمهات وبصوت سعد الجميل.

وجيه القيايى المحامى ابن الساده القيايى.. صديق عمر سعد وزميل دراسته وزميله فى منظمه الشباب الاشتراكى رغم انحداره من أصول برجوازيه فى ريف محافظه المنيا.. ابتسامه صافيه كأنها جزء من ملامحه وعقل متفتح وقلب دافى مشحون ومشجون بحب مصر العزيزه.. مش بس مصر الأثر الخالد.. لكن مصر المستقبل أيضاً.. «مستقبل بنته الجميله الوحيدده حنان».. وأوزوريس القاهرى ابن حى شبرا النابغ اللى درس تاريخ مصر المخروسه واتخرج بتفوق واتعين مفتش آثار فى حوش آدم أولاً بعددين يروح شبرا وكان ييمتعا بكلامه الجميل عن الأسلاف العظام.. كان بيتكلم عن كل واحد منهم وكأنه من بقيه عيلته وكان بعد كل وجبه ثقافيه يقدمها لنا يضحك ويقول:

- المهم. الناس دول أدهشوا وحيروا كل اللي اتعرف عليهم ماعدا إحنا!

وفؤاد السبكي انفلاح الشرقاوى اللي هبط قاهرة المعز عشان يدرس ويتفوق فى حياته الدراسيه والعملية ويسافر الهند وباكستان وبنجلاديش ملحق تجارى ناجح وجنب دا كله يكتب الشعر بموهبه رصينه ويرجع لنا من جولاته الآسيويه بدنيا من الأساطير من موطن طاغور وإقبال ويسحرنا بحوادثه الجميله عن ناس قابلهم هناك بيعشقوا مصر المحروسه وشعبها الطيب الجميل وحلمهم بزيارتها فى يوم من ذات الأيام.

وفريد القاياتى ابن عم وجيه المهندس الزراعى والروايه المبدع للشعر العربى والمتنبى على وجه الخصوص وبيرم اللي كان فريد مسميه عاشق مصر العظيم.. الأستاذ نظمي زميل سعد الموجي فى الدراسه والعمل فى مصلحة السياحه والراجل دا بالذات كان عنده طموحات مهوله فى تطوير العمل السياحى فى مصر وكان دائماً يعمل مقارنه بين الإمكانيات المتواضعه للبلاد اللي نجحت سياحياً وإمكاناتنا المهوله المعطله بفعل اللصوص وتناBLE السلطان المهيمنين على العمل السياحى فى مصر المحروسه.

الحقيقه أنا مش قادر أقدم شخصيات تانى لأن الحكايه حيطول شرحها اللي عايز أقوله إن دا الجو اللي اتولدت فيه فكره التعاون بينى وبين الشيخ إمام. أزاى؟ إحنا لما كنا بنسهر معاه ماكناش بالنسبه له مجرد سميعة، هو كان دائماً يقول لنا:

- انتو عزوتي وناسي وأنا من غيركو جيص فى قفص عشان كده لما كان بيغني كان بيحجب آخر ما عنده.. أنا لاحظت حاجه إنه فى كل إعاده بيدي إضافات من عنده لا تقل أصاله ولا حلاوه عن اللحن الأصلي وذات مره سألته.

- إنت ليه ما بتلحنش؟

قال لى:

- مش لاقى كلام وقور.

ضحك محمد على وقال له:

- وقور إزاي يعنى؟ لا بس عمه!

قال له:

- لا يا سيد محمد.. كلام وقور يعنى مافيهوش تنطع.

قال له:

- إنت جيت تكحلها عميتها.. إذا كنت مش فاهم وقورح افهم تنطع؟

قلت له:

- أنا أديك كلام.

قال لى:

- دا شىء يشرفنى يا أستاذنا.

أنا صراحه عجبتنى حكاية يا أستاذنا دى رحت مطلع قلم وورقه وكاتب له النص
التافه اللى سبق ادبته لمرسى سعد الدين يوصله لأخوه بلبل وقريتهوله وادبته الورقه
حطها فى جيبه وقال لى:

- إن شاء الله يكون.

وفات يوم والثانى والثالث وأنا على أحر من الجمر وفى الوقت نفسه مكسوف
أكلمه إلى أن كان يوم اصطحبنا سعد الموجى على بيت الشيخ عبد السلام الموجى
والد سعد رحمه الله عليه.

لهفنا العشوه الجميله وبدأنا السهره وفوجئت بسعد بيقول بأدبه وتواضعه الشديد
وابتسامته الجميله:

- كلنا شوق ولهفه لاستقبال أول مولود فنى من مولانا والأستاذ نجم.. فرد إمام:

- يكون بإذن الله.

وضحك سعد وقال:

– دانتوا بتشتغلوا من ورائنا بقى!

قلت له:

– والله أنا منتظر زيك ويمكن أكثر.

فقال إمام بلهجه اعتذار:

– معليش يا أستاذنا أنا أصلى كسول ووحش.



ريشة الفنان: جبهة

قلت له: - العفو يا مولانا إذا كان النص مش عاجبك أكتب لك غيره.

راح سعد الموجي مديني ورقه وقلم وقال لي:

- قول مدد يا سيدى عمر وتوكل على الله.

قلت له:

- طب أعرف سيدى عمر مين الأول.

قال لي:

- سيدك عمر بن الفارض سلطان العاشقين.

قلت:

- مددين.

وبدأت أكتب:

أنا أتوب عن حبك.. أنا؟

أنا لى ف بعدك غنا!

دنا باترجاك

الله يجازيك

يا شاغلنى عليك

وإن غبت سنه

أنا برضه أنا

لا أقدر أنساك ولا لى غنا

ولا أتوب عن حبك أنا

وفي خلال نص ساعه كان النص انكتب وفي خلال نص ساعه تانى كان اتلحن
وفضلنا نغنيه طول الليل وكان دا أول عمل بينى وبين الشيخ إمام..



ما بين دا قال

ودا بيقول محيرنى ف هواك

على طول

تغيب عنى يا دوب ساعتين

تجبنى بكلمه قالها عذول

ويتمد الخصام ليلتين

فى قلنا وقال

وشرح يطول

محيرنى.. ومتحير

وكل دقيقه تتغير

عشان دا قال

ودا بيقول

تصوروا إن الكلام التافه ده كان السبب في شقلبة حياتي!! ما هم هما دول يا
سيدي البقين الزفرين اللي شافني الدكتور مرسي وأنا باكتبهم فعجبوه! فخدمهم لبليغ
يلحنهم!

بس أنا بقى من ساعتها بدأت أتعامل مع نفسي باعتباري شخص ذو أهميه فبدأت
أغير مشيتي وطريقة كلامي وأسرح شعري بالصابون، ولو كانت الإيد طايله كنت
غيرت ملابسى بالكامل.. بس معلى مسير القرش بعجري في إيدي وأكل ما يعجبني
وألبس ما يعجب الناس.

كمان بدأت رجليا تعرف سكة معهد الموسيقى العربية.. كل عصره أنط لهم زي
قرد قطع، وأخش البوفيه عدل، وما أدراك ما البوفيه؟ حاجه كده تفكر بـجبلاية
الفرود.. شلة مقاطيع واقفين على أول سلمه من سلالم المجد وكله في الضربان
الشديد اللي مطول سوالفه تشبهاً بعبد الوهاب القديم، واللي لابس شورت وقميص
وبالطو في عز الصيف! واللي قاعد يكلم نفسه واللي قاعد ماييكلمش نفسه واللي
لابس شنبر نضاره من غير قزاز واللي واقف يلعب حواجه في المرايا واللي لامم
حواليه شله بيسمعهم كلام مش مفهوم! هو يقول وهما يمصمصوا شفايفهم ويقولوا:
- يا عيني كمان.

والأغرب من دا ودا شخص تخين وقصير وماسك عود قاعد يتجد عليه بز عم إنه
يلحن أغنيه اسمها «غرام فى البستان»، وبقي له سنتين بيلحن فى المطلع اللي بيقول:

يا شاغلنى ومشغول عنى بجوافايه

طب رد علىّ وخد لك منجايه

يا بلحتى فى أيامى الرايحه

يا فضيحتى فى أيامى الجايه

خد لك منجايه بجوافايه

منجايه النايه كوا النايه!!

الراجل ده أنا حاولت اعرف اسمه ما أمكنش.. كان بعضهم بيناديه بـ«أبو الزيك
الرايق».. وكنت كل ما أقرب منه يبعد عنى.. مش عارف ليه؟.. يبدو إنه كان
بيتشائم منى.. المهم إنه كان عنده ثقه أكيدة إن أم كلثوم حتغنّى اللحن ده فى يوم من
ذات الأيام.



الفاجومي

وهلت المصائب.. بقصيدة

كلب أم كلثوم

■ قصيدة ركبّت صاحبها الزمكة وقصيدته دخلت كاتبها

السجن.

■ الشيخ إمام صنعه؛ حنان أمه وقساوة أبيه وصوت

الشيخ رفعت.

■ لماذا أنا ثالث ثلاثة أولهم.. المتنبي والثاني بيرم

التونسي؟

سورة الفاتحة

بسم الله الرحمن الرحيم

الحمد لله رب العالمين

الحمد لله رب العالمين

الحمد لله رب العالمين

الحمد لله رب العالمين

الحمد لله رب العالمين

الحمد لله رب العالمين

الحمد لله رب العالمين

ذات عصره واحنا قاعدين في بوفيه معهد الموسيقى العربي، حصل هرج شديد
في الطرقة اللي جنب البوفيه، وقامت الناس تجري.. حبتين وبدأت الهمهمه..

- بليغ.. بليغ أهه.

- والله صحيح.. دا بليغ اهه

- ومين اللي متشعلق في دراعه ده؟

- دا واد شاعر لسه جاي م الصعيد بشحمه.

- وماله متأبد في دراع بليغ كده؟

- فرصته.

يبقى حيوصل.

- عقبالنا..

ولقيت نفسي في جراه غريبه باقتحم الموكب..

- أهلا بلبل.. أنا الشاعر أحمد فؤاد نجم.

حاول يتجاهل.. ما اديتلوش فرصه..

- أنا زميل الدكتور مرسى.

قال لي:

- آه.. أهلاً.. أنا خلاص ح الحن البتاعه دي.. قال ويقول.

تصدق تؤمن بالله؟.. أنا بعدها ما سمعت حاجه.. رجعت على البوفيه نافش
ريشي، وورايا شلة سلالم المجد اللي اتلموا حواليه لأول مره عشان يباركولي
وياخدو فكره عن الموضوع.. فبدأت أتعامل معاهم بألاطه.. حطيت رجل على رجل

وزعمت إن أم كلثوم اتجننت أما سمعت الكلام. وصممت إنها تغنيه.. وأنا الحقيقة
لسه بافكر في الموضوع!

لكن وعدتهم إني في خلال أسبوعين ح آخذ قراري، وشطح بي الخيال لدرجة
إني فكرت جدياً في فتح حساب في بوفيه المعهد لولا إن عمر قرني الجرسون
أجهض الفكره لما قال لي بصريح العبارة:

- هنا.. مافيش شكك يا حلاوه.. هنا جبتو لا رجاء.. مسكتو مشروب! ما فيش
لا رجاء يقعدوك ع كرسي بالمقلوب.. وقوم بقى هويتنا..



حارتنا في الحواري
علم على الصواري
لوطار فوقها الكتاري
تتهز المشريه
يا حوش آدم يا دارنا
ياساكن حضن جارنا
سيدنا الحسين تبارك
شهيد الإنسانيه



في هذه الأثناء كان إنتاجنا، الشيخ إمام وأنا بدأ في التتابع.. صحيح مش بشكل
غزير لكن في تقديري كانت النوعيه جيده إلى حد ما يعني مثلاً في أغنيه عشق
الصبايا:

حييت سواد العين سنه
ونسيت صباحي
وغرقت في ليل الضنا

عطشان وصاحي
ولما بان ورد الشفايف
لون جراحي
طاوحت قلبي ورحت له
والشوق ورايا
شوف الحكايه يا وله
شرف الحكايه
عشق الصبايا يا وله
طول معايا!



أهم من العلاقه الفنيه كانت العلاقه الإنسانيه بينا كل يوم بتنمو وتتوثق كل يوم
عن اللي قبله وبدأنا نحكي ونتحاكى.

عرفت عن الشيخ تعلقه الشديد بأمه ونفوره المصحوب بالخوف من أبوه اللي كان
حزمه في تربية الشيخ إمام بيصل في أحيان كثيره إلى حد القسوه وعلى الجانب
التاني كان فيض من الحنان والحب بيتدفق عليه من قلب الأم اللي كان إحساسها
بالذنب بيتحكم في تصرفاتها حيال الشيخ إمام.. لأنه كان أصيب بالرمد الحبيبي
وهو لسه رضيع ولجأت أمه للدايه اللي عاجلته بحشو عينه روث البهايم عده مرات
حتى فقد البصر تماماً..

- كانت الله يرحمها بتحمل نفسها الذنب، وتفضل تبكي بالساعات لوحدهم
العيال قال لي يا أعمى.

أما الواقعه اللي سابت أثر جارح وأليم في نفس الشيخ إمام ولما حكاها لأول مره
كان جسمه كله بيرتجف والعرق بيشر منه رغم برودة الجو، بعد ما ختم القرآن في
كتاب قريته - أبو النمرس - انتزعه أبوه من حضن أمه وخذه على مصر وسابه في
الجمعيه الشرعيه.

والحقيقة إنني على مدى خمسة وعشرين سنة من عمر صداقتي مع الشيخ إمام حاولت أفهم منه ليه أبوه وداه الجمعية الشرعية؟ أو يعني إيه الجمعية الشرعية أو شرعية بالنسبة لإيه؟ أو مين إللي عملها شرعية؟ لا أنا فهمت ولا طلع هو كمان فاهم حاجه!!

المهم قعد الشيخ إمام ياكل ويشرب في الجمعية الشرعية، وبيات فيها كمان إلى أن ضبط متلبساً مع سبق الإصرار والترصد بجرمة الاستماع إلى صوت الشيخ محمد رفعت وهو يقرأ سورة مريم في راديو القهوه فطردوه شر طرده مشيع باللعنات إلى الطريق العام وهو مازال في طور الطفولة فلم يجد له مأوى يا ولداه غير رحاب سيد الشهداء الحسين بن علي رضي الله عنه، فأقام في المسجد إقامه دائمه إلى أن كانت ذات ليله بعد صلاه العشاء سمع اللي يقول له:

- مساء الخير يا مشيخه.

رد الشيخ إمام بأدبه المعهود:

- مساء الهنا يا محترم.

قال له:

- إنت حافظ القرآن؟

قال له:

- إن شاء الله.

المهم.. فضل دا يقول ودا يرد عليه وانتهى الحوار بأن الراحل ظرف الشيخ إمام مبلغ جسيم الشأن كعربون وسجبه؟؟ عشان يحيي ليله قرآنيه في بيته على وعد تأبيج باقي المبلغ آخر الليل.. وبعد شويه مشي سخنين فوجئ المقرئ؟ بصاحب الليله المزعومه بيصفعه ثلاث أربع مرات أفقدوه الوعي وخذ منه العربون والكام قرش اللي جمعهم طول النهار من أهل الخير زوار ضريح الحسين، وقلعه الجبهه والعمه والملابس الداخليه وخدمهم وسابه ملط بعد ما اعتدى عليه بوحشيه، وبعد

مرور ليله رهيبه اكتشف الطفل إنه في قرافه المجاورين.. الحادته البشعه دي تركت آثار جارحه في مشاعر الشيخ إمام فيما بعد، وكانت هي السبب في فشل زواجه الوحيد لأنها كانت بتطارده في كل وقت ومكان حتى في فراش الزوجيه اللي ما استمارش أكثر من سبعة أيام ثبت فيهم عجز الزوج عن ممارسه وظيفته وتسليمه بهذا العجز وسعيه للانفصال السريع عن الزوجه الوحيديه في حياته.



غير كده آثار وجودي في حوش آدم مجموعه من ردود الأفعال المختلفه مثلاً.. كان في حوش آدم منشد مشهور من منشدي الإذاعه وكان الشيخ إمام بيشتغل معاه في البطانه في مقابل العشوه المتينه والتحشيشه الفللي آخر الليل.

أخونا المنشد ده هو وجيله كانوا عايشين على تراث المنشد المجيد الشيخ علي محمود، نفس الكلام ونفس الألحان يقولوها في الإذاعه وسهرات المساجد، وكذلك الأفراح واليالي الملاح يعني على رأي الملحن الموهوب المرحوم عزت الجاهلي:

- ياعم الشيخ أبو العنين.. بوس إيدك وش وظهر انتو لا بتدفعوا لمؤلف ولا للملحن، وعمالين بس تعبوا شرايط واسطوانات وتلايموا على الفكه وتجمدوا وتشتروا عزب ربنا يخرب بيوتكوا.

وفي ليله من ذات الليالي طقت في دماغ المنشد المذكور فكرة التجديد والتطوير زي عبد الوهاب ما بيقول، طرح الموضوع على بساط البحث، وبعد شد وجذب اقترح الشيخ إمام اختيار كلمات مجهولة المؤلف يقوم الشيخ إمام بتلحينها على طريق استاذة العظيم الشيخ درويش الحريري، وعجبت الفكره عمنا المنشد المشهور، واختاروا عده أبيات من برده البوصيري وطبقات الشعرااني ووضبوا الطبخه الفنيه وراحوا سجلوا في الإذاعه وابجوا المبلغ عن كلام الإمام البوصيري وألحان الشيخ

إمام بعد ما نسبوا التأليف والتلحين للمنشد المشهور اللي ضميره نقح عليه فأضاف لمخصصات الشيخ إمام فوق العشوه والتحشيشه مبلغاً وقدره خمسين قرش صاغ بالكمال والتمام باً عتباره ملحناً من الباطن ومشيت المسائل آخر حلاوه على هذا المنوال ثلاث أربع سنين إلى أن أهلت طلعتي الميمونه علي حوش آدم وبدأنا نشتغل سوا فعمنا الشيخ إمام دلق المنشد المذكور، فبالتالي اعتبرني خطفت منه الفرخه اللي بتبيض الذهب فسقط عليّ أخوه المزين يقابلني بالأحضان وأول ما اتلف يقول للناس:

- دا واد جاسوس إسرائيلي ابن كلب زارعيه هنا في حوش آدم ونهايته إن شاء الله جبل المشنقه وعن قريب بإذن واحد أحد.

كل دا وأنا في غفلة رينا لا أعرف حاجه عن علاقه الشيخ إمام بالمنشد أخو المزين ولا عن مشروع التجديد والتطوير اللي باظ بسبب علاقتي بالشيخ إمام ولا حتى عن عملي مع الموساد الإسرائيلي.. والحقيقه إن أنا لغاية دلوقتي مش قادر أفهم.. ليه إمام كان بيخبي عليّ الموضوع ده؟

لكن برضه في اختراع اسمه بركهه دعا الوالدين.. وهو دا اللي أنقذني من المصير الدامي اللي كان بيتظرنني علي إدين الناس.. الكلام ده كان في أوائل الستينيات، وكانت إسرائيل اسمها الكيان الصهيوني العنصري التوسعي، وأحياناً رأس الجسر للإمبرياليه العالميه، وكان الشعور بالعداء تجاهها متأججاً سواء على المستوى الشعبي أو على المستوى الرسمي.

يعني شوف المزين ابن الحرام كان بيدبر لي في إيه، وأنا ما أعرفش، لكن يشاء السميع العليم إن المزين المذكور يضبط متلبساً بسرقة الخشب والأسمت اللي مشونهم المقاول لعملية ترميم جامع الفكهاني، وكانت فضيحه بجلاجل هزت ثقة الناس في المزين، وبالتالي أسقطت دعاواه ضد العبد الفقير، وأطلق عليه علي أبو شبهه اسم - بن جوربون اللي ياكل مال النبي ويغمس بالصحابه، - وشيللاه يا بركة دعا الوالدين



كل يوم عن الثاني كنت باتمكن أكثر من صنعه الشعر لأنني كنت بأفهم أكثر من خلال الاحتكاك بالشباب المثقف في سهرات حوش آدم الممتعه. ومن أهم القناعات اللي اعتنقتها في الفتره دي قناعة إن الفن بشكل عام وعلي الخصوص الشعر كائن حي.. يعني الشعرا بيخلفوا القصايد زي الناس ما بيخلفوا العيال، وزي ما العيال أقدام وأعتاب ونواصي برضه القصايد كده.. فيه قصيده تسعد وقصيده تتعس.

مثلاً.. شاعر العرب الأعظم أبو الطيب المتنبي وهو بيولد طفله الجميل قصيدة -واحر قلباه- لو كان يعرف إنها حتجيب أجله على الأقل كان لم الأتاك حبتين، وماكنش فيه أي داعي يكتب البيت المنكود:

الخيال والليل والبيداء تعرفني

والسيف والرمح والقرطاس والقلم

لأن الواد الشمحطي اللي قطع عليه الطريق اصطاده منه وقال له ما معناه:

- مش أنت برضه إللي قلت كيت وكيت؟

خليك مطرح المتنبي.. تعمل إيه؟

أنا عن نفسي لو كنت مطرحه ما كنتش جيت ورا.. على الأقل من باب الحماقه.. وهو دا اللي عمله الشاعر العظيم لأنه رد على الواد الصايح بما معناه:

- أيوه ياسيدي أنا اللي قلت كده وأعلا ما في خيلك أركبه.

- ويقال والعهد على الراوي إن الولد كان مخبر في أمن الدوله الإخشيديه ومزقوق ع المتنبي بعد ما تولي التقارير السريه عن عضويه الشاعر العظيم في التنظيم السري للقرامطه، وطبيعي تبقى التصفيه الجسديه هي رد الفعل السلطوي الوحيد لدوله بيحكمها العسس.

شفتوا بقي المتنبي خلف إيه؟

فيه بقي قصيده مبروكه زي العيل اللي يسعد أهله.

مثلاً الشاعر إبراهيم ناجي اللي سود الأوراق وخلص المحابر غزل في محبوبته المجهوله حتى كتابه هذه السطور.

كان يعرف منين إن واحده من غزلياته الجميله حستحول بعض أبياتها إلي أغنيه جميله اسمها- الأطلال يلحنها السنباطي العظيم وتغنيها أم كلثوم بجلالة قدرها ويقولوا عنها المزيكاية الخواجات إنها- سيمفونية العرب- ويتحول حق أدائها العلني إلي نزناز فلوس يفضل يخز علي دماغ الورثه إلي أن يرث الله الأرض ومن عليها.

حتى عمنا بيرم رغم أنه كان حمايه فرنساويه- ويمكن ده اللي خلاه يحط الملك فؤاد في دماغه ويفضل يكيل له من المنقي خيار قسايد من ماركة: ولما عدمنا بمصر الملوك

جابوك لنجليز يا فؤاد قعدوك

تمثل على العرش دور الملوك

وفين يلقوا سافل نظيرك ودون.

لغايه مايقول له في نهاية القصيده:

بذلنا ولسه بنبذل نفوس

وقلنا عسى الله يزول الكابوس

ما نابنا إلا عرشك

يا تيس التيوس

لا مصر استقلت

ولا يحزنون

ولما مرت المسألة بسلام تصور عمنا بيرم الحمايه الفرساوي حتحميه من نحس

القصايد اللي تتعس وبطش الملك فراح رازعه قصيده القرع السلطاني وكشر الملك
عن أنيابه وضرب بالحمايه الفرنساوي عرض المحيط ونفي بيرم من مصر اللي روحه
فيها وقعد في المنفى تستعاشر سنه واتلطم فيهم وشاف الويل وكتب بدمه قصايد
العشق الخالده اللي بيقول في واحده منهم ويوصف حاله في الغربه:

لا سطل خروب يسعفني

ولا ابن نكته يكفيف

ما يقصف العمر ويفني

إلا الخلايق بعلها

يا مصر هجرك يكفاني

يا عمله قمع وناسياني

دا يوم ما ح ارجع لك ثاني

حتبقى رجعه برسمالها

وفيه بقى شعرا وشعارير خلفوا قصايد سعيده عملت لهم أرصده في البنوك
بالعمله الصعبه والسهله وبنوا منها قصور بحمامات سباحه على شط النيل والكنال
وركبوا الزلمكه والشبح واتجوزوا نساوين من بتوع الإعلانات واللهم لا حسد.

العبد الفقير بقى خلف قصايد م اللي تزعل السلطان وتفتح باب اللومان وطبعاً
كل قصيده منهم كان لها حكايه لكن قبل ما أحكيها أحب من كل مؤمن يوحد الله
ويسمعني صلاه النبي.



كلب الست هي البكره.. يعني المفروض إني أسميها أول الفرحة.. لكن فرحة
مين؟ دي عملت لي مشاكل مالهاش حل.. كل صحابي أول ما سمعوها حصل لها
انفهاش من النوع البلاهوني.. وحقوقك ليه؟



الفاجومي

الليثي عبد الناصر: ألويا أنور
السادات: تمام يا فندم

- قصة قصيدة «كلب الست».
- ضارب الرق الذي أنشأ تنظيم «الخباط الأشرار»
- على إيقاع الضباط الأحرار.
- محتال غلبان خدع السادات وخذ منه ٥٠٠ جنيه
- من المال العام؟

المعروف عنى إننى طول عمرى من دراويش الست أو كلثوم.. عاشق صبابه ومغرم متيم بصوتها السماوى الساحر وفنها الأصيل.. مش بس كده.. دانا كنت هاريهم كلام فى الموضوع ده.. وأحياناً ماكتتش باستكفى بالمعلومات الصحبحه فكنت باخترع معلومات من عندى تحلى الكلام وتسخن القعهه.

وكنت لما بسخن باتكلم عن زكريا والسنباطى والقصبجى وبيرم وأحياناً شوقى باعتبارهم أصدقائى بنقعد سوا وبنأخذ وندى فى الكلام ورافعين الكلفه لدرجة إنهم بيقولولى:

يا أحمد وأنا أقولهم يا زكريا ويا رياض ويا بيرم وهكذا، ممكن السامعين ما كانوش بيصدقوا أكاذيبى.. لكن ماكانش حد فيهم بيعترض وكانت ليالى الست ما تحلاشى إلا بالعبد الفقير.. كان الشاطر فى صحابى هو اللى يخطفنى بدرى ليلة الست عشان القعهه تحلاطب إزاي بقى أنا أكتب القصيده دى؟ أنا ح أحكى الحكايه من أولها ورزفى على الله.

كنا فى أوائل الستينيات يعنى فى عز عز الاشتراكيه وتحالف قوى الشعب بعد ارفع رأسك يا أخى فقد مضى عهد الاستعباد بحوالى عشر سنين يعنى كان الطب اتقدم جداً والناس اتنورت وبقينا مواطنين لا رعايا إلى آخر الشعارات النميسه دى! وذات صباح جميل طلعت علينا الصحف القوميه الثلاثه الأهرام والأخبار والجمهوريه بخبر عجيب، بدون أى تعليق اللى فاكره إن كمال الملاح أبرز الخبر فى صفحته اللى فى زهر الأهرام بعنوان- من غير عنوان- أبرزه إزاي؟ عمل حواليه دايره حمراء ما أعرفش بقى يقصد إيه؟ المهم إن الخبر بيقول حفظ التحقيق فى قضية كلب أم كلثوم وبعد كده حيثيات الحفظ العجيبه! إيه الحكايه؟ قالك إن طلبة معهد التريه بالهرم كانوا عاملين يوم رياضى مع طلبة كلية الفنون الجميله بالزمالك- يعنى ورا فيلا أم كلثوم- وكانت المسابقات حتقام على ملاعب كليه الفنون.. حلو كده؟

طبعاً بعض الطلبة راحوا الزمالك بعريياتهم الخصوصيه وبعضم خدوها موتورجل..
 الإخوه تبع الموتورجل فايتين قدام فيلا أم كشوم وإذا بكلبها العزيز المدلل ينط من
 السور يبقى فى الشارع ويتشن على أفقر طالب اللي هو المدعو إسماعيل خلوصى
 ويروح ناطط فى كرشه مبعتره بدون سابق معرفه، ويكده يا أصدقائى يبقى مشروع
 عمكو خلوصى أبو إسماعيل اتدمر تماماً.. لأن المفروض إن أبو السباع كان حيتخرج
 مدرس ألعاب رياضيه وتبتدى العيله تاكل من خيريه لكن بعد العاهات المستديمه



فى البوليس
بكره تتولف وزاره
للكلاب
ياخدوك رئيس



أول رمضان أقابله فى حوش آدم كان شايلى لى كيس من الهدايا والمفاجآت
المدهشه..

بدأت بالفطور فى بيت الشيخ والفطور فى بيت الشيخ معناه الاستمتاع بما لذ
وطاب من الوجبات الرمضانية وغير الرمضانية من يد ست الكل الحاجه أم سعد.

وبعد الفطور وصلاه العشا والتراويح اتنصبت القعه.. أغلب الوجوه معروفه
بالنسبه لى.. أحمد الموجى شقيق سعد الموظف وشقيقهم الأصغر الفنان جمال
الموجى اللى كان لسه طالب بكلية الفنون الجميله وعمهم سعيد الموجى وكيل
الفنانين المعروف وعازف الإيقاع فى تخت أم كلثوم لكن الجديد فى الموضوع
شخص ربه كبير الراس قدمهولى أحمد الموجى:

- أبو على الموجى.

قلت له:

- أهلاً.

قال لى:

- أهلاً بيك يامعقدنى.. تصور إنى بعد ما قرئت كلب الست بطلت أكتب
شعر!

أنا اعتبرت المسأله مجرد مجامله.. لكن استكثرت عليه عبارته إنه كان بيكتب شعر
من أساسه وخصوصاً وإنى لاحظت أنه ما بيعرفش ينطق حرف السين والصاد..

بينطقهم شين فاحتقرته واديته الطرشه وبدأت أعمل أحاديث جانبيه هامسه مع عليه
القوم من باب المنظره!

حبتين وبدأ إمام يدوزن العود وفوجئت بيه بيقول:

- فين أبو على الموجي؟

قال له الشخص:

- أنا معاك يا مولانا.

قال له:

- تعالى جنبى هنا.

قام قعد جنبه راح جمال الموجي مناوله علبه جلد سودا مربعه فتحها وطلع منها
رق مدندش وقعد يمسح بإيده على جلد الرق بحركه دائريه إلى أن انتهى الشيخ
إمام من دوزنة العود وبدأوا يعزفوا مجموعه من البشارف والسماعيات الشرقيه
الجميله وفوجئت بأبو على الموجي بيحول الرق بين إديه إلى كروان ساحر الصوت
والإيقاع بصيت على وشه لقيته رايح فى غيبويه وملامحه المنفره بدأت تاخذ شكل
جميل رحت ناطط من ع الكرسي وقاعد تحت رجليه وكأني باعتذر له عن الجلافه
وقلة الأدب اللي قابلته بيهم..

رحله ساحره مع المغنى الأصيل غسلتني من ساسي لراسي انتهت ساعه السحور
بالموشح الجميل اللي كنت باردده معاهم وكأني باكلم أبو على الموجي..

مولاي كتبت رحمه الناس عليك فضلاً وكرم

فالمرجع والمآل والكل إليك

عُربٌ وعجم

مالى عمل يصلح للعرض عليك

بل صار عدم

فارحم ذلى ووقفتى بين يديك
إن زل قدم



بعد الليلة دى بدأت علاقتى بحسن الموجى ابن خال سعد تتوطد.. هو كان ساكن فى الحدائق وكان بقى له سنوات هاجر حوش آدم فبدأ ييجى كل يوم بعد ما يخرج من شغله ويفضل معانا لآخر الليل.

شخصيه مركبه صعب التعامل معاها.. يعنى عايز صبر.. فنان متعدد المواهب بيكتب ويلحن ويغنى ويعزف ويمثل ويخرج ومع كل هذا ما حققش أى حاجه - وصل فى الدراسه إلى سنه تالته هندسه بتفوق مذهل وفجأه انتهى كل شىء وفصل من الكليه لتعدد مرات الرسوب!! فقد إيمانه بأى شىء وكل شىء.. عارف كل حاجه.. ومش مصدق أى حاجه.. كل شىء فى الدنيا مترتب مسبقاً واللى مرتبينه اليهود.. حتى الكوره سياسيه.. الأهلى والزمالك هما يهود الكوره وعشان كده هو كان يشجع الترسانه.. الثوره وعبد الناصر.. كل دا مترتب وما فيش فايده فى أى حاجه.. كنت دايمًا باختلف معاه وباسفه كلامه وكان الخلاف بيوصل لدرجة الصرخ.. لكن لما كان يمارس الفن كنت باقعد قدامه مشدود زى التلميذ البليد.. يقولك:

احنا شعب ندل.

نشتم المندار بوشه

والنصاحه

لو نغشه

ما احنا شعب ندل

الركوب فى الزحمه يحلا

واللى يهبط

واللى يعلا

ما احنا شعب ندل

الدكاتره بالأونطه

ألف أهيف ع الزغطه

ما احنا شعب ندل

وبعد ما يعدد مجموعه من صور السلبيه فى حياتنا يقول:

قالوا لى ما قلتهاش ليه

فى الإذاعه

قلت لهم إحنا شعب ندل



طبعاً القصيده دى كانت بتستفزنى وما كنتش باحب أسمعها وكان هو عارف

كده فكان أول ما يقابلنى يقول لى:

- إحنا شعب ندل.

وبعدين فضل يطورها لحد ما سمانى أنا شخصياً «الندل الأعظم» وكان أبو على الموجى ملموم على شله محبطين من جيرانه فى حدايق القبه بيبث فيهم أفكاره العدميه وكان مسميهم تنظيم «الحباط الأشرار» على وزن الطباط الأحرار.. وكانت هوايتهم ممارسه الشر ضد بعضهم وكان هو أكثرهم عبقرية فى توضيب المقالب لدرجه إنهم كانوا مسميينه - الأستاذ وسخ الموجى - هو كمان ما كانش مقصر فى حقهم.. وشوف بيوصفهم إزاي:

أنا رمه

ما فيش همه
وكان ممكن
أكون قمه
لكن خاننى
غرور ظنى
وكان ممكن
يوصلنى
فرق تكة
قفل سكه
فقلت اركن
على الدكه
لقيت شله
ما فيش مله
تجيب الفقر والذله
تلات تسطر
ترانزستور
يارب استر
يارب استر

• • •

وله فى شكوى الزمان قصيده كاتبها وملحنها يقول مطلعها:

أنا حظي عجب
وتمللي كده بيخلي العقل يطير
وحاجات ياما بتحصل لي
لما تمللي عاديكو باغير
م اللي الحظ بيديله
ويبقى عاطي له وعنده كثير
دنا متهيألى أفرع
ولا أوقع نفسى ف بير
المهم إن حسن الموجى بوجوده معنا كان إضافه لها قيمتها للصوت اللي بعد كده
طلع من حوش آدم ووصل لكل الأسماع العربيه فى شتى أنحاء الأرض.



الفقير من قله حيلته بيحلم وعشان كده يقولوا:
- «الجعان بيحلم بسوق العيش».
وساعات لما الحلم ما بيسعفوش يبلجأ للنميمة كنوع من أنواع الانتقام ولأن كل
القوانين اللي فى العالم موضوعه عشان تحمى الغنى م الفقير فالفقرا بيعتبروا أى
خارج ع القانون بطل شعبي.
كنا قاعدين فى المنظمه - أهل تحت - وبتكلم فى التفاوت الاجتماعى الصارخ
فى مبنى المنظمه بأدواره الثلاثه..
الفقير بيزيد فقر والغنى بيزيد غنا..
وجرنا الكلام للسؤال السرمدى:
- طب وبعدين؟

الأستاذ عوف مساعد المخرج المزعوم حسم المناقشه ورد على السؤال:

- ما تتعيبش نفسك يا تعبان أنت وهو.. فيه قانون بيحكم العالم وملخصينه فى عبارة - يبقى الحال على ما هو عليه وعلى المتضرر اللجوء للقضاء - ولعلمك بقى يا مخشمون أنت وهو العبارة دى موجوده فى كل لغات العالم! لكن محمد الأسوانى واحنا مروحين واستكمالاً للمناقشه حكى لى حكاية غريبه عن عامل سويتش كان فى المنظمه وسابها..

العامل ده كان عنده تسع عيال وهو ومراة وكان مرتبه تمانيه جنيه فى الشهر!.. يعنى كان فى الدمار لدرجه إن يوسف بيه كان مسكنه ببلاش فى بيت قديم من بيوت العيله فى شبرا..

ويبدو إن أخونا ده كان هارى نفسه تصنت على المكالمات فاكتشف علاقه متينه بين بعض الأشخاص فمكدبش خبر.. طلب السيد أنور السادات اللى كان أيامها سكرتير عام المؤتمر الإسلامى وقلد صوت الليثى عبدالناصر:

- آلو يا أنور.. أنا الليثى عبدالناصر..

- أهلاً يافندم.. أهلاً أهلاً..

- أهلاً بيك أنا ح أبعت لك ولد اسمه كذا إبعث لى معاه خمسميت جنيه..

- حاضر يافندم..

واستأذن صاحبنا وخرج من مبنى المنظمه وع المؤتمر الإسلامى وجاب الظرف اللى فيه المبلغ وسدد ديونه ورش رشه جريئه على السعاه والفراشين فى المنظمه وزعم إن له عم مليونير فى البرازيل توفاه الله وانه هو الوارث الوحيد لهذا العم المليونير. حلو كده؟ خالصوا الخمسميت جنيه فى ظرف شهر. أخونا قالك أعملها تانى و..

- آلو يا أنور.. أنا الليثى عبدالناصر..

- أهلاً يافندم.. أهلاً أهلاً..

- أهلاً بك أنا ح ابعت الولد تديله تلتमित جنيه..

- أمرك يافندم..

يقوم يشاء السميع العليم إن صاحبنا يحط السماعه من هنا ويتصل الليثى
عبدالناصر بالسادات من هنا ويبدو إن كان فيه حاجه مطلوبه فقال:

- طيب يافندم لما ييجى الولد اللى انت باعته ح أديها له..

- ولد مين؟

- الولد اللى سيادتك باعته.

- أنا باعت لك ولد؟

- أبوه يافندم دا هو فى الطريق.

- طيب لما ييجى حوشه عندك أنا جاي فوراً..

● ● ●



الفاجومي

تحقيق معي برئاسة
السفـرجي الملكي

■ قلت للسفـرجي الملكي الذي يحقق معي: اطلب لنا
قهوه من المصاريف السريه.. قال لي انت حرامي
وعينك قويه.
■ كرد فعل للتحقيق معي كتبت قصيدة «عصفور
وصياد».

المره الأولانيه عامل السويتش خد ظرف الفلوس من عند مدير مكتب أنور السادات وهو واقف.. لكن المره دى فوجئ بمدير المكتب بيحتفي بيه جداً ويقول له:
- دالسيد أنور السادات منتظرك عشان تشرب معاه قهوه. بدأ الفار يلعب فى عبه فوطن النفس على مجابهة الشدائد.

دخل المكتب لقي السيد أنور السادات بنفسه واقف يستقبله:

- هيه.. قهوتك ايه بقى..

- ساده..

- وانت إزيك؟!

- تحمده..

- وازي الليثى بيه؟..

- بخير بيوس إيد سعادتك.

- انت كنت معاه النهارده؟!

- أنا معاه كل يوم..

وبعد سلسله من الأسئلة التعذيبيه دخل الليثى بيه.. صاحبنا راح قايم مبوط فيه وقال له:

- أنا ف عرض حضره النبى يابيه..

قال له:

- انت تعرفنى

قال له:

- وهو فيه حد ما يعرفكش.. دانتو عماد البلد وأجدع ناس فيها.

- أنا بعثك تاخذ فلوس من هنا؟

- ما حصلش يا باشا...

- آمال أيه اللي خلاك تعمل كده؟!

- الفقر ياليتي بيه.

- انت بتشتغل قين ياد؟

- فى عزبه يوسف بيه فى المنيل.. فى منظمه التضامن يعنى.

- طب وإزاي بتسرق وانت موظف؟!

- هو دا يا بيه مربوط الفرس.

واقترح الليثي بيه تحويل المتهم للنيابه، لكن السادات فضل الاتصال بيوسف بيه لإبلاغه بجريمة أحد رعاياه، وفعلاً تم الاتصال وكان رأى يوسف بيه هو التكتم على الموضوع وإرسال الشخص مع مخصوص، وبعد سيل من الشتائم والتهديد كتب يوسف بيه على المتهم وصل أمانه بمبلغ الخمسميت جنيه على أن تسدد خصماً من مرتبه بواقع جنيه كل شهر!! يعنى التمانيه جنيه اللي دعوه للسرقة حيقبوا سبعة وبعدين لازم يعيش. كمان خمسميت شهر عشان يسدد آخر قسط!! واحد من ولاد الحلال كبرها فى دماغ الواد وقال له:

- انت دوله إسلاميه؟

قال له:

- لاء.. أنا شخص مسلم.

قال له:

- خلاص خليه يملغوا النيابة.. هما مش حيقدرؤا..

فصاحبنا طلع ليوسف بيه وقال له:

- انتوا عايزين تخصصموا م التمانيه جنيه؟ دا يبقى كفر.. دانتوا تبقوا إنجليز..
وعلى الطلاق ما حد يخصم لى ملیم لأبلغ الثیابه..

فقام یوسف بیه کل الواد قلمین غیظ وطرده من المنظمه وعینّه فی "روز الیوسف"
بخمسه وعشرین جنيه. بعد الحکایه دى بأیام غاب الأستاذ محمد المصرى مندوب
المنظمه لدى هیئه البرید بسبب مرضه فانتدبونا انا ومحمد الأسوانى بدله. وفى أول
یوم رایحین مکتب البرید قلت لمحمد الأسوانى:

- ما تیجى نسرق ونتعین فی روز الیوسف بخمسین جنيه.

قال لى:

- نسرق إیه؟!

قلت له:

- نسرق طوابع.. هو یعنی الورق الزباله اللى بیعتوه ده له لازمه؟..

قال لى:

هب للنبی أرسلنا البرید من مکتب الملك الصالح، وعملنا الكشف على طريقة
شرفنطح طلع لنا جوز جنيهات، هو خد ذهب وأنا خدت ذهب، واستمرت
الحکایه دى أربع تیام کل یوم نطلع جوز جنيهات نفطر ونجیب الشای والسجایر وفل
الفل، وفجأه فی الیوم الخامس لقیتم محمد بیقول لى:

- إحنا كده ماشیین فی طریق الهاویه.

قلت له:

- یا جدع کبر دماغك بلا هاویه بلا خرا.

قال لى:

- لا یاعم أنا مش جای معاك.

قلت له:

قلت له:

- يتعل أبوك لأبو اللي عينك.

ورحت قايم مروح على أساس إني ماارجعش المنظمه تانى.. وفي البيت لقتني
باكتب قصيده عصفور وصياد:

يا صياد الطيور يا خال

صباeck عن زناد الموت

دنا عصفور ضعيف الحال

ولا اكفيش عيالك قوت

عجبتني القصيده رحت كاتب منها نسخه وحاططها في ظرف وباعتها ليوسف
السباعي، تاني يوم فوجئت بيوسف شخصياً جاى لى البيت ومعاها السكرتير
الخصوصى، وخدنى فى عربيته ع المنظمه وفي مكتبه طلب لى قهوه وقعدنا نشربها
فى صمت وفجأه قال لى:

- انت شاعر مدهش.. القصيده جميله جميله جميله.. لكن تقصد مين

بالصقر؟!

قلت له:

- أقصد السفرجى الملكى..

فانفجر بالضحك وقال لى:

- اعتبر الموضوع منتهى وبكره تيجى تستلم شغلك..

قاعد فى مكتبى الفخم فى المنظمه باحل الكلمات المتقاطعه وإذ بالدكتور مرسى
يدخل على باسم المحيا ويقوللى:

- بليغ بيسلم عليك وبيرجوك تروح لجنه الإذاعه تصرح النص لأنه تقريباً انتهى

من اللحن.

يا عيني يا عيني... والله واتحقق الحلم وبقيت فنان مشهور يا فؤاد يا بن هانم..
مدد يا سيدى سليم يابو مسلم مدد يا بركة دعا الوالدين..

فى هذه الأثناء كان حصل لى شرف التعرف على شاعر الشباب أحمد رامى
بسبب قصيده عصقور وصياد اللى قراها مع الأستاذ يوسف السباعى فقال له:

- أنا لازم أشوف اللى كاتب القصيده دى.

ولما عرفت الكلام دا من الأستاذ حسين الخصوصى رحت قابلت الأستاذ رامى
فى مكتبه بالإذاعة، وقدمت له نفسى فرحب بى ترحيب شديد.. هو صحيح ما
طلبليش مشروب.. لكن نزلنا من الإذاعة واحنا مأنهجين بعض.

كتبت النص بتاع قال ويقول.. كتبته بخط جميل وخذت إذن الساعه واحده،
وعلى مكتب رامى لقيته مش موجود قلت أسيب له النص ع المكتب لما ييجى بكره
يقراه ويصرحه.. فيها حاجه دى؟!!

بعدها بشهر باشوف البرامج فى مجله الإذاعة قرئت خبر بيقول:

انتهى الملحن حلمى أمين من تلحين أغنيه كلام الناس للشاعر أحمد فؤاد نجم
وسينغنيها المطرب أسامه رءوف!!!

مين حلمى أمين؟ ومين أسامه رءوف؟ أنا ما سمعتش الاسمين دول قبل كده،
ودا طبعا نتيجة جهلى لكن أعمل إيه مع بليغ؟!

خذت بعضى ووحى للأستاذ رامى... أول ما شاف وشي قال لى:

- مبروك أنا صرحت لك النص ونازل ع الخريطه الأسبوع ده.

فى الأحوال العاديه بنى آدم مننا لما بيسمع خبر زى ده بتبقى الفرحه مش سايعاه
وبعضهم بيعتبرها مناسبه سعيده جديره بحفل يقام على شرفها وكل برغوت على قد
دمه.. إنما بقى العبد الفقير فهمها غلط لدرجة إن الأستاذ رامى قال لى:

- انت مش مبسوط ليه؟

شرحت له الموضوع وكان لسه شيطان الألاطه متلبسنى فقلت له:

- بصراحه النص دا أنا مفصله لأم كلثوم.

الراجل قال لى وهو مفهوش:

- أم كلثوم حته واحده؟!

قلت له:

- مش أقل

قال لى:

- طيب...

وبعد فتره صمت قال لى:

- إذا كنت مصمم على رأيك روح لأمين عبد الحميد.. وأنا ح أكلمه.. ما

كدبتش خبر.. وعلى مكتب أمين عبد الحميد اللى هو مراقب عام الموسيقى والغناء..

دخلت لقيت شخص ملوش ملامح باينه من كميه القرف اللى حاططها على وشه

صعب على دخلت آخذه بالحضن.. وهو قاعدع المكتب وإذا بيه بيتراجع وهو قاعد

مفزوع وقال لى:

- إيه ده؟ انت دخلت هنا إزاي..

قلت له:

- مش الأستاذ أمين عبد الحميد؟!

قال لى بعد ما هدى شويه:

- أيوه أنا.. وأنت مين!

قلت له:

- مش الأستاذ رامي كلمك؟

قال لي:

- كلمني في إيه؟ انت عايز إيه؟

رجعت شرحت الموضوع ثاني.. قال لي:

- يعني مش عاجبك حلمي أمين..

قلت له:

- الراجل أنا ماشفتوش والمسألة مش كده خالص...

قال لي:

- يعني نجيب لك عبد الوهاب...

قلت له:

- لآ.. أنا عايز أم كلثوم...

ضرب جرس من نوع معين دخلوا ثلاثة فراشين شالوني هيلا بيلا وع السلم قلت لهم: بس نزلوني هنا أنا عارف السكه

- وروح يا زمان تعالى يا زمان جمال الموجي الأخ الأصغر لسعد الموجي كان أيامها طالب بكلية الفنون الجميله بالزمالك، وكان صديق لفنان الكاريكاتير ناجي كامل، وفي يوم جاتي جمال وقال لي:

- انت مزعل حلمي أمين ليه..؟

وحكى لي حكاية طويله عريضه فهمت منها أن حلمي أمين راح الإذاعه فقال له أمين عبد الحميد إن فيه ولد مؤلف أغاني ناشئ يقول عليك إنك مش ملحن، وإن حلمي زعلان جداً وكان بيحكى لصديقه ناجي كامل، وبالصدفه كان جمال عند ناجي وسمع الحكايه فقال لهم أنا أعرف هذا الشخص، وجه بلغني فطلبت منه تدبير لقاء عاجل مع حلمي أمين لتوضيح الأمر.



الفاجومي

عشت وسط العدوية
والواحية والنمارسه

« سألني ناجي الرسام.. انت شيوعي ؟ فقلت أنا مسلم
وموحد بالله.
« واحد مدعي « طرب » يطلب من الشيخ إمام
تقديمه للإذاعة ويقدم لنا أكله كباب.



أسانسير روز اليوسف ولا كل الأناسير! حاجه كده تفكر كبرواد الفضل لما
يسبحوا بالسرعه الإملانيه.. يعنى لا هو مستعجل على فوق ولا ملهوف على
تحت...

شخص محايد.. ما تعرفش إن كان ماشى بالطول ولا بالعرض لكن وانت جواه
يديك إحساس بالثبات وكأنك ممتطى صهوة جمل سودانى ماشى فى الصحرا على
أقل من أقل من مهله لأنه عارف ومتأكد إن نهاية مشواره يعنى نهاية حياته.

وأنا جوا الأسانسير كنت باهياً نفسى لمقابلة الملحن حلمى أمين عشان أوضح له
المسألة وأكشف له الدسيسه الخسيسه اللى رماها بينى وبينه الأستاذ مراقب عام
الموسيقى والغناء اللى عرفت بعد كده إنه ملحن فاشل ودي كانت عقده من أي فنان
ناجح وعرفت كمان قدراته الإبداعيه فى إذلال وإهانة الفنانين الموهبين.. الشيء اللى
ماعرفتوش إلى وقتنا هذا هو الشخص الشرير اللى وضع هذا المريض الموتور فى هذا
الموقع الوظيفى الخطير.. مراقب عام الموسيقى والغناء!!

ما علينا.. طلعنا جمال الموجى وأنا الدور الأخير.. مجله صباح الخير نقابل
حلمى عند صديقه الرسام ناجى كامل حسب اتفاق جمال مع ناجى واستقبلنا ناجى
بترحاب بسيط وقال:

- اتفضلوا.. زمان حلمى جاي..

بهرنى الجو المجنون فى أوضه الرسامين.. ريحه الحبر النفاذه.. الشخصيات
والرسومات القوضويه بالحبر الشينى على الحيطان.. كل شيء فى الأوضه كان فى
غايه الهرجله الكراسى مكسره والمكاتب وسخه وعليها حاجات غريبه، فوط كان
لونها أصفر زى بتاعه التكبسيه وكبايات بعضها فيه بقايا شاي وبعضها فيه بقايا
قهوه وبعضها فيه ميه سودا مغروز فيها فرش رسم وكلها مليانه أعقاب سجائر

ومشاط كبريت خالصانه والأرض مليانه ورق ملغمط حبر بعضه مفروود وبعضه مكور.. آخر لخطبه.. لكن لخطبه تسحر حاجه كده تفكر بأشعار صلاح جاهين المجنونه أو رسومات حجازى قليله الأدب.

ما أعرفش أنا فضلت قد إيه سارح فى السحر ده لغايه ما سمعت ناجى بيقوللى:
- معانا هنا شاعر اسمه فؤاد قاعود.. تعرفه؟
قلت له:

- أنا قرئت له كتير فى صباح الخير وباحبه وباريت أقدر أشوفه.



قال لي:

- قرئت له إيه؟

قلت له:

- قرئت له:

المجتمع زى الرصيف

وسخ

وعايز يتكنس

فيه ناس

بتعرق ع الرغيف

وناس

بتعرق م التنس

قال لي:

- إنت شيوعى؟

قلت له:

- لأ.. أنا مسلم وموحد الله

وقعدت أتابع ناجى وهو بيرسم ولا حظت إنه بيمضى ناجى كده ناجى.

قلت له:

- ليه الألف مش طالع عدل؟

قال لي:

- أصل أنا واد مش دوغرى.. أنا لثيم.

وضحكنا وخذنا الكلام ونسيت موعد حلمي وبعد فتره انتظار طويله كان ناجي
خلص شغله وحلمى ما جاش.

- زى عوايده.

قالها لى ناجى وقمنا على وعد باللقاء والحقيقه أن بساطة الفنان ناجى كامل
شجعتنى على التفكير فى معاودة الزياره ودى كانت رغبه ملحه جويا للتعرف على
هذا العالم العجيب... عالم الصحافه وبالتحديد صحافه مدرسه روز اليوسيف.



بدأت أندمج فى الحياه العامه فى حوش قدم وأتعرف على الخريطه الاجتماعيه
فى هذا المكان العجيب... سكان الحوش ما هماش من أصل واحد... رغم
انصهارهم فى نسيج واحد... فمثلا فيه العدويه النازحين من بنى عدى فى الصعيد
ودول بيشتغلوا فى صناعه السجاد والعيش والجزاره وفيه الواحيه ودول أمهر ناس
فى تزويد قاهره المعز بحبوب منع الفهم ودا تعبيرهم عن الفول والعياذ بالله وخطورة
الواحيه النازحين من الواحات الداخله والخارجة إنهم يبلعوك الحبوب الملعونه دى
وانت فى غاية الانكشاف والإنبساط من طعامه الفول وحلاوته وفيه النمارسه اللى
هما من أبوالنمرس بلسديات الشيخ إمام ودول تجار الصينى أيام العز والألامونيا
والميلامين وجميع مشتقات النفط من العصر الحديث، وعن النمارسه حدث ولا
حرج.. تجار أشطر من اليهود وأحرص من الدمايطه وفيه تعبير سايد بيستعمل فى
وصف حركات النص كم بين الأصدقاء اللعي هو:

- إنت حتنمرس على؟!!

عموماً ما تستعجلوش على رزقكم وحتشوفوا نمرسه لما تشبعوا... مثلاً..

صباح يوم جمعه... كنا مأشفرين بما جميعه لا فلوس ولا أكل ولا دخان ولا
صنف ولا دياولو.

قلت له:

- وبعدين يا إمام؟

قال لى:

- ما تقلقش... قوم بينا نشكك حجرين معسل من عبد الرءوف غملا بيعهم فراغ المعدة وبعدين يخلق فى قضاه رحمه.

بالمناسبه عبد الرءوف ده كان صنايعى فى قهوه العدويه وكان ما بيشككش حاجتن تخلق غير المعسل... ليه بقى؟ المعلم أساساً كان مانع الشكك من أصله والقرار ده كان ماشى على كافة شيء يطلع من تحت إيد النصبجى يعنى الشاى والقهوه والجنزيبيل والينسون والسحلب إلى آخر عيله السوايل... لكن عبد الرءوف العجيب كان مذكّن فى جيبه ثلاث أربع ورققات دخان بيعهم لحسابه الخاص لزبون الشكك.

قول قاعدين أنا والشيخ إمام نشد فى البورى لحين ميسره وإذ بحته أفندى رهيب الأناقه والشيّاكه واقف قدامنا ومركز عينه على إمام ومتجاهل العبد الفقير تماماً قلت:

- يمكن صديق قديم لإمام وبيحاول يتذكر.. وعموماً تبقى فُرجت ركزت عنيه عليه إنه يعبرنى؟ أبداً... برضه فضل متجاهلنى بطريقه دنيئه استفزتنى ولسه ح أسأله راح داخل ع الشيخ إمام وسأله:

- إنت الشيخ محمد؟

غمزت إمام فى رجله وقلت له:

- أيوه.. هو دا الشيخ محمد.

برضه ابن الجزمه تجاهلنى وقال للشيخ إمام:

- أنا عايزك توصلنى الإذاعه.

غمزت إمام فى رجله تانى وقلت له:

- وماله.. بس انت بتعرف تغنى؟

بص لى باشمئناط وقالى بألاطه شديده:

- أمال يعنى ح أروح الإذاعه ألب سيجه؟!

قلت له:

- بس لازم الشيخ محمد يسمعك الأول.

قال لى:

- أهلاً بيك وبالشيوخ محمد وبعبد الوهاب نفسه.. أنا مستعد.

قلت له:

- إنت فاضى إمتى؟

قال لى:

- فوراً.

قلت له:

- طب اتفضل عندنا فوق بعد ساعه من دلوقتى.

قال لى:

- وليه بعد ساعه؟!

قلت له:

- أصل احنا رايعين ناكل كيلو كباب من عند أبو هاشم.

قال لى:

- شاورولى ع البيت واسبقونى انتو وأنا ح اجيب الكباب والحقكو.

قلت له:

- أصل احنا بعد ما ناكل حنخش الباطنيه نجيب حاجه.

قال لى:

- موجود معايا الصنف.. ومزاج على قوى.

سحبت إمام وطلعنا على فوق واحنا ع السلم قال لى وهو بيضحك:

- مش قلت لك ح يخلق فى قضاءه رحمه... أهو خلق فى قضاءه لحمه.

حييتين والباب خبط قمت فتحت لقيت الزبون داخل بكيلو الكباب والسلطات والعيش فرش الأكل قدامنا وقال:

- اتفضلوا انتوا بالهنا والشفاء وأنا ح أعمل لكو الشاى وأولع الفحم وأروش البطرمان.. وفى أقل من خمس دقائق كان كيلو الكباب بالعيش بالسلطات اختفى من الوجود.. وجبسنا بالشاى.. وبدأت الاصطباحه النميسه وفى نوبة الصهله ضحك إمام وقال:

- إنما احنا ما اتشرفناش بالإسم الكريم.

قال له:

- خدامك سلامه يا شيخ محمد.

قال له:

- تعالى جنبى هنا بقى عشان تدوقنى حلاوتك.

الرجل حصل له رعب وبص لى.

قلت له:

- عمك الشيخ محمد عايز يسمع صوتك.. غنى..

راح فاكك الكرافته الحمرا وزراير القميص الذهب وترس رجله في الأرض وبدأ
يطلع أصوات غريبه من بقه أشبه بأصوات الفيران المولودين لسه.. إمام انتفض وقال:

- إيه دا يابو النجوم.. فيه إيه؟

قلت له:

- ما فيش حاجه.. لا الأستاذ سلامه ح يغنى.

قال لى:

- لا.. فيه حاجه بتزيق زى العرسه.

غمزته بشده وقلت للأستاذ:

- اتفضل يا أستاذ.

قال لى:

- هو الشيخ محمد متضايق من حاجه؟

قلت له:

- لا أبدا.. اتفضل غنى.

وإذا بالأستاذ وبغس الصوت بيغنى:

يا دينى يا امه.

الحليوه برّه

هو القمر فى السما.

ويش نزله ع الحيط.

كبدای.

ولداى.

عاد يابوي.

قال له إمام:

- بس بس بس... خلاص.

سكت وبص لي قلت له:

- حتسمع النتيجة دلوقتي.

وإذا بالشيخ إمام يقول:

- النتيجة صفر.

الجدع وشه راح لون وجه لون وقال لي:

- إيه؟ ما فيش أمل؟

قلت له:

- الأمل موجود طبعاً... بس انت محتاج تدريب جامد.

قال لي:

- أنا مستعد للتدريب.

قال له إمام:

- باقولك إيه اسمعني أنا... أنت تشوف لك شغلانه تعملها بعيد عن المغنى..

روح العب كره.. العب طاولة... مثّل.. لكن إوعى تغنى...



الفاجومي

يوم قررنا مقاطعة الإذاعة

■ تقدم إمام لامتحان الملاحنين بالإذاعة.. فسأله
 رئيس اللجنة.. أنت بتشرب حشيش؟
 ■ أهديت صلاح جاهين ديواني الأول فاتهمني
 بسرقة أشعار فؤاد حداد.
 ■ لماذا إذا خرج حجازي الرسام عن صمته يتحجر
 لساني وأصبح له مستمعا؟!

أنا من خلال معرفتي بالشيخ إمام اكتشفت انه مجامل جداً وأحياناً لدرجة
النفاق... مش فاهم هو ليه تريس مع الراجل ده بالذات.

الراجل قال له:

- يعني ما أغنيش خالص؟

قال له:

- بتأنا.

قلت له في محاوله لجبران الخاطر:

- مش قوى كده يا شيخ محمد أى واحد ممكن يغنى في الحمام.

قال لى:

- ولا في الحمام.

ضحكت وقلت له:

- بلاش في الحمام يغنى لنفسه.

قال لى:

- ولا لنفسه.

قلت له:

- دا اضطهاد يا شيخ محمد... أنت كده تبقى بتحرمه من حق إنسانى.

قال لى:

- يا بو النجوم أنا ما حرمتوش دا ربنا هو اللى حرمه.

الراجل قال له بود شديد:

- ما هو البركه فيك يا عم الشيخ محمد.

قال له:

- لا بركه ولا حركه.

قال له:

- دناح اغرقك كباب وحشيش بس انت وافق يا شيخ محمد.

قال له:

- ماتعيش نفسك.. ثم أنا ما اسميش الشيخ محمد أنا اسمي إمام محمد عيسى.. وروح بقى دور ع الشيخ محمد.

الراجل قام بهدوء ربط الكرافته وزراير القميص وخرج وأول ما وصل لحوش البيت زعق بعلو حسه:

- ياللا يا ولاد "الوسخه" يا جعانين.. والله ما أنا مسامحكو فى الكباب اللي طفحتوه.. يا شيخ محمد يا أعمى يا ابن "الوسخه"

وطلع بجرى على برّه.

بدأ حسن الموجى يندمج فى الجوق الغنائى المكون من الشيخ إمام ومحمد على والعبد الفقير والحقيقه إنه كان إضافه مهمه لأنه زى ما حكيت عازف إيقاع موهوب وصاحب صوت أجش لكن حساس وقادر على أداء النغمات وله حضور طاغى... صوت ينتمى إلى مدرسة الفنان العظيم الخالد الشيخ زكريا أحمد... لكن الحلو ما بيكملش.. ليه؟

برزت مشكله فيه أثارها الشيخ إمام فى قعده... ألا وهى زميلى فى الكورس الأستاذ محمد على... أنا سمعت ناس كثير بيغلطوا فى الفصحى لكن زميلى الكورال العزيز محمد على كان الوحيد من نوعه اللي بيغلط فى العاميه.. يعنى مثلاً بينطق الخاه... غين يعنى كلمه الشخبطة ينطقها الشغبطة ودا مش لأنه ألدغ فى الخاه

لا سمح الله، لأنه ينطق كلمه الضغط الضغط... مش بس كده.. دا كمان بيركب الجملة غلط.. يعنى أنت لو غلطت فى اسم زكريا محبى الدين حتقول إيه؟ أكيد حتقول أى حاجه غير اللى بيقولها محمد على.. لأنه بيقولها محبى زكريا الدين، ويقول عن الأخضر الإبراهيمى إبريم لاغضر وهكذا ماتعدش، وأخونا الشيخ إمام تلميذ نجيب فى مدرسه الشيخ درويش الحريرى اللى ما فيهاش أى تسامح أو مهاده مع العبث بمخارج الحروف... والحقيقه أن المشكله دى سببت لى متاعب ثلاث شهور فى محاولات مستمته لتصليح نطق زميلى فى الكورس انتهت كلها بالفشل واليأس ثم ثلاث شهور فى جدل مضمئ مع الشيخ إمام انتهت على مضض بوجود محمد على فى الكورس الناطق وأمره لله.

لما حكيت لأفراد الجوق عن تجربتى مع الإذاعه والسيد/ المراقب العام إياه اتبجح الشيخ إمام و حكى لنا تجربه مماثله.

وهو كان رايح يمتحن ملحن فى الإذاعه!! (أنا حاطط علامتين التعجب دول لأنى لغايه دلوقتى مش فاهم يعنى إيه يمتحن ملحن؟).. ماعلينا.. راح عمنا الشيخ على اللجنه ضمن خمسه وعشرين ملحن جاين يمتحنوا برضه!

رئيس لجنه الامتحان كان اسمه حافظ عبد الوهاب.. وحافظ عبد الوهاب كان مذيع يعنى كان خريج آداب أو دار علوم قسم لغه عربيه يعنى مالوش أى علاقته بالمزيكه غير إنه بعد كده احتضن المطرب عبد الحليم شبانه وسماه عبد الحليم حافظ.


قاعد الشيخ إمام فى مقاعد الانتظار وسمع الحوار بين الأستاذ حافظ عبد الوهاب والملحن اللى بيמתحنوه ويأريته ما سمع.. لأن الحماقه لبست جتته وانظرط وقام على حيله يصحح السؤال للبيه رئيس اللجنه، غمزه اللى جنبه أو زغده وقال له:

- اسكت،، دا رئيس اللجنه.

قال له:

- وكمان رئيس اللجنه.. يبقى عليه العوض فى المزيكه.

طبعاً كل اللى قاعدين فى اللجنه فوجئوا بحماقه الشيخ إمام وخصوصاً السيد/ رئيس اللجنه اللى فاجأ الجميع بسؤاله للشيخ الأحمق:



- إنت بتشرب حشيش؟

قال له:

- أيوه.

قال له:

- طب لما تبطل حشيش ابقى تعالى قدم فى الإذاعة.

قال له:

- لاح ابطل حشيش ولا ح اقدم فى الإذاعة وسلامو عليكو.

.. و من يومها ما هويش ناحيه الإذاعة.

سألته:

- هل ده قرار؟

قال لى:

- بلا عوده.

قلت له:

- وأنا كمان خدت القرار ده وبلا عوده.

واعتبزننا ده ميشاق غير مكتوب بعدم التعامل مع الإذاعة.. وعن الأجر والعائد
المادى قررنا إننا لا نطلب ولا نرفض وبكده نحترم أنفسنا ونكرم فننا.



أنا مش فاكـر.. كان يوم إيه؟ ولا كان يوم كام؟

كل اللى فاكـره إنه كان يوم.. لون فستان ليلة الحنه.. بمبى بمبى بمبى.. آيوه بمبى..
يومها قابلت شاعر كبير.. ومشهور.. وشريف.. وبيقول:

لو غيتك شهرتك..

اعمل لها طبال.

صوت الكفوف عَ الدفوف.

يدوش.

لكن.. قتال.

والشهره مهره.

حويطه.

تقلب المختال.

تقزح وتجمع وترمح.

باللى راكبها.

ياتجيبه للدليل.

ياييجى فوق مناكبها.

والحر لجل الحقيقة.

يركب الأهوال.



الشاعر أحمد فؤاد قاعود.. واحد من أنجب و أشعر ولاد بيرم العظيم إسكندرانى
زى أبوه...والاسكندرانى فى مزامير عمنا بيرم:

إذا اتحدلق

جلنف

لكن له مبدأ

يغواه لحد ما يتزحلق

فى نقره إبليس يخشاها

قابله على شوق فى أوضه رسامين صباح الخير.. كنت قاعد عند الصديق الرسام
ناجى كامل ودخل علينا.. شاب ربعه.. صحتة اللهم لا حسد عنيه الملونين بتشع
منهم نظره نفاذه.. نظره جريئه تقتحمك وكأن صاحبها يقولك أنا أهه.

قال لى ناجى كامل:

- آدى يا سيدى الراجل اللى أنت متشوق تشوفه.. الشاعر فؤاد قاعود.. فزيت
متنور على حيلى وانحدفت عليه وسلمت عليه بحراره.. وكمل ناجى مهمه التعريف
فقال له:

- الشاعر أحمد فؤاد نجم قالب دماغى عايز يشوفك.

خدنا بعض ونزلنا بدون حتى ما أستاذن من ناجى.. قعدنا على قهوه جنب روز
اليوسف.. قال لى:

- سمعنى.

سمعتة عصفور وصياد وكلب الست وياعم إدريس.. أبدى إعجابه باللى سمعه..
اتشجعت.. حكيت له حكاية الفقرات اللى سمعتها فى السجن من أشعار فؤاد حداد
وإزاي أنا حطيت اللى افكرته منها فى ديوان "صور من الحياه والسجن" وشرحت له
تصورى. قال لى:

- أنت راجل طيب.. لكن ما حدش حيفهم اللى انت بتقوله ده.. وحيعتبروها
سرقة أدبيه..

قلت له:

- معاك حق.. ودا حصل بالفعل.

قال لى:

- إزاي؟

قلت له:

- من أسبوعين قابلت صلاح جاهين فى أسانسير التلفزيون وقدمت له نسخه من
ديوانى وعرفته بنفسى.. قال لى:

- إنت اللى سارق شعر فؤاد حداد؟

قلت له:

- أنا مش سارق شعر فؤاد حداد. دا أنا كان قصدي.. ما سابنيش أكمل كلامي وقال بلهجه كلها تعالى وأستذه لدرجه أوجعتني:

- خلاص خلاص.. ما تبقاش تعمل كده تاني.

وسابني ومشى.. وعشان كده يا أستاذ فؤاد أنا باكتب قصيده أشتم فيها الشيوعيين ولاد الكلب الكفرة!

ضحك فؤاد قاعود وقال لي:

لأ.. ما تشتمش الشيوعيين.. وصلاح جاهين مش شيوعى.. والشيوعيين مش ولاد كلب ولا كفرة.

وبدا هو يسمعن بعض أشعاره.. لقيت لها طعم تاني.. عشقتها لأنها لمست قلبي بدون استئذان.

وافترقنا على وعد باللقاء فى روز اليوسف بعد ما كلمته عن تجربتنا الشيخ إمام وأنا ورجيته أنه يشرفنا بالحضور لحوش آدم عشان يسمع ويحكم بنفسه وأهو قال كلمتين أتعلم لى منهم كلمه وكلمه على كلمه يسقوا كلمتين واللى عايز يتعلم يسمع ما يتكلم وعلى رأى المثل يموت المعلم ولا يتعلم.. وصلى ع اللى خطر ع الرمل.. لم علم.



تانى يوم دخلت لك حوش آدم.. تقول عنتر بن زبييه؟ جايز تقول أبو زيد الهلالي سلامه؟ برضه جايز تقول حمزه البهلوان. تقول سيف اليزل؟ كله جايز.. ليه بقى؟ أنا من يوم ما سكنت فى حوش آدم وأنا صباحى خارج رايح المنظمه وراجع الضهر إيد ورا والتانيه ورا برضه النهارده بقى راجع لك يا حوش آدم فارس على راس كتيبه من المثقفين أذكر منهم الشاعر فؤاد قاعود والروائي الناقد علاء الديب وفنان الكاريكاتير الكبير محبى اللباد والرسام الصحفي مصطفى رمزي وأخيراً وليس آخرًا حجازى الرسام وما أدراك ما حجازى الرسام.

كل دول كانوا جاينين بناءً على اقتراح الشاعر فؤاد قاعود عشان يسمعوا الشيخ
إمام فى أول زياره سياحيه لهذا الموقع النائى فى أحشاء جمهورية القاع على هوامش
المدينه الرهيبه، قاهره الستينات.



الفن طاب واستوى وطلب الأكله.. كل يوم كنا بنستقبل مولود جديد وأحياناً
كان المولود بيبقى توأم.. اتنين يعنى واتحولت أوضه محمد على إلى ورشه عمل
بالنهار والليل يتجمعوا السُّمَّار يسمعوا ويتناقشوا ويشجعونا على الاستمرار والمزيد
من الإبداع وأضاف الشاعر فؤاد قاعود للجوقه إضافه كميّه ونوعيه وعملنا تجربه
تلحين الشعر الحر وتمخضت تجربه عن مجموعته جميله من الأغاني اللى كتبها
فؤاد- شعر حر- ولحنها إمام.. أحزان القرد- و الشجره بتخضر- وحبيبتى بنت
أرض - والبياع.. إلخ.. على الجانب الآخر.. كانت الأغاني اللى كتبتها.. على
حسب وداد جلى وعصفور وصياد.. وأبوك السقامات.. والحمام الإمري اللى
كتبتها أوصف بيها اللى إحنا فيه:

الحمام الإمري صبح

ع البنائى

قابل الصبح المنور

بالأغاني

والمعانى الحلوه رنت

فى الخميله النايه

غنت

والقلوب الصاحيه حنت

للأمانى





دبت في المكان روح جبارة واتسعت الدايـره وزاد عدد المريدين والأصدقاء وبدأت
أجهزه التسجيل تاخذ مكانها في الأوضه وكأنها جزء من الديكور الثابت وبدأنا
نتعرف كل يوم على ناس جدد وأصبح الشاعر والصديق فؤاد قاعود من سكان
المنزل رقم اثنين لعطفه حوش آدم بالدرب الأحمر بالقاهره، كنت فرحان ومتونس..
وكل يوم أتعلم حاجه جديده وكل ما كنت باتعلم حاجه جديده كل ما كنت

باكتشف جهلى وأضحك على نفسى.. أضحك على أفكارى العبيطه وتصرفاتى الانتهازية- تقول مين كان بيعلمنى؟ المفروض يكون شخص شديد الكلام.. وأسمع منه وأفهم وأتعلم.. مش كده برضه؟ لكن لا.. أنا بقى اللى علمنى أبقى بنى آدم قبل ما أبقى شاعر هو الصامت الأعظم حجازى الرسام..،. الراجل ده ما بيتكلمش خالص لا عن نفسه ولا عن غيره... يعنى أنا مثلاً عرفت تاريخ جياه فؤاد قاعود من يوم ما اتولد لغايه ما بقى شاعر كبير.. من خلال كلامه عن نفسه وخصوصاً فى الأوقات اللى ما بيكونش حجازى الرسام موجود فيها لكن حجازى دا بقى أدى لى ثلاثين سنه أعرفه ومش عارف له أصل من فصل اتولد إزاي وفين؟ وليه؟ عاش فين؟ جه مصر إمتى؟ ما بيقولش وكأنه من كوكب آخر علشان يعمل فى فن الكاريكاتير المصرى ثوره موازيه للى عملها سيد درويش فى الموسيقى والمسرح الغنائى، ومع ده يقدم بنفسه نموذج للفنان اللى بيحترم فنه ويحميه من نزوات النفس والطموح لشهره والمال وأهم شيء علمهولى عمى حجازى إنى أسمع غيرى..

الشيخ إمام كان متعصب لمدرسه الشيخ درويش الحريرى فى الموسيقى وده اللى كان يمثّلها شيخ الملحنين زكريا أحمد وفؤاد كان متعصب لمدرسه بيرم فى الشعر وكان رأيّه إنه هو اللى يمثّلها- وأنا فى أول الأمر انجريت ورا إمام وفؤاد وكنت باستمتع بتسفيه كل الفنانين اللى برّه الدايه دى لأنى كنت بالاقى فى ده بعض التعويض إزاء الإحساس بالظلم اللى كان بيقترسني من الداخل.. ولما عملنا أغنية على حسب وداد جلى ونالت الإعجاب لقيت فرصتى فى الهجوم على الغير وكانت أيامها بتذاع أغنيه عبد الحليم على حسب وداد جلى وذات مره كان حجازى قاعد فى الغوريه والراديو يبذيع أغنيه عبد الحليم ولقيتها فرصه فقعدت أهاجمها بشكل هيسبرى وأقلد صوت عبد الحليم بشكل كاريكاتيرى وفوجئت بحجازى الصامت بيقول لى بمنتهى الهدوء:

- ليه؟ دا الكلام مكتوب كويس.

أنا كآنى بلعت كوره حديد.. خرس خالص وبدأت أحس بالخجل من تصرفاتى وطريقه هجومى على أغنيه أنا ما سمعتش هى بتقول إيه؟ مش دي والنبي خيبه

بالويبه على رأي امي ظهرت مجموعه جديده من الشباب الموالي لفؤاد قاعود...
محمد يونس ومحمد عبد السلام وفاروق متولى وعبد السلام رضوان وخضري..
فؤاد فهمنى إن دول مكوينين شركه ثوريه كهربائيه فى السويس!

أنا الأول ما فهمتش يعنى إيه شركه كهرباء ثوريه لكن ظُرف الشباب قربنى منهم
وبمرور الأيام عشقتهم... وفى يوم قرر فؤاد السفر الجماعى لإسكندريه وسافرنا
ونزلنا فى بيت أم فؤاد وهناك قابلنا الأستاذ على قاعود الشقيق الأكبر لفؤاد.. راجل
متبتل.. مالوش علاقه بأى شيء فى الحياه إلا البحر.. بينه وبين البحر علاقه حميمه
الصبح لازم يتقابلوا ويتكلموا مع بعض ساعه والمغرب يكرروا نفس اللقاء ويقولوا
كلام جديد.. ماعدا البحر الأستاذ على ما بيكلمش حد...



الفاجومي

لماذا أحترم الحكومة؟

■ أين اختفى الشاعر وكييل النيابيه الذي قال « يا
بلدنا يا عجيبيه / فيكى حاجه محيراني / نزرع القمح
بصعوبه / يطلع القرع في ثواني...؟
■ طردت من حوش آدم.. ونفذ الطرد صديق فنان
وجار ماجور.

بذل فؤاد قاعود جهد لإقناع شقيقه الأكبر على سماع الشيخ إمام طوال القعدة
عيني ما نزلت من على الأستاذ على، أوقات كانت عينه بتسافر بعيد.. وفجأة ترجع
كلها حيويه.

بعد على ما سمع سابنا وقام، وقام فؤاد.. خرج وراه.. ورجع فؤاد بعد شويه
وقال لي:

- سألت علي عن رأيه فقال جملة واحده: دا شيء محترم..



إحنا النهادره زارنا النبي.. يا ألف ألف تلتميت مليون مرحباً ويا عشرميت مليون
هلا.. البيه النياه بذات نفس شخصيته اتعطف واتلطف وشرف بيتنا الحقير زاير
مش قابض!!

أنا ربك والحق لما قدمهولي فؤاد قاعود:

- الأستاذ شريف وكيل نيابه.

الأول إنشائمت وقلبي انقبض.. ما انت عارف اللي بيني وبين الحكومه.. أنا
صحيح باحترمها.. بس دا خوف مش حب.

لكن لما كمل فؤاد:

- الأستاذ شريف المنباوى شاعرز ميلنا.

وكيل نيابه وزميلي؟! استنى بقى يا حكومه.. والله لأخليكى تقولى الحنه الفتل
بكam الرطل.. ومين عارف مش يمكن يظهر لى زميل ظابط.. عمومًا أنا وانتى يا
حكومه والزمن طويل.. شفتوا بقى فوايد الشعر؟

وبدأت أفرز الزميل الجديده.. شاب حليوه.. شعره مسبب وسايح زى شجيع

السيما ولايس بدله شياكه وفاكك الكرافته بالاطه ومبتسم بشده وسنانه بيضا وبتلمع
زى إعلانات كولينوس وبدأ البيه النيايه يسمعننا شعره عجبتنى الثقه والألاطه اللى
فى طريقه أداؤه وكن بعد كل جملة يقولها يبتسم ابتسامه الشخص اللى عمل مغرز
ونجح فيه.



أنا بصراحه حببت الشخص ده بشده أكثر من شده ابتسامته.. حببت شعره
البسيط اللاذع:

يا بلدنا عجيبه.

فيكى حاجه محبرانى.

نزرع القمح بصعوبه.

يطلع القرع فى ثوانى.



(على فكره.. فيه ناس بينسيوا البيتيز دول للشاعر محمود الماحى ودا مش
صحيح.. أولاً لأن محمود الماحى ما كانش بيكتب شعر عامى.. ثانياً أنا سمعت
بعض قصايدى منسوبه لمحمود الماحى.. فأرجوك تصحى للعمليه).

اندمج شريف المنباوى فى المجموعه وأصبح عضو عامل فى النادى وبقي يبجى
لوحده.. وذات صباح دخل شريف صحنى م النوم.. وبعد ما فطرنا القول الشديده
وعملنا الاصطباحه المتينه طلع من جيبه ورقه وسمعنا منها أغنيه كان لسه كاتبها
وعلى الفور دخلت المكنه م الناحيا دى طلعت م الناحيه الثانيه متلححه غنوه ظريفه
لطيفه أربعه وعشرين قيراط ودخل فؤاد قاعود لقينا قاعدين نغنيها واللى نقوله
نعيده... بصيت على وش فؤاد لقيته مبتسم ابتسامه المفاجأ..

بصيت على شريف لقيته بيوحه لفؤاد ابتسامه شديده.. وبعد ما انتهينا من الغنا
دار بين فؤاد وشريف جدل من النوع الرهيب الشأن كان الخلاف على المطلع اللى
بيقول:

يام العيون المصراويه

يام العيون المش عاديه

كان رأى فؤاد إن عبار- المش عاديه- ركيكه وكان رأى شريف إنها جديده
وجريئه.. وفى النهايه احتفظ كل واحد بوجهه نظره لكن بعد الواقعه دى بدأت

العلاقه بين فؤاد وشريف تتدهور رغم محاولاتي المستميتة فى إصلاح ذات البين
وكان شريف يتعمد ييجى فى الأوقات اللي فؤاد ما بيكونش موجود فيها ويمشى
قبل فؤاد ما ييجى.. مش فاكرا المسأله دى استمرت قد إيه وبدأ شريف يخفف من
زياراته وأخيراً انقطع تماماً وفات لى حاجتين الحاجه الأولى كانت الانجراره المتلته
عند بيع الصنف ودى مش مهمه لأنى سدتها لكن الحاجه الثانيه هى اللي فضلت
كانت قصيده جميله كان كاتبها فى شخص لاداعى لذكر اسمه لأنه مات فى ستين
داهيه.. لكن الشخص ده كان بيمثل نوعيه من الفنانين مازالت موجوده مع الأسف
وتكاد تكون مهيمنه على عقول وأذواق الناس من خلال قنوات الإعلام اللي
معششين فيها زي العنكبوت.

محمد محمد محمد صليب

مؤلف أغاني

وشاعر أديب

يجوز راح تقول

إن اسمه غريب

ولكن أفهم جنابك قوام

محمد محمد

ومسلم قوى

ويمكن يهودى لثيم ملتوى

ويمكن صعيدى

ومن ملوى

ويمكن منوفى

ويمكن مدام

•

ويمكن يقول للبصل

يا قمر

ويحلف

بأن البقرع الشجر

وفارش خدوده

لعالم غجر

وجاهز قفاه

لاحتمال القلام

•

مؤلف أغاني

ولكن بلا

وكاتب وشاعر

ويلعب جلا

وله في الحياه كلها مشكله

ملخصها كلمه - حثدفع لى كام-

وتدفع فيكتب

أدب بالطلب

تعوزه حماسي

تعوزه طرب

تعوزه فكاهي

يقول لك.. وجب

كانك في مسمط

بتطلب طعام

ويعرف يزمر

لكل العهد

ويعسك كمنجه

ويلعب بعود

ولو مصر دى

يحكموها اليهود

حيصبح يهودي

ويمكن حاخام

•

وله حاسه سادسه

تشم الميول

وحافظ كويس

أصول الأصول

ويعرف يطاطي

ويعرف يقول

يعيش أى حاجه

ويضرب سلام.

ياترى فين أراضيك دلوقتى يا شريف؟ ... ولسه فاكر القصيده دى ولا نسيته؟

•••

حسن الموجي كان عنده قدره على اللعب بالالفاظ... مذهله... وذات يوم كنا قاعدين بربطه المعلم وحصلت دردشه في الشعر وقال وجيه القاباني:

- أنا ملاحظ إن أغراض الشعر اللي عند فؤاد قاعود أكثر تنوعاً منها عند نجم وده في ظني راجع لثقافته فؤاد وعشان كده يابو حميد لازم تقرا.

.. وكعاده سعد الموجي أسرع لنجدتي فقال:

- لا يابو خنان.. إسمح لي أختلف معاك.. أنا شايف إن ثقافته فؤاد هي ثقافته المؤسسه وأنا باعترف إنه حصل منها كثير لكن بنفس القدر نجم حصل من الثقافه الشعبيه... وعشان كده الطعم مختلف.

وحسم حسن الموجي المناقشه بلعبه من ألعابه الظريفه.. خد أول حرف من أسمائنا فؤاد وأنا وركبها فطلعت كده.. أحمد فؤاد قاعود (أَقُّ) وأحمد فؤاد نجم (أَقْن) وضحكنا وانتهت الأزمه!!

فوجئت ذات يوم بفؤاد يقول لي:

- ممكن تستنى أنت شويه بقى؟

ما فهمتش.. قلت له:

- إزاي يعني؟

قال لي:

- تبطل كتابه شويه لإمام عشان يلحن الشعر... يقصد شعره هو.

قلت له:

- قوى قوى...

وفعلاً.. توقفت عن الكتابه.. لكن قلبي ما قدرتش أوقفه عن الفرح باللي بيحصل... كل يوم مولود جديد... وكل يوم نغمه جديده وكل يوم فرح جديد وأنا بنفس الحماس باغنى وأضحك وأفرح وأطير مع السرب السعيد.

وذات يوم كنا قاعدين بلحن كلام جديد لفؤاد... الشيخ إمام وأنا وفؤاد قاعود

وأعضاء شركه مصر للكهرباء الثوريه وكالعادة أبدت ملاحظه أو اقترحت شيء على الشيخ إمام مش فاكرو.. ففوجئت بفؤاد يقول لى بمنتهى الغلظه:
- اسكت أنت .

بصيت على وش إمام ما لمحتش أى تعبير.. وقررت السكوت.. حوالى سنه كامله عايشين مع بعض ناكل ونشرب ونتكيف وننام ونصحى لكن ساعه الغنا أقعد معاهم برضه لكن ببقى ما ينفتحش ودى كانت أكبر عملية تعذيب اتعرضت لها فى حياتى لأنى ضعيف جداً أمام النغمه والكلمه والنكته.

بعد كده سافروا اسكندريه من غيرى وقعدوا اسبوع لحنا فيه شويه حاجات وبعد رجوعهم بيوم رجع فؤاد من روز اليوسف ومعاه شخص أفندى قوى أكثر من البيه النياحه ذات نفسه وكانوا جايين معاهم ريكورد كبير - جروندج - من أبو شرايط طاره زى بتاع أحمد الموجى وقال فؤاد للشيخ إمام:

- يا مولانا أنا جايب لك أخطر وأهم ناقد موسيقى فى البلد الأستاذ سليمان جميل الناقد الفنى بجريده الأهرام.

واتنتر الشيخ إمام على حيله وقال:

- أهلاً أهلاً.. وهل يخفى القمر.

وشغلوا التسجيل فبدأوا بالحاجات الللى اتلحنت فى اسكندريه وفوجئت بأن الشيخ إمام واخذ لحن قصيدتى - عصفور وصياد - ومركب عليه كلام لفؤاد قاعود.. حسيت بسكينه بتحش فى قلبى بصيت على فؤاد قاعود لقينته باصص على سليمان جميل بصيت على سليمان لقينته باصص على الشيخ إمام.. انسحبت جواً نفسى وواصلت السكوت.

بعد ما انتهت جلسه الاستماع قال سليمان جميل كلام كتير كل اللى فاكرو منه.

- دا فن حقيقى والسكوت عليه جريمه.. ولازم ياخذ فرصته ولازم الناس

تسمعه...

وكلام من هذا القبيل... وقال الشيخ إمام كلام كثير برضه كان أهمه إن:

- أمه محمد بخير طالما فيها أمثال أستاذنا الجليل سليمان جميل راعى الفنون.

وتعهد الشيخ إمام بمواصله الليل بالنهار فى الإبداع وترك مهمة النشر للساده الأجلاء رعاه الفنون من أمثال سليمان جميل وخلافه.

بعد ما نزلوا وانفردت بالشيخ إمام سألته:

- إحنا يا إمام مش اتفقنا مالناش دعوه بالإذاعه والتلفزيون؟

ضحك وقال لى:

- انتوا مين؟

قلت له:

- أنا وأنت.

قال لى:

- خليك فى حالك.. خليك فى حالك.

وكان لازم أواصل السكوت.. فسكت.

يوم رجعت الظهر من المنظمه لقيت إمام وفؤاد ومحمد على قاعدين زى الى مات له ميت.. إمام منعكش دماغه وفؤاد بينفخ من مناخيره ومحمد على ما بيطلعش نفس... إيه العبارة؟ الجماعه راحوا للأستاذ راعى الفنون.. راحوا له البيت حسب الموعد المحدد... لقيوا إيه بقى؟

محمد على يقول لك:

- دا واد أفندى آخر صياحه... لكن مسيره يقع فى إدينا.. أدام مش عاوز يشوف خلقتنا... بيواعدنا ليه؟ لأ وإيه؟ حاطط لنا القفل والرزق الباب... أما دى عجيبه والله.. أنا م الأول ماكتش مستريح له.

وقال الشيخ إمام:

- ما أنا ادبتها له في وشه... قلت له- ولتعرفنهم في لحن القول...

(ملحوظة) على الطلاق بالتلاته ما حصل.

القصد.. نزل فؤاد وغاب يومين ورجع ثاني وفي يوم رجوعه رجعت من المنظمه
الظهر دخلت الأوضه الصغيره اللي بانام فيها لقيت الكلیم مفروش في الأرض
وفوقه طبقه من الخرا... كميه كبيره جداً ما أعرفش جابوها منين وعامل ريحه بشعه
رجعت بضهرى ع الأوضه الكبيره لقيت الشيخ إمام ومحمد على قاعدين.. سألت
محمد:

- إيه يا محمد اللي على فرشتى ده؟

قال لي:

- خرا.

قلت له:

- مين اللي حطه؟

قال لي:

- أنا.

قلت له:

- ليه؟

قال لي:

- عشان تفارقنا.

- قلت له:

- وما قتلش ليه؟

قال لي:

- أدينى بأقول لك.

قلت له:

- طيب أناح أخلص الشهر اللى لى وأمشى.

قال لي:

- لا.. تمشى دلوقتى.

قلت له:

- أروح فين؟

قال لي:

- تروح فى ستين داهيه.

وراح قايم مدور الضرب فى فأنا بادلته الضرب وفوجئت بجارنا الفوقانى نازل
وماسك رقبه قزازه وعايذ يضربنى بيها.

حسيت إن المسألة مترتبة فقلت لمحمد:

- خلاص... أنا ماشى.

ومشيت..





لنجم والشيخ إمام يتوسطهم محمد علي

الفاجومي

الكورة فتحت لي باب التليفزيون

■ بفضل حالة غم كتبت ديوان شعر كامل عن
الصراع الدائريين الأهلي والزمالك.
■ الشيخ إمام.. صاحبي وزميلتي وراوي أشعاري.. دي
عشرة الغالي.

زى ما خرج أبونا آدم من جنة رضوان، خرج حفيده الفاجومي، من جنة حوش آدم.

أنا عملت إيه؟ ... إيه اللي كلته عشان أشرب عليه ميه؟

قالولى: اسكت... سكت... خليك فى حالك.. خليتنى فى حالى.

- طب أيه النظرية؟

برضه ما فيش أي نظرية..

- طب وبعدين... كده مخي حيزرب...

- أقولك يا واد.. ما تلجأ للرومانسيه..

- إزاي يعنى؟

- خليك رومانسى يا حمار... اعتبر إن وجودك فى حوش آدم عقبه فى سبيل

المشروع ورغم إنى ما عرفتش إيه المشروع إلا إنى خليتنى رومانسى.



إنجازين مهمين فى حياتى سمح لى الوقت بإتمام الإنجاز الأول كان المدخل إليه

سؤال حجازى لى:

- إنت قرئت بيرم؟

قلت له بمنتهى البجاحه:

- ما عجبنيش.

بصر لى وضحك وبعدين قال لى:

انت ابن (.....) كذاب.

فانفجرت بالضحك.

قال لى:

- ع العموم أنا عندى أعماله الكامله ح اديها لك تقراها...

وضحك وقال لى:

- تانى.

وقريت بيرم يا محترم ومن يوم ما قرئته واللى جالى جالى... الإنجاز التانى كان قرايه مجموعه كبيره من المسرحيات العالميه جابها لى حجازى وقال لى وهو بيديها لى:

- إقرأ النص على طول.. ولو لقيت نفسك بعد قرايه النص قادر تقرا المقدمه إبقى إقرأها.



وح أقول إيه ولا إيه الراجل ده علمنى كتير على شرط عمره ما حسسنى إنه بيعلمنى أنا فاكرو أنا باقرا له قصيده البلى بم بم وما كتتش باكرر جملة والبلى بم بم والبلى باه قال لك إيه قالك آه.. فقال لى:

- دنا كنت باحسب إنك حتكرر المقطع ده.

جربت اللى قال لى عليه لقيت القصيده بقى لها طعم تانى.



الصبح كنت باصطبج عند محمود الباشا وراجع مونون قالت لى زميله فى المنظمه:

- أنت كنت فين يا نجم؟ دا حجازى طلبك بالتليفون وبيقولك لازم تعدى عليه فى المجله بعد الساعه اتنين....



- خلاص بقى يا فؤاد... سماح يا أهل السماح ويا بخت من قدر وعفى وتكفى العايب عييته.

كان صوت أمى عمال يرن جوايا زى جرس الحريقه وأنا قاعد ساكت قدام حجازى الرسام بعد ما قال لى بمتتهى الهدوء والبساطه:

- دا الشيخ إمام عيان قوى وحالته وحشه وطلبه الوحيد إنه يشوفك ضرورى.

قلبي اتخلع.. خدت بعضى وقمت نزلت من غير استئذان... كانت تذكره الأوتوبيس بقرش صاغ- أيام بقى الله لا عاد يعودها- وكان كل اللى احتكم عليه شلن ورق! ما حبيتش أجرحه فقلت أتمشاها أفرنجى للغوريه فى عز عز النقاريه.. ألف سلامه ليك وألف وألف بعد الشر عليك.. دانت مهمما كان صاحبي وزميلي وراوى أشعارى للناس ومخامسنى العيش والملح سنين.... دى عشره ع الغالى والعشره ما تهونش إلا على ولاد الحرام... هى دى الحقيقه. وأى كلام غير كده باطل وقبض الريح.

ثم مسين أدرانى إنك كنت موافق ع اللى اتعملل معايا... أكيد أنت بالذات ما كنتش معاهم بس ما كنتش قادر تعمل حاجه.. سلامتك يا صاحبى من كل شين - وزى ما بدينا سوا لازم نكمل جاي لك يا إمام يا صاحبى... جاي بعرض مفتوح وضمير صافى وقلب أخضر زى قطع الورد... وعفا الله عما سلف.

قال الراوى ياساده يا كرام... صلوا على خير الأنام... ولما وصل الفاساجومى إلى مضارب حوش آدم قفز قلبه فى جنبه وطفرت الدموع من عينيه.

- والله زمان يا حوش آدم... وحشتنى يا بن الإيه... لكن اللهم لا شمانه... فین المشروع اللى طردونى عشائه؟ راح المشروع عشرين حته واتحول الموقع إلى أطلال تشبه ديار بنى عبس بعد ما اتعرضت لغاره جباره فى غيبة فارس الفرسان وشاعر الحرب والطعان عتتر ابن زبييه الكريم حامى الحمى والحريم وهازم الغريم اللثيم... أما عناصر المشروع فقد ولوا الأدبار ولأذوا بالفرار وتمزقوا إربا وضاعوا فى الفيافي والقفار.. مسحمد على رمز الألاطه واقف على باب سيدى يحيى يبيع بطاطه! وعناصر شبكه الكهريا الثوريه تلاشوا فى الحال وتقطعت منهم الأوصال بعد ما استولى أحدهم على الرصيد المحترم وبمزقه على نسوان شارع الهرم وبعدها سافر السويس انتحر هناك! وفؤاد قاعود انقطعت رجله وسيرته من الحته... وسبحان الحى الذى لايموت.

طلعت الموقع اللى هو البيت لقيت إمام وحيد مع المرض وقزايذ الدوا وشرايط البرشام نايم على لحم الدكه وهو جلد على عضم... أول ماشم ريحتى فز منتور على حيله وقال لى:

- يا حبيبى... إنت جيت؟

خده فى حضنى وقلت له:

- ماتتحر كمش.. خليك نايم مستريح.

قال لى:

- تعبت م الراحه يا ابو النجوم.

قلت له:

أجر وعافيه إن شاء الله.

قال لي:

- ماتسبينيش تاني... أنا اتهدلت في غيابك.

قلت له:

- هو أنا برضه اللي سبتك؟

قال لي:

- ما تكملش.... أنا ح أقولك على حاجه.. نحب نسمع مين؟

قلت له:

- أحب أسمع صوتك وأنت بتغنى... وحشتني الحكايه دي قوى.

قال لي:

- طيب ناولني العود.

وفوجئت بيه بعد ما دوزن العود بيغنى بأصغى صوت وأرق صوت سمعته في

حياتي:

تخاصمني كثير.

تصالحني كثير.

كل دا يا حبيبي.

مالوش تأثير.

تهجرني سنين.

توصلنى سنين.
 ما تغير نيش.
 دانا حبي كبير
 وإن كان أمل العشاق القرب.
 أنا أملى فى حبك هو الحب.
 وإن غبت سنه أنا برضه أنا.
 لا أقدر أنساك.
 ولا لى غنا.
 ولا اتوب عن حبك أنا.

عرفت من الشيخ إمام إن السامر انفض وكل منهو راح لحاله بعد عمليه طردى
 المهينه من حوش آدم.. ما فيش غير حجازى هو اللى ما قطعش الود وكان دايمًا
 شايف طلبات إمام وما مرض جاب له الدكتور والدوا وكان بيحب اللحمه والفراخ
 لمحمد على عشان يغذى الشيخ إمام.. ولما سأله عن سعد الموجى قال:
 - سعد زعلان منى يابو النجوم.. أنا شमित الزعل فى صوته وهو بيكلمنى.
 قلت له:

- ماتاخدش فى بالك.. بكره تشم الفرحة فى صوته بإذن الله..
 وقد كان.. بمجرد وجوعى لحوش آدم إتلم الشمل والبيت نور من جديد ورجعت
 الأنعام تلعلع من تانى.. كل يوم نغم طالع بيزف مولود جديد.. يا حلاوه مصر لما
 تغنى ويا حلاوه المغنى لما يطلع من قلب مصر..

الفاجومي

أنا.. وجـ راد يوليـو

ـ الحرب التي أعلنها حجازي الرسام قبل عام ١٩٦٧
على صفحات روز اليوسف.
ـ كتبت قصيدة «يعيش أهل بلدي» وكانت بداية
المشاكل مع الحكام اللئام.



100

101

102

103

104

القاهرة صدقوني.. مش مجرد مدينة.. القاهرة دى كوديه زار تهيج النسوان وتطلع العفاريات على جتتهم وغزيه متحزمه ولا بس الصاجات وبترقص.

وترقص الجدعان فى كل فرح وتزف كل عريس.. وغجره بتصدق وتظاهر وتضرب الرمل وتوشوش الودع وتشوف مافى حادثه كبيره حصلت على حياه عيني إلا والقاهرة قايله لى عليها قبل ما تحصل! حتقول لى إزاي؟ اسمع الحكايه دى:

يوم سبتاشر يناير ١٩٧٧ بالليل كنا سهرانين عند عبده جبير فى السيده وآخر الليل مروحين فى عربيه سعيد التشاقى وفى ميدان باب الخلق بالتحديد بصيت من شباك العربيه وقلت لهم:

- القاهرة مكفهره يا جدعان.. الهوا مكبوس ولونه مخطوف.. لازم فيه حاجه حتحصل - كنا أربعة فى العربيه أنا وعزه بلبع اللى كانت أيامها مراتى وسعيد التشاقى ومراته هينذر الشابه الإيرلنديه الجميله الودوده المثقفه والإنسانه الرائعه اللى تخليك غصب عنك تحب أيرلندا واللى بيعجى منها.. المهم أنا قلت لهم كده وهما انفجروا بالضحك.. وقالوا لى فى نفس واحد:

- ربنا يجعلنا من بركاتك يا شيخ نجم.

الساعه عشره الصبح لقيت حرمى المصون السيده عزه بلبع حفيده مرسى باشا بلبع بتصحبنى بمتهى الرقه:

- إيه.. إنت نايم ولا ميت.. قوم الناس فى الشارع والحكوم هربت..

أفتح عينيه ألقى لك المدام تبعى مالىه جيوب الجينز زلط ووشها معفر ومهيب بستين نيله وإديها لتنين مليونين زلط ولسه بسلامتها جايه من المظاهره تشرب شاي وراجعته تانى!

دى مجرد مره من ضمن المرارير اللى قالت لى فيهم القاهرة ع اللى حيحصل بكره ولسه ياما حتشوف.


نرجع لموضوعنا الأولانى سنه ١٩٦٧ الصيف سستها لاشفت له ندى صبحيه ولا
لمست له نسمة عصره.. كان صيف مكتوم كتمه الفول فى القدره.. تحس كده إن فيه
حاجه ثقيله كاتمته على مراوحك وانت ياولداه على رأى شكوكو:

جرحونى وقفلوا الأجزاءانات

لا قالوا لى إزيك

ولا سلامات!

• • •



ريشة الفنان: بهجت

فرسان الصحافه الموجودين فى كل عصر رغم كل شىء كانوا أيامها يستكلموا عن إفراز مرضى طالع من عبايه الثوره.. جراد أصفر انتشر فجأه وبكثافه مخيفه، انتشر فوق المزارع والمصانع يبلع الأخضر واليابس ويكرش ويسمن وخدوده تحمر من دم الشقيانين.. قالوا عنهم كلام كثير لكن حجازى كان بيرسمهم بكروش ولايسين بدل سودا ونضارات سودا وراكبين عربيات سودا آخر موديل ويشربوا السيجار الهافانا الشديد واحتدمت المناقشات فى شأن هذه الكائنات الغريبه وهل هما شريحه ولا طبقه جديده؟ إذا كانت شريحه يبقى كفايه حركه تطهير تخلصنا منهم وإذا كانت طبقه جديده تبقى المسأله محتاجه ثوره تانى، يعنى ثوره على الثوره وانتهاز عبدالناصر فرصه مناسبه.. وخطب، طبعاً كل الناس كانوا منتظرين الخطاب بفارغ الصبر وكل الناس متأكدين إن الرئيس بخطبه واحده حيقضى ع الطبقة الجديده ويخلصنا منهم فى غمضه عين وبدأ الخطاب وبعد الديباجه والذى منه فوجئنا بالقائد يقول بعلو حسه:

- مافيش طبقه جديده.

قلت فى عقل بالى:

- أحه.. يبقى الرئيس مش شايف حاجه م اللى إحنا شايفينه. أحتين وحته..

وبعدين قال إن فيه إطار العمل الوطنى اللى هو تحالف قوى الشعب العامله
وبعدين قال بلهجه تهديد واضحه:

- بتوع الكاريكاتير زدوها قوى.

يا نهار زى النيله يا واقعه زى الطين.. ليه كده ياريس؟! دا حنا مالناش غيرك! أنا عن نفسى كنت باحبه لدرجه العباده وكنت باحسد نفسى إنى عشت فى عصره وكنت فرحان وفخور إنه رئيس مصر وقائد ثورتها فى الزمن اللى أنا عشته وكان كلامه عندى زى القرآن وكلام أبويا على الشمروخ وأمى وكل الناس اللى باصدقهم عشان باحبهم.

بتوع الكاريكاتير؟! يا خساره يا ريس.. يا خساره يا مصر.. بقى المعاناه والقرف
الى شايلىنه وكاتمين الدمع القبيح وطواير الجمعيه وبهدله بناتنا فى الأوتوبيس
وشبابنا الى راح فى كل بلد شهداء وولادنا واخواتنا فى المعتقلات بدون تهمة
والرعب الى لابس جتتنا من صلاح نصر وحمزه البسيونى والدجوى وغيره وغيره
بقى كل دا بفعل رسامين الكاريكاتير ولاد ستين فى سبعين؟ أما صحيح الى
اخشوا ماتوا والله يرحمك يابا على يا شمروخ.

أنا بصراحه لقيتني مطالب بحركه جددنه مع رسامين الكاريكاتير الى باحهم
على قد ما بيمتعونى بخفه دمهم ويضحكونى على نفسى.. هما دول ولاد مصر
وضميرها الصاوى ولسانها الحراق ودمها الى زى السكر.. كفايه إن فيهم حجازى
- الفنان الشعبى العظيم الى شايف كل حاجه كويس قوى وبينشن على عين الدمى
من غير ما يعمل شوشره حوالين نفسه ولا يطلع فى تليفزيون ولا ينزل فى رمضان ولا
يرشح نفسه فى انتخابات ولا يصاحب مسئول.. كل طاقته حطها فى كف إيد
الأخضر ولون فن الكاريكاتير بالمصرى وسقاه شابه وفاسوخه وتمر حنه وزر ورد
ودار صينى وجاوى وعنبر وعين العفريت وكل البهارات المصريه الحراقه ماجابش
موزار وبتهوفن ورشهم ع الموال المصرى زى ماعمل الدكتور اللواء، لأ حجازى بقى
قلب الآيه رش المصرى الى كان ضايع ع الأجنبى الى كان موجود روقه وزوقه
وسقاه من فيض النيل خر العسل منه إزاي بقى يا عم جمال تعمل كده فى ولادك
وتنصر عليهم الحراميه؟!

ياترى يا هل ترى إنت عارف الحراميه دول وبتدافع عنهم؟ دى تبقى مصيبه ولا
انت ماتعرفش بوجودهم من أصله؟.. دى تبقى مصيبتين. القصد. استخرت ربنا
واستعنت ع الشقا بالله وكتبت دفاعاً عن رسامين الكاريكاتير وأولهم عمى وأستاذى
أحمد إبراهيم حجازى:

يعيش أهل بلدى

وبينهم مفيش

تعارف

يخلى التحالف يعيش

تعيش كل طائفه

من التانيه خايقه

وتنزل ستاير

بدابير وشيش

لكين فى الموالد

يا شعبي يا خالد

بتلم صحبه ونهتف يعيش

يعيش اهل بلدى

❖ ❖ ❖

يعيش المثقف

على مقهى ريش

يعيش يعيش يعيش

محفلط مزفلط

كتير الكلام

عديم الممارسه

عدو الزحام

بكام كلمه فاضيه

وكام اصطلاح

يفبرك حلول المشاكل قوام

يعيش المثقف

يعيش يعيش يعيش

يعيش أهل بلدى

يعيش التناوبه فى حى الزمالك

وحى الزمالك

مسالك مسالك

تحاول تفكر

تهوب هنالك

تودر حياتك

بلاش المهالك

لذلك

إذا عزت توصف حياتهم

تقول الحياه عنلقا

مش كذلك



ويمكن تشوفهم

فى وسط المدينه

إذا مر جنبك

أوتومبيل سفينه

قفاهم عجينه
كروشههم سمينه
جلودهم بتضوى
دماغهم تخينه
ستانهم مبارد
نفوت فى الجليلد
مافیش سخن بارد
بياكلوا الحديد
مادام نهر وارد
وجای م الصعيد
تزيد الموارد
كروشههم تزيد
وتسمع وتسلم
بأن التنايله
أو الاكلين
حیسمع كيرهم
ويعمل مقابله
مع الفلاحين
ويحصل تعارف
ونملا المصارف

بدم القطيع
أطيع الخليفه
أطيع والديك
أطيع التنايله
دا مفروض عليك
وتزرع وتبعث
لحي الزمالك
وحي الزمالك
مسالك مسالك
تحاول تفكر تهوب هنالك
تودر حياتك
بلاش المهالك
لذلك
إذا حد جاب لك سيرتهم
تبسمل تكبر
وتهتف كذلك
يعيش التنايله
يعيش يعيش يعيش
يعيش أهل بلدى
♦ ♦ ♦

يعيش الغلابه
فى طى النجوع
نهارهم سحابه
وليلهم دموع
سواعد هزيله
لكن فيها حيله
تبدر تخضر
جفاف الربوع
مكن شغل كايرو
مايتعبش دايره
لا ياكل
ولا حتى يقدر يجوع
ياغلبان بلدنا
يا شحم السواقى
يا فحم المصانع
يا منتج يامبهج
يا آخر حلاوه
يا هادى
ياراضى
يا عاقل

يا قانع
ما تتعبد عقلك
في شغل السياسة
وشوف انت شغلك
بهمه وحماسه
وعود عيالك
فضيله الرضا
لأن احنا طبعاً
عبيد القضا
ورزقك
ورزقي
ورزق الكلاب
دا موضوع مؤجل
ليوم الحساب
كمان الصحافه
حتكتب في حالتك
وتنشر مناظر
لخالك وخالتك
وتطلع يا مسعد عليك الغناوى
وتسمع باسمك

فى قلب القهاوى

تحبك مشيره وبنات الجزيره

وقصه غرامك

تشيع فى الرداوى

يعيش عم مسعد

يعيش يعيش يعيش

يعيش أهل بلدى

● ● ●

ودى كانت نهايه فرقة بطاطه المسرحيه وبدايه المشاكل مع الحكام واللثام وشال
الحمام.. حط الحمام.

■ ■ ■

الفاجومي

وفي يونيو ٦٧ خاب
أمل العشاشين

- فجأة وبدون مقدمات طلعت علينا الصحافة
بمنشيات ملتهبه.
- الشيخ إمام بدأ يهيا نفسه لإقامة أول حفله
غنائيه تحت «قبة الصخره».
- بعد اليوم الأول من بداية الحرب بدأ الفاري لعب
في عب الناس.

صديقي الكاتب الليبي الكبير الصادق النيهوم اللي هو بالنسبه للثوره الليبيه زى إحسان عبدالقدوس بالنسبه لثوره يوليو. ومن الصدف السعيده جداً أن قابلته فى الفندق الكبير فى طرابلس فاتعلقت بيه زى الغريق مايتعلق فى قشايه.. كانت الوحده حقتلنى فى الفندق.. هو صحيح الموت فى فندق خمس نجوم أحسن من الموت فى سجن الاستئناف أو حتى فى أوضه حوش آدم لكن أنا ماكتتش عايز أموت من أصله، وكل واحد بقى حر وإذ بى أفاجأ بالصدىق العقيد يوسف الدبرى داخل على الصبح وبيقولى:

- دا الأستاذ الصادق النيهوم موجود هنا عرف إنك موجود وعايز يشوفك.

قلت له:

- معقول! هو هنا من إمتى؟

(طبعاً أنا لا كنت عارف مين هو الصادق النيهوم ولا هو هنا فى).

قال لى:

- دا وصل إمبراح من جنيف لأن معمر بعت له ويمكن يقعد هنا أسبوعين.

المهم قابلت الصادق النيهوم.. شخصيه باهره.. كل ما تقترب منه تكتشف جانب جديد مضىء لدرجه الإبهار، ثقافه واسعه متنوعه وموهبه أصيله فى الكتابه وانتماء عربى راسخ رغم إقامته الجبريه فى جنيف أحد معاقل الصهيونييه الراسخه فى أوروبا.. قبل ثوره الفاتح كان بيكتب فى الصحافه سلسله من المقالات شديده الأهميه بالنسبه لكل المثقفين الليبيين وخصوصاً ضباط الجيش المناوئين للحكم الملكى وبالتحديد تنظيم الضباط الأحرار اللي قام بالثوره بقيادة العقيد معمر القذافى وكعادة الثورات فى كل زمان ومكان ركبوا الانتهازيين الموجه وحاصروا الثوار

الحقيقيين ونجح الصادق النيهوم فى الإفلات بجلده من الحصار وحط بيه الرحال فى جنيف مع احتفاظه بعلاقات جيدة بقائد الثورة معمر القذافى!!؟

والصادق النيهوم له مجموعه من المؤلفات القيّمة يعرفها جيداً ويعتزّ بيها كل المثقفين فى المغرب العربى ومن أشهرها كتاب - الحيوان - اللى استخدم فيه مزج بين أسلوب الجاحظ فى كتابه اللى بيحمل نفس الاسم وأسلوب بيدبا فيلسوف الهند فى كتابه - كليله ودمنه -.

أثناء ما التقيت بالصادق فى طرابلس كان على وشك الانتهاء من كتابه - صوت الناس - ولحسن حظى إن بعض فصول الكتاب كانت موجوده معاه وقرا لى منها فأمستنى رغم أن محتوى الكتاب شديد الجفاف.. لأنه بحث عن الهوية العربيه! وكان الفصل المكتوب عن ديمقراطيته الحكم هو أهم الفصول فى نظرى.. هو يقول فى الفصل ده إن العالم لم يشهد فى تاريخه حكم ديمقراطى غير الأربعة وعشرين سنه اللى هما بدايه الدوله الإسلاميه وبيقول إن كلمه المسجد كلمه دخيله على الإسلام وإن الاسم الصحيح هو الجامع وإن الجامع ماكانش مجرد مكان لإقامه الشعائر وكان بالدوجه الأولى برلمان مفتوح الباب والعقل أمام كل الآراء بلا قهر ولا تعتيم، وضرب عدة أمثله معروفه فى أدبيات الإسلام.. لكن أخطر شىء فى هذا الفصل.. هو قرار الحرب بيقول إنه لم يحدث فى خلال هذه الفتره أن انفرد شخص باتخاذ قرار الحرب ولا حتى الرسول نفسه لأن المسأله كانت تطوعيه يعنى ماكانش فيه جيش نظامى قائم على الخدمه الإجباريه بالأجر يعنى كان الرسول ﷺ أو أمير المؤمنين ﷺ يصعد المنبر ويخطب فى الناس ويتحاور معهم فى كل شئون الدنيا والدين وعند مسأله الحرب يطرح وجهه نظره للمناقشه وبعد الموافقه الجماعيه ينادى بلال حنى على الجهاد ويخرج كل واحد من الجامع على بيته يتقمط سلاحه ويخرج للجهاد فى سبيل الله بمحض قناعته وإرادته فإذا أتى نصر الله والفتح فالثواب للجميع بالتساوى وإذا وقعت الهزيمه يتحملها الجميع بالتساوى برضه.

أنا سبقت الأحداث واخترت الوقعه دى بالذات لأنى مالمقيتش أنسب منها مقدمه

للى جاي.

إحنا كنا قاعدين فى أمان الله لا بينا ولا علينا، الحر عاجن الناس فى هدومها وأزمات التحول الاشتراكي محاصره المواطن ومفيش أى فايده من المقاومه على رأى الأفلام المصريه لكن برضه كان فيه متنفس فى حفلات أم كلثوم ولقاء السحاب بينها وبين الدكتور عبدالوهاب وماتشات الكوره اللى على ودنه والاستمتاع بفن صالح سليم والضطوى والفناجيلي وحماده إمام وسمير قطب وباقي كباتن مصر الحريفه وفجأه وبدون مقدمات طلعت علينا الصحافه بمانشيتات ملتهبه:

- «إسرائيل تحشد حشوداً على حدود سوريا».

- يانهار زى بعضه ياجدعان.

- ياترى الرئيس حيسكت؟

- يسكت إزاي ياجدع!! دى سوريا.

- حقه كله إلا سوريا.

- قال ياخبر النهارده بفلوس بكره يبقى بيسلاش. وفعلاً - هنا القاهره - قالها المذيع بلهجه خطيره بعد ما قطع الإرسال فجأه وبدأ المذيع أبو صوت رخيم ضخيم فخيم يقرأ خطاب موجه من الرئيس جمال عبدالناصر شخصياً للمسيو أوثانت أمين عام منظمه الأمم المتحده ذات نفسها.. وبدأ المذيع الخطاب بالعباره التاليه:

«عزيزى أوثانت» - تصوروا! يعنى إحنا المذيع بتاعنا راسه براس سكرتير عام منظمه الأمم المتحده ياجدعان!

- أمال ياجدع داحنا عندنا القاهر والظافر.

- دا بيقولك ثلاثه قاهر وتلاته ظافر يدمروا إسرائيل بالكامل وياكلوا حتته من لبنان فوق البيعه.

- طب مانضرب تلاته قاهر واتنين ظافر عشان مانعورش لبنان.

- حتفضل حته من إسرائيل يامخشمون.

- ندكها بالميج تلاته وعشرين يا أهبل.

- تلاته وعشرين إيه يامتخلف.. إحنا عندنا السبعة وعشرين.

المهم إن الخطاب بيقول لعزیزه أوثانت مامعناه لم العیال بتوع البولیس الدولی واتكل على الله وسینا إحنا وإسرائيل نخلص مع بعض.

أنا عن نفسی كنت عارف القاهر والظافر والميج وما إلى ذلك وكنا بنشوفهم فی العرض يوم تلاته وعشرين یولیو من كل سنه وكان صوت الطیارات بیکسر قزاز العمارات العالیه وجنازیر الدبابات بتهرس أسفلت الشوارع ودا فی حد ذاته كان بیفرحنی فی ولاد الكلب سكان العمارات العالیه والشوارع المسفلته، فما بالك لما ده كله ينزل على دماغ إسرائيل عمیله الإمبریالیه ورأس جسر الاستعمار الجدید.. الحمد لله إنی عشت وح أشوف الیوم دا بعینی! أحمدك وأشكر فضلك یارب.

الناس انشحت فی الشوارع والبیوت وزی عادہ المصریین الطیبیین كل واحد نسی مشاكله الخاصه وانغرز لشوشته فی مشکلة الوطن، الشیخ حسین إمام الجامع الکفیف الظریف قآل لی:

- إن شاء الله الاصطباحه فی تل أبیب یابو النجوم.. هناك الحشیش من علی أبوه ولا تقولی مصطفی مرزوق ولا قوطه ولا دیاولو.

قلت له:

- ولا حسن نصار؟

قال لی:

- ولا حسن نصار.. باقول لك من علی أبوه یابنی آدم تقول لی کانی ومانی.

والشیخ إمام بدأ یهیباً نفسه لإقامه أول حفله غنائیه فی فلسطین المحرره! أنا كان رأیی نعملها فی تل أبیب لكن هو صمم نعملها تحت قبه الصخره.. أنا ما أعرفش قبه

الصخره دى فين لكن اضطريت أوافق أمام إصراره العجيب.. غير كده بقى
مجموعة العزاب لضيق ذات اليد علقوا آمال كبيره على حل مشاكلهم الجنسيه مع
نسوان اليهود اللى بيموتوا فى الراجل المصرى حسب زعم أحمد الزينى.

.. وانتشرت الملصقات فى الشوارع.. إسرائيل إلى البحر.. فى خليج العقبه كسر
الرقبه.. وحاجات من هذا النوع واشتغل مطبخ الأغانى فى عزبه ماسبيرو ولأن
الكلام زى ما بيقولوا - ما عليهش جمر ك - اتفتحت علينا ماسوره الإذاعه غرقنا
كلام مجعلص ورهيب من ماركه:

الدم الدم الدم

الدم الأمريكانى

وكانى مانى يانى

وإضرب إضرب

لجل العيال و لجل الجبال و لجل الخيال

و لجل أى حاجه آخرها آل، فيه شاعر تصور إنه داخل عركه فى سوق الخضار
فقال:

ولا يهملك ياريس

م الأمريكان ياريس

حوالك أجدع رجال

ويوم الاثنين خمسه يونيو صحينا ع المارشات العسكريه فى الراديو والبلاغ رقم
واحد واتنين وتلاته.. أنا خرجت من حوش آدم وكنا موقعين حذاشر طياره وصلت
المنظمه كانوا بقوا أربعة وتسعين بقى كل اللى يقابلنى راجل مرا آخده بالحضن..
حاله من الجنون الفرحان عشتها فى حياتى ثلاث مرات: مره يوم طرد الملك فاروق
والمره دى والمره الأخيره يوم قتل السادات.. تصور بلغ بى الجنون إنى آخذ شاعر
شرايين اليأس بالحضن فانتهزها فرصه وزنقنى فى المكتب وسمعى القصيده اللى

كتبها في الموضوع.. سمعني حوالى أربعة وثمانين بيت وبعدين قال لى دا المطلع قلت له كمل وإن شاء الله قبل ماتخلص القصيده يكون الطيران الإسرائيلى وقع كله، وفجأه سمعنا صوت طيران واطى فاندفعنا إلى سطح المنظمه وشفنا طيارتين ماشيين على وش النيل وفوجئنا بالأستاذ إدوار الخراط الأديب المعروف ومدير الشؤون الفنية بالمنظمه طالع ورانا جرى وبيقول لنا بلهجه جارحه:

- إيه اللى طلعلكوا هنا؟.. إنزل إنت وهو:

أنا حسيت إن لهجته بنتطوى على اتهام!!! حاله الفرح المجنون اللى كنت عايشها هى اللى منعتنى من الرد عليه.

بعد اليوم الأول الفار بدأ يلعب فى عب الناس.

- إيه الحكايه؟ عدد الطيارات الإسرائيليه اللى وقعت كتير قوى.

- والدفاع الجوى هو اللى وقعها أمال فين الطيران المصرى؟

- يمكن مدينته للضربه الأخيره.

- قريت هيكل النهارده؟

- لأ سمعت أحمد سعيد؟

- عرض اللى فاهم حاجه فى البلد دى.

- وطى صوتك لنروح ورا الشمس.

... تانى! الناس خرجت من حاله الفرح ورجعت للبليه والخوف.. الموقف

غامض والبيانات الرسميه حاجه من اثنين يا إما اللى كتبها أبله يا إما متصور إنه

بيكلم شعب أبله.. يعنى لما يطلع أحمد سعيد يقود المعركه من صوت العرب وكأنه

يشجع ماتش كوره ويقول:

- بشرى يا عرب، لبنان دخل المعركه لمدته دقيقه. يبقى دا راجل عاقل؟!





الفاجومي

يوم أذاعوا خبر سينا بصوت نجاة

«يوم ٧ يونيو كتبت قصيدة «واه يا عبد الودود»

كرد فعل تلقائي.

«دوامه لفتنا كلنا.. رعب قلق يا ترى يا هل ترى.

«انعقد مجلسنا في المساء وغنينا حتى الصباح» نوح

النواح والنواحه».

دوامه مرعبه لفتنا كلنا... دوامه من الرعب والقلق يا ترى يا هل ترى.. الناس في الشوارع والقهاوى والأتوبيسات مبلمين.. ما حدث قادر يبص في وش التانى.. الضحكه المصريه الصافيه الجريئه ماتت.

زكى كمسارى أتوبيس ٩٥.. المشاكس خفيف الدم ركبت معاه يوم ٧ يونيو لقيته ساكت وحاطط وشه في خشبه التذاكر وياخذ الفلوس من الركاب ما يببش فيها زى عوايده ويشاغب مع الركاب..

زكى ده كان متعه بالنسبه لركاب خط ٩٥.. آخر طرفاته كانت قبل الحرب بيومين مع مواطن قروى راكب ومعه قفه، قعد زكى يحسس عليها وبعدين قال له:
- إيه ده؟.. المشلتت ممنوع في مصر.

الراجل قال له:

- ومين اللي منعه؟

قال له:

- بلاش كلام في السياسه لنروح أنا وأنت في أبو نكله.

زكى النهارده حزين ومبلم.. سألته من باب كسر الصمت.

- مالك يا أبو الزيك؟

بص لى ما قدرتش أخط عينى في عينه... نزلت وشى في الأرض تانى.. وصلت المنظمه لقيت نفس الحاله.. ماحدث بيتكلم مع حد.. ما حدث يببش لحد، الناس خايفه من بعضها.. عايز أتكلم مع حد عايز أفضفض. دخلت مكتب فاضى وقفلت على نفسى بالمفتاح من جوا وبدأت أكتب:

واه يا عبد الودود

يا رابض ع الحدود
ومحافظ ع النظام
كيفك ياواد صحيح
عسى الله تكون مليح
وراجب للأمام
أملك ع تدعى ليك
وع تسلم عليك
وتجول بعد السلام
خليك ددع لايوك
ليجولوا منين دايوك
ويمصخوا الكلام
واه ياعبد الودود
ع اجولك وأنت خابر
كل الجضيه عاد
ولسه دم خيِّك
ماشرباش التراب
حسك عينك تزحزح
يدك عن الزناد
خليك ياعبد راصد
لساعه الحساب

آن الأوان يا ولدى

ماعدًا إلا الميعاد

تتفض الشركة واصل

وينزحوا الكلاب

إن كُت ودَّ أبوك

تديب لى تار أخوك

والأهل يبلغوك

دميعةً السلام

●●●

واه يا عبد الودود

كيفك وكيف زمايلك

عسى الله طيبين

خالك زناتى داي لك

ضمن المتطوعين

واختك تطلع يوماتى

ع المشتشفى الجديد

حاكم عيمرنوها

فى العرکه تكون حكيمه

ومحمدین موافى

يتعلم المطافى

ويجولك شد عزمك

ويجولك العوافى

ومن هنا الجرايب

والعيله والعيال

ع يبلغوك سلامهم

ولتمه الرجال

وآخر الكلام

نجولك فى الختام

الله يصون بلدنا

ويحرس السلام

والدك حسن محارب

غفير برج الحمام

يوم الخميس الحزين تمانيه يونيو سنه ١٩٦٧

اليوم دا بيفكرنى بموال قديم سمعته مره من عيد السروجى زميلى فى عمال
الكنال بتوع السكه الحديد تبع الزقازيق... الموال القديم بيقول:

يوم الثلاث الذى

فات

صعب ياخواتى

فى حى بليس

عساكر جيش

لمنع الناس

عن النحاس ياخواتي

البطل أحمد سعيد بطل زعيق وتهديد وغلب صوت العقل وبدأ يقول كلام مفهوم.. وأتارى إسرائيل دى بقى طلعت ماعندهاش ريحه الشرف ولا هى ولا أمريكا... وإن الولس هو اللى هزم عرابى!!

البيانات العسكرية جزاها الله كل خير طمنتنا وبردت قلوبنا ع الفرقة الرابعة المدرعه وإنها سليمه والحمد لله، كما خط دفاعنا الثانى ما زال متماسك بعون الله!!
والظاهر والله أعلم إن البوينه تبع المارشات العسكريه عطلت ولأ حاجة فقاموا مشكورين مركبين بوينه تانيه يقوم على بختنا يطلع ع البوينه التانيه أغنيه:

كل شيء راح وانقضى

واللى بينا خلاص مضى

ماتفهمش مين هو اللى بينا ومضى عليه إيه؟

أنا بودانى اللى حياكلها الدود سمعت الغنوه دى فى اليوم المذكور ثلاث مرات وعلى موجه البرنامج العام فقط لاغير!

باقول ممكن تكون الحكايه صدفه! عموماً إن بعض الظن إثم.. هى صدفه برضه أما صباح اليوم الحزين فكان شكلها زى المنقذ اللى انطفت ناره بكوز ميه فبقى معجنه.. مانشتات عجيبه ماتعرفش ولاد الحرام كانوا بيحبوها منين... وقف ضخ النفط.. نفط ضخ الوقف وحاجات من هذا القبيل شرطاً بالخبر الأحمر.. إيه رأيك بقى؟ وآخر الليل ماهانش عليهم يسبوا فينا بصايه والعه راحوا دالقين على دماغنا الخبر الشوم- مصر تقبل وقف إطلاق النار- انطقينا ياولداه وانكفينا وكفينا ع الخبر خمسة وأربعين مليون ماجور.

آخر نهار الخميس الحزين خدت نسخه من قصيده عبد الودود ورحت على دار أخبار اليوم عشان ينشروها فى مجله آخر ساعه اللى كان رئيس مجلس إدارتها

يوسف السباعي برضه كان لازم القصيده دى توصل لصاحبها عبد الودود المصرى
الى هو زكى كمسارى ٩٥ وسمنطر زميل النقل الميكانيكى وشاعر الشرايين وأحمد
سليم عامل التراحيل الشيوعى وأبوك على الشموخ والأستاذ محمد زى العسل...
كل الى بيغنوا نسيوه تصورا! مع إنه هو الى عليه الرك فى الحرب والسلام.

ودخلت مكتب مدير مكتب يوسف بيه لقيت اتنين أفنديه قاعدين على مكتب
وكراسيهم لازقه فى بعض وساكتين وأول ما شافونى داخل بصوا لبعض قلت لهم:

- سلامو عليكم.

ما حدش رد.

قدمت الورقه لواحد منهم فبدأ يقرأ بصوت مسموع.

واه ياعبد الودود.

يارابض ع الحدود.

قال لى:

ما خلاص ما بقاش فيه حدود.

رحت مطلع قلم من جيبي وشاطب المطلع وكاتبه كده:

واه ياعبد المتعال

يارابض ع الكنال

بصوا لبعض بدهشه وقال لى واحد منهم:

- يوسف بيه جوا! خش إديله القصيده... وبصوا لبعض وضحكوا.

دخلت المكتب الأعظم لقيت يوسف بيه فى منتهى الأناقه لابس قميص رمش
العين أزرق فاتح بياقه فانها وزن وبنطلون رمادى فانله وجزمه بنيوش إنجليزى
عريض وشراب رمادى نايلون حتقولى شفت الجزمه والشراب إزاي؟ لأنه كان قاعد
ع الكرسي وممدد رجليه ع المكتب فى وش الداخلى من بره وماسك التليفون اللبنى

وبيهمس وعنيه الجميله مبتسمه زى أجدرع وأجمل شجيع سيما أمريكانى... ساعه
ماشافنى اتعدل فى قعدته ناولته القصيده وقلت له:

- انشر دى.

خدها منى وقال لى:

- حاضر حنشرها العدد الجاى.

نزلت من أخبار اليوم زى اللى مضروب على دماغى بدل ما اتجه لشارع فؤاد
اتجهت لميدان رمسيس من شارع الجلاء عند مستشفى السكه الحديد لقيتهم راميين
المرضى على الرصيف وعربيات جيش واقفه قدام المستشفى بينزلوا منها جثث
وجرحى وشفت كيس مشمع مليون ما أعرف إيه وغرقان بقع دم من برا ما أعرفش
إزاي وصلت حوش آدم دخلت الحمام حسيت بإسهال شديد كأنه ميه سخنه مدبت
إيدى بابص فيها لقيتها غرقانه دم أحمر جيت أقوم ماقدرتش ندهت على محمد
على جه خدنى من الحمام نيمنى ع الدكه الخشب ما أعرفش نمت قد إيه صحيت على
صوت إمام قال لى:

- سلامتك.. نجيب لك الدكتور عبد الفتاح؟

قلت له:

- ماتيجى نتمشى.

قال لى:

- بينا.

نزلنا من حوش آدم دخلنا الغوريه شمال على بوابه المتولى وتحت بوابه المتولى
قلت له:

- هنا بالضبط كان متعلق جثمان طومانباى.

قال لى:

- رحمه الله عليه.

قلت له:

- رحمه الله علينا إحناء.. إحناء دلوقتي اللي نستحق الرحمة يا إمام.. وخرجنا من
بوابه المتولى يمين على تحت الربع خلصناه وعودنا يمين على بورسعيد ويمين على
الأزهر ويمين على الغوريه وشمال على حوش آدم وصلنا البيت كانت انكتب
واتلحنت أول قسايد الرد على الهزيمة ليلتها جه سعد الموجي ووجه القاياتي ومنير
سويلم وجمال الموجي وغيرهم وفضلنا نغنى حتى مطلع الفجر.


ناح النواح والنواحه

حاحا	على بقره حاحا النطاحه
حاحا	والبقرة حلوب
حاحا	تحلب قنطار
حاحا	لكن مسلوب
حاحا	من أهل الدار
حاحا	والدار بصحاب
حاحا	وحدا شر باب
حاحا	غير السرايب
حاحا	وجحور الديب
حاحا	ويبان الدار
حاحا	واقفين زنهارة
حاحا	وف يوم معلوم
حاحا	عملوها الروم
حاحا	زقوا الترباس
حاحا	هربوا الخراس

حاحا	دخلوا الخواجات
حاحا	شفطوا اللبنات
حاحا	والبقرة تنادى
حاحا	وتقول يا ولادى
حاحا	وولاد الشوم
حاحا	رايحين فى النوم
حاحا	البقرة انقهرت
حاحا	فى القهر انصهرت
حاحا	طب وقعت ليه؟
حاحا	وقعت م الخوف
حاحا	والخوف يجى ليه؟
حاحا	من عدم الشوف
حاحا	وقعت م الجوع ومن الراحه
حاحا	البقرة السمر النطاحه
حاحا	ناحت مواويل النواحه
	على حاحا
	وعلى بقره حاحا
	ملحوظه:

لثنين الصحفيين اللى كانوا فى مكتب مدير مكتب يوسف بيه مازالوا أحياء وربنا يديهم الصحه والعمر وهما الأستاذ طارق فوده والأستاذ أحمد صالح.





الفاجومي

الأقدي الذي أخبرنا بتتحي
عبد الناصر قبل عبد الناصر

■ يوم الجمعة الحزين ظهر عبد الناصر على شاشة
التلفزيون كالأسد الجريح وألقى بيان التنحي.
■ بعد البيان صرخت.. لا.. مستحيل.. مش ممكن.
■ في نفس واحد.. هتفت الجماهير: بلادي بلادي
بلادي.

كان أبويا المرحوم على الشمروخ أوقات الشدايد- ومكترها- يقول لنا يا ولاد ما تنزعجوش م المصايب. دا ربنا قبل ما يقدر البلا بينزل اللطف... سبحان الله... تقولش سبحانه وتعالى كان عارف إن كتافنا المهمله مش حتشيل تقل البلوى فاختر بلطفه يوم الجمعة ٩ يونيو سنة ١٩٦٧.... أهى الناس بتبقى قاعده فى البيوت وكل منهو مستخبي فى هدومه، ودافن الوجيعه فى السكات.

طب دا إحنا يوم الخميس الدامى اللى هو امبارح وكانت الرؤيه لسه ماثبتش.. كان حالنا حال كان كل واحد فينا حاسس إنه عامل عامله ومكسوف يبص فى وش أخوه... دا غير بقى اللى كان له شاب ولا اتنين ع الجبهه ومش عارف لهم طريق جرّه... وكاتم الدم ع القبيح ومش قادر يسأل عن العزيز الغايب وإلا يبقى خاين وأنانى ومش هامه غير مصلحته الشخصيه وناسى هموم الوطن الكبير اللى هو عدم المؤاخذه م المحيط للخليج!

تعالى بقى ليوم ثبوت الرؤيه اللى هو يوم الجمعة الحزينه يوم ما وقعت البقره كترت عليها السكاكين... الوشوش كانت صفرا صفرا الموت والأنفاس مكروشه وكأن الشعب المصرى كله جات له والعياذ بالله نوبه ربو أو حاله احتضار جماعيه... وسى الراديو عمال كل خمس دقائق يعلن عن بيان هام حيلقيه الرئيس جمال عبد الناصر على الأمه فى تمام الساعه المش عارف كام والناس فى حيص يبص وياترى يا هلترى... وفجأه قال وجيه القاياتى لسعد الموجى:

- إلا قول لى يا بو سعده... هو عرابى برضه كان هرب؟

وانفجرنا بالضحك ثواني وغرق بعدها صوت الضحك فى بحر السكات وحاول أوزوريس الخروج بينا من جو المأساه فسأل سعد:

- لكن تفتكر يا بو سعده الصعايده حيسكتوا؟ وضحك لوحده وقال منير سويلم

وكأنه بيكلم نفسه:

- يا ترى حيقول إيه فى البيان؟

ورد عليه واحد أفندى ما أعرفوش كان قاعد يتكلم بلهجه العالمين بيواطن الأمور
عن قوه أمريكا الرهيبة ويردد- بزهو - عبارته هيكل الشهيره (نحن لا نستطيع أن
نناطح الولايات المتحدة الأمريكية) قال الأفندى إياه ردًا على سؤال منير:

هيسقتيل طبعًا إذا كان عنده دم

دا قائد مهزوم ياباشا ولو كان بيحس كان لازم يتتحرزى هتلر.. هتلر انتتحر
وموسولينى انتتحر.. وحتى كليو باترا انتتحر.

اتهيألى إنى أقوم أجيب زماره زوره بسنانى لكن محمود اللبان قال:

- أنا باقول يمكن يضرهم بالذريه... دى عالم ما ينفعش فيها غير الذريه... مش
احنا برضه عندنا الذريه؟

وضحك أوزوريس تانى وقال له:

- طبعًا يابو حنفى... عندنا الذريه الصالحه. وقال فؤاد السبكى:

- اللى مش مفهوم يابو سعده لغايه دلوقتى هو موقف الاتحاد السوفيتى. فقال
الأفندى:

- الاتحاد السوفيتى لو فتح بقة حياكل نفس العلقه.

قلت له بغيظ:

- أنت جايب العلم دا كله منين؟

ضحك وقال لى بسخرية واضححه:

- دا بعض ما عندكم.

قلت له:

- أنت جاسوس.

قال لي:

- وأنت جاهل وحمار وقليل الأدب.

رحنا قايمن طابقين فى خناق بعض لولا إنهم حجزونا.. وبدون ما حد يشعر
قمت نزلت وفضلت ماشى من بيت وجيه فى درب الحماميز لحد ما وصلت بيت
مصطفى خال عفاف بنتى فى غمره... وصلت إزاي؟ مش عارف.. توهه.. وربنا
يجازى اللى كان السبب لقيت الموضوع نفسه فى شقه العزاب اللى مع مصطفى...
العيون مطفيه والضحكه اللى كانت بتزعج الجيران ميتة والحزن رامى تقله ع المكان..
وسألنى أحمد الزينى:

- إيه أخبار الجبّه؟

قلت لمصطفى:

- أنا ح أنام وصحيتى قبل إذاعه البيان:

الساعه مش عارف كام قعدنا قدام التلفزيون ما فيش نفس طالع.. وظهر عبد
الناصر.. الأسد الجريح... عيون الصقر دبلانه ومكسوره واللمعان المخيف اللى كان
بيشع منها انطفى والوش الأسمر اللى كان بيطفح شباب وحيويه عجز وشاخ بين
يوم وليله وكأن صاحبه طالع م القبر يشم هوا وراجع تانى... يا خسارتك فى الحزن
يا مصر... يا عينى عليك يا جمال ياللى كنت امبارح بس عتتر زمانك وفارس
عصرك وأوانك... يا ترى الحصان هو اللى انكسر تحتك ولا أنت اللى انكسرت فوق
الحصان؟ زمان كانوا يقولوا لنا:

- الولس كسر عرابى.

واحتا من خمستاشر سنه طردنا الملك والإنجليز والبشاوات حييجينا الولس منين؟

وبدا عبد الناصر البيان:

أيها المواطنون.. راح فين الصوت النحاسي الجمهورى اللى كان بيزلزل الدنيا شرق وغرب؟ راحت فين التريقه المصريه الحراقه والابتسامه اللى كانت بتنور الضلمه حوالينا؟

القلب انكسريا ولداه والصوت العالى بقى حشرجه وأئين طالع من قلب مجروح بينزف الكلام بدمه.

كلام كتير فى البيان عن مؤامره طلع مقاسها أوسع من تصوراتنا! وهجوم كنا منتظرينه من الشرق قام ابن اللثيمه جالنام الغرب!!

كمان السفير السوفيتى الملحد قال لنا- أوعوا تبدأوا بالضرب يا مسلمين!!

كلام مش راكب على بعضه ولا يدخل دماغ عيل بيعملها على روحه.. ومن باب بروان العتب أعلن القائد إنه بيتحمل المسئوليه بمتهى النبل والفروسيه قرر إنه مش لاعب وحيسلم الأمانه لزميله وصديقه زكريا محبى الدين!! وصرخت:

- يا ولاد الكاااالب... لا... مستحيل... مش ممكن، ولقيتني واخذ السلم أربعات وطالع أجرى فى شارع طه السيوفى وأنا باصرخ:
- لا... مستحيل مش ممكن.

ما كنتش عارف أنا رايح فين؟ ولا باقول لا مين؟ ولا إيه هو اللى مستحيل واللى مش ممكن! وبدأت ودائى تصفر ومن خلال الصفافير بدأت أميز نفس الصريخ بنفس العبارات:

- لا.. مستحيل... مش ممكن.

الأول اتيهألى إن دا صدى صوتى جاى من الصحرا!! لكن صحرة إيه دى ناس طالعه من الحوارى زى الفيران اللى طالعه مذعوره من الجحور.. ناس بجلايب وقمصان وينطلونات ونسوان طالعه بهدوم البيت وعيال بجلايب وبيجامات وكلهم يبجروا ويصرخوا:

- لا... مستحيل.. مش ممكن.

جريت عليهم واستخبيت فيهم وفضلنا نجرى ونصرخ وكل مانعدى على شارع جانبى ولا حاره يقابلونا ناس طالعين يجرؤا وينضموا لنا لحد ماوصلنا ميدان الجيش كان الميدان ترش فيه الملح ما ينزلش الأرض.. سمعت صوت جاي من ورايا ويقول عباره غريبه لبشت جتتى ورجعت أصرخ لا... مستحيل... مش ممكن الراجل بيقول: تاه الملاح والموج غدار يامراكبيه!

وسمعنا أصوات بتقول:

- على بيت الريس فى منشيه البكرى.

واندفعت الناس فى اتجاه العباسيه... كل بلكونات شارع العباسيه تقريباً كانت مليانه نسوان بتصوت وتلطم ورجاله بتصرخ بشكل هستيرى لكن بيقولوا عبارات مش مفهومه... مافيش جملة توحد الناس... كل واحد كان بيغنى على جرحه... ما فيش خنوه تجمع المصريين اللى طول عمرهم يغنوا! فى الفرح وفى السبوع وفى الموت وفى الحصاد وفى

الكنيسة والجامع وعلى زهور الركائب فى البر وعلى سطوح المراكب فى النيل وفجأه وبدأ يغنى بلادى بلادى.. غريبه! النشيد دا كان ممنوع أيام الثوره باعتبار إنه بيتكلم عن مصر ومصر تعيش أنت وبقي اسمها الجمهوريه العربيه المتحده!.. متحده مع مين؟ مش مهم.. المهم ان اسمها كده وبناء عليه اتولفت أناشيد جديده تناسب المقام من ماركة ياجمال يا مثال الوطنيه وناصر كلنا بنحبك. واحنا الشعب اخترناك من قلب الشعب وياجمال يا حبيب الملايين وحاجات مالهاش أول من آخر.. كل يوم تقريباً كنا بنسمع نشيد جديد من هذا النوع ويأويلك إذا جت مناسبه وطنيه.. تبص تلاقى الأناشيد نازله ترف وكأن واحد دلوقته زلط على دماغك وأنت حالط جلط.

المهم صاحبنا دا بدأ وإذ بالشارع والناس والبلكونات والشبابيك فى نفس واحد وكأنتك بتسمع فرقه كورال مدربه:

بلادى بلادى بلادى

لكى حبي وفؤادى

مصر يا أم البلاد

انتى غايتى والمراد

وعلى كل العباد

كم لنيلك من أيادى

يخرب عقلك ياسيد يادرويش.. دانت أتاريك بلوى مسيحه... بقى كل الأناشيد
الى انصرف عليها دم قلب مصر واللى جندوا لها جيوش من فحول الشعرا
والمملحناتيه واسطوانات المغنوياتيه.. كل ده يسقط فى لحظه ويضيع فى الزحام المجنون
وتطلع لى أنت من قلب المظاهره بعودك الكحيان وصوتك المشروخ الأجش:

مصر يا أرض النعيم

سدنى بالمجد القديم

مقصدى دفع الغريم

وعلى الله اعتمادى

بلادى بلادى بلادى

لك حبي.. وفؤادى

أيوه أيوه ياعم الشيخ سيد يابو قلب جنينه وريشه دهب... مدد ياموال الوجه
والحلم.. والموت والحيا.

مصر أنتى أغلى دره


فوق جبين الدهر غره

يابلاذى عيشى حره

واسلمى من كل عادى

بلادى بلادى بلادى

لكى حبي وفؤادى



ریشہ الفنان: بیہمتہ

وصلتني رساله بمتهى الوضوح وعرفت ليه أنت أقوى من الموت والزمن
مدد ياسيد يا اسكندرأتى مدد على طول المدد.

وصلنا مشارف منشىه البكرى وإذا بالمدافع المضاده للطيارات تلهب السما بسيل
من القذائف اللى كانت أصواتها بتزلزل الأرض.... لكن العجيب إن الناس ما
خافوش ووقفوا يقنوا... بلادى بلادى وبعد فتره انطلقنا نحجى فى اتجاه البلد واحنا
بتغنى والدنيا ضلمه لكن ونس... عمرى ما حسيت بالأمان والونس زى ما حسيتهم
وأنا باجربى فى الضلمه فى وسط ناس ما اعرفهمش فى الليله المرعبه ليله ١٠ يونيو
١٩٦٧.

إيه اللى حصل تانى يوم؟ ما تسألنيش.. أنا كنت نايم سطيحه وآخر حاجه شفتها
قبل ما أنام كانت المانشيت الرئيسى لجريده الأخبار- الشعب يقول لا! - غريبه! طب
ما الشعب كل يوم بيقول عشرين لا والسجون والمعتقلات مليانه ناس كل جريمتهم
إنهم قالوا لا... اشمعنى بقى اللادى هى اللى جت على معدتكو ونشروتوها، ونمت
وصحيت لقيت الرئيس جمال عبد الناصر رجع فى كلامه- تلييه لنداء الشعب-
وبقى رئيس من أول وجديد.. يعنى اللى فات مش محسوب!



الفا جومي

صاحب زوريا كشف الحرامى

أمل مصر

.. وزحفت على حوش آدم أفواج المثقفين
والفنانين.. جاعوا للفرجة علينا فكانوا فرجة أهل
الحى.
« الحمد لله خبطنا » كانت أول البلاغات الحرييه
التي طلعت من حوش آدم.
« الموسيقار اليونانى العظيم سأل: أمال فى الرجل
التي اسمه الشيخ إمام؟ »

بدأنا نسمع الحوادث بعد ما وصلوا العساكر الى انكتب لهم عمر جديد... كل الحوادث كانت بتأكد حاجه.. الضباط الكبار سابوا العساكر والضباط الصغيرين وهربوا وانفجر كبت الناس فى النكته.. سيل من النكت الحراقه ملا الشارع وعلى شرط بصوت على.. مع إن الصوت العالى فى الفتره من ١٩٥٣ إلى ١٩٦٧ كان عوره.

وأحياناً كان بعض الناس بيدفعوا حياتهم تمن لعلو الصوت وفيه نكتتين فى الموضوع ده أنا مش ممكن أنساهم.

النكته الأولى عن كلب جربان حاطط ديله بين وراكه وبيجربى بأقصى سرعه فى اتجاه الحدود الليبيه وعند نقطه الحدود قابله واحد صاحبه وسأله:

- على فين يا بوى؟

قال له:

- على ليبيا.

- حتعمل إيه فى ليبيا؟ عقد عمل؟

قال له:

- ابدأ ح أهوهو وراجع.

قال له:

- طب وبتجربى كده ليه؟

قال له:

- ح أهوهو على روحى.. سيبنى.

والنكته الثانيه على واحد لافف وشه بالشاش الطبي وقابل واحد صاحبه فسأله:

- إيه.. كفى الله الشر؟

قال له:

- أبدأ.. دا الدكتور فتح لى وشى تمانيه سنتى.

قال له:

- ليه؟.. خراج؟

قال له:

- لا خلع ضررس.

قال له:

- طب ليه الدكتور مافتحش بلك وخلع لك الضررس؟

قال له:

- وهو فيه حد يقدر يفتح بقه فى البلد دى؟

وفى أول خطاب لجمال عبدالناصر بعد العوده الحميده قال:

- الشعب بيقول إن فيه طبقات جديده وأنا مع الشعب.. الشعب بيطالب بالتغيير وأنا مع الشعب وبعدين قال بعلو صوته: سقطت دوله المخابرات!! واشتغل التسقيف.. نفس المسقفاتيه بتوع دولة المخابرات هما اللى بيسقفوا برضه عشان سقطت دولة المخابرات!!

قلت فى عقل بالى:

- خلاص بقى.. سقطت البراقع وبانت الوحوش على حقيقتها.. أنتوا اللى هزمتونا مش إسرائيل على رأى الإمام على يا أشباه الرجال ولا رجال.. وزى ما بيقولوا فى الروايات (شمرت عن ساعد الجد) وعلى الطلاق بالتلاته ما أعرف إن كان ساعد الجد ده هو اليمين ولا الشمال.. فشمرت الدراعين لتنين.



أول البلاغات الحرييه اللى طلعت من غرفه عمليات حوش آدم كانت قصيده -

الحمد لله خبطنا - اللي انتشرت زى النار فى الخطب لأنها كانت أول اشتباك بينى وبين السلطه وأول هجوم صريح وجرىء على عبدالناصر شخصياً وسبحان مغير الأحوال.. وأنا الحقيقه ما كنتش عايز أملا المذكرات قصايد لكن القصيده دى بالذات عملت معايا شويه ألعيب غريبه، أولها: كنا قاعدين بنلحن حاجه جديده وإذا بمجموعه.



عمال من مصنع الحديد والصلب داخلين علينا، وبعد التحية والسلامات والذي

منه طلع واحد منهم ورقه من جيبه وقال لي:

- الشعر ده بيتوزع سرّاً في المصنع، ولما قرّيته عجبني فجبته لعم الشيخ عثمان يلحنه.. فتحت الورقة وقرّيت لقيت «الحمد لله خبطنا» لكن فيها جزء زايد ما أعرفش مين اللي كتبه واكتشفت إن الجزء ده هو اللي أنا «ماكتبتوش» وكان لازم أكتبه عثمان القصيده تكمل، الجزء بيقول:

الحمد لله واهي ظا طط

والبيه حا طط

في كل حتته مدير ضابط

وإن شالله حمار

قلت له:

- اسمع يا إمام كده (ورحت قارى الجزء الزيادة وقلت له) إيه رأيك لو نحطه في القصيده؟

قال لي:

- طب دوقنى.

رحت قايلها كده:

الحمد لله خبطنا

تحت بطاطنا

يا محلا رجعه ظباطنا

من خط النار



يا أهل مصر المحمية

بالحراميه

الفول كثير والطعميه

والبر عمار



والعيشه معدن واهى ماشيه

آخر أشيا

مدام جنبه والحاشيه

بكروش.. وكتار



حقوقلى سينا وماسيناشى

ماتدوشناشى

ماستميت أوتويس ماشى

شاحنين أنفار



إيه يعنى لما يموت مليون

أو كل الكون

العمر أصلاً مش مضمون

والناس أعمار



إيه يعنى فى العقبه جرينا

ولا ف سينا

هي الهزيمة تنسيتا

إننا أحرار



إيه يعني شعب ف ليل ذله

ضايح كله

دا كفايه بس أما تقول له

إحنا الثوار



الحمد لله ولا حولا

مصر الدولة

غرقانه في الكذب علاوله

والشعب احتار



الحمد لله واهي ظاظت

واليه حاطط

في كل حته مدير ضابط

وان شالله حمار



وكفايه أسيادنا البعدا

عائشين سَعْدًا

بفضل ناس تملأ المعده

وتقول أشعار



أشعار تمجد وتماين

حتى الخاين

وان شا الله يخربها مداين

عبدالجبار

ماسوره صرف (غير صحي) انفجرت في حوش آدم غرقت البيت رقم ٢ بسيل
من المثقفين والأفنديه.. واتحول بيتنا التافه الحقير بين يوم وليله إلى مزار مقدس
ينحرق على بابه البخور، وتقام الشعائر والطقوس، وسبحان الذي يغير ولا يتغير!
كل الرموز الثقافيه والإعلاميه والفنيه أو أغلبها زحفت علينا تشوف وتسمع
وتندهش وتروّح.

إحنا كمان بدأنا نخرج من كفن النسيان والتجاهل ونسهر برأ البيت بدعوات
مانعرفش أصحابها، نتعشى ونغنى ونشرب عدم المؤاخذه الويسكى والفودكا والجن،
ونعفر أجود أنواع التبغ ونركب ذهابًا وإيابًا أفخر أنواع السيارات ونعاشر النساوين
اللى هى..

والله وباضت لك فى القفص يافؤاد يابن هانم وبقيت مرموق ومطلوب ومشار
إليك بالبنان.

أنا كنت باتفرج على الناس اللى جاين يتفرجوا علينا، وكنت باتفرج على التغيير
اللى طرأ على الشيخ إمام ومحمد على.. الشيخ إمام فى أول معرفتنا كان بيبقى قاعد
بيغنى وأول مايسمع صوت الأذان يسكت فجاء ويقلب العود على رجله ويتابع

المؤذن بصوت مسموع جملة جملة، وكان شديد الأدب والحرص على اختيار الألفاظ.. دلوقتي بعد ما داق الويسكى والمزه.. كان فى جرّه وخرج لبراً.. اتحول لشخص عدوانى وانفتحت ودانه لالتهام عبارات المديح خصوصاً من النسوان اللى كان بيعاملهم بجرأه غريبه أدهشتنى!!.. واللى أدهشنى أكثر إن النسوان ماكانوش بيزعلوا.. كانت وقاحه إمام بتسعدهم وتفرفشهم فيلنزقوا فيه ورجالتهم قاعدين فى منتهى الأهميه.. عمومًا النقلة النفسيه دى فجرت طاقات الإبداع جواً الشيخ إمام وأثخننا بأجمل وأروع ألحانه ع المحطه والحاوى وابن البلد وصبر أيوب ويعيش أهل بلدى ودور ياكلام على كيفك دور، ولما استشهد المناضل العظيم أرنستوشى جيفارا أبدع الشيخ إمام أعظم ألحانه على الإطلاق للمرثيه اللى كتبتها بدموعى لجيفارا العظيم، وبالناسبه لما مات عبدالناصر، ومن خلال الجنازه الشعبيه الرهييه فى شوارع وحوارى القاهره سطا أحد اللصوص على جملة من لحن مرثيه جيفارا وركب عليها كلام ومشيت الملايين تردد اللحن المنسوب للشخص اللص بينما مبدع اللحن الحقيقى الشيخ إمام قابع بين جدران زنزانه انفراديه فى معتقل القناطر الخيرييه على مرمى حجر من استراحه الرئيس!!

الكلام الأصلى اللى ركب عليه اللحن كان يقول:

ياشغالين

ومحرومين

يامسلسلين

رجلين وراس

والكلام اللى ركبه اللص على اللحن كان بيقول:

الوداع

ياجمال

يا حبيب الملايين

الأغرب من كده إن ملحن مشهور جداً كانوا مسمينه «أمل مصر» اشترى الجملة المسروقة من اللص، ولما حضر الموسيقار اليونانى العظيم ثيودراكس لتشييع جثمان صديقه عبدالناصر عزمه الملحن - أمل مصر - وسمعه اللحن على إنه من إبداعه وطلب منه توزيعه عالمياً و.. بعدما سمع اللحن عدة مرات سأل أmaal فين الراجل اللى اسمه الشيخ إمام؟! وباظ المشروع..!!



من المكاسب الشخصية الغالية اللى حصلت عليها من الحدودته دى كلها كان تعرفى على الفنان العظيم الراحل كمال خليفه.

أنا مابافهمش فى الفن التشكيلى.. ومش ح أفهم.. وقابلت كتير ناس أعلام فى الفن التشكيلى من أمثال جمال كامل والسجيني وعبدالهادى الجزار.. ناس لطاف قضيت فى صحبتهم وقت لطيف وخلاص.. لكن كمال خليفه هو اللى كلبش فى قلبى وفضل معايا على طول.. كان مصدر وعارف إن النهايه وشيكه.. لكن حبه للحياه والناس حوله لطفل متفائل مشع بالحب والدفا والحنان.. أنا من مصغرى أعرف أن السل مرض معدى والعياذ بالله.. ومع هذا كنت كل ما أقابل كمال خليفه أحتضنه بشده وأبوسه من بقه.. كنت عايز آخذ منه اللى جواه ولو متغمس بالسل، وإن عشنا نعيش سوا وإن متنا نموت سوا.. مره كنا سهرانين عنده وبعد ماسمع مرثية جيفارا سألنى ودموعه على خده:

- إنت شيوعى يا أحمد؟..

قلت له:

- أنا باحب الصبين..

قال لى:

- ومابتحبش مصر؟

مأعرفتش أرد عليه.. ومأعرفتش إيه اللي حصل ليلتها.. تانى يوم جهزت الرد
ولحنه الشيخ إمام واتصلت بكمال خليفه وقلت له:

- ألو أستاذ كمال.. انت عندك مواعيد الليله؟!

قال لى:

- أيوه.. ليه؟!

قلت له:

- أصل إحنا كنا جايين لك الليله.. عارف ليه؟!

قال لى:

- ليه؟!

قلت له:

- علشان أجاب على سؤال ليلة إمبراح.

قال لى:

- المواعيد اتلغت وأنا فى انتظاركم.



الفاجومي

التحريض برق ورعود وقبل

القول طبق فتنة!

■ قصيدة «بعد السلام والمرحبه» كانت ردى على

سؤال: انت شيوعى يا أحمد؟.

■ فتانين في زنازين على سطوح الزمالك.

■ على صنية بطاطس.. مناقشات ساخنة حول

أحكام عسكريه مضحكه.



استقبلنا كمال خليفه على باب شقته بابتسامته المعهوده ولكن المره دى كانت
الابتسامه أعرض وأجمل.

وعلى فكره كمال خليفه الوحيد اللى ما كانش ييقدم لنا الويسكى والفودكا
والجن والتبغ والنساوين، كل ما فى الأمر طبق الفته بالخل والتوم وسيد الطعام اللى
هو الهُبر... ومع هذا كنت بابقى طاير م الفرخ وإحنا زايحين له...

المهم لهفنا العشوه المتينه وبدأ إمام يدوزن العود.. وإذا بكمال خليفه وكأنه ييقرا
من دفتر الغيب بقول للحاضرين:

- أنا إمبراح سألت أحمد سؤال وهو حيـجـاوب دلوقتى... السؤال كان بيقول:
وما بتحبش مصر؟!

وبدأ الغنا...

بعد السلام والمرحبه

ياولاد بلدنا يا طيبين

نفرش كلام المصطبه

واضح لكل السامعين

مصر الحبيبه الطيبه

أم البنيه والبنين

إيش حال ولادها المخلصين

وسط العواصف مركبه

بين ريح شمال

وريح يمين
جابوا الطيب ابن الحلال
كشف ما خاف
وشاف وقال
أهل البصيره فى البلد
جواب لكل السائلين
قالوا البلد
عايزه ولد
ياخذ بتار المظلومين
ولد يعوض اللئى راح
ويعلافوق كل الجراح
ويمد إيده فى الضباب
يشد أنوار الصباح
ويسأل الشيخ إمام:
فيكم ولد يا سامعين؟
- نقول له أنا ومحمد على:
- أجدع ولد
يقول لنا:
- طب هو فين وهو مين؟
نقول له:


ابن البلد
نروح كلنا مع بعض قايلين:
يا بن البلد
يا بن البلد
الوقت وقتك يا ولد
يا قلب مصر ونبضها
يا بن البلد يا بن البلد
يسرى بطولها وعرضها
يا بن البلد يا بن البلد
يا قمحها
يا رمحها
يا صبحها
ياربحها
يا نور سماها وأرضها
آدى كلام المصطبه
يا ولاد بلدنا الطيبه
بعد السلام والمرحبه
واضح لكل السامعين

●●●

بعد التسقيف ساد صمت ثقيل وقام كمال خليفه خدنى فى حضنه الدافى
ووشوشنى:

- هو دا طريقك الوحيد... يا بن البلد...

●●●



من الأماكن التي رجلينا مشيت عليها سطح عماره في الزمالك مرصوصه فوقه
مجموعة غرف تفكر بالزنائرين، وكان ضمن نزلاء، هذه الزنازين النزيل جوده
خليفه والنزيل أحمد نور الدين.. الأول خريج كلية الفنون الجميله قسم الرسم

والتانى برضه خريج كليه الفنون الجميله لكن قسم التصوير، وفى ليله من ذات الليالي كنت سهران معاهم فسألنى جوده خليفه:

- انتو بكره عندكم ارتباطات؟

قلت له: لا

قال لى:

- فيه صينييه بطاطس باللحمه فى انتظاركو مع ماتيسر من الكيف والمزاج العالى.

قلت له:

- فين؟

قال لى:

- عند محمد جاد.

قلت له:

- مين محمد جاد؟

قال لى:

- إنت بديك أمك حتفتح لى سين وجيم.. فاضى ولا مش فاضى؟.. إنطق..

قلت له:

- فاضى.

قال لى:

- خلاص بكره آجى أخذكوا بتاكسى لغايه هناك.

وبكره جه جوده خليفه وخذنا بتاكسى لغايه هناك، وهناك دخلنا شقه أرضى حقيره المنظر والأثاث. واستقبلنا ع الباب شخص زنجى يفكر كى بالزناجره اللى بيطلعوا مع طرزان فى الأفلام ورحب بينا بشده وبلهجه ريفيه خشنه، وتقدمنا إلى

داخل الشقه فوجدنا كوكبه من الفنانين والمثقفين أذكر منهم حجازى الرسام وعدلى رزق الله الرسام برضه ومحى اللباد أيضاً، والأستاذ "ميم عين" الزعيم الناصرى العلم وكان أهم الحاضرين من وجهه نظرى أنا والشيخ إمام هو الأستاذ الحسينى المدرس، شخص حليوه عينه ملونه ويس... لكن يستمد أهميته من كونه ماسك قسم الطبخ والمزاج وبالمناسبة هو مش مدرس دا موظف فى وزاره التموين مع محمد جاد، لكن أنا أول ماشفته إدانى انطباع إنه مدرس فعاملته على هذا الأساس، وهو قبل يتعامل على أساس انه. الأستاذ الحسينى المدرس...

رقعنا العشوه المتينه وسلطنا الحناجر وبدأنا الشغل بالعزف الساحر: الشيخ إمام بالعود وحسن الموجى بالرق، ودخلنا فى موشع سيد درويش الخالد "يا شادى الألحان".

وكان رد الفعل مشجعاً فبدأنا نقول شغلنا وأثناء ما كنا بنقول أغنية شرم برم خرج محمد جاد عن جادة الوقار وسأل عدلى رزق الله:

- مين اللى كاتب الكلام ده؟!

فشاور له على، وفوجئت بمحمد جاد نازل على قصبة رجلى بخشبه وهو يقول لى:

- يا ابن الكلب يا حيوان.. أنت طلعت لهم منين؟

الضربه كانت قويه لكن الرساله وصلتني.. رساله الحب اللى ربط بينى وبين محمد جاد من يومها حتى كتابه هذه السطور..

محمد جاد فلاح من بركه السبع زحف مع النازحين إلى قاهرة المعز بحثاً عن مكان تحت الشمس.. مصرى الانتماء والثقافه.. مشحون بالحب والإعزاز والفخر بتاريخ مصر المحروسه وبأستاذه العظيم الراحل الدكتور حسين فوزى.. نبغ فى كتابة مقاله الصحفيه والقصه القصيره والرسم!!

ومع كل هذا فضل محمد جاد فى الظل بسبب خجله وعدم قدرته على الحديث

عن نفسه.. عمرى ما سمعته يقول أنا وإذا قال رأى فى أى مسأله ينسب الرأى ده لأساتذته حسين فوزى أو ذكى نجيب محمود أو سليم حسن عاشق مصر الفرعونه العظيم.. أنا عرفت من محمد جاد مين هو اخناتون أول الأنبياء وصاحب أول ثوره اجتماعيه فى تاريخ الإنسانيه، وعرفت منه ابن إياس المؤرخ الشعبى المصرى العظيم.. حاجات كتير علمهالى محمد جاد وهو لايدرى.. المهم إن الليله دى - ليله البطاطس والهبر - كانت بدايه لمرحله جديده فى مشوارنا الفنى أضيف فيها صوت قوى وواضح النبرات والانحياز للناس الغلابه ضد الظلم والقهر والجهل. وفى ذات ليله كنا سهرانين فى شقة العجوزه وكان الحدث الرئيسى اللى استحوذ على اهتمامات ومناقشات الحاضرين هو مظاهرات طلبة الجامعه اللى نزلوا الشارع لأول مره منذ عام ١٩٥٣ متظاهرين ضد ما سمي آنذاك بأحكام الطيران.

كانت المحكمه العسكريه العليا جداً انعقدت بناء على ضغط الرأى العام لمحاسبة المسئولين عن الهزيمه العسكريه المهيينه اللى سموها النكسه، وبعد جلسات ومداومات أصدرت المحكمه الموقره مجموعه من الأحكام المضحكه، فانفجر الغضب من الصدور، وكانت قمة الغضب هى نزول طلبة الجامعه إلى الشارع فى مظاهرات عارمه رددت مجموعه من الشعارات كان أخطرها وأوجعها..

- لا صدقى ولا الغول.. عبد الناصر المسئول..



الفاجومي

مبعوث حكومي بدرجت

نَاقَةُ الْأَدَبِ

■ رساله من رجاء النقاش.. يعني رساله من
الحكومة.

■ بعد زيارة رجاء لحوش آدم: أناح أسس حزب أسميه «حزب الشيخ إمام».

■ لماذا امتنع الشيخ إمام واعترض على عرض رجاء النقاش أن يظهر في برنامجه في التليفزيون.



نزلت قوات شعراوي جمعه المدربه «تدريب على» واستخدمت كل فنون
وأسلحه القتال ضد الطلبة الوطنيين العزل إلا من حبهم لمصر وغضبهم لشرفها..
وكما هي العاده سارعت الأقلام المشبوهه تتهم شباب مصر بالخيانة والعماله
عشان يقطعوا الطريق على أى قلم شريف يدافع عن الطلبة ويعرض وجهه نظرهم.
وكان محمد جاد هو الفنان المصرى الوحيد الذى قال رأيه فى المسأله ووقف
جنب شباب مصر فى أول تجربه شعريه يكتبها:

يام المطاهر

رشى الملح سبع مرات

ومع الزغروته احكى حدوته

تعلب فات

الا المطاهر شافها مظاهر

طب سكات وبايده شرح

بنيان وصرخ

وكتب ترخ

ما احناش بقرات

.....

وعند محمد جاد ليلة سهرة شقة العجوزه شفت عدلى رزق الله ومن ساعتها بقينا
صحاب.. ممكن مانشوفش بعض سنين طويله لكن أنا على طول باقى مستنيه.. هو
كمان يببقى عارف إنى مستنيه يروح جاى فجأه أروح أنا بمنتهى السنداله مسلم عليه

عادى وكأنا كنا مع بعض إمبراح.. هو كمان شكله أليط.. يعنى محمد على بس على بشواتى، والغريب إنى أقابل البرنس عدلى فى جحر محمد جاد الرب على الكائن بيدروم العجوزه اللى محمد جاد من باب المنجيه بيسميه «شقة العجوزه»!

وعدلى رزق الله مش برنس فى شكله وبس.. لأ دابرنس فى تصرفاته ماعندوش حاجه جهجهونى.. كل شىء عنده مترتب ومنتظم.. وتلاقيه كده بيتصرف على أقل من أقل من مهله.. ما يتكلمش عمال على بطل.. كلمه رطل وعشره رطل.. ويعرف ابن الحرام ينقى الكلمات اللى توصل لك هو عايز يقول لك إيه.. وبس.

يعنى بلا مؤاخذه ما بيسخنش زى حالاتى فى الكلام ولا بيتحمق ويروح فاقع له بقين زفرين وساعه الجذ يسحب جيزه ويهرش فى عرق الهيافه زى بعضهم.

ذات يوم جانى على ريق النوم فطرنا وشربنا الشاى والذى منه ولعبنا عشرين طاولة واحد وتلاتين ومش فاكر يومها مين غلب.

هو دايمًا يزعم إنه ما بيتغلبش طاولة ولو قلت له اللى بدعها اتغلب يقولك «أنا اللى غلبته» وأثناء ماوقف عشان ينزل قال لى وكأنه تذكر فجأه:

- أيوه صحيح.. أنا جايب لك رساله من رجاء النقاش.

كانت أيام بقى «الله لاعاد يعودها» كان رجاء النقاش زى ما بيقولوا - ملء السمع والبصر - تفتح راديو تلاقيه ، تفتح تليفزيون، تفتح كتاب تفتح جرنال، تفتح مجله تلاقى الأستاذ رجاء النقاش قاعد ومربع فى وسط الفطاحل من نجوم الشقافه والفن والإعلام.

أنا ربك والحق قلبى كان حيفظ من حلقى من شدة الفرح.. قلت فى عقل بالى:

- رجاء النقاش بجلالة قدره باعت لشخصى الضعيف رساله؟! ومع مين؟ مع البرنس عدلى رزق الله! كده يبقى تمام.. أصل رجاء النقاش يعنى الحكومه.. طلب الحكومه حبتعت لنا رساله ليه؟ لازم صوتنا وصل فوق ووصل بقوه واهم طالبين يعملوا معانا مفاوضات على غرار مفاوضات باريس اللى دخلوها الأمريكان

مجبزين مع ممثلى الفيت كونج.. جبهه تحرير فيتنام.

إذن هاهو المبعوث الشخصى بالباب ويطلب الإذن بالمشول.

- فليتفضل.

ورحت واخذ لك بوز شديد وتخيلت نفسى محاط بالصحفيين والعدسات عماله
تطلع شرار وقلت لعدلى بألاطه:

- رسالة إيه ياعزيزى؟.. أوجز أرجوك.

ضحك عدلى وجاب سيرة المرحومه أمى بشكل غير محترم وبعدين قال لى:

- هو عايز ييجى هنا.

قلت له:

- أهلاً بأى حد ييجى من طرفك.

قال لى:

- ولا وحياء أمك.. هو مش من طرفى.. أنا بلغتك الرسالة وانت حر تقبل أو

ترفض.. لكن ما ترجعش تقول دا عدلى هو اللى جابهولى.

كلام يخلى الفار يلعب فى عب الأسد، لكن ميول الاستعراض والمغامره
والفضول حسمت المسأله فقلت له:

- يتفضل وفوراً.

قال لى:

- فوراً إزاي؟ هو ف جيبى! أنا بكره ح أبلغه بموافقتك وآجى أقولك ع الموعد

اللى هو يحدده.

قلت له:

- ماشى.

وخلال يومين كان بيتنا الحقيق بيتشرف باستقبال الأستاذ رجاء النقاش وبمعيته
كوكبه من الصحفيين الشبان.

- أهلاً بالتلفزيون.

بدأنا نغنى وأنا عيني ع الضيف الكبير.. كان فى حاله ذهول تام، أنا اللى كنت
باختار الأغانى فقدمنا لهم وجبه حراقة من الأغانى والقصايد وكان ضمنها - حسب
المتبع - أغنيه «الحمد لله خبطنا» وبعد انتهاء البرنامج بدأت أرحب بالزائر العظيم،
ومرافقيه الغر الميامين، ونقلت لهم إحساسنا الغامر بالسعادة بمناسبة هذه الزياره
الميمونه لمنزلنا حقير الشأن والمنظر.. وانفتح خط المجاملات الحاره وتألق الشيخ إمام
كعاداته فى اختيار عبارات التكريم والمديح والثناء وفضل يكيل لحد ما غرق الضيوف
الكرام.

وقرر الأستاذ رجاء الدخول مباشره فى الموضوع وبدأ بالتعليق على ماحدث:

- دا شىء مدهش والله العظيم.. إزاي الفن العظيم ده تحجبه عن الناس؟!.. ثم
أدلى بالتصريح الخطير التالى:

- أنا ح أسس حزب وأسميه حزب الشيخ إمام، وح أكون من أعضائه.

ثم تساءل على استحياء:

- يا ترى تقبلونى يا شيخ إمام؟

وكان إمام لسه عايش الدور فتقمص روح طه حسين وقال بنفس صوت طه
حسين:

- بل انت مؤسسه وزعيمه إلى الأبد يا أستاذ رجاء وإليك يدى والله على ما نقول
شهيد.

قلت فى عقل بالى:

- يا ولاد الكاالب.. فى قعده واحده تأسسوا الحزب وتنتخبوا الرئيس وتبايعوه إلى الأبد!!!

وأخيراً وبلا مجاملات طلب الأستاذ رجاء إننا نظهر معاه فى التلفزيون من خلال برنامجه الأسبوعى «شريط تسجيل».

وفوجئنا جميعاً بالشيخ إمام يقول بمنتهى الجليطة:

- لا.. كله إلا التلفزيون.. أنا أربأ بنفسى وبفى أن يصل للناس من خلال التلفزيون.. قال تلفزيون قال.. لا ياسيدى يفتح الله.

وذهل رجاء النقاش من عنف رد فعل الرجل الفاضل المذهب المجامل صاحب الحزب اللى لسه متأسس وزى مايقولوا «أسقط فى يده».

هو ما أسقطش قوى لأنه تماسك وضحك وبدأ يستفسر عن أصل العداوه بين الشيخ والتلفزيون.


عايز الجد ولا ابن عمه؟ أنا عارف السبب ورأى إن رد فعل إمام كان طبيعى جداً لأن اللى عمله معانا التلفزيون مايتعملش.



إحنا من كام شهر كنا على وشك اقتحام مبنى التلفزيون شخصياً.. لكن ما نزل قدم عن قدم إلا بأمر الله.. ربنا ماكتبهناش ورجعنا قفانا يقمر عيش..

والعبارة إن السيدة عايدة شكرى المديعة الأولى فى إذاعة الشعب كانت فى زياره لبيت الشيخ عبدالسلام بدعوه من زميلتها المديعة الأولى فى البرنامج العام السيدة جمالات الزياى رحمه الله عليها.

وزى ما تقول إن سيرتنا جت فطلبت عايدة شكرى من جمالات شريط عليه أغانى الشيخ إمام، وتطوع الفتى الجميل جمال الموجى بتلبية رغبة الضيفه لقيناه جاي ويسألنا عن شريط ولحسن الحظ ما كانش فيه.. بصيت على إمام لقيته مبتسم بزهو لغايه دلوقتى مش عارف كان مصدره إيه؟



بريشة الفنان : بيشة

سألت جمال:

- انتوا اتغديتوا؟

فهم القصد فابتسم وقال لي:

- لسه .. وانتوا؟

قلت:

- برضه لسه.

قال لى:

- خلاص تاهت ولقيناها أنا ح آخذ العود واسبقكوا وانت تجيب مولانا وتيجوع البيت نتغدا مع بعض ولو مولانا مزاجه راق وحب يتكرم علينا بحاجه نبقى أسعد ناس فى الدنيا.

قلت له:

- طب ولو مولانا غَبَّ جامد فى الأكل ومزاجه اتعكر وما غناش؟

قال لى:

- يبقى كفايه علينا إننا حتنا نس بيكم.. هو دا شويه؟

قول سفحنا الغدوه المتينه والشهاده لله إن كميات البروتين اللى بلعها مولانا قصاد عيني تبشم وتسطل ثلاثين مجاور أزهرى على الأقل شرطاً يكونوا من بنى فجعان.

وبدأ الشيخ يرد الجميل فأبدع واتسلطن وغنى بشكل أدهش الحاضرين وخاصة عايدة شكرى اللى قالت كلام.. أنا اللى ما عنديش أى فكره عن الأدب ومشتقاته بدأت أخجل وخدودى تحمر ما أعرفش جابت الحمار منين؟ والحقيقه إن عايدة شكرى من الشخصيات اللى لو شفتها مره واحده ماتقدرش تنساها.. إنسانه مثقفه تقطر عذوبه وموده.. حتى صوتها.. منتهى الرقه إلى جانب أنها إنسانه ولوفه وبسيطه.

قول قبل ما تنتهى القعه كنا اتفقنا على إننا نعمل مجموعه من الشعارات الغنائيه ونهديها لإذاعه الشعب يحطوها فى الفقرات اللى بين البرامج الرئيسيه، وخدنا مهلة أسبوع، وحتكون هى سايه لنا خبر عند الأمن فى التلفزيون نروح نسجلهم ونرجع.

يقوم يشاء السميع العليم إنه يكرمنا بزياره ميمونه ومفاجأه من الزميل محمد جاد
فى نفس الليله وبمجرد ياخويا ما قلنا له ع الموضوع راح مطلع ورقه وقلم..! ابن
المجنونه فى خلال نص ساعه كان كاتب شعارين: واحد دفاعاً عن المرأه والثانى ضد
العنصريه.

ومسك إمام العود وهاتك يا تنجيد.. ما فتتش ساعه زمن إلا وكنا قاعدين نغنى
الشعارين، واتلموا علينا عيال الحاره بقيادة لبيبه بنت جارنا إبراهيم هاجه اللى نزلت
زغاريت طول ما احتا شغالين وبقت زفه.



الفا جومى

أنا وإمام والأستاذ هيكل
فى مجلس الأمن القومى

« على سلاطيم التليفزيون ضربونا ودا الجونا وحمدنا

الله أن العود لم يصب بسوء.

« ناقد فتى وجه سؤال لأجهزة الأمن: كيف تغفلون

عن نجم وإمام؟

« عضو بارز فى مجلس الأمن القومى قال عنا: «إنها

صرخة جوع.. وعلينا أن نقتلها بالتخمة».

أنا بيني وبينك دماغى ضرب (تانى) والغيره شعوطت صرمى رحت ماسك
الورق والقلم ونزلت لك حرت وقوام قوام خلصت أنا كمان شعارين وما حدش
أحسن من حد!

(الغربه) و(الأوله بلدى).

وراح إمام ابن العفارىت شايطهم فبقى رصيدنا أربع شعارات فى ليله واحده
بفضل جنان محمد جاد وزغاريت لبيبه بنت هاجه و.. عبقرية الشيخ إمام.

مجرد مانور الصبح شقشق نزلنا فطرنا الفول من عند فوزى العجيب، وسابنا
محمد جاد وروح وبقينا لوحدنا أنا والشيخ إمام.. وسألته:

- إنت حتنام؟

قال لى:

- لا .. وانت؟

قلت له:

- مش جاي لى نوم م الفرحة.

قال لى:

- طب هو احنا يعنى يعنى.. ما معناش اصطباحه؟

قلت له:

- ولا الوتكه.. انت إيه يا إمام.. ما بتشبعش؟

قال لى:

- يعنى انت بتشبع؟

قلت له:

- طب ماتيجي بينا تماشها افرنجي لغايه التلفزيون.. منها تنشيط ومنها نعمل
مفاجأه لعائده شكرى ونسجل لها الأربع شعارات ونيجي..



موشيه الفنان : بومس

وبعدين سألته:

- ولا انت تعبان؟

قال لي:

- دانت اللي تعبان.. أنا خرمان.

قلت له:

- على ما نروح ونيجي يكون خلق في قضاءه رحمه.. هيه؟ انت واد جامد؟

قال لي:

- أنا واد جامد قوي.. قوي جداً خالص.. ياللا بينا.

حطينا كتفنا في كتف بعض وفضلنا نتدألج لحد ما وصلنا ماسبيرو.. دخلنا ع
الأمّن أنجبجه وإمام معلق العود في دراعه الشمال.. صباح الخير.. ماحدش رد.. إمام
اتاخد.. خفت ليَقْفَل ويبوط المشوار.. قلت لبتاع الأمن:

- احنا عندنا معاد مع الأستاذة عايده شكرى.

بص لنا من فوق لتحت بمنتهى القرف وسأل إمام:

- إنت بتشتغل إيه؟

قال له:

- إنت شايف إيه؟

قال له:

- أنا شايف قدامى راجل كفيف وشايل عود.. تبقى انت يا إمه مطرب يا إمه

ملحن.

قال له:

- طب ما أنت نبیه أهه.

قال له:

- واللى معاك دا بيشتغل إيه؟

قال له:

- دا الأستاذ الشاعر أحمد فؤاد نجم.

ضحك وقال لى باستظراف:

- شاعر .. شاعر بإيه؟!!

راحوا ضاحكين وقال واحد منهم:

- شاعر بمغص.

وراحوا ضاحكين تانى.

قال لى:

- طب ماتشعر لنا شويه.

قلت له:

- أمك اسمها حنفى .. وأبوك عايش فى كنفى.

وعينك ماتشوف إلا النور .. أربعه شداد غلاظ بقوا يدألجونا على سالام
التليفزيون زى براميل الزيت، وإمام متأبد فى العود سلمه يبجى فوقه وسلمه يبجى
تحتة .. لكن ستر ربك خرج العود من التجربه صاغ سليم، وسمعنا من خلال
ضحكهم صوت جهورى بيقول لنا:

- ياللا يا زباله يا ولاد الكلب .. إياك تعتب هنا تانى انت وهو.

ولقيت الناس ملمومه بتتفرج زى عاده المصريين وصوت بيقول:

- هما عملوا إيه دول؟ ..

ورد عليه صوت تانى:

- لازم كانوا جاينين يغنوا بالعافيه..

أنا طلعت على بضحك، لكن فوجئت بالشيخ إمام متألم وحزين وحاسس
بالإهانة ودموعه نازله على خدوده.

قلت له:

- إنت زعلت؟

ماردش عليّ.

طبببت عليه وبسته وقلت له:

- جري إيه ياد يا خرع انت.. بقى شويه بقر زي دول يزعلوك برضه؟!

وبعدين وحياء العيش والملح وراس سيدنا الحسين.. لو عايز تخش المخروب ده
لأدخلك من أوسع الأبواب.

المهم - العود ماجرالوش حاجه، لكن الشيخ إمام هو اللي انشرخ، وفضلت
الحكاية دي مسيطره على مزاجه فتره طويله.

عرفت بقى إيه عبارته التلفزيون معانا وليه إمام هب في رجاء النقاش؟

قلت له في ودنه:

- هدّي اللعب وسيبني أتصرف.

وقلت للأستاذ رجاء:

- ماتزعلش م الشيخ إمام هو أصله ما بيعحبش التلفزيون لكن عشان عيونك
لازم يروح معاك.. وحیروح لوحده كمان..

قال لي:

- دا جميل جداً.

قالها وكأنه خرج من ورطه.. وثاني يوم جت عربيه خدت الشيخ إمام العصر

ورجعته الساعه عشره بالليل .. كانت السعاده طافحه على وشه .. سألته ..

- سجلتوا إيه؟

قال لي:

- سجلنا الغربه وعم السيد.

وقد حكى لنا إزاي اتلموا عليه في التلفزيون ورحبوا بيه وإزاي هو فكر يبصق على موظفين الأمن وهو خارج .. وكان سعيد جداً وهو بيحكى لي إن:

- الست شريفه فاضل قابله بالأحضان وطلبت منه يسمعها حاجه فقعد سمعها عشق الصبايا وطارت بيها في السما وطلبتها منه عشان تغنيها فوافق فوراً على اعتبار إننا روح واحده في جسدین!!



على إثر إذاعه برنامج شريط تسجيل وضحت الرؤيه .. مجموعه المكالمات التليفونيه وبعدها الرسائل اللي أنهالت على مبنى التلفزيون تسأل عن مين المغني الضربير اللي ظهر في البرنامج أكدت للمعنيين أن المسأله أكبر كتير من دماغ الساده كتاب التقارير السريه اللي كان رأيهم إننا شويه حشاشين جعائين وموتورين ونازلين شتيمة في الحكومه عمال على بطلان وإن مافيش لا فن ولا يحزنون، وإذا كان الأستاذ هيكل قال في اجتماع مجلس الأمن القومي - بعد كده - :


- هذه صرخه جوع، وسوف نقتلهما بالتخمه.

فالأستاذ سليمان جميل - حامى حمى الفن - قال على صفحات الأهرام الغراء في مقال بعنوان - المثقفون والشيخ إمام - إن الجماعه دول قاعدين يحششوا، ومن خلال الدخان الأزرق يقولوا الكلام الفارغ ده!!

وتساءل بمراره.. أين أجهزه الاتحاد الاشتراكي وأين أجهزه أمن الدوله!!

.. المهم .. تفتحت علينا شبابيك الدنيا الواسعه .. ونجح بعض الصحفيين في الوصول إلى مجاهل حوش آدم عياناً بياناً وفي وضع النهار .. بعضهم جه للرصد والنشر والبعض الآخر جه للفرجه والدهشه .. والبعض جه لكتابه التقارير.

وارتفع معدل الدعوات الخارجيه بصوره مذهله - فبقى اللي ييجي بدري هو اللي
يفوز بينا.. واتفرج يا فؤاد يا بن هانم وشوف الدنيا واغرق يا شيخ إمام في اللحوم
والأسماك والطيور اللي كنت بتسمع عنها في الحواديت..



الفاجومي

وكلما جاءوا للفرجة علينا
تفرجت أنا عليهم!

■ قالوا عنا خارج مصر: إنهم زمجرة الغضب الآتي.
■ محمود حسن إسماعيل قال لي: أنت شاعر..
فوقفت أمامه «زي الجحش»..
■ الظاهره الشيطانيه اللي برزت فجأة من تحت بيت
متها لك في حارة حوش آدم.

قبل ما نخش فى المجمعه الإعلاميه عايز أقول إن الصديقين فهمى حسين ومحمد حجبى وبمبادره شخصيه سبقوا العاصفه وزارونا فى حوش آدم عشان يكتبوا عننا مقاله فى مجله صباح الخير تحت عنوان "الحاره المصريه تغنى لجيفارا".

يومها استمتعت برسومات حجبى الجميله... رسم المكان بما فيه ومن فيه.

كان موجود فؤاد قاعود ومحمد على ومحمود اللبان والشيخ إمام وأنا... حسب رغبه حجبى فضلت أنا للآخر.. ولما قعدت قدامه عشان يرسمنى ماركتش زى عوايدى... فقال لى:

- يا أبنى أهد شويه خلىنى أعرف أرسمك دنا بارسمك بتحيز.

وكتب الأستاذ فهمى حسين عن المكان العجيب اللى طلع من أحشائه الصوت اللى غنى فى رثاء جيفارا العظيم ولما استعرض سكان المكان قال عن شخصي الضعيف- ومنهم الشاعر أحمد فؤاد نجم غزير الإنتاج الجيد قليل الحظ مع هذا فى فرص الذبوع والانتشار - أنا بس حبيت أسجل الوقعه دى عشان كل واحد ياخذ حقه.

نرجع لموال المجمعه الإعلاميه والشهره اللى هبطت علينا فى أعقاب الزياره الميمونه اللى كرمنا بيها الأستاذ رجاء النقاش وصحبته.

أصوات مختلطه صدرت عن كل قنوات الإعلام المرئى والمسموع والمقروء والرادار والأشعه فوق البنفسجيه.

كله بيتكلم عن الظاهره الشيطانيه اللى برزت فجأه من تحت أنقاض بيت متهالك فى حاره حوش آدم يحمل رقم ٢.

ناس كانت مع.. ناس كانت ضد ومحسوك آخر استهبال راسم العبط وعمال

أُتفرج على دول ودول.

كل رموز الثقافه والفن والإعلام تقريباً.. يا إما جم يتفرجوا علينا في حوش آدم يا
إما سحبتونا على أرضهم في السهرات الخاصه وكله كان بيتفرج وهو مدهوش
وعشان كده ما حدش فيهم خد باله مني وأنا باتفرج عليهم!
لكن على أي حال الأمر ما سلمش من مكاسب شخصيه عظيمه للعبد الفقير
مثلاً..

بعد حفله نقابه الصحفيين الأولى قال لي الأستاذ رجاء النقاش:

- دا محمود حسن إسماعيل معجب بيبك جداً وعازب يشوفك.

أنا ما صدقتش وداني.. قلت له:

- محمود حسن إسماعيل مين؟

قال لي:

- الشاعر.

وبدأت أكلم نفسي:

- محمود حسن إسماعيل معجب بي أنا؟ يا خرابي يا أمه.. شاعر النهر الخالد
العظيم اللي كنت مجرد ما أسمع اسمه بدني يتلبش وأحس كأنني واقف قدام
مقصوره سيدنا الحسين طالب الصفح والرضا!

أنا صحيح عمري ما شفته ولا في الصورة لأنه ما كانش من نجوم الإعلام لكن أنا
رسمت له صوره في خيالي.. فارس ملثم ومحتطى صهوة حصان عربي من نسل
الأدهم حصان عترة العباسي فارس الفرسان وقاهر الشجعان وكانت الصورة دي
بتبقى قدام عينا كل ما أسمع عبد الوهاب يغنى له:

نحن شعب عربي واحد

ضمه في حومة البعث طريق

الهدى والحق من أعلامه

وإباء الروح

والعهد الوثيق

أذن الفجر على أيامنا

وسرى فوق روايبها الشروق



قلت لرجاء:

- إنت بتشوفه يا أستاذ رجاء؟

ضحك وقال لى:

- أبوه وهو عايز يشوفك.

قلت له:

- إمتى؟

قال لى:

- زى ما تحب.

قلت له:

- أحب حالا.. دلوقتى.

قال لى:

- خلاص بكره نروح له المكتب

تانى يوم كنا عنده فى المكتب وما حدش يسألنى المكتب كان فىن؟

لأنى وأنا ماشى مع الأستاذ رجاء ما كنتش شايف السكه.. أنا كنت عمال أرسم فى عقل بالى صوره اللقاء.. وفجأه لقيتنى وجهاً لوجه مع شاعر النهر الخالد.

ما أقدرش أقول إن صورة الواقع كانت مطابقه لصوره الخيال.. فى الخيال كان ملثم فما شفتش ملامحه وكان راكب حصان فما قستش طوله وعرضه لكن هنا فى المكتب كان إنسان عادى شعره الكثيف المجدد الأبيض كان نايم على ورا ووشه النحاسى المصوص كأنه تمثال فرعونى اندفن فى طمى النيل وطلع اتحمص تحت شمس أسوان الملتيه.. أول ما بصيت فى وشه افكرت:

على صهد الأرض السمرا

وأنا أبوى النيل سوانى

ممصوص وخشن من بره

زى الطينه الأسوانى

والخضره في جلبى وجلبى

دائماً على طرف لسانى

فقت من سرحانى لقيتنى فى حضنه وهو بيردد جملة لسه مش فاهمها لغايه
دلوقتى.. كان بيقول:

- هذا شاعر يا أستاذ رجاء.. ناشدتك الله هذا شاعر.. كررها أكثر من مره وأنا
واقف زى الجحش مش فاهم حاجه.. لكن صوره اللقاء ده فضلت محفوره على
صفحة قلبى.. وجرى ما جرى ودخلت المعتقل وخرجت منه ودخلت تانى وخرجت
ثالث ودخلت رابع وهكذا إلى أن جاني خبر موت الشاعر الفارس محمود حسن
إسماعيل فى الغربه.. مات فى الكويت ياولداه! ما تعرفش كان هناك فى شيخوخته
بيعمل إيه؟ بيحسن دخله ولا هربان من الجحود والتجاهل والقهر اللى شافه هنا..
هنا فى مصر وعلى شط النهر اللى غناه و غنى له..

الغريب فى أمر محمود حسن إسماعيل إنه عاش فى وطنه غربه العصافير وهاجر
منه هجرة العصافير وفى المهجر مات موته العصافير.

انقطع التيار الكهربائى فجأه واتعطل جهاز التكيف.. وفرفر عصفور النيل
الأخضر ومات.. مات عطشان فى الصحرا!!

ما تقولش هو دمل وانفقع! يا سبحان الله.. كان فيه دا كله؟ هي مجرد إشارة
وصدرت عن أبصر مين.. ودول قالوا:
- خد عندك.

مطر مقالات ودراسات وريبوتاچات صحفيه نزل يرخ يرخ على قرعة بنت أخت
القراء العرب: بخصوص الثنائي اللي ظهر فجأه فى حوش آدم ناس قالوا علينا
ظاهره. وناس قالوا لا دا الرد الشعبي على الهزيمة العسكريه وناس سمونا
"الإرهاصه" وناس سمونا "المخاض" دا الكلام دا هنا فى مصر.. خد عندك بقى فى
الوطن العربى السعيد فى تونس والمغرب كان اسمنا- الشجب التحتى!- وفى سوريا
ولبنان كان اسمنا. صوت نغمه الجماهير- أما فى الشقيق العراق ودا اللي كان
عاجب الشيخ إمام جداً" فكان اسمنا زمجرة الغضب الآتى.

لأومين بقى اللي كتب؟ مثلاً.. الدكتور فؤاد زكريا رئيس تحرير مجله الفكر
المعاصر- آنذاك- والأستاذ محمود أمين العالم رئيس مجلس إداره دار أخبار اليوم-
آنذاك برضه- والدكتور حسن حنفى والدكتور لويس عوض والأستاذ كامل زهيرى
نقيب الصحفيين والأستاذ عبد الرحمن الخميسى والأستاذ محمود السعدنى والأستاذ
جلال السيد والأستاذ محمد تبارك وكله تقريباً كان.. آنذاك!

.. الوحيد اللي ما كنش - آنذاك- هو الفلاح الفصيح عمدة مصطبة الكلام وعم
المتكلمين وبر الأمان لأى فلاح فصيح شايف وخايف وعائز يفضفض بالكلام يقوم
يروح يرمى حموله على كتاف شيال الحمول وقطب الرجال، عبد الفتاح الجمل،
فلاح النيل الفصيح.

.. الراجل ده ما انجرش ف الزفه الأولانيه.. فضل ساكت لحد ما المراكب انحرقت
وكشروا لنا عن أنيابهم ولفقوا لنا قضيه المخدرات. راح كاتب عمود فى جريده
المساء اللي كان هو رئيس تحريرها يشد على إيدنا ويقول لنا أنا معاكم ومعايا كل
ولاد مصر الطيبين وييقول فى نهايه العمود- ياعمنا الشيخ إمام ويا فتى الفتيان نجم
أشد على أيديكما وأحى فيكما العناد.

تصدق بيايه إن العمود ده ونسنى - آنذاك - وكأنه كتيبه صوارىخ بتحمينا.. نرجع بقى للزفه الأولانيه.

آنذاك كانت مجله الكواكب فى مقدمه الموكب وحصلت على سبق صحفى عباره عن حفل ساهر حتنظمه فى نقابه الصحفيين للثنائى اللى ملا الدنيا وشغل الناس مع الاعتذار الشديد لعمنا المتنبى... وفعلا اتحدد موعد الحفله وكانت الدعوه عامه كمان قررت مجله الكواكب إقامه معرض لتمثيل الفنان التلقائى محمود اللبان بمبنى دار الهلال.

وحكايه تلقائيه محمود اللبان بدأت بعد محمد جاد ما رجله خدت ع الحته ويومياً عامل السكه قياسه، ورايح جاي الخط زى ترمای المديح وذات مره شاف محمود اللبان بيعمل لنا منقذ لزوم القعه... كان يجيب صفيحة السمته الثلاثه كيلو ويقصها نصين ياخذ النص ويجيب كوز سلمون مفتوح من الناحيتين ويركبه فوق ويثبته بالجبس يقوم بيقى مدخنه ويكسيها جبس م الجنبين فتبقى شبيهه بالضريح أبو مادنه وفتح لها هوايه من تحت تجبد الهوا على فوق يخلى الفحم آخر صهلله! قوم إنت يا عم محمد يا جاد انسطل وافضل برق فى المنقذ جبتين وروح صارخ فى وش محمود اللبان لبش جتته أكثر ما هى متلبشه:

- إيه ده؟ دافن تشكىلى!.. يخرّب بيت أبوك يا محمود يا ابن الكلب.. وقبل محمود ما يستوعب الصدمه كان محمد جاد ضارب إيده فى جيب السويتر الجلد البنى ومطلع جنيه - يدبح الفرخه - أيام ما كان الجنيه جنيه - وقال له:
- الصبح تعمل لى واحد زى ده..



الفاجومي

٥٠ جنيه عربون صداقة
من الحكومتين

■ تحول منزلنا إلى شبه إقامة دائمة لجموعه من
المنذيعين والمخرجين بإذاعة الشعب.
■ لويس عوض: نجم شجاع شجاعة مريبه.
■ وجدت في روايه ليوسف إدريس الحل لتبديد
الخوف من الحكومه.

$$\frac{1}{2} \left(\frac{1}{2} + \frac{1}{2} \right) = \frac{1}{2}$$

$$\frac{1}{2} \left(\frac{1}{2} + \frac{1}{2} \right) = \frac{1}{2}$$

$$\frac{1}{2} \left(\frac{1}{2} + \frac{1}{2} \right) = \frac{1}{2}$$

$$\frac{1}{2} \left(\frac{1}{2} + \frac{1}{2} \right) = \frac{1}{2}$$

$$\frac{1}{2} \left(\frac{1}{2} + \frac{1}{2} \right) = \frac{1}{2}$$

$$\frac{1}{2} \left(\frac{1}{2} + \frac{1}{2} \right) = \frac{1}{2}$$

$$\frac{1}{2} \left(\frac{1}{2} + \frac{1}{2} \right) = \frac{1}{2}$$

$$\frac{1}{2}$$

$$\frac{1}{2}$$

محمود اللبان فضل يبرِّق في وش محمد جاد بنوع من التوجس لأن محمود أساسًا ما يخافش في حياته إلا من حاجتين.. العسكري والمجنون! وصرخ محمد جاد تاني في وش محمود المرعوب:

- إنت بتبرِّق لى كده ليه؟ إنت مش مصدق إنك فنان تلقائي؟

وافتل محمود ضحكه يظمن بيها نفسه وبص للى قاعدين وقال:

- يا جدعان حوشوا الجدع ده عنى... دا ابن كلب صحيح.. إنت جاي تخرم دماغنا على آخر الزمن... فنان إيه ونيلة إيه؟ قال بعد ما شاب ودوه الكتَّاب.. يلعن أموات أمك..

وبرِّق محمد جاد في وش محمود اللبان وصرخ:

- إنت حمار.. شاب إيه وكتاب إيه؟.. إنت عارف نجيب محفوظ نشر وهو عنده كام سنه؟.. أربعين سنه يا حمار.. وعارف موزارت كتب أول كونشرتو وهو عنده كام سنه؟ تسع سنين يا طور.. وإنت قاعد لى هنا تبيع لبن زبادى؟!

وراح رامى له الجنيه فى حجره وقال له:

- امسك.. الصبح آجى الاقيك عامل لى واحد زى ده.. ودى كانت نهاية معمل الألبان البدائي.. تعلق المعلم محمود حسين عاشور الشهير فيما بعد بالفنان التلقائي محمود اللبان اللى اعترفت الأوساط الفنية فى مصر والوطن العربى بأصاله موهبته واتعاملت معاه الدوله على أساس إنه فنان متفرغ لعدده سنوات أقام خلالها مجموعه من المعارض الفنية الناجحه جدًا فى أرقى صالات العرض بالقاهره والأقاليم..

نيجى بقى لقنوات الإعلام المسموعه والمرئيّه..

أولاً إذاعه الشعب كان رئيسها آنذاك الفنان فاروق خورشيد بدأوا يذيعوا أغانيها

بشكل مكثف لدرجه إنى سمعت "چيفارا مات" وأنا ماشى فى الزمالك! وكلفونا
نعمل لهم شغل خاص بالإذاعة "محو الأميه" و"غناوى" وكتبت لهم ملحمة شعرية
عن غاندى محرر الهند العظيم.

وانحول منزلنا الحقيقى إلى شبه محل إقامة لمجموعه المذيعين والمخرجين بإذاعة
الشعب... سهير الحاراتى وعائده شكرى وعائده مرسى وعبد الفتاح الصبح
وإسماعيل العادلى والمرحوم عبد الرازق قنديل وسمير حسين ومدحت زكى..

كانوا فرحانين بينا قوى وكأنهم لاقين لقيه! معلوم... مجموعهم من الشباب
الوطنى مجروحين فى كرامتهم ويبدوروا على مخرج من أزمتهم اللى هى أزمه
الوطن المهزوم ويحكم وضعهم فى جهاز الإعلام شايقين الصورة قد إيه كئيبه
وسودا.. ليه بقى؟ ما هم بيقرؤا ويسمعوا كل الصحف والإذاعات المنوعه على
الشعب المصرى من دون شعوب العالم.. وكأنه غير معنى بالموضوع مع إن الخيبه
خيبته والقتيل قتيله والتار دين فى رقبتة هو لا غيره ولا سواه.. وجهاز الإعلام
المصرى اللى هما جزء منه قاعد يقول ما فيش هزيمة ولا حاجه.. دى مجرد إشاعه
لأن العدو الصهيونى الإمبريالى كان قصده يهزم الإراده ويغير القياده اللى هى
الرئيس عبد الناصر والحمد لله أهو قاعد.. تبقى فىن الهزيمة بقى؟!

وفجأتن يلاقوا اتنين أنيميا طالعين من شق فى قلب حاره يقولوا كلام مختلف
ويحطوا النقطه الحروف بجراه وصفها الدكتور لويس عوض لما قال:

- نجم ده شجاع شجاعه مريبه.

بيتهيالى والله أعلم إن ده كان مصدر دهشتهم وفرحهم بينا إحنا بقى وأنا
بالتحديد كان فرحى بيهم أشد.. ليه بقى؟

أنا حسبتهما مضبوط.. إزاي أنا ح أقولك.

إحنا دخلنا شمال فى دوله ومش أى دوله.. دي دوله بوليسيه عسكريه لها تراث
متراكم من انتهاكات حقوق الإنسان ومشهود لها بطول الباع فى البطش بالمعارضين

وسجلها حافل بجرائم التعذيب الوحشية وضحاياها ما يتعدوش ابتداء بفرج الله
الحلو اللى دويوه فى الأسيد وانتهاء بسيد قطب عالم الأدب اللى أعدموه عقاباً على
اختلافه معهم فى رأى من خلال كتاباته.. يعنى لا نجمهر ولا جاهر بالصباح!

طب إحنا حنروح فين فى دول؟ إحنا على رأى المثل: يا جحاح عد غنمك قال
واحد مكسحه وواحد عميا.. يبقى إحنا ضايعين ضايعين تراجع ما عدش ينفع..
طب والحل؟ الحل لقيتعه عند يوسف إدريس فى روايته العبقريه (البيضا).. البطل
عنده بيهرب فى الناس.. فى الزحمه.. يبقى إحنا محتاجين زحمه.. ونس يعنى..
وهما دول الونس..



ذات صباح جميل دخل علينا شاب أنيق ولايس نضاره طيبه وعرفنا بنفسه:

- أحمد الجبيلى.. مخرج بصوت العرب.

- أهلاً وسهلاً

إنسان مهذب جداً وشديد التواضع.. حاجه كده زى اللى بيسجى فى الكلمات
المتقاطعه يقولك: خمسه أفقى "خجول" من ثلاث حروف فيطلع حى.. قعد الراجل
سمع وأبدى إعجابه بأسلوب مهذب جداً وبعدين قال:

- أنا جاي من طرف الأستاذ عروق مدير صوت العرب.

قلت له:

- أهلاً وسهلاً وإزى الأستاذ عروق؟

قال لى:

- بخير الحمد لله ويسلم عليكو جداً وعايذ يقابلكو.

واندفع الشيخ إمام وقال له:

- إحنا ما بنقابلش الأشكال دى.

قلت له:

- لآ يا إمام الأستاذ عروق راجل شريف.



بريشة الفنان جيمية

قال لي:

ولما هو شريف بيشتغل معاهم ليه؟

قلت له:

- الراجل جالك لحد عندك والمثل بيقول من جاك دارك جاب الحق عليك..

وقلت للأستاذ الجبيلي:

- إحنا تحت أمر الأستاذ عروق ويتفضل يشرفنا فى أى وقت..

قال لى:

- دا هو منتظر كم فى مكتبه فى الوقت اللى تحدوده.

قلت له:

- ليكن بكره صباحاً بس لازم حد ييجى ياخدنا عشان الأمن بيميننا.

تانى يوم الصبح جالنا الأستاذ أحمد الجبيلي ودخلنا إلى مكتب الأستاذ عروق فى التلفزيون.. وإحنا داخلين من الباب قلت للشيخ إمام:

صبح ع الأمن يا إمام راح قايل بعلو صوته

- صباحكو خرا

وفى مكتب الاستاذ عروق لقينا الأستاذ رجاء النقاش! الراجل استقبلنا بحراره
وقال:

- إحنا عايزين نتعاون سوا وصوت العرب مفتوح لكل صوت شريف.. وكتب
لنا كل واحد شيك بخمسين جنيه وقال لنا بأدب شديد:

- دول هديه من صوت العرب.

خدنا الشيكين ونزلنا مع الأستاذ رجاء الى اقترح إن إحنا نقدم برنامج يومى
طوال شهر رمضان من صوت العرب اسمه- مع ألحان الشيخ إمام- ويقوم بتقديمه
الأستاذ رجاء شخصياً..

قلت له:

- بس أنا عندى شرط.

قال لى:

- اتفضل..

قلت له:

- تاخذوا العمل على بعضه أو تسيبوه على بعضه.. يعنى مفيش حذف ولا إضافة.

الراجل وافق وبدأنا نستعد للتسجيل ولحفله نقابه الصحفيين.

كان حسن الموجى خلع بعد فؤاد قاعود نتيجة الصراع بينه وبين محمد على على وظيفة الإيقاع، والكلام دا أنا عرفته من حسن الموجى لما رحت أجيبه عشان يحضر معانا الحفله والتسجيل، والغريب فى الأمر إن الشيخ إمام- عالم الموسيقى- كان بيزكى محمد على اللي مالوش أى علاقه بالموسيقى على حسن الموجى عازف الإيقاع المبدع اللي لا يقل بأى حال عن مستوى أكبر المحترفين!!

المهم.. رحت لحسن وبعد محاييله وطبطبه أفتعته وفتنا على فؤاد قاعود فى البيت وقلت رأيي اللي اتخلص فى إن الشجره أثمرت وإن كل من ساهم فى الزراعه والرى أصبح من حقه يجنى ثمرة مساهمته وإن إحنا فى النهايه أصدقاء ومافيش بيننا تناقض ولازم نبقى فى انصوره جنب بعض وقمنا من عند فؤاد ع الغوريه لقينا الشيخ إمام ومحمد على مش هناك وأثناء ما إحنا قاعدين سألني فؤاد قاعود: تفتكر رجاء النقاش حيوافق على وجودنا سوا؟

فقلت له بذهول:

- وإيه دخل رجاء النقاش فى كده؟

ضحك وقال لى:

- مش هو قائد المسيره..

قلت له:

- إنت عارف يا فؤاد إني ماليش قائد.. وإنت أدرى الناس..

الفاجومي

شاعر السلطنة الذي حبيته
وتابعه الذي كبيته!

- سرتعاهد على إخفائه رجاء النقاش وفؤاد قاعود.
- رساله من صلاح جاهين: أنا سعيد جداً بنجاحاتك.
- شاعر صعيدى: نجم أصله ييكتب شعر وحش.

وابتدا القلب البريء الخام يندهش.. ويضنيه البحث عن إجابات للأسئلة الصعبة التي بدأت تحاصره بالحاح... إيه.. فيه إيه؟ الناس بتكذب بمتتهى البساطه ليه؟ كل الناس خايفه من بعضها.. خايفين على إيه؟ والمدهش فى الأمر إن اللى إنت خايف منه.. هو نفسه خايف من شخص تانى.. والشخص التانى خايف من شخص ثالث.. وهكذا...

مين اللى مخوف الناس دى كلها؟ أكيد شخص قوى جداً ومايبخافش... طب تعالى كده نطلعها سلمه سلمه ابتداء من المواطن اللى خايف م المخبر اللى ببخاف م الطابط اللى خايف م المأمور.. حنوصل لأكبر كرسى فى القعده!

أنا لما كلمت رجاء النقاش بخصوص ضروره تواجد فؤاد قاعود معنا ما اعترضش وطلب منى أجيب فؤاد معايا ونقابله الصبح فى مكتبه بدار الهلال... وقد كان واستقبلنا الراجل بترحاب وشربنا القهوه عنده وبعدين قال لى:

- سيينا لوحدنا شويه.

فأنا قلت لفؤاد:

- أنا منتظرك فى الغوريه.

وخرجت فرحان ورحت بشرت الشيخ إمام بعوده لم الشمل زى زمان فقوجئت بعدم حماسه قلت له:

- إنت مش فرحان ليه؟

قال لى:

- يا أخى بطل الهبل دا بقى.. بقى بعد اللى اتعمل فيك دا كله.. حترجع تانى لعنب ديه..

- قلت له:

- يا سيدى أنا مسامح.

قال لى:

- بس أنا مش مسامح.

قلت له:

- فى إيه؟

قال لى:

- فى العشره جتية اللى سرقوها منى فى القطر.

ضحكت وقلت له:

- بقى أنا بأقولك حاول تتصور منظرنا واحنا كتيرع المسرح تقوللى قطر وترماى..

قال لى:

- لا معلىش وإذا كنت بتحبى بلاش الموضوع ده.

قلت له:

- طب وحسن الموجى؟

قال لى:

- حسن الموجى ييجى بس ما يتفلسفش على.

وقررت إنى أنفاهم مع فؤاد ونتفق على حل للموضوع ده لكن فؤاد ما جاش..
اختفى تانى.. إيه اللى دار بينه وبين رجاء النقاش؟ الله أعلم!!

عموماً لتنين على قيد الحياه ربنا يطول عمرهم.. يمكن ييجى يوم ويقولوا.. قول يارب..

وصلتنى رساله من صلاح چاهين بيقول فيها أنا سعيد جداً بنجاحاتك وبيقول فى نهايتها أتعشم أن تزورنى فى منزلى المتواضع بالزمالك!

الرساله دى جابها لى جمال الموجى ما أعرفش إزاي واختفت ما أعرفش إزاي
برضه!



برضه!

أنا عمري ما باحتفظ بحاجه لكن الرساله دى بالذات كنت عايز أحفظ بيها لأن صلاح جاهين بينى وبينه حاجه مش مفهومة. مش مجرد حب.. طب ما أنا باحب الدكتور حسين فوزى ومره أهدانى كتابه العظيم - سندباد المصرى - وكتب لى "إلى شاعرنا القومى من تعجب بلا تحفظات" وباحب يوسف إدريس بلدياتى ابن الشرقيه العبقري ومره أهدانى واحد من كتبه وكتب لى "إلى الفارس الذى تمنيت أن أكونه" والكتابين دول بالإهداءين اللى عليهم ضاعوا.. زى أى شيء عندى ممكن يضيع.. أيوه زعلت عليهم شويه لكن خلاص... أدى الله وأدى حكمته.. إلا رساله صلاح جاهين زعلان عليها إلى وقتنا هذا.. ماتعرفش إيه اللى بينى وبين الراجل ده.. إحنا مش كنا على خلاف وبس.. لا دانا دمي فى رقبتة لأنه هو كان فى السلطه وأنا معتقل بتهمة تأليف الشعر ومافتحش بقة.. لكن باحبه والمثل بيقول حبييك يلع لك الزلط.. وأنا بصراحه مش عارف باحب فيه إيه؟ شاعر.. طب ما الشعرا مالىين الأرض.. فيه واد شاعر المفروض إنه صعيدي لأن الصعايده جدعان بس دا مش جدع.. الواد ده فى أسبوع ما اعتقلونى سنه ١٩٦٩ طالع مع السفاح شعراوى جمعه فى التلفزيون ردًا على الحمله الإعلاميه المثاره فى الصحافه العربيه والأوربيه بتتدد باعتقالى وتطالب بالإفراج عنى شعراوى يقول له:

- آلى إحنا بنعتقل الشعراء؟

فيرد هو:

- كيف يافندم؟ طب ما أنا جاعد مع سيادتك أهه وطالعين فى التلفزيون سوا.

فيقول له مثلاً:

- وإيه آخر إبداعاتك يا..

فيقول له:

- حصيده لاذعه يا فندم بافضح فيها جشع أصحاب المخابر وبتوع الدجيح.

يقول له:

- شفت الديمقراطيه؟

يقول له:

- شفت يا فندم.

يقول له:

- قول لهم بقى..

يروح قايل لهم!!

وهو كان صديق لصديقى وزميل اعتقالى أحمد الخميسى ولما خرج أحمد وسابنى فى المعتقل قابل الواد ده وقال له من بال العتب:

- أنت بتهاجم نجم ليه وهو فى المعتقل؟

قال له:

- أصله بيكتب شعر وحش..

قال له:

- يعنى أفهم من كده إن الحكومه حابساه عشان شعره وحش؟

.. وغيره وغيره.. فؤاد حداد ما هو أشعر من نار على علم.. أحبه وأحترمه وأثامى فيه وأقول لشعراء الفصحى بالفم المليان:

- إنتو عندكم المتنبي ومحمود دوريش وإحنا عندنا فؤاد حداد.

فيه بعد كده حب؟ لكن صلاح جاهين كان مريبى لى خبل فى دماغى وجايب لى بعيد عنك مرض الانفصام الشخصى.. كنا بنبقى فى المعتقل وأهاجم كل شعراء السلطه وأجى عنده.. ما أقدرش! آخر مره رجع فيها من أمريكا بعد جراحه ناجحه فى الشريان التاجى وبعد ما قرينا الخبر فى "الأهرام" قال واحد من الطلبة المعتقلين:

- هو مش عايز يموت ليه؟

الكلمه وجعتنى .. بصيت له وقمت ..

دخلت زنزانتي وكتبت:

حمد الله ع السلامه

وسلامتك يا جميل

يا ريته كان فى قلبى

شريانك العليل

نفسى أكتب لك قصيده

زيك

مالهاش مثيل ..

.....

بعد ما كتبت القصيده ندهت على الطالب صاحب الكلمه اللى وجعتنى وقريتها
له .. فوجئت بدموعه نازله وراح واخذنى بالحضن وقال لى:
- أنا آسف يا ابو النجوم ..



الفاجومى

وعلى أرض الصحفيين سجلنا
هدفا فى مرمى الحكومة

■ فى حفلة نقابة الصحفيين لم نلتزم بالبرنامج.
■ سأل ضابط الكمين الشيخ إمام وزميله: رايح فين
يا راجل انت وهو؟.. قالوا له: واهنتا شايفين
رايحين فين؟
■ بعد ليلة «الندوة» بجارة الروم اتفرقت القعدة
من حوش آدم.

اللى حصل فى حفله نقابه الصحفيين شيء ما ينحكيش ولا يتوصفش.. أنا طول
عمرى أقرأ عبارته معينه وما افهمهاش.

يقولك المطرب الفلانى أو الملحن العلانى أو الممثل الترتانى قال بيبقى خايف
وجتته بعيد عن السامعين والحاضرين بتبقى متلبشه وبيبقى راكبه ستين عفريت قبل
ما يقدم عمل جديد للامؤاخذه جمهور!

كلهم بيقلولوا الحكايه دى من باب العياقه عشان لامؤاخذه الست المذيعه تمصمص
شفايفها وتلعب حواجبها من حيل الدهشه وتقول:

- الله (ولازم اللام بتاعه لفظ الجلاله تبقى رفع الفتله وكذلك الطاء والصاد وكل
حروف التفضيم والتضخيم فى لغتنا الجميله فتنتطق كده)

تبعاً تبعاً هو ذا الفنان الأسيل.. دائماً متتير وخايف إنه لا كدر الله العمل بتاعه
يسأت.

أنا مش فاهم بيقلولوا كده ليه؟!.. طب دا انت حتقابل ناسك اللى بتحبهم
ويحبوك.. فيه حد يخاف من لقّا الأحيه؟!



أنا من ساعه ما خرجنا من حوش آدم لغاية ماوصلنا مبنى نقابه الصحفيين وأنا
ريقى ناشف من الخوف... هو إحنا رايعيين نصطاد سمك؟

دا إحنا رايعيين نواجه الدوله بكل جبروتها وعلى ملعبها!

إحنا مجرد ما وصلنا باب مبنى النقابه مسكت الشيخ إمام من إيدته وشديته (لأول
 وآخر مره) بعنف عشان نستخبي فى الزحام الرهيب اللى كان بادى من الباب البرانى
ومتتهى على المنصه اللى ح نقعد عليها ونغنى.. حسيت بالدفا والأمان والقوه والعزم
الشديد.. الناس حلوه قوى يا جدع.. إيه الجمال دا كله؟ غابه حقيقته من الزنود
والسواعد السمرا مرفوعه حوالينا وكأنها بتحمينا وابتسامات صافيه وفرحه فى

العيون محاطانا من كل جانب.. إيه بقى اللي ممكن يخوفنا؟ نقلت الإحساس ده للشيخ إمام باللمس - لغتنا المشتركة دائماً لما بنبقى فى وسط الناس - لقيته انفرذ زى الوتر المشدود وبقى ماشي جنبى زى عود الزان لحد ما طلعنا المنصه بعد مجهود مضمنى بسبب الزحام فى القاعه.. وبعدها كل شيء اتبدد مع الخوف حتى البرنامج اللي كان موضبه الأستاذ رجاء النقاش بالنسبه للأغاني اللي حنقدها ما قدرتش ألترم بيه واتحولت المسأله إلى ما يطلبه المستمعون وكله خارج البرنامج حتى الطفله الجميله لميس رجاء النقاش اللي كان عمرها أقل من ستين طلبت "بقره حاحا" اللي كانت خارج البرنامج فقلناها..

المهم.. خلصت الحفله بهدف صاروخى سجلناه فى مرمى الحكومه بكل مؤسساتها الثقافيه والإعلاميه دون خسائر من جانبنا اللهم إلا إصابتي الأولى مست علاقتى بالأستاذ رجاء النقاش اللي اعتقد إنى خدعته لما خرجت على البرنامج أمام إلحاح ما يطلبه المستمعون. والتانيه انتهت علاقتنا الفنيه بحسن الموجى نهائياً بعد ما عمل حاجه غريبه جداً وغبيه جداً.

أنا قلت قبل كده إن إمام ومحمد على كانوا كارفين حسن الموجى وأنا كنت مصمم على وجوده لمصلحه الشغل.. يوم حفله نقابه الصحفيين الصبح رحت جبته من الشغل بالمحايله ورحنا الغوريه اصطبحننا وفهمت إمام إن حسن حيكون معنا فى الحفله فقبل على مضض.. لكن كان فيه مشكله وهى عدم وجود رق لحسن.. قلت له على رق جمال الموجى فرفض.. قلت لإمام يستقضى لنا رق من حد قال لى: "ما أعرفش" خدت حسن ونزلنا على شارع محمد على أجبرنا رق باتنين جنيه فى اليوم وسبت بطاقتى الشخصيه رهن عند الراجل.. بعد الحفله أدور على حسن الموجى فى سلقط فى ملقط.. فص ملح وداب..

تانى يوم رحت له الشغل وسألته عن سبب اختفائه قال لى: "روح.. كنت تعبان وروح" .. سألته عن الرق قال لى: "سبت ع المنصه بعد الحفله" قلت له:

- معقول ده يا حسن!

قال لي:

- اللي حصل

رحت لوحدي على شارع محمد علي وفهمت الرجل أن الرق انسرق وأنا
مستعد أدفع ثمنه وأخذ البطاقة قال لي:

- عشرين جنيه..

دورت في جيوبى ما لقيتش غير ستاشر جنيه الرجل عدهم وقال لي:

- إيه دول؟

قلت له:

- دول كل اللي معايا.

راح مفاجئني بقلمين سخنين طيروا الشرار من عنيا وقال لي:

- دول بقى يفوقوك ويبردوا نارى.

وراح رامى لى البطاقه ع الرصيف خدتها وطلعت أجرى وأنا عمال أقول:

- الله يخرب بيتك يا حسن يا موجى.. الله يخرب بيوتكو يا ولاد الكلب كلكو.



أكثر من مره الشيخ إمام يقوللى:

- دا فيه جماعه حباينا عايزين يشوفوك.

وبعدين يطنش.. إلى أن كان يوم ساعه صبحيه وكنت قاعد لوحدي وكان إمام
ومحمد نايمين.. سمعت صوت بينده من تحت:

- يا شيخ إمام.. يا أستاذ نجم.. يا أهل الله ياللى فوق.

قلت له اتفضل.. شويه ودخل على راجل مكفوف ، وعرفنى بنفسه:

- أخوك محمد عبيد.. اللى أنت مستكبر تيجى بيته..

قلت له:

- ليه بتقول كده؟

قال لى:

- هو الشيخ إمام مش بلغك؟

قلت له:

- جايز نسى.

قال لى:

- نسى ميت مره؟ والله لما يصحى لأملص ودانه.. عملت الشاى وقعدنا نشرب
وندردش لقيت نفسى أمام إنسان ذكى دمه خفيف وضارب الدنيا صرمه عن معرفه..
قال لى:

- إحنا يا سيدى كل يوم اتنين بالليل بيتلموا إخوانا المكفوفين عندى فى البيت
ونسهر صباحى وكلهم عايزين يشوفوك.

قلت له:

- طب إزاي؟

ضحك وقال لى:

- إنها لا تعمى الأبصار..

قلت له..

- صدق الله العظيم.

ويوم لتنين حطيت باطى فى باط الشيخ إمام وخدناها دألجه لحاره الروم..

●●●

بيت محمد عبيد «الندوه» ستاشر مكفوف بما فيهم محمد عبيد ومراته أم نهانى -

مكفوفه- فضلت أنا وتهانى اللى بتشوف طشاش.. إحنا المبصرين اللى فى الهلمه دى.. كانت ليله ممتعه فيهم حوالى سبعة بيعزفوا عود بشكل يخبل.. وكلهم بيغنوا وكلهم ييقفشوا وينكتوا وكلهم ييشغلوا فى القعه.. اللى ماسك إداره نار واللى بيعسل واللى بيعمل الشاى.. واحد فيهم بيدى باجور الجاز إيريه ومحمد عبید صاحب البيت خد عجله «سعد لاخرس» ونزل الغوريه جاب طلبات ورجع زى الجن ومحمد عبید ده نوادره ماتتعدش..

كان مره خارج هو والشيخ إمام من حاره الروم قابلهم كمين فى باب الغوريه سألهم الظابط:

- رايح فين يا راجل انت وهو؟

قال له:

- هو إحنا شافين؟

قال له:

- معاكو حشيش؟

قال له:

- معاك أنت؟

طلع الظابط دمه خفيف وضحك واداله حته تيجى ربع قرش.. مسكها محمد عبید وحطها على ودنه شويه وقال للظابط:

- دا حشيش حكومه.

قال له:

- إيش عرفك؟

قال له:

- شميتة..

قال له:

- إنت بتشم من وذك؟

قال له:

- وبشوف بقلبي.

.. المهم.. حوالى الساعه ثلاثه صباحًا قالوا عايزين نسمع تهانى بقى.. تهانى دى اللى أنا قلت لك بتشوف طشاش.. غنى يا تهانى.. وبدأت تهانى تغنى.

صوت هامس لازم تطرطق ودانك عشان تسمعه، ومجرد ما يدخل ودانك تضيع واسأل علاء الديب اللى انهطل من صوت تهانى وبقي ماشى يغنى على روحه.. «يا صجره ضلك عجبنى».

وبعد كده اتحولت القعده من حوش آدم النص راح على حاره الروم فى حضن صوت تهانى والنص الثانى راح على محمد حجازى الأخ الأصغر للشاعر الكبير أحمد عبد المعطى حجازى وبالمناصبه محمد حجازى كانت ودنه ألماظ وصوته شديد العذوبه وكان دايماً لما غزالتة تروق يغنى لنا أصعب ألحان الشيخ إمام:

قيدوا شمعاه يا أحيه ونورولى

رمشتين من رمش عين

وبيندهولى

من هنا سكة ملامه

من هنا سكة ندامه

سكتين ياللا السلامه

أمشى فين

يا ناس قولولى؟



الفاجومي

دوخـيـنـيـيـالـوـنـه

- انتهى شهر العسل مع الحكومة بانتهاء برنامج مع
- إحسان الشيخ إمام من صوت العرب.
- هي حفلة نقابة الصحفيين الثانية قلت لرجاء
- النقاش، إذا كنتم زعلائين أخذ الشيخ إمام وتنزل.
- مصر مليانة بالمواهب.. أرنبيه براويه مطرح
- مطروح بتولد.

بانتهاء شهر رمضان سنة ١٩٦٨ انتهى برنامج مع ألحان الشيخ إمام اللي كان
بيذاع من صوت العرب بتقديم الأستاذ رجاء النقاش وانتهى معاه أيضاً شهر العسل
مع الحكومه بعد ما اتضحت النوايا وبقي اللعب ع المكشوف.

سلسله من الأحداث والوقائع عملت تراكم وكان لابد من حدوث الاصطدام.
أولاً فوجئت بعملية تشويه متعمده أثناء إذاعه البرنامج من صوت العرب أحياناً
كانوا يذيعوا جزء من نص الأغنيه وأحياناً كانوا يذيعوا الجزء الأخير من الأغنيه ودا
كان مخالف لاتفاقي مع الأستاذ رجاء- يا تاخذو العمل على بعضه.. يا تتركوه على
بعضه- ولما سألت الأستاذ رجاء قال لي ماليش دعوه.. روح اسأل صوت العرب.

واقعه ثانيه كانت شديده الغرابه ولسه لغايه وقتنا هذا مندهش لها احنا كنا تقريباً
بنحبي حفله كل ليله وذات صباح جالنا واحد من طرف الأستاذ رجاء وقال لنا:
- ماتر تبطوش الليلا دي.

- ليه يا سيدى؟

قال لك:

- الأستاذ رجاء عامل حفله لعائلات العاملين فى دار الهلال.

- حاضر.

وبالليل رحنا دار الهلال نزلونا فى بدروم لقينا حوالى خمسين مرا بملايه لف
وكل مره معاها على الأقل ثلاث عيال يبصرخوا أحاول فى الميكرفون أتكلم معاهم
ودول أبداً وبعد حوالى ساعه من الصريخ والمحاييله لمحت الأستاذ رجاء واقف على
باب البدروم ومبتسم رحت له أشتكى له وفوجئت بيه بيقول لى:

- إنت مش فنان شعبى.. سكتهم لو تقدر.

وضحك ضحكه غريبه.. بذلت مجهود خرافي عشان أمتع نفسى من القىء فى
وش الأستاذ رجاء ونجحت - مع الأسف.

الفنان والإنسان الرقيق المرحوم عباس أحمد- مراقب عام التلفزيون - كان
يقدم برنامج اسمه- حياتنا الثقافية- خدنا الأستاذ رجاء ورحنا سجلنا معه حلقه
مدهشه على مدى ساعه هى مدة البرنامج. وكان موعد إذاعتها السبت القادم ويوم
السبت القادم فتح المرحوم عباس أحمد درج مكتبه وطلع الشريط فى الموعد ركبوه
وإذا بالشريط ممسوح!!!

ما اعرفش اتصرفوا إزاي وتانى يوم جالنا المرحوم عباس أحمد وهو بيكلم نفسه
ومكسوف جداً من اللى حصل.. قلت له- ولا يهملك يا عبس.. احنا مستعدين
نسجل لك أجدع منها.

وقد كان سجلنا له حلقه تانيه أذيعت السبت اللى بعده.

فى آواخر شهر العسل كنت قبل الغروب عند واحد صديقى فى دير الملاك وأثناء
عودتى ما اعرفش إيه اللى خلانى حودت على بيت الأستاذ سيد خميس وفوجئت
هناك بالشيخ إمام ومحمد على يلفطوا أو فطروا ويستعدوا للخروج وغلط محمد
على زى عوايده وقال لى:

- كويس إنك جيت عشان نمشى سوا.

قلت له.

- على فين؟

قال لى:

- على نقابه الصحفيين.. ماهى الحفله التانيه الليله.

وحسيت بالإرتباك اللى انتاب الشيخ إمام وسيد خميس.

سألت الشيخ إمام:

- انتوا اتفقتوا ع الحفله دى إمتى؟

قال لى:

- كل واحد حر.

تانى يا إمام؟ أول مره خليك فى حالك ودلوقتى كل واحد حر!

خرجت من بيت سيد خميس مش شايف قدامى.

يا ترى المره دى بعتنى بكام؟ يا صاحبى.

كنت ماشى أهلوس لغاية ما لقيت نفسى فى ميدان باب الحديد ولقيت تاكسى

فاضى ركبت وقلت له:

- نقابه الصحفيين.

ما عرفش كان مرقد ايه من الوقت لأنى دخلت النقابه وطلعت على قاعه

الاحتفالات لقيتها مليانه ولقيت محمد وإمام ع المسرح وإمام بيدوزن العود.. أول ما

دخلت القاعه فوجئت بعاصفه من التصفيق الحاد وقفت مطرعى وانحنيت للناس

حتى انتهى التصفيق رحت قازح ع المسرح فى خطوه واحده فانفجرت تانى عاصفه

من الضحك والتصفيق وسمعت صوت من الصف الأول بيقول:

- دا قرد مسلسل.. مش حيقدرُوا عليه.

وطيت على وذن إمام وسألته

- قلتوا إيه؟

قال لى وهو مرتبك.

- لسه.

روحت بابص عالقاعه لقيت فؤاد قاعود قاعد فى الصف الخامس مسكت

الميكروفون وقلت:

- فيه شاعر كبير قاعد في القاعة وهو الحقيقه مكانه هنا المسرح الأستاذ فؤاد
قاعود يتفضل.

الناس سقّفوا وطلع فؤاد وبدأ يلقي وجاني واحد من صبيان الأستاذ رجاء
النقاش وشوشني:

- الأستاذ رجاء عايزك جوا.

رحت معاه جوا في مكتب النقيب لقيت الأستاذ أحمد بهاء الدين - ربنا يرحمه -
النقيب السابق والأستاذ كامل زهيرى النقيب السابق والأستاذ رجاء النقاش اللي
سألني:

- مين اللي طلع الجدد ده ع المسرح؟

قلت له:

- أنا.

قال لى:

- ليه؟

قلت له:

- لأنه شاعر.

قال لى:

- دا موقوف تنظيمياً وممنوع م الكتابه.

قلت له:

- المسأله دى لا تعيننى وعموماً إذا كنتم زعلانين آخذ الشيخ إمام وننزل.

الأستاذ بهاء قال لى:

- خلاص يا أستاذ نجم ما تشغلش بالك واتفصل روح لجمهورك.

أثناء وجودنا فى الاستوديو لحضور تسجيل المطرب محمد رشدى لأغنية الغربه دخل علينا المدعو شفيق جلال وتجاهلنى تمامًا وسلم ع الشيخ إمام وقال له وهو باصص لى:

- ما تسيبك ياعم الشيخ م الكلام الفارغ اللى بتقوله ده وتعالى أوديك للأستاذ عبد الوهاب محمد يأكلك لقمه سمينه.. سمينه قوى وخرج المذكور!!

الغريب فى الأمر إنه فى نفس اليوم كنا راكبين عربيه الأستاذ رجاء النقاش ورايحين نوصل سيد خميس لبيته كنا ثلاثه.. الأستاذ رجاء النقاش وسيد خميس وأنا وفى ميدان باب الحديد وبدون مقدمات فوجئت بالأستاذ رجاء النقاش بيقول لى:

- أحب أقول لك.. مفيش وحده عضويه.. لازم تسيبوا بعض إنت تشوف لك ملحن وهو يشوف له شاعر.

وبعدين وكأنه تذكر قال:

- على فكره أنا اديت الشيخ إمام خمسين جنيه.. إداك نصيبك؟

قلت له:

- أيوه- وطبعًا دا ما حصلش.

ولما روحت قلت للشيخ إمام:

- رجاء سألنى عن الخمسين جنيه اللى اداهم لك وقلت له إنك إديتى نصيبى.

ارتبك شويه وقال لى:

دا هو قال لى إنه إداك زيهم

قلت له:

- طبعاً أنت صادق ولعلك تكون فهمت اللي هما عايزينه.. يا إمام إحنا حياتنا في التحامنا ببعض.

قال لي بمتهى البراءة:

- وهو ده اللي أنا حريص عليه!!

دوامه مرعبه من الأفكار السودا خدتني دوخيني بالمونه..

لوحدك بقيت يا بن هانم وإن ركنت حتركن على حيطه مايله.. ياللا أديك عملت اللي في دماغك ووحياة النبي ومن نبي النبي نبي لو علقوك في ميدان التحرير زى الديبحة وخدوا من لحمك كل يوم جرام ما يبقوا خدوا حقهم منك.. إنت عايز إيه تاني؟

فقت من أفكارى على صوت بينده من تحت:

- يا شيخ إمام.. يا نجم.

قلت:

- مين؟

قال لي:

- أنا أحمد بهجت.

قلت له:

- اتفضل

الساعة كانت حداشر صباحاً وما حدش صاحى فى البيت غيرى وصل أحمد بهجت الباب وقال لى:

- أنا جايب لك معايا شاعر عظيم (ودخل ووراه الساعى بتاعه لابس جلابيه حلق كنيف زفير وجزمه كوتش صوابعه طالعه منها) هما دخلوا وأنا فضلت مستنى ع الباب.. قال لى:

- ما تيجي.

قلت له:

- فين الشاعر العظيم؟

قال لي:

- ما هو ده الأستاذ أحمد الغندور.

دخلت لقيت الشاعر العظيم قاعد مقرفص ع الأرض فبدأت أتعامل معاه بألاطه... شاعر إيه ده؟... دنا كل يوم فى الجرايد والراديو والتلفزيون كافه شيء ناطق أو مكتوب واللى أكد لى الفرق الرهيب بينى وبين الشاعر المقرفص إنه كان بيكلمنى بمنتهى الاحترام حضرتك ويا أستاذ أحمد وأوقات... يا أستاذنا.. عايز إيه بقى؟ ورمت طبعاً وانتفخت على سنجة عشره.. دنا كويس إن ما فرقعتش فى وشه وبعدين البدله الفخفخينه اللى لابسهها أحمد بهجت مدمره منظر الغندور أبو جلابيه زفير حلق كنيف.. وجاى تقول لى شاعر عظيم! واستعديت عشان أقول له:

- قوم ياد اعمل لنا كبايتين شاي أنا وعمك الأستاذ أحمد..

راح أحمد بهجت قايل له:

- سمع عمك أحمد حاجه يا احمد.. سمعه الدرہ الصفرا..

وبداً صاحبنا فاكشفت من لهجته إنه شرقاوى لأنه بيقول الشعر بالفلاحي.. أما القصيده فبتحكى عن الدرہ الصفرا اللى كانت قبل سنه ١٩٥٢ علف طيور الفقرا لأن طيور الأغنيا يا إما بتاكل قمح يا إما بتاكل دره شامى بيضا.. تعالى النهارده وشوف الفلاحين بيقفوا طواير على شونه بنك التسليف في كل قريه وبياكلوا ضرب مخبرين بالخرزان عشان الواحد فيهم يطول كيله من الدرہ الصفرا يطحنها ويخبزها لعباله!!

رحنا نجيب الدرہ الصفرا.

وجفونا صفوف!

القصيده على بعضها أنا نسيته لكن اللي صعب يتنسى هو مطلعها:

سنين العزيز

رجعت ببجھطها المعروف

والفجر عم البلاد

وجوم يا يوسف شوف

صرخت من أحشائي:

- يا ابن ديك الكاالب.

ونزلت على ركي وزحفت وقعدت جنبه ع الأرض وأنا حاسس إنى فى حجم
حباية الدرہ الصفرا.

كان لازم يحصل لى كده عشان أخرج من الدوامه.. وخرجت حسيت إنى مش
لوحدى.. ياه! دا مصر مليانه.. أرنه براويه مطرح ما تروح تولد وتسبب عيالها
يكبروا فى الجحور لاحد يقدر يحصرهم ولا حد يقدر يسيطر عليهم.. أثارىكى ما
بتموتيش ياعجوزه يا صبيه! يا أم طرحه وجلابيه يا بنت الكلب.

فى حفله بيت الطلبة المغتربين وبدعوه من اتحاد الطلبة الأردنيين بالقاهره فوجئنا
بوجود الأستاذ عبد الوهاب محمد مؤلف الأغاني المشهور مدعو لإلقاء بعض
أشعاره.. أنا الحقيقه أهتميت إنى أسمع من باب الفضول- مش يمكن عنده أشعار
وطنيه؟.. طلع قال تسع قصايد عن ضفيره حببيته من أول شعر البطن لغايه ما بقت
أربعه متر والآخر اكتشف إن شعرها ذهب!

وبعد ما خلص أنا تصورت انه حبيجى يسلم علينا ففوجئت بيه بيقول
للحاضرين:

- ودلوقتى أنا بافضل لكم تقوموا تروحوا حفله الست أم كلثوم!
قلت له فوراً:

- إحنا معانا تذاكر ورايحين يا أستاذ عبد الوهاب استنى خدنا معاك .
وقبل ما يفكر يقبل أو يرفض كنت ع المسرح وماسك الميكروفون وباقول قصيده
- كلب الست- بس.. وخلاص.

طب مين اللي داعينا ومين اللي داعى الأستاذ عبد الوهاب؟
الحكاية دى فكرتني بحفله دار أخبار اليوم اللي كان رئيس مجلس إدارتها الأستاذ
محمود أمين العالم (ماكانش لسه بقى دكتور) واحد من رموز الحركة الشيوعية
العربية.

يدعينا فى حفله.. دا مفهوم.. إحنا بنغنى للعمال والفلاحين والصعايده وبنغنى
عن چیفارا وفيتنام وفلسطين.. لكن يدعى معانا الشيخ نصر الدين طوبار عشان يقول
تواشيح ومدائح نبويه؟.. دى مش تبقى فزوره! دماغى كان حيطر شق لحد ما
حجازى قال لى - دى اسمها لعبه التوازنات يا حمار.

كده ارتحت شويه ولو إنى لغاية وقتنا هذا مش فاهم يعنى إيه لعبه التوازنات..
لكن أدینی عرفت إن فيه حاجه اسمها كده وع العموم لاعور أحسن م لاعمى.

●●●

أما حفلة محمد جاد اللي عملها لنا فى بركة السبع فدي حدوته كانت حتنهى
بكارته- محمد جاد شخصياً كان حيروح فيها.. حيروح حيروح.. مش حيثجس
يعنى.. لآ دا كان حيروح مورته.. كان حيموت.. إزاي؟ أنا أقول لك.. راح لواحد
من تلامذته فى الاتحاد الاشتراكى العربى اسمه لطفى الحفناوى.. ولطفى ده جدع
طيب وخدم ورايح لاتحاد لاشتراكى عشان يخدم!! شخص أهبل يعنى.. قال له:

- واد يالطفى.. إيه رأيك زى ما عزمنا الأبندى نعزم أحمد فؤاد نجم والشيخ
إمام وانت اللي تعزمهم باسم أمانة بركة السبع.

قال له:

- قوى قوى.

يقوم يتفتق ذهن محمد جاد عن فكره جهنميه إنه بالمناسبه دى يفتتحوا مسرح
بركه السبع اللى مش موجود أصلاً! لكن عند محمد جاد مفيش مشكله هات ياد
بالطفى الفلوس اللى فى جيبيك.. طلع لطفى الفلوس اللى فى جيبيه وإنت ياد طلع
وإنت ياد طلع العيال كلها طلعت اتجمع فى إيد محمد جاد مبلغ مش بطل بعث
جاب خيش وخشب وراح على حته واسعه دق سدايب الخشب فى الأرض ومسمر
فيها الخيش بدل حيطه والسقف مش مهم علماً بأن الحفله كانت فى عز الشتاء وكنا
حنموت أنا وإمام م البرد..

عمك محمد جاد لزوم المنجيه بعث جاب كام عليه لاكمه فضى عشان يظبط
الشغل والمسرح يبقى لميع نسيوا يجيوا فرش له للدهان أو الفلوس خلصت مش مشكله
قوم إنت يا عم محمد جاد إدهن بإيديك.. وطبعاً محمد جاد زى حالاته ضوافره
دائماً طويله خش اللاكيه بين ضوافره ولحم صوابه ولبد تعالى يا نت يا عم لطفى يا
حفناوى تشجيعاً للأستاذ اللى بيشتغل بإيده خلى مراتك تعمل أنجر رز بلبن وخده
على موقع العمل وباللا يا أستاذ الغدا.

قعد الأستاذ بكلوه إيده حول نص أنجر الرز على معدته.. أتاى اللاكيه ده
سميات ما فيش خمس دقائق والمغص اشتغل فى مصارين أبو جاد زى ما يقولوا-
أعطى ساقيه للريح- على فين؟ ع المستشفى وهو بيجرى لقي واد راكب عجله راح
ناطط راكب قدامه وع المستشفى ياد بسرعه.

وفى المستشفى عملوا له غسيل معدة ونيموه على سرير نضيف بملايات بيضا بناء
على أوامر الطبيب اللى هو فى الأساس من تلاميذ أبو جاد. فاق محمد جاد من
الإغماء بعد ما شعر بزوال المغص ببص هو فين لقي ممرضة حسنة قاعدة جنبه وهو
رافل فى المفروشات البيضاء ففوجئت الممرضة بمحمد جاد بيهتف بعلو صوته:

- يعيش أحمد فؤاد نجم يعيش الشيخ إمام عيسى...

ولولا الطبيب كان أبو جاد اتكثف فى السرير وصبح تانى يوم اترحل ع الخانكة
بقميص الكتاف.



الفاجومي

الطريق إلى كمشيش

- قضيت شهرين راقداً في مستشفى المبره بمصر القديمة.
- خطبت «نعمه» أخت مرات واحد زارني بدون سابق معرفه.
- في كمشيش فوجئنا بأن وصولنا عمل زوجه من ردود الفعل المتباينه.



حوالى شهرين قضيتهم راقداً فى مستشفى المبره بمصر القديمه فى كنف ورعايه الدكتور رزق عبد المسيح اللى هجم ع البيت فى منتصف ذات ليله واختطفنى بعد ما تدهورت صحتى نتيجة للإهمال والضغط العصبى المستمر واحتجزنى فى المستشفى للعلاج بالقوه! - إذا لزم الأمر- لأن قرحة المعده اللى ظهرت أعراضها بشده بعد حفله الصحفيين الثانيه كانت بدأت تنزف وأنا لغايه دلوقتى مندهش إزاي وصل خبر مرضى للدكتور رزق!

المهم الشهرين دول حصلت فيهم حاجات كثيره..

فى المستشفى اتعرفت على الدكتور رزق عبد المسيح الشيعى القديم المحبط- بعد قرار القيادات بحل جميع التنظيمات السريه والعمل من خلال تنظيم الاتحاد الاشتراكى.

ومن خلال رزق عرفت إن الإحباط زى اللون متعدد الدرجات وردود الأفعال.. لأن رزق اللى حرمة قرار الحل من العمل الجماعى قدر يحافظ على التوازن النفسى بداخله واستمر يمارس العطاء من خلال مهنته كطبيب بشكل أدهشنى.. كان أول طبيب يدخل المستشفى صباحاً وآخر طبيب يخرج من المستشفى مساءً وكان بينه وبين مرضاه علاقه شديدة الحميميه (إذا جاز التعبير) كانوا طول الليل يتكلموا عن رزق وكان لما مريض يتعب فى العنبر بالليل ما يرضاش يخلى حد يسعفه لغاية ما ييجى الدكتور رزق الصبح!

الأهم من كده علاقه بالمرضين والتمرجيه..

كان بيصرع العنبر يوم الجمعة ساعة الزياره وأثناء فحصه لمريض شفت تمرجى بياخد فلوس من السزوار.. غمزته.. ضحك وغمزنى يعنى - شايف! - اندهشت من رد فعله. وفى مكتبه سألته:

- إنت شفت اللي حصل؟

قال لى:

أيوه

قلت له:

- وسبته ليه؟

قال لى:

- لأن أنا اللي قايل لهم يعملوا كدة!!

قلت له وأنا مذهول:

- إنت بتقسم معاهم بقى؟!

ضحك وقال لى:

- مش للدرجه دى... المسأله إنه حيسرق حيسرق.. مش لأنه غاوى يسرق لكن لأن مرتبه ما بيغطي ش احتياجاته فأنا اتفقت معاهم يبعدوا عن أدوية وغذاء المرضى وينموا مواردهم من نفحات الزوار اللي حولوها إلى نوع من الفرده! بمرور الوقت.

أيضاً كان فيه طبيب زميل لرزق فى الإحباط اسمه الدكتور عبد المنعم عبيد ودا كان حاطط همه فى القرايه.. كان كل يوم ييجى يشنف أسماعى بالقرايه فى مسرحيه الشرقاوى الحسين نائراً وشهيداً.

وعرفت كمان الدكتور صالح طبيب أمراض النساء العبشى خفيف الظل اللي كان دائماً يقول لى:

- أنا مش فاهم ليه إنت واجع قلبك بالسياسه؟! إنت راجل فنان والسياسه دى مهنة ما فيهاش أى فن.. دى مهنة الكذابين وقتالين القتلا!

مهنة الغايه تبرر الوسيله.

الراجل ده كان عاشق لمهنته وفضل يلح علىَّ عشان أحضر معاه عمليه ولاده

يمكن ربنا يهديني وأكتب اللحظة دي.. لحظه ميلاد الحياه اللي هي فى رأيه.. أروع لحظات الحياه.

عرفت كمان جلال.. جه زارنى ومعاه نعمه بدون سابق معرفه.. ارتحت لزيارته وحسيت إنه من بقيه أهلى. وتطورت علاقتنا وخطبت نعمه أخت مراته اللي هو مربيهها هي واخواتها.

جانى كمان بدون سابق معرفه ثلاثه زوار حيسقى لهم تأثير بعد كده فى حياتى وهم - الدكتور على الجنجيهى - سعيد عبد المعطى - طلعت السنجاى.

وبعد خروجى من المستشفى اكتشفت مجموعه من التغيرات طرأت على الشيخ إمام ومحمد على.. أولاً بدأ فؤاد قاعود يحضر كل الحفلات العامه اللي بيحييها الشيخ إمام كمتفرج! أنا شفته فى حفله كلية الحقوق بجامعة اسكندريه بعد ما ألح على طلعت السنجاى إنى اعتبرت ده مبادره مشكوره من فؤاد على طريق إعادته لم الشمل.

التغير الثانى كان مزعج بالنسبه لى لكن ما كانش مخوفنى واتعاملت معاه باستهانته شديده مش عارف ليه لغاية دلوقت؟

فى يوم خروجى من المستشفى لقيت شخص لبلاى بيدعى إنه شاعر وبينتهز أى فرصه عشان يأكد دعواه مثلاً فى استشهاد چيفارا كتب مطرزه فى رثاء الشهيد والمطرزات نوع من القصائد بيبدأ كل بيت منها بحرف من اسم الشخص المقصود بالقصيده حسب ترتيب الحروف فمثلاً الأخ ده كان كاتب فى چيفارا:

ج- الجيم جلد

ى- والياء يا سلام على دا ولد

القصد أنا لاح اكمل القصيده ولاح أقول اسم المتشاعر اللبلاى لأن دا شرف ما يستحقهوش (هو فقط معضوض فى شفته عضه رجالى واللى عضه قرص عليه فشرمه دا كل اللى أقدر أقوله عنه).

لقيت الشخص ده قاعد مع الشيخ إمام وجايب له كلام يلحنه على طريقه شفيق
جلال ويأريت الكلام دا بتاعه..لأ.. دا كان جايب قصايد لابن الفارض وابن
الفارض عندي له مكان جليل ما يقلش عن المتنبي وبيرم التونسي.

لكن ما أظنن إن المتشاعر الأشرم كان جايب كلامه للشيخ إمام يلحنه من باب
مجاملتي أو مشاركتي الإعجاب بسلطان العاشقين عمر بن الفارض.

إذن الجماعه مصممين على خطف الشيخ إمام وإعادة اكتشافه. وأنا مصمم على
عدم تسليمه لهم قبل تفرغه تمامًا من منجم الموسيقى اللي جواه وبعد كده ياخدوه
مبروك عليهم.

وزى ماتقول إن زهرى كان مطلق عليهم وحظى كان راكبهم وكان الإيقاع
السريع للأحداث فى تلك الأيام بيلعب لصالحى.

فبعد حادثه المتشاعر اللبلايى الأشرم بساعات جانى الدكتور على الجنجيهي
ومعاه مدحت مقلد واتفقوا معانا على السفر صباح باكر إلى كمشيش لإحياء حفل
ذكرى استشهاد صلاح حسين.

وكان الترتيب إن إحنا نروح الميعاد ع العنوان سألنا البواب عن الأستاذ مدحت
مقلد فقال لنا نزل الساعه ثمانيه سافر على كمشيش وفوجئت بأساير الشيخ إمام
بتهلل وهو بيقول:

- أحسن.. بركه يا جامع.

بتلفت عشان نرجع لقينا فى وشنا الدكتور على الجنجيهي !!

قلت له:

- إنت هنا بتعمل إيه؟

قال لى:

- أنا جاي آخذكم على كمشيش.

ركبنا عربيه بالنفر من موقف أحمد حلمي إلى كمشيش وفي الطريق حكى لى الدكتور على الموضوع (همسًا بناء على طلبى).

إمبارح عرف شعراوى جمعه بموضوع دعوتنا إلى كمشيش عن طريق شاعر مخبر فسأل شاهنده أرملة الشهيد صلاح حسين:

- إنتى صحيح عازمه نجم وإمام؟

قالت له:

- أيوه.

قال لها:

- مافيش داعى ولازم تسحبى الدعوه.

قالت له:

- ليه؟

قال لها:

- لأنهم.. لأنهم حشاشين.

قالت له:

- أنا مش ح أقدم لهم حشيش.

وانتهى الموضوع عند هذا الحد إمبارح.. لكن النهاده ما حدش عارف الموضوع وصل لفين؟

.. وصلنا كمشيش ففوجئنا بأن وصولنا عمل زوبعه من ردو الفعل المتباينه.. الطلبة اللى كانوا فى الاحتفال قابلونا بعاصفه من التصفيق والهتاف وترديد بعض أغانيها ومثلوا الحكومه قابلونا بالتجهم والارتباك الشديد لدرجة إنى سمعت واحد

بيقول:

- إيه اللي جاب دول؟

شاهنده فقط هي اللي جت استقبلتنا ورجبت بينا بينما اختفى الجميع بما فيهم مدحت.. لكن حيروح مني فين؟ سبت إمام ودخلت أدور عليه لقيت - لحش عريض القفا أحمر الخدين ومكرش زى اللي فى شهرها السابع ولا بس هدوم بيضا مشلبته يشرب من عليها العصفور ومشتبك مع مدحت - المرتبك - فى جدل عنيف انتهى بأن قال للحش لمدحت:

- دول لا يمكن يطلعوا ع المنصه.. التعليمات بتقول كده!

سألت يطلع مين اللش ده؟ قالولى دا أمين الفلاحين. أنا تصورت أن ده اسمه أتارى دى وظيفه.. أمين الفلاحين!

قلت له:

- يا أستاذ أمين.. يا أخى عيب داحنا ضيوفكم.. وانتو اللي داعيينا.

قال لى:

- أنا أعرفك متين يا جلع إنت؟ إبعد عنى ما تودنیش فى داهيه.

قلت له:

- طب وحياة أملك لطلع ع المنصه وابقى تعالى نزلنى.

وظا ط الحكاية وأوشك الحفل ع البوظان لولا إن مدحت مقلد طلع ع المنصه ومسك الميكروفون وحيا سفير كوبا لحضوره الحفل وقال:

- وبمناسبه تشریف السيد السفير فيه واحد فنان عامل أغنيه عن چیفارا وحيطلع

يقولها!!!!

ووطى على ودنى وقال لى:

- إعمل معروف چیفارا بس.

قلت له:

- ماتخافش.

ورحنا طالعين قايلين حرب الشعب وبعدين قلنا جيفارا مات.. وقلت للناس:

- إحنا حنغن في الغيط.. اللي عايز يسمع ييجي ورانا.

ونزلنا من ع المسرح ورانا اكتر من نص اللي في الحفله وقادنا أحد الفلاحين إلى قاعه واسعه في البيت قعدنا فيها واتلموا الناس حوالينا وهاتك يا غنا. يقوم ولاد الزواني بيعتوا ورانا غفر بعضيان يضربوا الناس بحجه تنظيم القعه!

شدت العصايه من واحد منهم قلت له:

- إنت مين قال لأمك تنظم؟.. عارف لو مديت إيدك على حد؟ ح اكسر العصايه دى على دماغك.

كان قاعد جنبنا- على كرسى طبعًا- ثلاثه ضباط مباحث.. بصيت لهم وضحكت فقال لى واحد منهم:

- إحنا تجار جلود.

قلت له:

- جلود بشريه طبعًا.

بصوا لبعض وضحكوا.

وانتهت حفله كمشيش بعد تصعيد المواجهه وبدأت أستعد لرد فعل السلطه بمزيج من الخوف والفرح.. الخوف كشعور إنسانى غريزى من بطش السلطان والفرح بانتصارى عليهم فى معركة الاحتفاظ بالشيخ إمام.

الكلام اللى اتكتب فينا واللى اتقال عنا يملأ قفف.. لكن أذكى الكلام كان اللى كتبه الأستاذ محمود السعدنى فى مجله صباح الخير تحت عنوان- أغانى هذا الرجل-

أنا مش ح أناقش رأييه فى الشيخ إمام لكن اللى يهمنى هو رأييه فى كلام الأغانى قال
بما معناه إن الكلمات تتناول أوجاع الناس بأسلوب لاذع بينما شعراء المؤسسه
يكتبون عن هجر احبيب وسهر الليالى وعد النجوم فى عز الضهر.

أما اللواء الطبيب الأستاذ محمد عبد الوهاب موسيقار الأجيال فقال فى صوت
العرب لما سأله:

- سمعت الشيخ إمام؟

قال:

- أنا ماليش دعوه بالكلام!!

وراح قايل رأييه فى صوت الشيخ إمام وبكده يبقى سيادته ارتكب خطأ فنى
جسيم لأنه افترض وجود أغنيه مافيهاش كلام.

عرفت بقى ليه، الأستاذ رجاء النقاش كان مسمى البرنامج "مع ألحان الشيخ
إمام"؟



الفاجومي

إيه اللي عاجبك فى البلد؟!

- فى مديرية أمن القاهرة.. سألت الشيخ إمام معاك حاجة؟ قال لي معايات حته تيجي نص قرش.
- قلت لمدير الأمن: إيه اللي عاجبك فى البلد؟
- فوجئت بدموع القاضى فانفجرت بالبكاء وأنا أنشد قصيدة «بقرة حاحا».

ضاق حلقه الحصار حوالينا واستحكمت واتحول الموضوع إلى شبه مطارده بوليسييه هدفها تفتيت الكيان الفنى المزيج اللى استعصى على الترغيب ودهب المعز.. ولقيت نفسى لوحدى فى حاله دفاع مستميت عن تماسك الكيان واستمراره.. أنا ما كنتش خايف من الحكومه لأن القطر كان فاتها وما بقتش تقدر تستفرد بينا بعد الناس ما عرفونا من خلال الإذاعه والتلفزيون والحفلات العامه والخاصه.. أنا خوفى كله كان من عباره كل واحد حر.. لذلك كنت باخاف التفت ليخطفوا المحروس فى غمضه عين لأنه هو مستعد يتخطف.. تصور يا مؤمن إنى أبأت ليله فى امبابه عند خطيبتى أرجع الصبح بدرى ألقى الشيخ إمام بيلحن إعلانات!! والمره دى ماجابوش مؤلف من برا.. لا دا واد كان جاى مع محمد جاد باعتباره طبال وقدمهولنا أبو جاد كده:

- شوف الواد ده إذا كان ينفع يطبل خدوه.

خدناه رغم إنه ما بيعرفش يطبل.. خدناه بس من وش محمد جاد وقعد معنا فى الغوريه أكل نايم شارب متنيل على عينه.. دخلت لقيت إمام ماسك العود ومحمد على ماسك الرق والواد ده قاعد نافش زى الديك الرومى وواحد سمت المفكرين.

إيه اللى انتوا بتقولوه ده؟

فوجئت بالواد ببصرخ فى وشى:

- سيبونا بقى ناخذ فرصتنا.. انتوا خدتوا فرصتكو.

بصيت على إمام لقيته مبتسم قلت له:

- كمل يا إمام كنت بتقول إيه؟

قال لى:

- دا إعلان حيعجبك قوى!!

قلت له:

- سمعنى.

فبدأ يغنى:

عبدالرحيم ياغول

يا مخترع يا مهول

سهران بتعمل إيه؟

فى المعمل المقفول

خلاصه الكلام.. فهمت إن ده إعلان عن سجائر فلوريدا.. وإن اللى كاتبه الواد اللى مانفعلش طبال واللى جاب الشغلانته واد من توابع رجاء النقاش. وقررت أنحنى للعاصفه زى ماييقولوا وأشتغل فى الخبائثه وبالليل كنا فى سهره فى بيت ورا دار الهلال فطلبت من إمام يغنى الإعلان فغناه وفوجئ الجميع بأننى شديد الإعجاب بالإعلان لدرجه إننى أضفت له جزء بعد ما صلحت الكسور والمطبات.. الجزء بيقول كختام للإعلان..

الفلوريدا

الفلوريدا

متعه أكيدته

أكيدته أكيدته

وميلّ الشيخ إمام على ودنى وقال هو شديد الابتسام:

- أيوه كدا يا أخى فكها بقى عشان ربنا يفكها.

وكسينا العود وقمنا.. هما راحوا ع الغوريه وأنا رحت على إمبابه.

• • •

باقول لك أنا زهرى مطلق عليهم وحظى كان راكبهم ودا كله بيركه دعا
الوالدين.. أنا بمجرد ما وصلت إمبابه حطولى اتعشيت وقالت لى نعمه:
- اقلع هدومك عشان تتغسل.

ولبستنى بنطلون وقميص بتوع جلال جوز اختها عشان أنام بيهم للصبح لأن
عدم المؤاخذه مافيش بيجامات.. جلال كان عنده بيجامتين زى أى مواطن مستور هو
كان نايم فى واحده والشاعر عبدالرحيم منصور كان نايم فى التانيه.. طلعت بهدوم
جلال نمت جنب عبدالرحيم منصور ما أعرفش كان فات قد إيه حسيت حد
بيصحينى من رجلى.. فتحت عنيه وألقى لك ييجى عشرين دماغ منتشرين فوقى
وبيصولى.

- إيه؟ فيه إيه؟ انتوا مين؟

ضحك واحد فيهم وقال لى

- صح النوم.

قلت له:

- انتو مين؟

قال لى:

- إحنا اللي بندور عليك يا حلاوه.

وبعد حوار سريع عرفت إنهم جاينين يقبضوا علىَّ وإن اللي جابهم لغايه إمبابه
هو محمد على اللي حاولوا يخبوه فى واحد من البوكسات لكن أنا شفته بالصدفه!!
القصد.. فتشونى ما أعرفش بحثًا عن إيه ولما مالقيوش معايا حاجه سألنى واحد
منهم:

- أمال هدومك فين؟

قلت له:

- ما أنا لابسها قدامك أهه.

وفوجئت بيهم بينزعوا جيوب البنطلون ويحرزوها.. أثارى دول شرطه مكافحه المخدرات! وطبعاً خدوا جيوب البنطلون عشان يبعثوها المعمل الجنائى لتحليلها ولو كنت لابس بنطلونى أنا كنت رحت فى الكازوزه لكن زى ما قلت لك زهرى كان مطلق عليهم وحظى كان راكبهم.



لما نزلنا من البيت اكتشفت ضخامه القوه اللى جايه تقبض على.. حاجه مهوله لدرجة إنى قلت للواء على الألفى رئيس الحمله:

- طب ما انتو تقدرؤا تحرروا سينا أهه.. آمال ساكتين ليه؟!

ضحك وقال لى:

- لسانك ده هو اللى جايب لك الكافيه.

وفى مديرية الأمن لقيت الشيخ إمام قاعد على كرسى خرزان فى البوفيه وحواليه مجموعه كبيره من الضباط الشباب وهو نازل قرايه قرآن وطيت على ودنه وقلت له:

- دانئت تلاقيك ختمت المصحف.

عرف صوتى ودا بان على ملامحه.. سألته همساً:

- معاك حاجه؟

قال لى:

- أيوه.

قلت له:

- معاك إيه؟

قال لى:

- معايا حتة تيجى نص قرش.

قلت له:

- طب اظرف.

قال لى:

- ما خدوها.

قلت له:

- طب انت ما كانش معاك حاجه.. فاهم؟

قال لى:

- يعنى أكذب؟

قلت له:

- لا العفو.. انت عارف احنا فى الدور الكام؟

قال لى:

- لأ.

قلت له:

- إحنا فى الدور الخامس وأقسم لك بشرفى لو فضلت سايق فى الاستعباط
وقلت إنهم خدوا من جييك حاجه لأحدفك م الشباك.

قال لى:

- لأ خلاص.. ماخدوش منى حاجه.

وفى مكتب اللواء على الألفى قعدنا والراجل بعث جاب لنا سندوتشات شامى
فول وطعميه وشاى بحليب وقال:

- اتفضل يا أستاذ نجم.. اتفضل يا شيخ إمام.

ورفض الشيخ إمام بإباء وشمم.. فسألته:

- انت مش عايز تاكل ليه؟

قال لى فى ودنى:

- ليكونوا حاطين فيها حاجه.

قلت له:

- أنا بقى عايز أموت.

وسفحت سائر السندوتشات وشربت لتنين شاي بحليب وفجأه دخل ظابط شاب وشوش اللوا على الألفى وخرج فاصطحبنى اللوا الألفى إلى مكتب مجاور لقيت السيد/ مدير أمن القاهره اللواء زكى علاج اللى استقبلنى كويس جداً وبعد ما خرج اللواء على الألفى قال لى:

- إيه بقى يا سيدى؟

قلت له:

- إيه إيه؟

قال لى:

- ماتروح التليفزيون ولا البوتاجاز ولا حتى تروح فى داهيه وتريح دماغنا.

بصيت فى عنيه لقيته مسطول وواصل لدرجه الهرىع.. قلت له:

- صباح الفل.

قال لى:

- مش باين.

قلت له:

- فيه إيه؟

قال لى:

- يرضيك برضه إن مجله ألمانيه تشتت الرئيس بسببك؟

قلت له:

- طب وأنا باعرف ألماني؟

قال لي:

- ألماني ولا طلياني.. انت إيه اللي مش عاجبك في البلد؟

قلت له:

- وانت إيه اللي عاجبك في البلد؟

قال لي:

- لا دانت باين عليك ابن مجنون وحتوديني في داهيه معاك سلامو عليكو.

وسابني في المكتب وخرج.

وأمام وكيل النيابة لقيت شخص حائط وشه في الورق وسألني:

- الحشيش دا بتاعك؟

بابص لقيت قدامه حته حشيش تيجي نص وقية.

قلت له:

- ياريت.

قال لي:

- إنت بتهزر؟

قلت له:

- وانت بتتكلم جد؟ وبعدين انت حائط وشك في الورق ليه؟ مش تديني وشك

عشاك أشوفك وانت بتزيف.. يا فرحه أمك بيك.

قال لى:

- إخرس.

قلت له:

- إخرس انت واخجل من نفسك وم اللى بتعمله.

ودخل علينا اللوا الألفى وخذنى من إيدى على مكتبه وطلب لى قهوه وحسيت
ان الراجل مش مرتاح للى بيعملوه معانا.



تانى يوم كنا أمام قاضى المعارضات بمبنى مجمع المحاكم ببولاق.. أول ما دخلنا
الطرقه اللى فيها قاعه المحكمه لقيت حوالى عشر أفراد من حوش آدم جايبين لنا
أكل وسجاير وتمنيات ودعوات طيبه.

دخلنا القاعه لقينا محامى متطوع اسمه الأستاذ أحمد فؤاد وبعد مرافعه سياسيه
كلها هجوم على بوليسيه النظام خرجنا برآ القاعه واحنا مكبلين بالحديد.. شويه
ولقيت الحاجب بينده:

- فين أحمد فؤاد نجم؟

قلت له:

- نعم.

قال للحرس:

- فكه.. سعادته القاضى عايزه.

فكو الحديد من إيدى ومشيت ورا الحاجب دخلنا ع القاضى قال للحاجب:

- اخرج واقفل الباب وراك.

خرج الحاجب وفوجئت بالقاضى يقول لى:

- سمعني بقره جاحا.

بصيت عليه لقيت قدامي وش مصرى.. شعر - ملح وفلفل - وسحنه نحاسيه
ووش بيضاوى جميل لايمكن أنساه.. وش يدك الإحساس بالألفه والأمان .. أنا
لغايه دلوقت ما أعرفش مين هو.. لكن هو عارف نفسه ولقيتنى بدون تردد بانشد
القصيده بكل ما فى داخلي من حزن وعشق وشجن.. فوجئت بدموع القاضى نازله
على خدوده فى صمت فانفجرت بالبكا وانا بانشد القصيده حتى انتهيت منها وبعد
لحظات صمت طلع من جيبه ورقه بعشره جنيه ومدهالى وهو يقول:

- أنا ح أفرج عنكم بكفاله عشرين جنيه.. وأنا أقدر أساهم بالمبلغ ده فقط.

قلت له:

- شكراً أنا معاى المبلغ.

قال لى:

- طب خد هات لى بدى شريط من تسجيلاتكم.

قلت له:

- احنا ما بنبعش شرايطنا.. أنا ح أجيب لك شريط هديه.

قال لى:

- طب أنا ح أفرج عنكم لكن هما مش حيسيبوكم.. خلوا بالكم.

قلت له:

- المفروض انتوا اللى تخلوا بالكم.



كان الخواجه جوبلز وزير دعاية النازي له عبارته شهيره هو رجل، وهى فضلت بعده وتحولت عند بعض الحكام إلى قانون أو برنامج عمل.. العبارة بتقول على لسان المرحوم جوبلز.. «كلما سمعت كلمته ثقافه تحسنت مسدسى».. وبمرور الأيام وتغير الأشخاص تحولت هذه العبارة فأصبحت بالنسبة لى «كلما سمعت كلمه ديمقراطيه تحسنت شيشى».

وإذا كان الخواجه جوبلز قد قال عبارته المذكوره من منطلق الكراهيه للثقافه والمثقفين فأنا - أعوذ بالله من قوله أنا - أقول عبارتى هذه حزنًا على الديمقراطية التى انتهكها العسكر والحكام المستبدون فى العالم الثالث حتى أصبحت هذه الكلمه تثير الرعب واليأس والإحباط عند سائر الشعوب المغلوبه على أمرها ونحن على مقدمتها على أرض مصر المحروسه ذات السبعه آلاف سنه حضاره وديمقراطيه!!

والمدحش فى الأمر أن أعداء الحياه هم أكثر الناس تشددًا بهذه الكلمه - الديمقراطية - وهل يستطيع المصريون مهما مضت الأيام والشهور والسنوات أن ينسوا صلاح نصر وحمزه البسيونى والصول صفوت والنبوى إسماعيل وحسن أبو باشا وعبدالعال سلومه وحسن المصيلحى، وباقى هذه السلسله الجهنميه من القتل والجلادين الذين أذاقوا الشعب المصرى كل ألوان الهوان بحجبه الدفاع عن الديمقراطية فى مصر المحروسه؟!

وهل تغزل حاكم فى التاريخ فى محاسن الديمقراطية مثلما فعل أنور السادات الذى ألقى القبض على كل مصر بقرار واحد ديمقراطى فى ٤ سبتمبر ١٩٨١ وفى ظل ديمقراطيه أنور السادات ذات الأنيا ب تم اعتقالى خمس مرآت وفى الموه السادسه قدمت للمحكمه العسكريه بتهمه تأليف الشعر!!

عرفت بقى سيادتلك أنا ليه كل ما بسمع كلمه ديمقراطيه بالتحسن شيشى!!



- عجبك كله؟
- لا طبعاً مش عاجبنى
- بذمه النبى.. ومش عيب؟
- عيب طبعاً.. وعيب جداً كمان.
- طب وآخرتها..؟
- قريب بإذن الله.
- يا ترى العالم يقول علينا إيه دلوقتي؟
- يقول بقى زى ما يقول.. هو احنا حنمك بقى العالم.
- وكان ليه من أصله!!
- اهو بقى
- أنت عارف أنا بتكلم عن مين؟
- لا والله.
- أمال بتوافقنى على إيه؟
- وح أعارضك ليه؟
- أيوه صحيح.. يعنى أنت..
- موافق على أى شىء يحصل فى هذا الكون.
- بس ده ماكانش موقفك.
- أهو بقى موقفى.
- ودا من إيه؟!
- خلقه ربنا.

- أيوه بس اللي حصل ده ما حصلش فى أى بلد فى العالم غير مصر.
- أديك قولتها بلسانك.. غير مصر وطبعًا مفيش أى بلد فى العالم زى مصر وخصوصًا اليومين دول.
- فى إيه بالظبط.
- فى أى حاجه واسأل وأنا أجابك.
- فى الرياضه مثلاً؟
- وهى مصر بقى فيها رياضه
- آمال بقى فيها إيه؟
- فيها اللي أنت شايفه ده.
- آه صحيح.. أنت عارف أنت كنت محموء على مين من شويه.
- على مين؟
- يا ابنى المنحوس منحوس من يومه.. وبعدين أنت عايز نتفوق فى الرياضه بأماره إيه؟
- بأماره حضاره سبع تلاف سنه زى ما بيقول المذيع فى التلفزيون.
- هو أنت لسه بتتفرج على التلفزيون؟
- طبعًا.
- خلاص يبقى البقيه فى حياتك.
- فى مين؟
- فى عقلك؟



1. The first part of the document discusses the importance of maintaining accurate records of all transactions and activities. It emphasizes the need for transparency and accountability in financial reporting.

2. The second part of the document outlines the various methods used to collect and analyze data. It includes a detailed description of the experimental procedures and the statistical techniques employed to interpret the results.

3. The third part of the document presents the findings of the study. It includes a series of tables and graphs that illustrate the data collected during the experiment. The results show a clear trend in the data, which is discussed in detail.

4. The fourth part of the document discusses the implications of the findings. It explores the potential applications of the research and the limitations of the study. It also provides recommendations for future research in this area.

5. The fifth part of the document is a conclusion. It summarizes the key points of the study and reiterates the importance of the findings. It also expresses the author's gratitude to the funding agency and the participants who made the study possible.

الفاجومي

أجراً عشراً قصائد

- ١- العنبره
- ٢- غزه في قلب العرب
- ٣- اصحي يا مصر
- ٤- شيد قصورك
- ٥- بيان هام
- ٦- بوتيكات
- ٧- القضيه
- ٨- ع اللي حاصل
- ٩- رجعوا التلامذه
- ١٠- البتاع

العنبره

عنبر
كله يسمع
شخشخت بالزهر
ما نصفنيش ولا مره
وراهنت بالمهر والبقشيش
على مره
والسجن للحر
وإن كان مُر
ولا مره
فكرني بالتوبه بالمره
بعد مساء الخير
على حراس الليل
كنجى برنجى وشنجى
كله لبط ولو منجى
بس البدله بتفرق
والعيب ع المخزنجى

الأوله للنبي
والثانيه أيوب
والثالثه غُربتي
والرابعه المكتوب
والخامسه اللي افترى
حتما بيان مغلوب

* * *

الأوله يا نبي
يا محرر الانسان
يا بلسم المبتلي
يا نجدة الغلبان
كرمت صنف البشر
عن طايفة الحيوان
ورفعت سيف المهدي
عالي على الطغيان
وغسلت أرض العرب
من بقعة الأوثان
وزعقت يا أمتي

في سائر الازمان
الظلم يوم لو هان
يحرم عليكى المطر
والفي والعمران
تسرح بحورك عطش
في الزرع والانسان
ويجري فيكي الحنش
وتحوم الغربان
ترمي الخراب ع الجبل
والسهل والوديان
والنور يغور م السما
ووجه القمر ما بيان
والشوق يضيع في العمى
والضلمه والأحزان
والخوف يطيح في البشر
من قسوة السجان
والناس تخاف بعضها
وتخوف السلطان

والثانيه

قلت أنا أيوب وأنا مثلين

أيوب ومهما ابتلى

أيوب يروح لي فين

أيوب صبر كام سنه

أيوب صبر له يومين

طلعت عليه القصص

واتنادى بالاسمين

عدوه من الأنبياء

والصالحين لاتنين

وأنا اللي صبري هنا

جوا اللومان صبرين

صبري على خطقتي

من عزوتي والبين

وصبري تاني

على حكم الزمان يا عين

النذل فينا حكم

والنذل حكمه شين

حكم البقرع البشر

بشريعة القرنين

وحق تربيته نبي

طه كحيل العين

هل البت يوم يتنصب

بدل الميزان اتنين

وانظر بعين الرضا

للعدل في الميزانين

* * *

والتالله عُرْبتي

في عالم الاندال

النذل فيه احتفى

والحر فيه انطال

والواطي لما اعتلى

أجر له كمام طبال

الشحط والبلطجي

واللص والمحتال

والكوديه لبست شنب

وانحزمت بعقال

ومين بحب النبي

سقفه كمان يا عيال

الرقص دار في البلد

عمال على بطل

واللحم لما انكشف

غطى على اللي اتقال

لا سمعنا صوت في النغم

ولا شعر في الموال

خنقوا الكلام في الغنا

والرنه في الخلخال

* * *

واحد

يا موحد الواحد

اتنين

يا جد الحسين

تلاته

يا سو الشماته

أربعة

يا حبر المطبعة

خمسة

يا عزمي يا حي

سته

يا بكره يا جي

سبعة

يا قلبي يا مايل

ثمانيه

يا شوق الزمايل

تسعه

يا دنيا يا واسعه

عشره

يا خاين يا حشره

أعرفكم جميعا

إن السجن سور

وأعرفكم جميعا

إن الفكره نور

وعمر السور ما يقدر

يحجز بنت حور

وعمر النور ما يعجز

يقزح الف سور

واعرفكم جميعا

إن الظلم شايع

واعرفكم جميعا

باب السجن شايع

واعرفكم جميعا

إن ملوهشي أكره

واعرفكم جميعا

إنه حيقى ذكرى

واعرفكم جميعا

إن الثوره فكره

وابشركم جميعا

إن الوعدہ بكره

والنور عندنا

وعندكم يا حبايب

* * *

غزه في قلب العرب

ناح الحمام في الدوح

دمع البنفسج

سال

والورد

مال مجروح

من شكة الموال

قال الحمام.. يا ليل

ويا عيني

ع اللي إتقال

مين يشتري الفيروز؟!

غزه.. مع الدلال

* * *

من فين يا شابه النسب

وينت مين في الناس؟

ومين في ناسك حسب

وعطاكي.. للنخاس

بحرين عيونك أسي
ساقين.. قلوب الناس
من فين يا شابه التسب
وبنت مين
في الناس؟!
قالت بلهجة عرب
غزه في قلب العرب
حره.. وأهلي عرب
خالص
وبنت حلال

* * *

ألا أونا بنت العرب
للبيع
ومين قال كام؟
سنيوره شبه القمر
مصنوعه.. للأحلام
يا حلال
على المقتدر

وع الغلابه حرام
دق الجرس بالعدد
واحد
ومين قال كام؟
البتت من بدعها
ومن قلبها
عشقت
ومن وجدها
سمع الوجود زلزال

* * *

لا يا عديم التنا
لا انت
ولا البايعين
سوق النخاسه جبر
والأهل بالملايين
أبويا بانني الحرم
وامي من القدسين
ومصر

فيها الهوى

والعزوه

في الشرقيين

حلفت بالمرحمه

والفارس اللي حمى

ما امشي

ورا الاندال

* * *

اصحى يا مصر

اصحى يا مصر

اصحى يا مصر

هزّ هلالك

هاتى النصر

كونى يا مصر وعيشى يا مصر

مدي ايديكي

وطولي العصر

واصحى وكونى وعيشى يا مصر

* * *

اصحى يا عامل مصر يا مجدّع

وافهم دورك

ف الورايدّه

مهما بتتعب

مهما بتصنع

تعبك رايح

"للحراميه"

جهدك عملك

رزق عيالك

عرقك مرقك

ولا يهنالك

اصحى يا عامل

غير حالك

صون المصنع

واصنع مصر

اصحى وكونى وعيشى يا مصر

* * *

اصحى يا زارع مصر الخصرأ

قدّره وخضره

ونور وجمال

ابدّر غيطك

واحمى البدّره

ضدّ الآفه

والاستغلال

أرضك عرّضك

باب الدار
صبحوا مدّاسه
للسمسار
نعطش
ولا نشرِشْ عَكَار
وصفه قالوا الحُكَمَا يا مصر
إضحى وكونى وعيشى يا مصر

* * *

اصحى يا جندى
يا تار الشهدا
عمى وخالك
اختى اخوك
لَجُلْ ما تهدأ وتارك يهدأ
فرَّغ نارك ف اللى خانوك
يابنى الشعب يا حامى الشعب
أنت املنا فى يوم الصَّعب
اصحى يا جندى ودُقْ الكعب
حرر مصر وطهر مصر
اصحى وكونى وعيشى يا مصر

* * *

شيد قصورك

شيد قصورك ع المزارع

من كدنا وعمل ايدينا

والخمارات جنب المصانع

والسجن مطرح الجنينه

واطلق كلابك

فى الشوارع

واقفل زنازينك

علينا

وقل نومنا فى المضاجع

آدى احنا نمنا ما اشتھينا

واتقل علينا بالمواقع

احنا اتوجعنا

واكتفينا

وعرفنا

مين سبب جراحنا

وَعَرَفْنَا رُوحَنَا

وَالْتَقَيْنَا

عَمَالَ وَفَلَاحِينَ

وَطَلَبَهُ

دَقَّتْ سَاعَتُنَا

وَابْتَدَيْنَا

نَسْلُكَ طَرِيقَ مَالِهَشِ رَاجِعِ

وَالنَّصْرَ قَرَبَ مِنْ عَيْنِنَا

النَّصْرَ أَقْرَبَ

مِنْ أَيْدِينَا

مَعْتَقِلُ الْقَنَاظِرِ ١٩٧٣

* * *

بيان هام

هنا شقلبان
محطة إذاعة حلاوة زمان
من القاهرة
ومن كردفان
وسائر بلاد العرب
واليابان
ومن فنزويلا
وأيضاً إيران
ومن أى دار
أو بلد مستباحه
بفعل السياحه
مع الأمريكان

* * *

هنا شقلبان
محطة إذاعة حلاوة زمان
نقدم إليكم بكل اللغات

مراسح وسيما وجميع الفنون

صحافه ومنابر

وتليفزيونات

وخطبا ف جوامع

وجبنه وزتون

ونقزح ونركب جميع الموجات

ونبحث ونفهم

فى كل الشئون

ودايما نلعلع فى كل الحالات

ولا حد سامع

ولا يحزنون

* * *

وتسمع ما تسمع

دا مايهمناش

لأن احنا أصلا

بناكل بلاش

فخليك فى نفسك

وما تخيلناش

نسلط عليك القلم

واللسان

* * *

هنا شقليبان

محطة إذاعة حلاوة زمان

يسر الإذاعة

وما يسركوش

بهذي المناسبة

وما بندعيكوش

نقدم إليكم

ولا تقرقوش

شحاته المعسل

بدون الرتوش

شبندر سماصرة بلاد العمار

معمر جراسن للعب القمار

وخارب مزارع

وتاجر خضار

وعقبال أملتك

أَمِيرَ الْجِيُوشِ
مَا تَقْدَرُشْ تَنْكَرْ
تَقُولُ مَا أَعْرِفُوشْ
مَا تَقْدَرُشْ أَيْضَا
تَقُولُ مَا أَسْمَعُوشْ
شَعَاتِهِ الْمَعْسَلِ
حَبِيبِ الْقُلُوبِ
يَزِيلُ الْبُقْعَ
وَالْهَمُومَ وَالْكُرُوبِ
يَأْنَفْسُ
يَأْفِينُ
يِيلِيعُ حُبُوبِ
وَيَفْضَلُ يَهْلِفُطِ
وَلَا تَفْهَمُوشْ
وَتَفْهَمُ مَا تَفْهَمُ
دَا مَا يَهْمُنَاشْ
لَأَنْ أَنْتَ فَاهِمُ
وَعَامِلُ طَنَاشْ

ح تنكر وتحلف

ح أقول لك بلاش

ح تتعب دماغنا

وتتعب كمان

* * *

هنا شقلبان

محطة إذاعة حلاوة زمان

لأن المخبي ظهر واستبان

وكل المسائل

بدت للعيان

وطلع حكاوى

ونزلت كمان

عن التهريبيه

وعن كيت وكان

وعن محسوبيه

وعن ألعبان

ظهر فى المدينه

كأنه الطوفان

وغرقَ مراكب
وسوح غيطان
وبعض المراكب
ح تغرق كمان
وأزمة مساكن
وأزمة أمان
وعالم بياكل
في عالم جعان
وريحة مؤامره
في جو المكان
مخطط خيانه
مع الأمريكان
لدبح العشيره
وحرق الجيران
وفيه ناس بترغى
ولازم بيان كما أبلغونا
جميع الودان
لهذا وذاك.. وتلكم كمان

نقدم إليكم

عروسه وحصان

شحاته المعسل

وهذا البيان

* * *

هنا شقليان

محطة إذاعة حلاوة زمان

بسم الله

سلام عليكم

وسلمون وموز

وأما المسائل

فَهَنَجَفْ وَلَوْز

فيا إخوتي

ويا أخوات

إليكم بياني

كما هو آت

* * *

جميع المسائل

تمام التمام
وكل الكلام دا مجرد كلام
فصبراً جميلاً
ولا تقلقوش
وشغل الضغائن
أنا ما اقبلوش
ما فيش أى حاجه
على الطلاق والعناق بالتلاته
وما فيه أى حاجه
وقدر كمان إن فيه أى حاجه
ما فيش أى حاجه
ما لوش أى لازمه الكلام
واللجاجة
وعيب إن عيل يسوق السماجه
ويعمل لى باللو
ويعمل ديباجه
أنا بطبعي ضد السماسره الكبار
بحكم المنافسه

وحكم الجوار
لكن مش ف طبعى
إنى أعمل فضيحة
لواحد زميلى
هبش كام صفيحه
ما كل الزمايل
بتهبش صفايح
وكل اللى جاى
ماشى زى اللى الرايح
فيا أيها الشعب
صهين تفلعص
مساء التنفس
مساء الروايح

* * *

أخويا الأمير بزرميپ الإيراني
بعث لى السنادى
عزمنى ودعانى
أنا قبلت طبعاً

ورحنا العزومه
وكانت وليمه
ما تحصلش تانى
دا إيه المحمر
وإيه المكمر
وإيه المشمر
وإيه الصوانى
أنا دماغى تعبت
ولفت صراحه
من الفخفخه
والهنا الأصفهانى
هناك يعنى مثلاً
إذا شربت طافيه
تمز بكوارع
وبسطره ضانى
ما شفتش هناك
ناس بتحقد عليهم
ولا ناس بتشتهم

فلان الفلاني
لأنه اشترى عزبتين
من شطارته
وحكمة إدارته
وطلع مباني
وبعد الوليمه استلمنا الهدايا
مفضض
ومذهب
وقزّ وقيشاني
وطبعا أخويا الأمير
قال لي حاجه
ح اقولها لكو طبعاً
إذا الوقت ناسب
ح يطلع لي عيّل
بدون أي حاجه
ويعمل لي فلحس
ويقعد يحاسب
دا حقد اشتراكي أنا ما اقبلوش

ولو هو ابني أنا ما اعتقوش

كلام عن سماسره

كلام عن دعاره

حاجات مش صحيحه

جُمْلَ مستعاره

وعايزين يخلوا البلد

أَرْدَغَانَه

وعايزيني اسيب البلد

من زمان

وانا مش ح اسلم

واسيب الأمانه

ولا بالبوليس والنيابه كمان

فيا أيها الشعب

كَمِّلْ جميلك

وصبراً

والزم حتيجي المصارى

وتأكل وتشرب

تبع ما يآتيلك

وتغرق في بحر العبيد والجواري

وترسم حياتك

حسب ما يرائيك

وتملا الجواري

فساقى وقصارى

تسبح بحمدك

وتشكر جميلك

بفضل الزباله

وطفح المجارى

ختاما سلاما

وآخر كلاما

ضرورا

يسود الهدوء والوثاما

فماذا وإلا

ح طريقهاواللا

واهرب فلوسى

واسافر قواما

سلام عليكم

وسلمون وموز

بصفتي رئيسا

وأباً

وجوز

القاهرة/ ١٩٧٦

* * *

بوتيكات

بوتيكات النّات كوا النّات
وشقق مفروشه وعمولات
يا حلاه النّاوه كوا النّاوه
يا بلدنا يا آخر فتاكات
بوتيكات النّات كوا النّات
شبيك لبيك فتح مخك
ليبك شبيك غمض عينك
حتقفل مخك ح نطخك
ونلوشك لو تفتح عينك
ركب قرنين تركب مازدا
وتعيش سلطان في البرواز دا
مش عاجبك فالجبته الفازده
والعيش والقول والكرات
يا حلاوه النّاوه كوا النّاوه
يا بلدنا يا آخر فتاكات
بوتيكات النّات كوا النّات

* * *

مين فيكو ما يعرفش عليوه
شيال المينا الكحيان
فى ثوانى اتمول واتحول
بقى مسيو عليوه عليان
إزاي؟

ما هى بوظه ومفتوحه
على حس ولاد المفضوحه
وأرانب صاحيه ومدبوحه
تتأستك تبع البنوكات
يا حلاوه الناوه كوا الناوه
يا بلدنا يا آخر فتاكات
بوتيكاات النات كوا النات
حتقول لى الفقرا ومشاكلهم
دى مسائل عايزة التفانين
وأنا رأيى نحلها ريانى
ونموت كل الجعانين
وبهذا ما حدش ح يجوع
لو نعلن هذا المشروع
وح نقفل هذا الموضوع

نهائياً

ونعيش في تبات

يا حلاوة الناوه كوا الناوه

يا بلدنا يا آخر فتكات

بوتيكات النات كوا النات

سجن الاستئناف ١٩٨١

* * *

القضية

الحكاية والرواية

والقضية

والجناية

والفانلة فى الجونله

والمخده فى الملايه

والإدارة بالشطاره

والخساره

ع التكايا

والأمين مهلباتى

والأمانه مهلبايه

والصحافه مهلبيه

والإذاعه يا ضنايا

ألف ليلة وليلة

تنذب

ع الهوا

وتقول هويا

والمشايخ

كل شايخ

فى الفساد

يهدى الهدايه

والقناعه للجواعى

والبضاعه للهبايا!

والبوليس

فى اليغمه طايح

بالطبنجه والعصايه

ديب غريب

من غير كمامه

يهبش التوب والعبايه

والقضيه يا قُضايَا

بالمكايد والوشايه

دبروها

وفصلوها

بالمقاس

لبست قفايا

والعداله بالتداله

عطلوها

وهيّ جايه

والحكايه

والروايه

والقضيه

والجنايه

الحكايه عايزه قعده

والكلام

ما لوش نهايه

* * *

الحكايه إن البلد

مش ملك ناسها

والخلايق في البلد

مش مالكة راسها

والبلد يا ولاد بلدنا

مش عليه

البلد

علتها جايه

من خرسها

* * *

شوف يا صاحبي

ما انت شايف كل حاجه

بس خايف

الحقيقه بنت كلمه

والكلام لازم يدور

سندباد مواله عالي

في المداين

والكفور

يسقى من بحر الحقيقة

يسبح الإنسان

فى نور

الكلام الكلام

يكسر القيد واللجام

الكلام الكلام

يدفع الناس للأمام

شوف يا صاحبى

قول كلامك

واستخى فى الزحام

* * *

والجنايه إن البلد

من السكات

بعضها راح لليهود

والبعض مات

واللى جابوا النكسه

لسه ع الكراسى

والكراسى

فوق ضهور المخلوقات

والقضيه فى النهايه

خدها منى ف "كلمتين"

البلد

مش عايزه قعده

وكل منهو بفتوتين

البلد

عايزه المجاهده

باللسان وبالإدين

كلنا ومن غير معاهده

للبلد

علينا دين

يكبسونا

يجبسونا

يضر بونا كرباجين

البلد

سامعه وشاهده

وكل خُرم

قصاده عين

القاهرة ١٩٦٩

* * *

عالى حاصل

عالى حاصل فى الخواصل

يا سلاملم

يا سلام

الكلام عايز إذاعه

والوطن عايز كلام

والإذاعه مُستباعه

للمياعه فى الغرام

والبلد آخر مجاعه

والجماعه فى انتخام

واللى يخشى إنه يمشى

جيم وريه ودال ولام

ينقح الكلمه الرصاصه

ع القصيده وع المقام

تدوى زى الرعد

تدوش

تهتك الليل واللتام

ينكشف جسم الحقيقة

تظهر النقطة الحرام

* * *

يا سلامم يا سلام

والوطن عايز كلام

والإذاعة مستباعدة

قول يا عم الشيخ إمام

* * *

ما حنا قلنا م البدايه

وانتوا عارفين الختام

حيث وإن الصاله بوظه

والحضور نيام نيام

والمجال فيه ألف قاضى

كل قاضى وله مرام

والشهود نسيوا الشهاده

والقضيه والكلام

والقفص لم الضحايا

والهلالى لما قام

قلعوه روب المحامي

لبسوه توب لانتهايم

والنيابه ع الغلابه

طبقت بند اللجام

* * *

يا سلاملم يا سلام

والوطن عايش آلام

والإذاعه مستباعه

قول يا عم الشيخ إمام

* * *

بينما والحاله نيله

والبلد بالعه الفتيله

والخواجه بألف حيله

جاي يلغوص فى البرام

يحكوا عن أسطى الفلافسه

إنه أفتى

ولا أفسى

فى القضيه الهيكلية

وإن دى

ما هوش منافسه

* * *

وأنت مالك يا أسطى فلّس

جای تحسس أو تملس

الخواجه لما فلّس

جابه دفاترينه القدام

دشدش الباترينه تبعه

شد شعره

عض صابعه

إنت إيه شأنك تتابعه

أما مخك مش تمام

شالوا هايكل

جابوا علوه

كلهم فى الهم بلوى

إنت شوف لك سهره حلوه

بكام قزازه وجوز حمام

واحنا شايفين الخواجه

واحنا كاشفين

كل حاجه

وأنت تنيل تنام

* * *

ع الهيافه في الكلام

شوف يا عم الشيخ

إمام

خلق فاضيه

وعامله قاضيه

وهي موضع لاتهم

* * *

بينما شهدانا لسه

دمهم أخضر.. ولسه

جرحهم في القلب لسه

بيواجعنا

لو ننام

وان صحينا

نلقى غابه

ضبعت فيها الديابه
والغلا كاوى الغلابه
والكآبه ع الزحام
يحكوا عن واحد صاحبنا
كان أمين دايره صاحبنا
والدواير
قرع داير
ع الجميع قَرَنَ صاحبنا
نَزَلَ العداد وهاتك
واعلا
وانزل بجنيهااتك
خد مراتى
وهات مراتك
كله ماشى يا عب سلام
واما ريحة القرع فاحت
ع اللى بانى
واللى فاحت
والإشاعه

جت وراحت

جابوا تفسير المنام

فضحوا فنانه في زمانها

بعد ما الزمان غبنها

رحنا مصر وجينا بنها

واحنا سارحين في الكلام

* * *

يا سلاملم يا سلام

والوطن عايش آلام

والإذاعه مستباعه

قول

يا عم الشيخ إمام

القاهره/ ١٩٧٥

* * *

رجعوا التلامذه

رجعوا التلامذه

يا عم حمزه

للجد الثاني

يا مصر إنتى

اللى باقيه وانتى

قطف الأمانى

لا كوره نفعت

ولا أونطه

ولا المناقشة وجدل بيزنطه

ولا الصحافه

والصحفجيه

شاغلين شبابنا

عن القضيه

قيمولنا صهبه

يا صهبجيه

ودوقونا طعم الأغانى

رجعوا التلامذه

للجد تانى

طلعوا التلامذه

ورد الجنانى

اسمع يا ميلص

وشوف وعاین

ملعون أبوك ابن كلب خاين

يا صوت أميركا

يا أمريكانى

* * *

البتاع

ياللى فتحت البتاع
فتحك على مقفول
لأن أصل البتاع
واصل على موصول
فأى شىء فى البتاع
الناس تشوف على طول
والناس تموت فى البتاع
فبيقى مين مسئول؟

* * *

وازاى حتفتح بتاع
فى وسط ناس بتقول
بأن هذا البتاع
جانب الخراب بالطول
لأن حنة بتاع
جاهل غبى مخبول
أمر بفتح البتاع
لأنه كان مسطول

* * *

وبعد فتح البتاع
جابوا الهوا المتقول
نكش عشوش البتاع
وهذ كل أصول
وفات فى غيط البتاع
قام سمم المحصول
وخلا لون البتاع
أصفر حزين مهزول

* * *

وساد قانون البتاع
ولا عله ولا معلول
فالقاضى تبع البتاع
فالحق على المقتول
والجهل ساد فى البتاع
ولا مقرى ولا منقول
والخوف سرح فى البتاع
خلا الديابه تصول

* * *

يبقى البتاع فى البتاع

والناس صاييها ذهول
وإن حد قال دا البتاع
يقولوله مش معقول
وناس تعيش بالبتاع
وناس تموت بالفول
وناس تنام على البتاع
وناس تنام كشكول

* * *

آدى اللى جابه البتاع
جابه الخراب مشمول
لأن حته بتاع
مخلب لراس الغول
باع البتاع بالمتاع
وعشان يعيش على طول
عين حرس بالبتاع
وبرضه مات مقتول

سجن الاستئناف ١٩٨١

* * *

الفاجومى

عن الفاجومى.. قالوا



10/10/2019 10:10:10 AM

10/10/2019 10:10:10 AM

10/10/2019 10:10:10 AM

رجل بحجم أو وزن الفاجومي.. كتبت عن أشعاره دراسات
ورسائل ماجستير ودكتوراه في عدد من الجامعات.. لا نستطيع هنا
أن نجمع كل ما قيل عنه من آراء.. ولكننا سوف نقدم فقط عينة
مختصرة مما قيل عنه من مختلف شرائح المجتمع.

* أحمد فؤاد نجم إنسان لوعته السنون، حنكته الأيام، تفرحت على
جسده علل الناس وأوجاعهم ومكايدهم وأطماعهم إلى جوار
بؤسهم وغلبهم وطيبة قلوبهم، وهو مواطن مصري تخرج في كلية
الحياة الدنيا، لا سلاح له سوى موهبته الشعرية الشعبية وثقافته
البصرية، وأشهد مخلصاً أنه شاعر مصري عظيم.

خيري شلبي
الكاتب والروائي

* الفارس الذي تمنيت أن أكونه

د. يوسف إدريس

* إكتشفت وأنا أتأمل مشاعري تجاه «نجم» الانسان، ونجم «الشاعر»،
ونجم «الفاجومي» العنيد العصي على الإفساد، أنني أمام ابن البلد
الحقيقي بالذي أتمنى أن أكونه، وأن جلده فعلاً عباءة الفلاحين
القادمين من حقول القمح، وبيان القادمين من الصناعات الخفيفة
ليقوموا بالواجب اليومي ضد الهزيمة.

صلاح عيسى
الكاتب الصحفي

* ناشدتك الله.. هذا شاعر

الشاعر الكبير/ محمود حسن إسماعيل

موجهًا كلامه لرجاء النقاش حين زاره مع نجم

* اختار أحمد فؤاد نجم خامته وهي اللغة العامية المصرية وتعامل معها -بكل لهجاتها- بحب وسخونه وبراعة الداري بكل دروبها وحواريها وحدائقها الغناء.. ولم يستفد فقط بخواصها ولكنه بلورها وأعاد إكتشافها كذلك، وكانت النتيجة هي الخصوبة الكثيفة دائمة الخضرة التي يتميز بها شعره والتي تنتقل على الفور طازجة إلى قارئه فيحس معها بالإشباع والتعرف علي الذات.

صافي ناز كاظم

ناقدة

* شاعرنا القومي

د. حسين فوزي

● أحمد فؤاد نجم شاعر جريء جرأة «مربية»

● كل شعراء العامية في مصر يفكروا بالصفحة ويكتبوا بالعامية عدا أحمد فؤاد نجم فإنه يفكر بالعامية ويكتب بالعامية.

د. لويس عوض

* أنا رضعت أشعار أحمد فؤاد نجم من خلال أغاني الشيخ إمام التي يقتنيها والداي منذ أن كان طالبًا بهندسة منوف في السبعينيات، وكلما استمعت لهذه الأشعار أشعر أنها مكتوبة اليوم.

منير محمد الرباط

طالب بالمرحلة الثانوية

* الشاعر البندقية

د. على الراعي

* أنا عرفت الشاعر أحمد فؤاد نجم من حكايات جدو عنه، وأنا بحب أشوفه في الفضائيات عشان هو جريء ودمه خفيف.

آيه محمد أحمد عبد الحميد

تلميزة بالصف الثالث الإعدادي

* فيه قوه تسقط الأسوار بالغناء

الشاعر الفرنسي

لويس أراجون

* إن الشاعر أحمد فؤاد نجم يستعمل الصور الشعبية في شعره وأخطر من هذا أنه يستخدم الصياغة الشعبية في نظم أغانيه فلا يصنع في جسد الشعر الشعبي أجنحة من التهويم لا يستطيع أن يطير بها، إن قصائده البسيطة تستمد روعتها من بساطتها ولكنها تمشي بقدميها على الأرض.. أرضنا نحن.

الفنان: عبد الرحمن الخميسي

* شعرت ببعض القلق عندما هاجمتني بعض الأقلام الحكومية عقب بلاغي الشهير بخصوص التلاعب في تقييم شركة عمر أفندي.. إذ أن ضجيج هذه الأقلام المأجورة والمنابر الصحفية المتاحة لهم يوحى بأن وراءهم رأياً عاماً ضد ما فعلت.. ولكن عندما قرأت مقال أحمد فؤاد نجم في الدستور بعنوان «المصري أفندي» بكيت فرحاً وهتفت مطمئناً «ما دام أحمد فؤاد نجم معي، إذن فمصر كلها معي».. نعم، فهذا الشاعر الشاب ذو الثمانين ربيعاً هو وجه مصر

الجميل.. وهو صوتنا وسوطننا في وجه القبح.. والحق في وجه الباطل.

مهندس / يحيى حسين عبد الهادي

منسق «حركة لا لبيع مصر»

* .. كنت أتمنى أن يأخذ كل منا موقع الآخر.

الملياردير المصري: نجيب ساويرس

في حديث تلفزيوني مع الفاجومي

* .. رجل يحمل - بالترسيب - مخزون هائل من الثقافة الشعبية
لأمه عريقه، وعاش طوال حياته:

«على كفوف القدم دوار

يقوم وقت البدار بدار

وعند القسمه

مش محسوبه»

سيد عنه

جامع تراث الكيان الفني

«نجم / إمام»

* كان عمنا، أحمد فؤاد نجم، جزءاً من تاريخ جيلنا، وعلامه فارقه
في مسار تطورنا العام والشخص أيضاً، وركيزه أساسيه من ركائز
وعينا في مسيرتنا الوطنيه «العسيره» وصفحه مجيده من سيرة نضال
جيلنا الملحميه في سبيل الحق والعدل والحريه والإكتمال الإنساني
حتى ليحق القول دون تردد: ولو لم يكن نجم موجوداً في ضمير
جيلنا، لتوجب علينا ايجاده، ولست بقادر على تصور ملامح هذا

الجيل النبيل، ولا دوره العظيم في السعي لانتشال الوطن من أنقاض
الهزيمة، دون إستدعاء الدور الممتاز لعلمين كبيرين رفعا رايته
الخفاقة: أحمد فؤاد نجم والشيخ الجليل إمام عيسى.

مهندس. أحمد بهاء الدين شعبان

من قادة الحركة الطلابيه في السبعينيات

ومن مؤسسي حركة كفايه

* .. وهكذا نجد في هذا الديوان موهبه أصيله تنسم عبير الانطلاق
نحو الآفاق لتحلق فيها. موهبة متفاعلة بما حولها متعمقة ما في
نفسها محاولة بهذا وذاك أن تخرج لنا صورا من الحياة بأفراحها
وأتراحها وأزماتها وتطلعاتها.

د. سهير القلماوي

(من مقدمة أول ديوان شعر للفاجومي)

فهرس الكتاب



الفهرس

الصفحة	الموضوع
٥	• الإهداء.....
٧	• الحب الإيجابي.....
٩	• أمى .. عليها السلام.....
٢٣	• أنا أحقق من حماقه.....
٤٩	• أبوكو على الشمروخ .. بلبوص ..
٦٣	• الغريب .. ابن فاطمه.....
٧٥	• عبد الجليل لاقرع.....
٩١	• السفر إلى الزقازيق.....
١٢٣	• أصبحت الرفيق النجم.....
١٣٥	• مصر تانى.....
١٥١	• ناس فى أرميدان.....
١٦١	• حكاية السفاح.....
١٧١	• خرجت من السجن شاعراً.....
١٩٣	• الفاجمي فى القاهرة.....
٢٠٥	• ضبطت نفسى أسرق قصيده.....
٢٢٣	• وهلت المصائب.. بقصيدة كلب أم كلثوم.....
٢٣٥	• الليثى عبد الناصر، ألويا أنور السادات.....
٢٤٩	• تحقيق معى برئاسة السفرجى الملكى.....
٢٦٩	• عشت وسط العدويه والواحيه والتمارسه.....
٢٧١	• يوم قررنا مقاطعة الإذاعه.....
٢٨٥	• لماذا أحترم الحكومه.....
٢٩٩	• الكوره فتحت لى باب التليفزيون.....

الصفحة	الموضوع
٣٠٧	• أنا وجراد يوليوي
٣٢١	• وفي يونيو ٦٧ خاب أمل الحشاشين
٣٣١	• يوم أذاعوا خبر سينا بصوت نجاة
٣٤٣	• الأفندي الذي أخبرنا بتتحي عبد الناصر قبل عبد الناصر ..
٣٥٣	• صاحب زوريا كشف الحرامى أمل مصر
٣٦٥	• التحريض برق وعود وقبل القول طبق فته
٣٧٥	• مبعوث حكومى بدرجة ناقد أدبى
٣٨٥	• أنا وإمام والأستاذ هيكل فى مجلس الأمن القومى
٣٩٥	• وكلما جاءوا للفرجة علينا تفرجت أنا عليهم
٤٠٥	• ٥٠ جنيه عربون صداقة مع الحكومة
٤١٣	• شاعر السلطة الذى حبيته وتابعه الذى كبيته
٤٢١	• وعلى أرض الصحفيين سجلنا هدفاً فى مرمى الحكومة
٤٢٩	• دوخينى يا لونه
٤٤١	• الطريق إلى كمشيش
٤٥١	• إيه اللى عاجبك فى البلد دى
٤٦٣	• البقية فى حياتك.. فى عقلك
	أجراً عشر قصائد سياسية
٤٧١	١- العنبره
٤٧٩	٢- غزه فى قلب العرب
٤٨٣	٣- اصحي يا مصر
٤٨٦	٤- شيد قصورك
٤٨٨	٥- بيان هام

الصفحة	الموضوع
٥٠٢	٦- بوتيكاات
٥٠٥	٧- القضية
٥١٢	٨- ع اللي حاصل
٥١٩	٩- رجعوا القلامنه
٥٢١	١٠- البتاع
٥٢٥	• عن الفاجومي.. قالوا